


L. Mouilleron
art. peintre verrier
etor. de maréchal de Metz
1891

ROBERT W. WOODRUFF
 LIBRARY

Manuscript, Archives, and Rare Book Library



Paul Bernard Seydel
 Memorial



S.

CRV

LAL

NOV

R.P.P.

Secret

S A C R V M
SANCTVARIVM
CRVCIS
E T

P A T I E N T I A E
CRVCIFIXORVM ET CRVCIFERORVM,
EMBLEMATICIS IMAGINIBVS
LABORANTIVM ET ÆGROTANTIVM
ORNATVM:

ARTIFICES GLORIOSI
NOVÆ ARTIS BENE VIVENDI ET MORIENDI:
A V C T O R E

R.P.PETRO BIVERO Matritensi Soc.Iesv Theologo,
Serenissimorum Belgij Principum Concionatore.


2
304 DEL
BR1600
B58
1634

SACRVM
SANTVARIVM
ERVVIS
ET
PATIENTIAE
ERVVISORVM ET ERVVISORVM
EMBLEMATICIS IMAGINIBVS
LABORANTIVM ET AGROTANTIVM
ORNAVTVM:
ARTIFICIS GLORIOSI
NOVAE ARTIS BENE VIVENDI ET MORIENDI
AVCTORE


R.P. Petro Biverno Maritimo Sec. Iesv Theologo
Serenissimorum Belgij Principum Condonatore



ANTVERPLÆ, EX OFFICINA PLANTINIANA BALTHASARIS MORETI. M.DC. XXXIV.
CVM PRIVILEGIIS CAESAREO ET REGIO.



SERENISSIMO
PRINCIPI
FERDINANDO
S. R. E. CARDINALI
HISPANIARVM
INFANTI.

 N SACRO ORATORIO
Immaculatæ MARIÆ, &
animæ creatæ, & innouatæ
arte & artificio Baptismatis,
Pœnitentiæ, & Eucharistiæ,
Serenissimis Belgarum & Burgundionum
Principibus, auunculis & prædecessoribus
vestris, FERDINANDE PRINCEPS, pro
mei famulatus debito, & humilitatis meæ
officio, solemniter parentaui. Sub æterna
& gloriosa Archiducum tantorum memo-

2
ria SACRVM ORATORIVM patuit: & in
eo variæ effigies & imagines apparuerunt,
sacra Emblemata nouæ Artis benè viuen-
di & moriendi; cuius ope & operâ defor-
mata anima reformabatur & recudeba-
tur. Verùm enimuerò cùm omnis inge-
nua ars nobiles & illustres artifices amet
& habeat; ars inclyta benè viuendi & mo-
riendi gloriosos professores planè est asse-
cuta. Hanc artem aggredienti occurrit Sa-
piens, & suggerit: *Fili accedens ad seruitu-*
tem Dei, sta in iustitia & timore, & prapa-
ra animam tuam ad tentationem. occurrit,
& præuenit omnes Paulus: *Omnes qui piè*
vinere volunt in CHRISTO IESV, per-
secutionem patientur. Ergo cultores omnes
summæ artis benè viuendi & moriendi,
in regula Crucis, & in circino Laboris at-
que Constantiæ absoluent & perficient
opus suum, similes glorioso Regi, qui in-
strumento Crucis vsus, primus ac prima-
rius Artifex secundùm rationem circini
viuens

Eccli. 2,
1.

2. Tim. 3,
12.

viuens & moriens, myſterium redemptionis peregit; & cùm opus ſuum concluderet, aſſeruit: *Conſummatum eſt.*

Ioan. 19,
30.

Conſummatus in ligno, & per lignum, ſummus Artifex Crucifixus, Crucifixos ſibi ſimiles in formâ vitæ ac mortis ſuæ ſecum pariter euexit, & in cælum inuexit: quos profert & offert SACRVM SANCTVARIVM *Crucis & Patientia Crucifixorum & Cruciferorum, Emblematicis imaginibus laborantium & agrotantium ornatum.* Glorioſi Artifices omnes, & omnes coronati & laureati, porrectis in cælum manibus optatum veſtrum aduentum, SERENISSIME FERDINANDE, precantes, pro læto introitu omnia felicia & fauſta optant ac pollicentur. Conuolant omnes Crucifixi expansis brachiis in regales veſtros amplexus, & auium inſtar expandentium alas ſuas in aëre ſublimes pendent, ſe oſtendant & præſentant; vt, bonis auibus, in Belgium, à Belgis obſequio veſtro ſacra-

tis

tis expectatus & expetitus, feliciter ingre-
diaris. Omnes & singuli Crucifixi, quo-
rum icones in hoc SACRO SANCTVA-
RIO ostenduntur, non tam vocibus quàm
Crucibus attestantur, & monent: *In hoc
signo vinces.*

Vinces, FERDINANDE, vinces tanto
monitus oraculo, quod olim Constanti-
no Magno gloriosissimas victorias præ-
nuntiauit, & quas ipse virtute sanctæ Cru-
cis comparauit. Nec quidem sine labore
victoria: quæ causa fuit, vt Constantinus
Imperiale Crucis vexillum, acceptum di-
uino oraculo, *Labarum* esse & vocari in
castris decreuerit; sanxeritque, vt hoc ip-
sum à militantibus omnibus instar SACRI
SANCTVARIÏ haberetur & coleretur.
Hoc ipsum in castris Regiis & *Labarum*
sit & SANCTVARIVM CRVCIS, ET
PATIENTIÆ; quæ virtus, sicut & Crux,
aulica est, & militaris.

Vixit in aula, & obiit secundùm lauda-
bilem

bilem artem vitæ & mortis, dum Catholici Reges auus & pater V. CELSITVDINIS dominarentur, MARCHIONISSA DE CAMARASSA, Comitum Ducis amita, insignis Heroïna; quam *magnam Heroem* Hispanus Salomon, vester auus, appellabat. Hæc inclyta matrona, cum essent in Regia Curia plurima pia & magnifica factis templa, optabat ut nouum conderetur SANCTVARIVM quod DIVINÆ PATIENTIÆ consecraretur. Laudabile votum; & pro voto SACRVM VIRTVTI PATIENTIÆ hoc SANCTVARIVM esto, quod sub Regio nomine, protectione ac patrocinio REGIÆ V. CELSITVDINIS, conditur & editur.

Nec solum aulica, sed etiam militaris Patientia est; cuius nuda species, vacua & inanis umbra, de hostibus triumphare nouit. & quidem Romæ triumphauit, quemadmodum lib. I. Machab. cap. 8. commemoratur: *Et audiuit Iudas nomen Romano-*

* *

rum,

rum, quia sunt potentes viribus, & acquie-
scunt ad omnia quae postulantur ab eis: &
quicumque accesserunt ad eos, statuerunt cum
eis amicitias, & quia sunt potentes viribus.
Et audierunt praelia eorum, & virtutes bo-
nas, quas fecerunt in Galatia, quia obtinue-
runt eos, & duxerunt sub tributum: & quan-
ta fecerunt in regione Hispania, & quod in po-
testatem redegerunt metalla argenti & auri,
quae illic sunt, & possederunt omnem locum
consilio suo & patientia. Quod si figurata &
adumbrata Patientia bellica magnanimos
Romanos fecit, & constituit in Hispania
triumphatores; faxit Deus, ut vera Patien-
tia Christiana, quae hactenus pro Hispa-
nia, focus & aris Belgicis, contra hostes pæ-
nè innumeros militavit, sub Regio nomi-
ne vestro, CATHOLICÆ FERDINAN-
DE, bella, Deo adiutore, conficiat, victrix
& triumphatrix perficiat. Patientia autem
opus perfectum habet. Habuit olim perfe-
ctum opus in castris & praeliis contra Mau-
ros

Iac. I, 4.

ros patientia sancti FERDINANDI vestri
progenitoris gloriosi, cui solemne symbo-
lum fuit, *Dominus mihi adiutor*: eodem quo-
que adiutore nuper in castris & armis ad
Nortlingam in Germania victricibus, mo-
re maiorum, qui *possederunt omnem locum*
consilio suo & patientia, habuisti & possedi-
sti: ac deuictis copiis hostilibus, victor &
triumphator in Belgium tuum ingrederis.
Quòd si, moribus antiquis, nouæ portæ
victoribus aperiebantur, patefactæ sunt
V.CEL SITVDINI in Germania, & etiam
in Belgio: vbi cælesti tractus præfagio, &
diuino afflatu tactus magnanimus Heros
Marchio Aytonæ, qui rem hæcenus resti-
tuit, feliciter per clausum omnino Mosam
gloriosos aditus patefecit, dum insulam
sancti Stephani, Castrum Luthense, & Ar-
gentauum ad Nauaiam oppugnauit & ex-
pugnauit. Magna pro meritis oppugnato-
ris & expugnatoris gloria, glorioso trium-
phatori fores obseratas reuerasse.

Per nouas igitur portas solemnem agens
triumphum ingredi FERDINANDE
PRINCEPS, æmulus GLORIOSI RE-
GIS CRVCIFIXORVM & CRVCIFE-
RORVM, qui *exiuit Vincens ut Vinceret.*
victor ex Germania egredere, & tuum
ingredere Belgium, nouarum theatrum
Ps.44,5. maximum victoriarum: *intende, prosperè
procede, & regna.*





*Angeles Dei
Custodi, Illumina, et Rege.*

L V M E N S A C R I S A N C T V A R I I.

S*Acra vox SANCTVARII, quæ satis frequens in Oraculis diuinis, in vsu etiam est Scriptoribus Latinis, atque in primis Plinio lib. 23. Hist. cap. 8. In Sanctuariis, inquit, Mithridatis maximi Regis deuicti Cn. Pompeius inuenit in peculiari commentario ipsius manu compositionem antidoti. Quod nunc datur CRVCIS ET PATIENTIAE SANCTVARIVM, non deuicti, sed victoris est Regis.*

Tripartitum hoc SANCTVARIVM est, cuius prima

pars Regem gloriosum Crucifixum , & Crucifixos Principes , Apostolos , Episcopos , & Abbates in effigie repræsentat. Pars secunda alios inferioris gradus affixos Cruci demonstrat. Pars tertia Crucifixas ostendit feminas , quas omnes Regina gloriosa præit.

Quales Crucifixi , tales & Cruciferi laborantes & ægrotantes : quorum lectus doloris omnimodam sympathiam cum Dominica Cruce habet ; quam seruant cum ipso Domino Crucifixo martyres Cruci affixi.

CruX tam Crucifixorum , quàm Cruciferorum , instrumentum est artis benè viuendi & moriendi , quæ in sacro descripta fuit ORATORIO. Hoc instrumentum innatam sibi virtutem deriuatam à Patientia habet , eleuatam verò à sacrosancta Eucharistia. Hoc instrumento artifices caelestes utuntur , vt sibi coronam parent ; & parant dum laborant & ægrotant. Honor quippe alit artem benè viuendi & moriendi : & hic honor singulis laborantibus & ægrotantibus proponitur in SANCTVARIO. & ad singulas imagines extrema morientium Sanctorum verba citantur , vt illa tamquam oracula in lecto doloris colant , ac meditentur : præsertim septem vltima CHRISTI verba , quæ laureata & coronata Patientia ad regulam certam reducet

Iacob. I. 4: in fine & Appendice SANCTVARII ; in quo Patientia opus perfectum habet.

Hoc munus Angelo Custodi incumbit , vt non solum ad ORATORIVM Baptismi , Pœnitentiæ & Eucharistiæ animas


mas fideles ducat, sed etiam deducat ad SANCTVARIVM. Angelus enim ille, sub cuius custodia & cura populus Hebraeorum erat, & à quo ductus est per Rubrum mare, & desertum, sua præsentia & lumine illustrabat SANCTVARIVM, quod filij Israël intrabant, & in eodem summum Deum adorabant. Eapropter idem ipse custos Angelus, qui fuit in ORATORIO ductor, dux quoque nunc est in SANCTVARIO; cuius tres partes tripartito suo lumine ostendit, & declarat ingredienti, occurritque iam dicenti: Angele Dei, qui custos es mei, me tibi commissum pietate superna, custodi, illumina, rege & gubernas. Amen.

Angelus Custos phosphorus est SANCTVARII, in cuius sacro limine præmittenda est nostra confessio, eadem omnino cum illa quam Tertullianus in exordio sui libri de Patientia in verba sequentia præmisit:

Confiteor ad Dominum Deum, satis temerè me, si non etiam impudenter, de patientia componere ausum, cui præstandæ idoneus omnino non sim, ut homo nullius boni; quando oporteat, demonstrationem & commendationem alicuius rei adortos, ipsos prius in administratione eius deprehendi, & constantiam commonendi propriæ conuersationis auctoritate dirigere, ne dicta factis deficientibus erubescant. Atque utinam erubescere istud remedium ferat, uti pudor non exhibendi, quod alii
fug-

fuggeſtum imus, exhibendi fiat magiſterium: niſi quòd bonorum quorundam, ſicuti & malorum, intolerabilis magnitudo eſt, vt ad capienda & præſtanda ea, ſola gratia diuinæ inſpirationis operetur. Nam quod maximè bonum, id maximè penes Deum; nec alius id, quàm qui poſſidet, diſpenſat, vt cuique dignatur. Itaque velut ſolacium erit diſputare ſuper eo quod frui non datur, vice languentium, qui cùm vacent à ſanitate, de bonis eius tacere non norunt. Ita miſerrimus ego, ſemper æger caloribus impatientiæ, quam non obtineo patientiæ ſanitatem, & ſuſpirem, & inuocem, & perorem neceſſe eſt, cùm recordor, & in meæ imbecillitatis contemplatione digero, bonam fidei valetudinem, & Dominicæ diſciplinæ ſanitatem, non facilè cuiquam, niſi patientia aſſideat, prouenire.

Post hæc pinxit Tertullianus Patientiam, quam nos typis excudimus, & exprimimus per varias Crucifixorum imagines in gratiam laborantium & agrotantium: & quidem ſectantes exemplum ſimul & documentum S. CAROLI BORROMAEI, qui ſacris proſiſtis imaginibus laborantes eſſe iuuandos cenſuit: & ipſe agros his iuuabat; monēbatque Sacerdotes, vt oſtenſis ſanctis iconibus languentes & morientes excitarent. Hæc SACRI SANCTVARIi praxis, hic piarum eius imaginum vſus, & cultus eſto.



*Lectus doloris et mortis iustorum,
secundum mensuram Crucis.*

SYMPATHIA CRVCIS ET LECTVLI PASSIONIS ET ÆGRITVDINIS.

Cum sacra Crucifixorum imagines, quæ in SACRO hoc SANCTVARIO proferuntur, Emblematicæ omnes sint, indices status laborantium & egrotantium, qui lecto doloris affixi variis morbis diuexantur & affligantur, præmonendi sunt infirmi, quanta sit inter Crucem & lectulum materiæ, formæ, & finis paritas & similitudo.

Ex

Eadem
materia
Crucis &
lecti.

Ex eadem ligni materia Crux & lectus fabrefiunt. Contempferant hanc materiam, in quos grauiter inuehitur Amos cap.6. Væ qui opulenti estis in Sion, &c. Qui separati estis in diem malum: & appropinquatis folio iniquitatis. Qui dormitis in lectis eburneis, & lasciuitis in stratis vestris. Præstat in lecto ligneo iacere: ut, quoties in eo iaces, memineris primi lapsus, quem in primo ligno fecisti; & simul Crucis Dominicæ, per quam in ligno redemptionem inuenisti.

Eadem
forma.

Crux & lectulus in eadem forma conueniunt. Crux ita construitur & componitur, ut, quisquis inhaeret Cruci, caput erigat, corpus deprimat, extendat manus & brachia, pedes colligat. Quotusquisque in lecto cubat, ad hanc formam se componit; eleuat in altum caput, dimittit corpus, explicat manus & brachia, pedes coniungit & copulat. Cum S. Patriarcha Jacob in lecto suo moreretur, scriptum de eo legimus Genes. 49. Collegit pedes suos super lectulum, & obiit: appositusque est ad populum suum. Hic idem ipse est, qui Genes. 47. vicinus iam morti, mortis & vitæ Dominum veneratus in lecto est: Adorauit Israël Deum, conuersus ad lectuli caput. Qualis hæc adoratio fuerit, scribit & describit Apostolus cap. 11. ad Hebræos. Fide Iacob, moriens, singulos filiorum Ioseph benedixit, & adorauit fastigium virgæ eius. Adorauit Crucifixum lecto affixus, ad formam eius compositus dum extremè laboraret; & instar cælestis auis quæ pedes contrahit,

hit, vt se sustollat in altum, collegit pedes suos super lectulum, & obiit, appositusq; est ad populum suum.

Crux & lectus in eundem finem, in eundem scopum ^{Idem finis.} collimant. Hic lectuli finis est, vt cubantem in se hominem, somno ac quiete fruientem, admittat & excipiat. Hic idem scopus sacratissimæ Crucis est. Rogat Ecclesia CHRISTVM: Indica mihi, quem diligit anima mea, vbi pascas, ^{Cant. 1, 6.} vbi cubes in meridie. Tunc temporis CHRISTVS cubitum in Crucem iuit; & in Crucis lecto dormiuit. Ego, ^{Psal. 3, 6.} inquit, dormiui, & soporatus sum. Somnum cepit & quietem, cum dixerit adhuc ipse: In pace in idipsum ^{Psal. 4, 9.} dormiam & requiescam.

Quod si Crux & re & nomine cruciatum & tormen- ^{Eadem poena.} tum secum præfert; ne hoc ipsum desit lecto, positus in eo ager affligitur & torquetur. Huc pertinet quod asserit agrotus Jobus: Si dixero: Consolabitur me lectulus ^{Iob 7, 13.} meus, & releuabor loquens mecum in strato meo; terrebis me per somnia, & per visiones horrore concuties. Adde commentarium Ambrosij cap. 2. de Interpellatione Job. Quid ærumnosius, cum ipse lectus communem ad quietem datus, graue vulnus infligat? Tunc enim solemus, quod fecimus, recordari, & factorum stimulis compungitur interior conscientia. vnde & Scriptura ait: Quæ dicitis in cordibus ve- ^{Psal. 4, 5.} stris, in cubilibus vestris compungimini. Remedium quidem dedit, sed tamen conscientiam vulnerauit.

Consti-

Constitutus in lectulo suo Dauid vulneratum se sentiebat & gemebat : Laboravi, inquit, in gemitu meo, lauabo per singulas noctes lectum meum : lacrymis meis stratum meum rigabo. Considerandum hunc lectum laboranti & agrotanti proponit Chrysostomus Orat. 1. de Lazaro : En ostendo tibi lectum beati Dauid. Qualis igitur erat ille ? Non argento & auro , sed vndique lacrymis & confusione exornatus. Hæc ipse fatetur de se loquens : Lauabo per singulas noctes lectum meum.

En ostendo tibi, noue Dauid, lectum doloris, & simul honoris, secundum mensuram Crucis ; vt cognoscas quanta sit paritas & aequalitas inter Crucem passionis & lectulum egritudinum, quæ spinarum instar pungunt. dicitque propterea Rex : Conuersus sum in æruiua mea, dum
Psal. 31. 4. Idem præmium.
configitur spina. Ex acutissimis spinis fabrefacta est CHRISTI corona, & ex acutissimis morbis fabricatur gloriosum diadema infirmorum. Qui certat in agone, non coronatur, nisi legitimè certauerit. Certa in Cruce, certa in lecto, cum Crucifixo & Crucifixis ; quorum Emblematicæ imagines conditionis status tui & simul officij monebunt, & ostendent eam esse virtutem mirandam patientiæ, quam agens de eruditione Principum describit S. Thomas : Patientia, inquit, malis omnibus dominatur, omnia seruiunt ei, etiam mors ipsa.

EMBLEMATVM SACRORVM
 SANCTVARIII
 INSTRUCTIO PARTICVLARIS
 PRO HEBDOMADA TERTIA ET QVARTA
 SPIRITALIVM EXERCITIORVM.



OST QVAM S. Patriarcha Ignatius pri-
 mam & secundam septimanam sanctorum
 Exercitiorum considerationi creationis, Vita
 & miraculorum Christi accommodavit, ter-
 tiam hebdomadam mysterijs Crucis & pa-
 tientia Redemptoris applicavit. Huc etiam pertinent sacra
 Emblemata tripartiti Sanctuarij, cuius prima Pars est de
 Christo Crucifixo, & Superioribus Crucifixis; in quorum
 martyrio, praeter ceteris Crucifixis, stigmata passionis Domini-
 ca maximè splendent. Accedit glorioso Regi Crucifixo, &
 ceteris eius sociis, caeleste praemium ad singulas eorum Cruces
 expositum, quod palmis atque lauris exornatur. Hoc pacto
 Sanctuarium Cruci passionis & lauro resurrectionis Chri-
 sti respondet, & consequenter tertiae & quartae hebdoma-
 dae spiritualium Exercitiorum correspondet. Habebunt ita-
 que Antistites in prima Parte Sanctuarij Praesules, & Prae-
 latorum Crucifixos; quorum magisterio edocti, utramque se-
 ptimanam transigant, & perficiant.

Secunda Pars de subditis Crucifixis est; qui adherentes
 Regi suo, dicunt singuli quod S. Ignatius dixit in Exercitio
 regni Dei: Audiam, inquit, Regem loquentem ad om-

nes

nes subditos. Quicumque me comitari velit, paratus sit oportet non alio vti victu, vestitu, rebusque aliis, quam me vtemem conspexerit. In iisdem quoque laboribus, vigiliis & casibus ceteris mecum persistendum erit, ut particeps fiat victoriae & felicitatis unusquisque, prout laborum & molestiarum socius exstiterit. *Subditi sunt quibuscum loquitur Christus, & de quibus Pars secunda Sanctuarii sermonem facit, quatenus ad vocem gloriosi Regis se parant ad crucem & passionem tolerandam; ut sibi regnum Dei promerentes, cum Christo in gloriam resurgant. Hic scopus tertiae & quartae septimanae est, & hic ipse est secundae Partis Sanctuarii. Verum enimvero cum Christus caeleste regnum paruulorum esse dixerit, in Exercitio diuini amoris ad illos etiam gloriosi Regis sermo tamquam ad subditos dirigitur; & ipsi etiam vocationem eius & crucem pariter sequuntur, ut in fine huius secundae Partis ostenditur. Habebunt itaque subditi viri viros, pueri pueros, qui in passione & resurrectione Christi eos instruant, & informant.*

Tertia Pars virginibus, viduis, & coniugatis feminis Crucifixis conuenit; ut feminas pias, & sui profectus spiritualis studiosas, in sacris Exercitijs instituunt. Non solum viri, sed etiam feminae ad vsum spiritualium Exercitiorum admitti debent; & admittuntur cum magno suarum animarum commodo, ut ipsa experientia testatur. Absit, ut illae arceantur ab Exercitijs spiritualibus, cum feminae fuerint prius in Oratorio, & nunc in Sanctuario, quarum magisterio viri etiam mystici ducuntur, & se laudabiliter exercent. Habebunt itaque mulieres propriae suae conditionis magistras virgines, viduas, & coniugatas; sed potissimum gloriosam

riosam Reginam Mariam, ut instruatur, & moneatur
sui officij, & eius obseruatione beneficium promissæ resur-
rectionis acquirant. Hic finis tertiæ & quartæ hebdoma-
dæ est; & idem omnino est Partis tertiæ, in qua per spe-
cula passionis & patientiæ feminae vocantur & inuitantur,
ut seipsas ad exemplum gloriosæ Reginae Mariæ componant,
& ornent.

Accedit tertiæ Sanctuarij Partis Appendix de septem
extremis verbis Christi morientis, quæ S. Ignatius in fine
tertiæ hebdomadæ spiritualium Exercitiorum non minùs at-
tentis quàm deuotis auribus excipit: Effatus est, inquit,
Dominus in Cruce verba septem: orans videlicet pro
crucifixoribus: latroni parcens: Matrem & Ioannem
sibi mutuò commendans: exclamans, SITIO, quan-
do aceto eum potauerunt: & deinde se à Patre dicens
derelictum: postea, CONSUMMATVM EST: ac po-
stremo, PATER IN MANVS TVAS COMMENDO SPI-
RITVM MEVM. Hic finis loquendi Christi, & hic exitus
tertiæ hebdomadæ passionis, in qua patiens se exercet, &
virtus patientiæ exercetur. Hæc ipsa extremos Christi ser-
mones audit, & excipit coronata, ut vacantes exercitationi-
bus sacris moneat repositam esse coronam iis, qui Christo lo-
quenti obedierint vsque ad vltimam vitæ metam; & vnus-
quisque eorum factis ipsis declarauerit, quod promisit in
Exercitijs S. Patriarcha Ignatius, & perfectissimè impleuit.
Quid promiserit ipse, declarat in Exercitio illo diuini amo-
ris: cùm enim attentam & piam aurem applicuisset glorioso
Regi loquenti cum suis subditis, ut ad sui Regis exemplum
per crucem & passionem componerentur ad gloriam resur-
rectionis, offert se ex animo IESV socium, & dicit: En, ô

Rex supreme, & Domine vniuerforum, ego, licet indignissimus, fretus tamen gratia & ope tua, me tibi penitus offero coram infinita bonitate tua, nec non in conspectu gloriosæ Virginis matris tuæ, vt quàm possim proximè te sequar, & imiter in ferendis iniuriis & aduersis omnibus.

Affonat in omnibus Sanctuarium tertie & quartæ hebdomadæ spiritualium Exercitiorum: in quibus, pro compositione locorum, proderunt imagines Crucifixi Regis, & aliorum; pro punctis meditationum & considerationum, expositiones quæ ex sanctis Patribus & eorum libris adducuntur; pro diuersitate colloquiorum, variæ diuersæque orationes, quæ in hoc Opere formantur, & enuntiantur.

Quod si primæ & secundæ hebdomadæ Exercitia exigunt, vt qui in illis se occupat, benè habeat & valeat; tertia & quarta septimana, in quibus Christus languet, & post languorem resurgit, non dedecent eos qui affixi lecto decumbunt morbis & doloribus afflictati, & sperant, non tam virtute Medicorum, quàm ope diuinâ fore se tandem surrecturos. Unde fit, vt Sanctuarium Crucis & patientiæ in gratiam laborantium & agrotantium, sit etiam spiritualiter se exercentium, cùm morbis corporalibus diuexantur. Hæc itaque Exercitia sanis & agris, benè & malè habentibus hominibus vtilia sunt. Cùm enim Ambrosius 1. ad Timoth. 1. affirmauerit, Non sine merito est, qui cogitat de bonis viris, qui languens de Christo languente cogitauerit, & qui liber à morbo & è lecto surgens de Christo resurgente fuerit meditatus; indubiè non erit sine magno merito, cui par apud magnum Deum respondeat spiritale & corporale premium.

SACRI

I

SACRI
SANCTVARII
CRVCIS

ET
PATIENTIAE

PARS PRIMA

DE

SVPERIORIBVS CRVCIFIXIS
ET CRVCIFERIS.

Figura CRVCIS vbique inuenitur, apud PRIN-
CIPES, apud subditos, apud mulieres.

Chrysostomus, Quòd Christus sit Deus.

A

SACRI

1818

1819

1820

1821

1822

1823

1824

1825

1826

I M A G I N E S
 E M B L E M A T I C Æ
 P A R T I S P R I M Æ
 S A C R I S A N C T V A R I I.

Regis gloriosi Crucifixorum & Cruciferorum.

S. Petri Apostoli.

S. Andreae Apostoli.

S. Philippi Apostoli.

S. Bartholomæi Apostoli.

S. Simeonis Episcopi.

S. Sixti Papæ.

S. Macarij Patriarchæ.

S. Nestoris Episcopi.

S. Astij Episcopi.

S. Petri Episcopi Damasceni.

S. Clementis Episcopi.

S. Liberati Abbatis.

S. Paphnutij Abbatis.

Sanctus Laurentius Iustinianus
cap.8. de Obedientia.

Proferatur nunc in publicum Dei & hominum Mediatoris exemplum : in quo siquidem, tamquam in praeclarissimo speculo, Obedientia fulget imago, veraq; subiectionis forma conspicitur.



Quae fuerat seges opprobrii, post funera, CHRISTE,
 1. Crux tibi, crux alijs, crux sibi facta decus.

SACRI SANCTVARII
 CRVCIS ET PATIENTIÆ
 EMBLEMATICA IMAGO I.
 GLORIOSI REGIS CRVCIFIXI
 EXPLICATA.



PRIMA & primaria effigies Sanctua-
 rij Crucis & Patientiæ crucifixum
 CHRISTVM exhibet, qui, immi-
 nente iam passione, dum oraret, de-
 clarauit velle se propter obsequium
 & obedientiam immolari. Quid
 aliud nisi obedientiam eius oratio sonabat? *Pater,*
inquit, si vis, transfer calicem istum à me: Verumtamen
non mea voluntas, sed tua fiat. Cessit ex voto mors; de-
 cessit ex obedientiâ. *Humiliauit semetipsum factus obe-*
diens usque ad mortem, mortem autem Crucis. Glorio-
 sus diuinæ obedientiæ Artifex, in cuius elogium
 & vaticinium dixit & prædixit Isaias: *Radix Jesse,*
qui stat in signum populorum. Victor in Cruce stat de
 prima inobedientia triumphans.

*Hoc opus nostræ salutis ordo depoposcerat,
 Ut medelam ferret inde, hostis vnde læserat.*

Cruce

*Rex &
 Artifex
 gloriosus
 diuina obe-
 dientia.
 Matth. 27,
 33.
 Marc. 15,
 21.
 Luc. 23, 26.
 Ioan. 19,
 17.
 Luc. 22, 42.*

Philip. 2, 8.

Isai. 11, 10.

CRUX CHRISTI, Crux obedientiæ.

*Crux obe-
dientia in-
strumen-
tum artis
benè vi-
uendi.
Luc. 9, 23.*

PRæit gloriosus Rex, qui & dicit de se: *Si quis vult post me venire, abneget semetipsum, & tollat Crucem suam quotidie, & sequatur me.*

Myſterium magnum hoc eſt, quòd cùm glorioſus Rex ſuam Crucem baiularet, Simon Cyrenæus adiutor fidus acceſſerit. Nomen *Simonis* ſignificat *obedientem*; & obediens aſſociatus adunatuſque cum Christo vnâ & eandem Crucem geſtat. *Et quidem cùm eſſet Filius Dei, didicit ex iis quæ paſſus eſt, obedientiam: & conſummatus, factus eſt omnibus obtemperantibus ſibi, cauſa ſalutis æternæ.* Gloriabatur in excelsa Cruce Paulus imitator Regis glorioſi: de quo Cyrillus libro II. in Ioannem cap. 23. *Imitabatur Chriſtum Paulus, non in quantum eſt Creator Dominus rerum omnium (impoſſibile namque eſt homini, & omni creaturæ, quidquam ex nihilo producere) ſed in quantum mirabilem viuendi illius diſciplinam tamquam exemplar (vt homini poſſibile atque fas eſt) in ſeipſo tranſpungebat.*

*Excitatio
laboran-
tis.*

CRUX CHRISTI, Crux ægrotantis.

*Instrumen-
tum artis
benè mo-
riendi.*

CHRIſTVS in lecto Crucis iacens, ex mandato æterni Patris infirmum hominem egit. *Quemadmodum per lignum noſter caſus fuerat excogitatus;*

tus ; sic per lignum à casu renouati caelestia bona accipimus, cum ipsius quasi ægritudinis initium propter nos in seipsum Christus lustrauerit. Ita Cyrillus lib.12. in Ioannem cap.29. Hic æger, pauper & egenus est, quem Dauid ex placito Dei decumbenti ægro contemplandum proponit : *Beatus qui intelligit super egenum &* Psal.40. 1. *pauperem, in die mala liberabit eum Dominus. Dominus conseruet eum, & uiuificet eum, & beatum faciat eum in terra, & non tradat eum in animam inimicorum eius. Dominus opem ferat illi super lectum doloris eius : Uniuersum stratum eius versasti in infirmitate eius. Ad huius hominis pauperis, & gloriosi Regis speculum, componebat se iacens in doloris lecto Augustinus, cum Epist. 149. scriberet Profuturo : Secundum spiri- Excitatio agrotantis. *tum, quantum Domino placet, utque ipse vires præbere dignatur, ratione sanus, corpore autem in lecto sum. Nec enim ambulare, nec stare, nec sedere possum, dolore ac tumore percussus. Sed etiam sic, quoniam id Domino placet, quid aliud dicendum est, nisi quia rectè sumus. Rectè habet in extremis cultor diuinæ obedientiæ. Cum Ioannes Abbas totus hilaris obiret, dicebat : Numquam feci propriam meam voluntatem, nec aliquem docui quidquam quod ego prius ipse non fecerim.**



*Regit, leuat, et coronat,
Patientem ouem Agnus Eucharistiae.*

Leuamen laborantis & ægrotantis.

*Virtus
S. Eucha-
ristiae.*

Rex gloriosus ante sacrum Paschæ diem, quo Crucis passionem & mortem ex Patris æterni præscripto subiturus erat, seipsum immolauit in altaris Sacramento, cuius epulo ac potu mirabiliter se refecit, mirum in modum se recreauit. Delectatus tanti mysterij dulcedine ac suauitate, totus animosus & alacer ad tolerantiam crucis ac mortis se accinxit, & suos simul Crucifixos atque Cruciferos præmuniuit. Hic est ille Rex gloriosus, qui suos as-
secles

seclas ad passionem crucis vocat: *Si quis vult post me* Luc. 9, 23.
venire, abneget semetipsum, & tollat crucem suam quo-
tidie, & sequatur me. Et vt suauem ac leuem cru-
 cem reddat, inuitat Agnus ad sui communicatio-
 nem: *Venite ad me omnes qui laboratis, & onerati estis,* Matth. 11,
& ego reficiam vos. Tollite iugum meum super vos, & 28.
discite à me, quia mitis sum, & humilis corde: & inue-
nietis requiem animabus vestris. Iugum enim meum suau-
est, & onus meum leue.

Honor alit artem benè viuendi & moriendi.

SEcundùm mensuram regulæ, in qua cum oue
 pingitur & conuenit altaris Agnus, corona au-
 rea & aureola debetur, & exhibetur; quæ præcessit
 antea in typo mensæ antiquæ tabernaculi, & eius
 structura demandata Moyfi est *Exod. cap. 25. Facies*
& mensam de lignis Setim, habentem duos cubitos longi-
tudinis, & in latitudine cubitum ac semissem. Et inaurabis
eam auro purissimo: faciesque illi labium per circuitum,
& ipsi labio coronam interrasilem, altam quatuor digitis;
& super illam, alteram coronam aureolam.

Honor coronæ aureæ & aureolæ alit artem benè
 viuendi & moriendi, & excitat in primis cultores
 obedientiæ atque patientiæ, vt, si velint coronari
 cum Agno in regno cælesti, non otientur, sed præ-

tu suo religiosè & deuotè viuendo palmam martyrij obtinere, si obedientiam vsque ad mortem exemplo CHRISTI custodit, si beneplacitum Dei sectatur, & suum velle relinquit. Referat anima Crucifixum obedientem propriæ voluntatis abnegatione, vt eundem Martyrum Regem referat coronatione. Hæc qualis & quanta sit in excelsa Crucifixorum & Cruciferorum Rege, Ambrosius Serm. 15. in Psalm. 118. commemorat: Quæ est corona qua coronatur CHRISTVS, nisi corona gloriæ? Ioseph coronam habuit castitatis, Paulus iustitiæ, Petrus fidei. Singularum virtutum coronæ sunt. Solus IESVS CHRISTVS habet coronam gloriæ. In hac corona omnes coronæ sunt, quia gloria non partis vnius coronæ, sed præmium omnium coronarum est.

Hinc efficitur, coronæ aureæ & aureolæ diuisionem adstruendam in CHRISTO non esse, cum ceteras glorias contineat sola corona, qua ornatus & insignitus regnat & triumphat in cælis. Hæc vera sacræ Theologiæ definitio est. Tota crux, & non per partes, incubuit humeris CHRISTI, cuius testificatio est: *Torcular calcami solus, & de gentibus non est* Isai. 63, 3. *vir mecum*, cui non per partes, sed tota corona gloriæ debebatur. Hic ipse ad partem crucis obedientiæ suæ accersit Simonem, virum scilicet obedientem, passionis & glorificationis suæ consortem. *Jam tro-*


*Aureola
gloriosum
Regem non
deces.*

phæum suum, vt ait Ambrosius lib. 10. in Luc. cap. 19. Victor attollat. Crux super humeros imponatur, vt trophæum, quod sibi Simon siue ipse portauit, & CHRISTVS in homine, & homo portauit in CHRISTO. Et bonus ordo nostri profectus est, vt prius trophæa ipse erigeret, deinde Martyribus traderet erigendum, iuxta quod scriptum est; Tolle crucem tuam, & sequere me. Exclamat hoc loco Richardus Victorinus, agens de sacrificio Dauid: Oquàm confidenter Crucifixo adstabit, qui se propter ipsum ad omnem obedientiam subdit! Cum quanta conscientie securitate Verus obediens ad thronum gratie illius accedet, qui factus est Patri obediens vsque ad mortem, mortem autem crucis! Cum quantis trophæis de stadio huius vite exhibet, qui seipsum propter CHRISTVM penitus abiicit, & alienæ seruituti addicit, iuxta Salomonis sententiam, Prouerb. 21. Vir obediens loquetur Victorias.

Proferatur nunc in publicum sancti PETRI Apostoli exemplum: in ipso siquidem, tamquam in præclarissimo speculo, veræ humiliationis fulget imago, & ferentis patienter morbum forma conspicitur.



2 Quid cruce, Petre, opus est: quin pandis sidera Christi
 Clauibus: an Christo crux quoq; clavis erat:



EMBLEMATICA IMAGO II.
S. PETRI APOSTOLI CRVCIFIXI
EXPLICATA.

POST effigiem CHRISTI patientis apparet PETRI crucifixi Imago. Sub Nerone Imperatore crucis patibulo addictus, nouo modo, noua forma, capite inuerso pro suo voto ac libito crucifixus est, vt gloriosum Regem suum magis commendaret, & efferret, ac seipsum magis deprimeret. *Vir est imago & gloria Dei.* Imago non quærit propriam gloriam, sed eius cuius est effigies: vnde & CHRISTVS ipse, cùm sit splendor gloriæ & figura substantiæ Patris, asserit, *Non quero gloriam meam.* PETRVS viua imago est & gloria CHRISTI, & illum effert, se verò deprimit, vt impleat officium suum. Hic est ille magnus Apostolus, qui humilitatem suam cum magnitudine CHRISTI contulit, & post collationem factam seruus Domino primas dedit. Præcessit gloriosus Rex, & *inclinato capite tradidit spiritum*: suffecit in locum suum ac præfecit caput Ecclesiæ PETRVM, qui se in morte submisit & depressit.

Hegesip-
pus.
Metaph.
Prudent.
Lipoman.

1. Cor. 11,
7.

Ioan. 8, 50.

Sympathia
Christi &
Petri Arti-
ficum hu-
miliatio-
nis.
Ioan. 19,
30.

C

Crux

CRUX PETRI Apostoli, Crux sanctæ
humiliationis.

*Cruz hu-
miliationis
instrumen-
tum artis
bene vi-
uendi.*

Iob 3,7.

CUm nascitur homo mortalis, ad crucem nascitur: *homo nascitur ad laborem*; nascitur ad humiliationem, quam ipsa forma nascendi præfert, & portendit. Cum ex materno utero proles funditur, inuerso capite prodit, ut vel ab ortu suo nouerit, more PETRI crucifixi, ferre crucem humiliationis, & se totum Deo submittere. Hanc sibi crucem portandam putabat Iobus, cum diceret:

Iob 10,15. Si impius fuero, vae mihi est: & si iustus, non leuabo caput, saturatus afflictione, & miseria. Deus misérias & afflictiones immittit, ut assequamur mysteria humilitatis & humiliationis. Quanti verò hæc scientia habenda & æstimanda sit, vel ex hoc perspicitur potest, quòd lib.2. de Officiis cap.7. in Pauli elogium commendat Ambrosius. *Scio, inquit Paulus, humiliari.*

Philip. 4, 12. Non ergo indocta humilitas, sed quæ habeat sui modestiam & scientiam, laudi datur, &c. Præclare ergo dixit, Scio humiliari, id est, quo in loco, qua moderatione, quo fine, quo officio, quo munere. Nesciuit Phariseus humiliari, sciuit publicanus, ideò iustificatus est.

*Excitatio
laboran-
tis.*

Quo in loco humiliatus est? Submisit se PETRVS Romæ, submisit se in parte occidentali Orbis, ut scientiæ

scientiæ humiliationis , quam in Orientis regionibus à Magistro suo didicerat , præclarum specimen exhiberet. Docuit hanc in Vrbe Romana scientiam, vbi indocta superbia præualebat , & docta Crucis humilitas ignota omnino iacebat.

Qua se submisit moderatione? Seruauit modum, qui seruum decebat Regis ; & summo sibi honori duxit , extremâ tanto Principi ostendere submissione-
nem ; & dicere cum Dauide , *Vide humilitatem meam.* Psal. 24.
18.

Quo fine ita se subiecit? Subiecit se eo fine Princeps Apostolorum , vt Rex gloriosus staret , ipse iaceret. Nobilis hæc conditio fidelis ministri est , vt vel detrimento vel casu proprio incrementum & statum Principis sui sedulò curet. Cùm Ioannes in summo esset honore , fidum ministrum agens , falsus est ingenuè , *Illum oportet crescere, me autem minui.* Ioan. 3, 30.
Minuit Ioannes statum suum, vt CHRISTVS cresceret, PETRVS totum suum statum inuertit & euertit , vt staret CHRISTVS, nec vinqum à statu suo decideret.

Quo officio ita se depressit? Summum ille officium Pontificatus exercebat , & officij iure summus ei honor debebatur, cum CHRISTO tamen de paritate non contendebat, sed in cruce etiam cedebat, & procumbebat , & quidem meritò : teste enim & iudice Ambrosio lib. 10. in Luc. cap. 9. PETRVS non

poterat diuinæ constantiam intentionis aquare. Passio Domini æmulos habet, pares non habet.

Quo munere se, inuerso capite, cruci affigi curauit & obtinuit? Vt propria humiliatione Sedi Apostolicæ acquireret & compararet sublimem gloriam, quam supra omnes thronos Imperatorum & Regum obtinet; & ipse sibi summam in cælo exaltationem curaret, & consequeretur.

Philip. 4. 12. Magnus hic magister humiliationis est, cuius vox illa habeatur, *Scio humiliari*, & simul docere, quo in loco, qua moderatione, quo fine, quo officio, quo munere oporteat seruari & obseruari disciplina humiliationis.

CRUX PETRI Apostoli, Crux ægrotantis.

*Instrumentum artis
benè moriendi.*

Gen. 27.

27.

Heb. 11.

21.

1. Pet. 5. 6.

CVM esset infirmus Iacob, conuersus ad lectuli caput, fastigium virgæ, quæ in manu Iosephi erat, coluit & adorauit. Mysticus Iacob Apostolus PETRVS est, qui conuersus ad crucis caput, totus humilis culmen CHRISTI crucifixi colit, & laborantibus dicit: *Humiliamini sub potenti manu Dei.* Hic ægritudinis scopus, hic fructus, vt homo cuiuslibet status & gradus, nouerit seipsum deprimere, nouerit Deum immortalem colere & adorare. Hæc ad salutem animæ via, vt homo seipsum humiliet, cum infirma

infirma carne laborat. Audiant igitur ægri CHRIS-
 TUM dicentem & clamantem, *Venite ad me omnes,* Matth. 11,
qui laboratis, & onerati estis, & ego reficiam vos. 28. Tollite
 iugum meum super vos, & discite à me, quia mitis sum,
 & humilis corde. Huius loci Interpres Augustinus li-
 bro de Sancta virginitat. cap. 33. dicit: *Itane magnum*
est esse paruulum, vt nisi à te, qui tam magnus es, fieret,
disci minimè posset? Ita planè. Non enim aliter inuenitur
 requies animæ, nisi inquieto digesto tumore, quo magna si-
 bi erat, quando sibi sana non erat. Cùm ergo caro huma- Excitatio
 na morbis affligeretur & humiliatur, spiritus conua- agrotan-
 lescit. Huc pertinet, quod S. Birgittæ lib. 6. cap. 93.
 legimus, Dei Matrem de filia sibi chara pronuntias-
 se: *Ego Mater Dei, quæ nullam horam sine tribulatione*
cordis transiui in terris, consulo, vt ipsa non erubescat es-
se humilis. Ita significari Virgo virgini filix voluit
 per sanctam Birgittam: cui post hoc acceptum nun-
 tium apparuit B. PETRVS Apostolus, & ait: *Tu es*
noua sponsa Domini & Dei nostri, vade, & quare ab
illa muliere, quam ego dilexi, si fortè velit ex toto esse mea
filia. Et illâ requisitâ consentiente, & dicente, Volo toto
corde; B. PETRVS ait: *Ego providebo ei sicut filix Petro-*
nille, & recipiam eam in custodiam meam. Et statim Domi-
na illa, his auditis, mutauit vitam suam, & non longè post
cæpit toto vitæ suæ tempore infirmari, donec purgata cum

maxima deuotione tradidit spiritum. Quàm esse humilem voluit Dei Mater, vt se humiliaret vsque ad extremum vitæ terminum; B. PETRVS affligi semper morbis optauit atque curauit. Sic itur ad astra: sic clauiger æthereus per crucis humiliationem rectà in cælum ascendit, & cælestem sibi aditum fecit: &, qui sapiens est, *cor suum dabit in similitudinem picturæ, & vigilia sua perficiet opus.*

Eccli. 38,
28.

Leuamen laborantis & ægrotantis.

Virtus Eucharistia.

Matth. 11,
28.

REX gloriosus bibit de torrente in via, & dum biberet, ad ima demisit se, & caput suum inclinauit; quod deinde extulit & exaltauit. Hic calix passionis est, & hic ipse in altari consecratur, cuius haustu recreantur ac reficiuntur, qui more PETRI Apostoli deprimuntur & humiliantur. Dictum sibi à CHRISTO in Euangelio arbitrentur, *Venite ad me omnes, qui laboratis, & onerati estis, & ego reficiam vos. Tollite iugum meum super vos, & discite à me, quia mitis sum, & humilis corde.* Humiliationis iugum, aliàs graue atque molestum laborantibus & ægrotantibus; post Eucharistici Agni refectionem totum dulce ac suaue efficitur. Adest quippe in sacra Eucharistia CHRISTVS, qui descendit ad ima, vt ex-
viaticum. tollat humiles, & in cælum assumat. Virtus quidem patientiæ

patientiae licet hunc habeat effectum, vt quod semel illa depresso, in caelum euehat, eleuata haec virtus est in Agno sacrae Eucharistiae, cuius vel sola umbra, cum in terra iaceret Elias, eum erexit, & extulit vsque ad apicem montis Oreb, in quo caelestis sublimitatis cacumen apparebat.

Gloriosum opus Artis Crucis & patientiae,
Aurea & aureola corona.

AVrum, ex quo mensa tabernaculi decorabatur, & in ea corona aurea & aureola conficiebantur, ex imis terrae visceribus, in quibus natura illud condiderat, extractum erat, & à sua ipsius origine portendebat se creatum pro iis, qui & humilitatem & humiliationem amplecterentur. Vtramque amplexus est D. PETRVS, & idcirco appositae est *corona aurea super mitram eius, expressa signo sanctitatis, & gloria honoris*. Humiliatur prius aurum, quod in summo habetur pretio, & Pontifex aureus PETRVS prius in cruce deprimitur, & postea regno caelesti donatur, aurea & aureola coronatur. Hic ipse sermone & exemplo exhortatur: *Humiliamini sub potenti manu Dei, vt vos exaltet in tempore visitationis*. Hanc exaltationem tempore ægritudinis, & mortis, futuram esse, Apostolus insinuat. Caelestis illa

*Honor alie
artem be-
ne viuendi
& moriendi.*

*Eccli. 45.
14.
Corona
aurea.*

1. Pet. 5, 6.

*Aureola
humilia-
tionis.*

*Extrema
verba mo-
rientis.*

illa exaltatio erit animæ humiliatæ coronatio. Decorabitur corona aurea, & æmula aureolæ, quæ Martyribus gloriosis decreta est. Et quidem vera & perfecta humiliatio, quædam species martyrij est, quæ in Rege Martyrum clauit: innotescit & in PETRO, cuius martyrio dedit virtus humilitatis ingressum, progressum, & egressum gloriosissimum post extremam orationem, quam in mortis suæ articulo fecisse, veterum Patrum historia commemorat, in hæc verba: *Gratias tibi Domine IESV, Fili Dei viui, non solum voce & corde ago, sed etiam spiritu quo te diligo, quo te alloquor, quo te interpello, quo te teneo, quo te intelligo, quo te video. Tu mihi omnia & in omnibus, tu mihi totum, & nihil mihi aliud præter te solum, qui es verus Dei Filius, cui cum æterno Patre & Spiritu sancto honor & gloria in cuncta semper sæcula sæculorum, Amen.*

Proferatur nunc in publicum sancti ANDREAE Apostoli exemplum: in ipso siquidem, tamquam in præclarissimo speculo, spontaneæ oblationis fulget imago, & resignationis in morbis forma conspicitur.



I nunc et spera famam mersare tenebris:
3 Splendet ab infami lux radiata cruce.

S.



fu
neu
lira
qua
ta,
do
red
me
cu
g
Sa
Hi
est,
tiff
est @
perf

EMBLEMATICA IMAGO III.

S. ANDREÆ APOSTOLI CRVCIFIXI

EXPLICATA.

SANCTVS ANDREAS Apostolus, cùm Pa-
 tris in Achaia mysterium Crucis CHRI-
 STI sua prædicatione extolleret, à Præsi-
 de Ægea sub Nerone Imperatore crucis
 suspendio adiudicatus est. Voluntarium & sponta-
 neum Sacrificium ANDREAS seipsum in ara crucis
 litauit. Exclamauit victima ad aram : *O bona crux,*
quæ decorem ex membris Domini suscepisti, diu desidera-
ta, sollicitè amata, sine intermissione quæsita, & aliquan-
do cupienti animo præparata, accipe me ab hominibus, &
redde me magistro meo; vt per te me recipiat, qui per te
me redemit. Hoc holocaustum sublime, quod confe-
 cit de se ANDREAS, speculum sacrificij voluntarij
 gratissimum Deo fuit, ac proinde canit Ecclesia:
Suscepit Deus ANDREAM in odorem suauitatis. Rectè
 Hieronymus Epist. 28. *Aurum deponere, incipientium*
est, non perfectorum; fecit hoc Crates Thebanus, fecit An-
tisthenes: seipsum offerre Deo, proprium Christianorum
est & Apostolorum. Primus ac primarius auctor huius
 perfectæ oblationis extitit gloriosus Rex in sanctæ

Martyrol.
 Metaph.
 Nicephor.

Sympathia
 Christi &
 Andrea
 Artificum
 voluntarij
 Sacrificij.

Isai. 53, 7. crucis altari : *Oblatus est, quia ipse voluit. voluit & ANDREAS sic offerri, sic litari.*

CRUX ANDREÆ, CRUX oblationis sui.

Crux propria oblationis instrumentum artis bene viuendi.
Rom. 12, 1.

Excitatio laborantis.

Nemo sine cruce vitam ducit, secum vnusquisque crucem gestat, in qua seipsum suo immolet Creatori. Ad hanc immolationem excitat Paulus, cum ait : *Obsecro vos, fratres, per misericordiam Dei, vt exhibeatis corpora vestra hostiam viuentem, sanctam, Deo placentem, rationabile obsequium vestrum.* Hostia viuā, sancta & placens vero & magno Deo, nos ipsi sumus, cum quibus Bernardus Sermone de Purificat. agens dicit : *Quid, fratres, nos offerimus, aut quid retribuimus CHRISTO pro omnibus quae retribuit nobis? Ille pro nobis obtulit hostiam pretiosorem quam habuit, nimirum qua pretiosior esse non potuit. Et nos ergo faciamus quod possumus : optimum quod habemus, offeramus illi, quod sumus vtique nos ipsi.* Accedat Augustinus libro de Quant. anim. cap. 28. *Vellem vt nihil aliud agerem, quam reddere me cui maximè debeo, atque ita fieri, quod ait Horatius, amicum mancipium Domino.*

CRUX ANDREÆ, CRUX ægrotantis.

Instrumentum artis bene moriendi.

LAnguebat amore ANDREAS : cumque ille duceretur ad molestum crucis lectum, exclamauit,

uit, *O bona crux*, & in ea totum se dedit, totum se obtulit Deo. Dum valet homo, negotiis variis rebusque diuersis distrahitur. Vt se sibi totum recipiat, & de se hostiam viuentem conficiat, morbo tangitur, vocatur ad lectum, ad bonam ducitur crucem, si nouerit, more ANDREAE, de lecto componere altare, & seipsum in ægritudine sua patienter & hilariter immolare. Quisquis sponte se ita immolat Deo, tollit à cruce & lecto quod graue & onerosum est, iuxta Aphorismum Saluiani lib. 1. de Prouid. *Infirmittates, inquit, non sunt onerosæ tolerantibus, sed tolerare nolentibus. Siue enim grauia hæc, siue leuia, animus tolerantis facit.* Quisquis animo generoso lecto affixus est, sicut & ANDREAS cruci, sciat pertinere ad se, quod Epist. 15. scribit ad Olympiad. Chrysostomus: *Scis enim, scis inquam planè, quantæ laudis sit, corporis morbum generoso animo, atque cum gratiarum actione ferre. Hoc, vt sæpè à me dictum est, Lazaro coronam attulit: hoc in Iobi certaminibus diabolum dedecore atque ignominia affecit, pugilemque ob huiusmodi patientiam clariorem reddidit.* Admonendi ergo sunt ægri, vt generoso animo ægritudinis suæ crucem acceptent & amplectantur, & quidem cum gratiarum actione, quandoquidem non infertur grauis iniuria ægrotantibus, sed eximium beneficium con-

Excitatio
ægrotan-
tis.

fertur. Confirmat Augustinus Tract. de Visit. infirmorum Sermon. I. *Eia, inquit, si Episcopatum, aut honorem alium, aut donum aliud, aut sanitatem infirmis optabilem tibi concessisset Deus, nonne omni gaudio illud donum Dei suscepisses? Certè maiore exultatione, & affectuosiore voluntate, cum gratiarum actione hanc Dei animadversionem debes vnicam habere, quia & hoc utilissimum Dei donum est.* Congratulabatur sibi de dono crucis, & luce ipsa splendidius collatum sibi beneficium censebat & iudicabat ANDREAS, cupiensque benefactori suo gratiam facere compensationem, fecit suiipsius odoriferam immolationem. Qui mysticus ANDREAS est, dum laborat & ægrotat, propositam sibi imaginem ante oculos semper habeat, ut cum lecto affixus sit, ad hanc se componat formam, dignam sibi datæ infirmitatis concipiat ac formet opinionem, & debitam faciat æstimationem. Quam dum sanus esset, de se inchoarat hostiam Deo salutis offerre, iacens in lecto æger paratus sit animo perficere, ac gloriosè terminare.

Leuamen laborantis & ægrotantis.

*Virtus Eu-
charistia.*

R Ex gloriosus spontaneam immolationem tempore passionis suæ fecit, & perfecit. Ostendit satis clarè, se non trahi ad suam mortem inuitum, cum,

cùm , antequam à Iuda traderetur , seipsum in sacrificium & Sacramentum Ecclesiæ tradidit. Hoc Agni sacrificium & Sacramentum totum voluntarium est , ad cuius communicationem eos , qui vim patiuntur & laborant , vt seipsos Deo voueant , allicit & accersit CHRISTVS. *Venite ad me omnes, qui laboratis, & onerati estis, & ego reficiam vos: reficiam* Matth. 11, 28. & conuertam vos in me, vt sicut tradidi me sponte mea, & adhuc trado, effecti similes mei, voluntariè vestra omnia , & vos ipsos pariter offeratis. Patientia possessionem adfert animarum. *In patientia vestra* Luc. 21, 19. *possidebitis animas vestras.* & hæc virtus Eucharistiæ Viticum. est, vt quam in possessione sua vir patiens habet animam , eandem prorsus voluntariè & spontaneè oblatam Deo reddat & restituat.

Gloriosum opus Artis Crucis & patientiæ,
Aurea & aureola corona.

Splendebat auro mensa, quæ in antiquo tabernaculo præcessit, & in ea aurea corona & aureola resplendebant. Typus & vmbra erat sacri mysterij Eucharistiæ , cuius sacrarium non casu nec sine causa sæpè componitur & ornatur coronis floribus aureis contextis. Coronatur voluntarium sacrificium , vt nouerint omnes , qui spontaneam conficiunt

Honor alit
artem be-
nè vinen-
di & mori-
endi.

ciunt de se oblationem , adepturos inclytas gloriæ coronas , quibus in cælorum regno decorabuntur. Voluntariè offerebar seipsum Paulus , & dicebat,

1. Cor. 9. 7. *Hilarem datorem diligit Deus*, & idem ipse testabatur,

1. Tim. 4. 8. *Reposita est mihi corona iustitiæ*. Hæc aurea corona est

decreta Apostolo ANDREAE, cui martyrium gloriosum aureolam reportauit. Candidati vtriusque coronæ voluntarij sectatores CHRISTI, & imitatores ANDREAE sunt , qui in ipso lecto doloris non coactè, sed spontaneè spiritum suum Deo offerunt, sicut obtulit ANDREAS, eiusque imitator sanctus Nicolaus Tolentinas , qui exhalaturus animam ad crucem ait : *Salve crux pretiosa, quæ digna fuisti portare mundi pretium, quod in te quieuit, & sedit, & passionis æstu roseum sanguinem sudauit : ille per te me defendat in hac hora ab hoste maligno.*

*Extrema
verba mo-
rientis.*

Proferatur nunc in publicum sancti PHILIPPI Apostoli exemplum ; in ipso siquidem tamquam in præclarissimo speculo fulget imago patientis obstinationem & obdurationem peccatorum & morborum.



4 Quid mage Caucasæis certantia pectora saxis,
Quam monitis decuit saxa referre pijs?

E

E M.

S



m

Cr

cu

p v

Cr

de

ma

fin

ill

ru

&

not

mar

open

lapid

curus

EMBLEMATICA IMAGO IV.

S. PHILIPPI APOSTOLI CRVCIFIXI

EXPLICATA.

SANCTVS PHILIPPVS Apostolus Hiera- Metaph.
 poli in Scythia, imperante Domitiano, apud Su-
 crucis suspendium passus est, & ab obsti- rium, Ni-
 natis Barbaris saxi obrutus, glorioso suo cepor. &
 martyrio finem dedit. Hunc beatum Apostolum Isidor.
 CHRISTVS vocauit ad se cap. i. Ioan. *In crastinum*
voluit Iesus exire in Galileam, & inuenit PHILIP-
PVM, & dicit ei Iesus: Sequere me. Fidelis affecla
 CHRISTI, qui per tot rerum discrimina firmus Re-
 demptori adhæsit, nec crucifixum deseruit. Graue
 martyrium PHILIPPI, cui erat acerbior crux, ob-
 stinatio & obduratio hominum perfidorum, quàm
 illud ipsum patibulum cui fuerat condemnatus. Vir-
 tus sacratissimi PHILIPPI sic enituit inter lapides
 & saxa, quemadmodum mansuetudo CHRISTI in- Sympathia
 notuit, cùm duræ ac diræ genti contra se gestanti, Christi &
 manibusque tenenti lapides dixit, *Multa bona opera* Philippi
ostendi vobis ex Patre meo, propter quod eorum opus me Artificum
lapidatis? Per crucem & lapides CHRISTVM est se- cultura la-
 cutus PHILIPPVS, speculũ tolerandæ obdurationis. pidum.
Ioan. 10,
32.

CRUX PHILIPPI Apostoli, Crux obdura- tionis alienæ.

*Crux du-
ros mores
ferentis,
instrumen-
tum artis
benè vi-
uendi.*

*Excitatio
laboran-
tis.*

CRux obstinatorum hominum grauiissima est, & maximum eius onus robustos humeros exigit. Quamobrem S. Birgitta lib. 4. Reuelat. timens onus, cum rogaretur à CHRISTO, *Quid turbaris filia?* respondit: *Quia timeo mitti ad induratos.* CHRISTVS ipse, quo pacto ferenda sit ista crux, instruit Birgit- tam lib. illo 4. cap. 129. concludit tandem: *Ergo, qui desiderat vincere duritiam animalis, sit inflexibilis in ope- ribus discretionis, & constans in timore, & spe adiutorij diuini, & conetur quantum potest, & Deus adiutorium ministrabit, confringendo cor induratum.* Non quidem solum per ignem, sed etiam per Lydium lapidem natura auri exploratur; nec solum Apostoli & ho- mines Apostolici in fornace tribulationis, sed etiam faxea obstinatione peccantium dignoscuntur.

CRUX PHILIPPI Apostoli, Crux ægrotantis.

*Instrumen-
tum artis
benè mo-
riendi.*

Domestici inimici, sunt quatuor ipsa elemen- ta, ex quibus homo componitur; suis se hu- moribus armant, ciuile bellum indicunt & gerunt, affligunt hominem morbo, & lecto affigunt; nec tamen morbida elementa conquiescunt, dirè sæ- uiunt,

uiunt, naturæ ac medicinæ obstinatè reluctantur. Dura hæc conditio est, & cruci PHILIPPI similis, vt vires elementares, quas aluisti, & quibus beneficiasti, rebelles omnes conspirent, nec quiescant, donec penitus te obruant, & sub lapide sepulchri condât. Hanc eandem ferebat crucem matrona Olympias, cui S. Chrysostomus scribit: *Etiam si domi maneat, lecto quæ affixa sis, ne propterea inertem vitam ducere te existimes; siquidem iis, qui à carnificibus raptantur, lacerantur, excruciantur, atque extremis suppliciis maculantur, grauiora & atrociora sustines, nimirum summam huius morbi acerbicatem domestici atque intestini tormenti loco habens.* Quisquis sic vexatur & exercetur, ^{Excitatio agrotantis.} meminerit CHRISTI Domini; in cuius sacra passionem ^{Matth. 27, 51.} *petræ scissæ sunt*; vt ostenderet virtutem patientiæ suæ petris & saxi fortio-rem, cui lapides ipsi cesserunt. Saxa quidem fracta sunt, CHRISTI verò patientia omnino infracta permanfit. Meminerit PHILIPPI Apostoli, cuius illæsa virtus lapides læsit & fregit, & ipse victor excessit. Elucet virtus inter diros ac duros dolores, quibus cum torqueretur in martyrio suo Eleazarus 2. Machab. 6, 30. *ingemuit, & dixit: Domine, qui habes sanctam scientiam, manifestè tu scis, quia, cum à morte possem liberari, duros corporis sustineo dolores: secundum animam verò propter timorem tuum*

libenter hæc patior. Et iste quidem hoc modo vitâ decessit; non solum iuuenibus, sed & vniuersæ genti memoriam mortis suæ ad exemplum virtutis & fortitudinis derelinquens. Exemplum virtutis ac fortitudinis suæ S. PHILIPPVS reliquit, qui cum faxeis hominibus rem habuit, & tunc perfecit, cum è viuis victor excessit. Admonendus est æger, vt si mysticus esse PHILIPPVS velit, & secum durè actum tempore vitæ fuerit, cum iam ad extremam metam venerit, à cœpta via & virtute ne degeneret, sed persistat, donec patientiâ suâ, quæ dura ac dira sunt, vincat & perfringat.

Leuamen laborantis & ægrotantis.

*Virtus Eu-
charistia.*

R Ex gloriosus Sacramentum suum instituit in memoriam passionis suæ, vt memores nos essemus, fieri in altaris mysterio, quod factum est in crucis immolatione. Tunc temporis *petræ scissæ sunt*, & nunc virtute sanctæ Eucharistiæ duri labores & morbi superantur. Experiuntur Eucharisticam hanc vim, qui accedunt ad Communionem; & vt accedant, CHRISTVS Agnus laborantes & ægrotantes incitat simul & excitat, dum ait: *Venite ad me omnes, qui laboratis, & onerati istis, & ego reficiam vos.* Accessit Stephanus sanctorum Martyrum Princeps, canitque de eo Ecclesia, *Lapides torrentis illi dulces fuerunt.*

*Matth. 27,
51.*

*Matth. 11,
28.*

runt. Dura patitur mortalis homo, cum proximus
morti est: & cum nosset hanc ipsam CHRISTVS
difficultatem, occurrit & succurrit misero patienti,
conferens illi Eucharistiam, cuius participatione *Viaticum.*
despicere non solum morbum, sed etiam ipsam
mortem consuevit post sacri Viatici perceptionem.

Gloriosum opus Artis Crucis & patientiæ,
Aurea & aureola.

Licet Eucharistia sacrosancta secum afferat sum- *Honor alit*
mam dulcedinem, qua lapides torrentis dulces *artem be-*
reddat; vltcrius progreditur, & vt gloriosos efficiat, *nè viuen-*
di & mo-
impetito torrentis lapidibus Stephano aperit cælos, *riendi.*
& ostendit Regem gloriæ, primam coronâ auream,
& simul aureolam, ipsi martyrum Primicerio in re-
gno æternitatis destinatam. *Ecce, inquit, video calos* AA. 7, 55.
apertos, & Filium hominis stantem à dextris Dei. In quæ
verba Richardus Victor. agens de robore patientiæ,
monet: *In terris premebatur, & de calis consolabatur.*
Affligebatur ex illata miseria, afficiebatur ex inolita mise-
ricordia, gratulabatur ex inspecta gloria. *Ecce sub vno eo-*
demque tempore videbat inferiùs vnde compateretur, vi-
debat superiùs vnde incundaretur. In hoc eodem statu
S. PHILIPPVS erat, medius inter lapides & coronas;
& dum pateretur inferiùs, superiùs recreabatur; imi-
tator

tator Regis Martyrum, cuius regalis titulus in cruce superiùs eminebat, dum inferiùs grauiter torqueretur. Nec quidem sine mysterio, quod cap. 23. in Lucam exposuit Beda in hæc verba: *Pulchrè titulus, qui Christum Regem testatur, non infra sed supra crucem ponitur; quia licet in cruce pro nobis hominis infirmitate dolebat, super crucem tamen Regis maiestate fulgebat.* Superior sua passione Rex Martyrum, superior tormentis suæ crucis PHILIPPVS erat; erit etiam similis vtri-
Aureola. que æger, dura in lecto doloris, & extra lectum acerba patiens, si propositam sibi laboranti & ægrotanti aureolam in cælo consideret; & eius consideratione, quæ in terris dura & acerba tolerat, generoso corde contemnat. Quòd si duros morbos, & mortem ferre, species martyrij est, accedet patiens ad aureolam martyrij: vt qui similis est Apostolo in acerbitate passionis, socius etiam sit in gloria coronationis simul cum Stephano lapidato & coronato, cuius vox extrema fuit Act. 7, 58. *Suscipe spiritum meum.*

*Extrema
verba morientis.*

Proferatur nunc in publicum sancti BARTHOLOMAEI Apostoli exemplum; in quo siquidem, tamquam in præclarissimo speculo, fulget imago ferentis iniquum tribunal & morbum.



5 *Diripite exuias : melior me vita moratur.
Sic colubro, posita pelle, inuenta redit.*



ac
pl
cu
le
in
Ar
fil
H
w
n
p
cu
cu
le,
ter e
inre

EMBLEMATICA IMAGO V.

S. BARTHOLOMÆI APOST. CRVCIF.

E X P L I C A T A.

IN maiore Armenia sub Aftyage Rege Martyrolog. Iosephus apud Metaph.
 BARTHOLOMAEVS Apostolus pro defensione Catholicae Fidei primum virgis caesus, deinde cruci affixus, & in ea, cum adhuc viuis esset, pelle nudatus, tandem capite plexus, in caelum migravit. Hic ipse Apostolus est, cuius mandato coactus Astaroth confessus est, solere se pellem corporis tangere & laedere, donec homo pro valetudine perdita superstitiosa fecerit vota. *At ubi pro corporis sui salute sacra fecerit, inquit, ab afflictione desistimus, quod illius animae dominari incipiamus.* Hanc daemone conditionem detexit BARTHOLOMAEVS, qui maluit tota pelle carere, quam daemone sacrificium offerre, & suam animam in eius imperium transferre. Pelle nudatus est, apparuit speculum mystici serpentis instar, & quidem in ligno crucis, ut referret IESVM CHRISTVM, qui & dicit de se, *Sicut Moyses exaltauit serpentem in deserto, ita oportet exaltari filium hominis.* Deus & Dominus æquo iure agebat cum patriarcha Iobo, cum auferret omnia

Sympathia Christi & Bartholomaei Artificum ferenda iniuria.
 Ioan. 3, 16,

nia bona quæ mutuo dederat, & ille mutuo quæcumque habebat acceperat. Quamobrem accepti
 Iob 1, 21. *mutui memor, amissis iam opibus, dicit: Dominus dedit, Dominus abstulit, sicut Domino placuit, ita factum est, sit nomen Domini benedictum.* Tentator verò iudicium agebat iniquum, & Deum vrgebat, vt pelle
 Iob 2, 4. & carne Iobus nudaretur. *Pellem, inquit, pro pelle, & cuncta quæ habet homo dabit pro anima sua: alioquin mitte manum tuam, & tange os eius & carnem, & tunc videbis, quòd in faciem benedicat tibi.* Factum puta, tacta est pellis, læsa est caro. Qui sub iniusto Iudice tangitur, læditur, nudatur & spoliatur, laborem Iobi, crucem CHRISTI, BARTHOLOMAEI Apostoli excoriationem subit ac patitur.

CRUX BARTHOLOMÆI Apostoli, Crux iniusti tribunalis.

Crux tolerata iniustitia, instrumentum artis bene viuendi.
 Mich. 3, 1.
Excitatio laborantis.

Summæ iniquitatis species extitit, quam Deus in iudicibus Israëlis deprehendit, & simul reprehendit. *Audite Principes Jacob, & duces domus Israël. Numquid non est vestrum scire iudicium, qui violenter tollitis pelles eorum desuper eis, & carnem eorum desuper ossibus eorum?* Ergo cùm in subselliis humanis contra fas omne bonis priuatur, nudatur & excoriatur homo, putet se ad crucem BARTHOLOMAEI vocari,

vocari , & sciat æquum esse iudicem Deum , qui consulit causæ suæ , & illatæ iniuriæ atque iacturæ damna refarciet.

CRUX BARTHOLOMÆI Apostoli , Crux
ægotantis.

CERTO certiùs de pelle agitur, cùm quis grauem ^{Instrumentum artis bene moriendi.} patitur ægritudinem. Monet propterea Seneca Epist. 102. *Non licet plus efferre quàm intuleris : imò etiam ex eo quod in vitam intulisti , pars magna ponenda est. Deponetur tibi hæc circumiecta , nouissimum velamentum tui , cutis.* Quòd si sententia mortis feratur , & executioni mandetur, accidit misero homini , quod accidit BARTHOLOMÆO , qui & pelle nudatus è viuis abiit. Deus æquo iure cùm BARTHOLOMÆO egit, Astryages verò iniusto modo processit. Cùm homo corpore exuitur, Deus æquam iuris formam seruat , auctor verò mortis diabolus iniquè & iniuste agit. Diabolus collimat in spoliationem , Deus verò in animæ liberationem , cui dicendum : *Iustus* ^{Psal. 118,} *es Domine , & rectum iudicium tuum.* Confert Chrysostomus priorem illam iniusti tribunalis crucem, quæ hominem bonis & fortunis spoliat , cum cruce morbi & ægritudinis , nec dubitat istam priori cruci anteponere. Laborabat grauiter Olympias , cui

scribens Epist. 4. ait: *Non opibus spoliari, etiamsi omnibus prorsus facultatibus quispiam nudetur, res aequè grauis & acerba est, vt aduersa corporis valetudo.* Facultates illæ externæ sunt, & foris manent: salus verò corporis nostri res interna est, & magis propria, ac proinde grauius & acerbius est corporis salute priuari, quàm opibus & fortunis spoliari. Quàm præstet salus diuitiis, definitum est cap. 30. Ecclesiastici.

Melior est pauper sanus, & fortis viribus, quàm diues imbecillis & flagellatus malitia: salus animæ in sanctitate iustitiæ, melior est omni auro & argento: & corpus validum, quàm census immensus. Non est census super censum salutis corporis. Hic corporeæ valetudinis census, cùm homo valet, tenetur in sacco suo; cùm verò malè habet, quasi aperitur iam saccus. Liqueat in sancto Iobo, qui cùm iam opes suas amisisset, adhuc diuitias salutis ac valetudinis suæ intra sacculum pellis suæ continebat, dixitque propterea satan:

Iob 2, 4.

Pellem pro pelle dabit homo pro anima sua. Laborauit & ægrotauit, & ruptus sacculus est, variis conscissus vulneribus. CHRISTVS ipse, qui mortuus est ex infirmitate, disrupta iam corporis pelle, dixit Patri: *Conscidisti saccum meum, conscidisti pellem meam, & circumdediti me latitia.* Cùm quis paulatim deficit, cùm quis paulatim moritur, paulatim pelle nudatur,

Psal. 29,
12.

Excitatio
ægrotan-
tis.

datur, &, vt corporis spoliationem æquo & forti animo ferat, rogandus Deus, vt qui hominem pelle & carne vestiuit, & data pelle videt à crudeli morte exui, patienti tantam iniuriam succurrat, & de iniqua morte iustam vindictamumat. Præsentet se ipse Deo, & ad diuinam eius clementiam excitandam sistat se in eius præsentia: ostendat se mysticum BARTHOLOMAEVM, iacentem in crucis lecto audum resurrectionis futuræ, in qua pelle nudatus homo renouabitur, ac totus nouus resurget.

Leuamen laborantis & ægrotantis.

Rex gloriosus, qui serpentis instar exaltatus est *Virtus Eucharistia.* in cruce, & pellem suam reliquit, vt à sepulchro resurgens refloresceret, in memoriam non solum passionis suæ, sed etiam resurrectionis condidit Eucharistiam ad corroborandũ eos qui iniuriam patiuntur, carne & pelle nudantur. Animat eos, dum ait: *Venite ad me omnes, qui laboratis, & onerati estis, & ego reficiam vos.* Hic gloriosus Rex est, *Matth. 11, 24. Plal. 102,* qui *facit iudicium iniuriis patientibus, dat escam esurientibus.* Esca sacræ Eucharistiæ, caro eius est; nec timet pelle priuari, qui sancto CHRISTI vellere vestitur atque munitur. Tunc mortalis homo immortalitatem esurit, cum mortalitati renuntiat, & tunc maxime

ximè esurienti prouidit Deus de sacro Eucharistiæ pabulo ; vt esuriem suam homo , qui pelle carnis
Viaticum. exuitur , auferat & extinguat. *Dat escam esurientibus,*
 dum viuunt, sed potissimùm dum moriuntur.

Gloriosum opus Artis Crucis & patientiæ,
 Aurea & aureola corona.

*Honor alit
 artem be-
 nè uiuen-
 di & mo-
 riendi.
 Psal. 102,
 6.*

*2. Tim. 4,
 8.*

*Aureola
 spoliationis
 iniuste.*

DVo hæc coniunxit Daud in laudem & elo-
 gium summi Dei , vt feruet in iudicando iu-
 stitiam, & in curanda alimonia prouidentiam : *Qui
 facit iudicium iniuriam patientibus, qui dat escam esurien-
 tibus.* Et quidem Paulus à supremo omnium Iudice
 coronam suam expectabat : *Reposita est mihi corona
 iustitiæ , quam reddet mihi Dominus in illa die iustus iu-
 dex.* Ergo cùm præcepit Moyse Deus , vt sterneret
 mensam in tabernaculo fœderis , & in ea coronam
 auream & aureolam reponeret , se ostendit proui-
 dum , æquum , & iustum iudicem, pro iis qui pa-
 tiuntur iniuriam more BARTHOLOMAEI, qui con-
 tra fas & nefas sua pelle nudatur , suo corio spolia-
 tur. Quòd si hoc genus martyrij subit, qui bonis &
 vita immeritus punitur atque priuatur, Deum respi-
 ciat remuneratorem offerentem compensationem,
 vt similis BARTHOLOMAEO adscribatur eorum nu-
 mero , quorum meminit Apostolus , & eorum pa-
 tientiam

tientiam commendat. Rapinam bonorum vestrorum Heb. 10,
 cum gaudio suscepistis, cognoscentes vos habere melio- ^{34.}
 rem & manentem substantiam. Nolite itaque amittere
 confidentiam vestram, quæ magnam habet remuneratio-
 nem. Quanta sit remuneratio, tunc temporis planè
 patebit, quando stabunt iusti in magna constantia aduer- Sap. 5, 1.
 sus eos qui se angustiauerunt, & abstulerunt labores eo-
 rum. Interim mysticus BARTHOLOMAEVS, vel cùm
 iniquum tribunal subit, non tam vincitur quàm
 vincit, vt Sermone de S. Alexandro, Euentio & Theo-
 dulo definit in hæc verba Ambrosius: *Quantò plura*
patiebantur, tantò se victoriosissimos credebant: victoria
enim est martyris, iudicium persequentis, sicut scriptum est:
Et vincas cùm iudicaris. Cùm iudicatur enim martyr & Psal. 50,
condemnatur, tunc vincit atque prosternit. Tali enim iu- ^{6.}
dicio non est addictus ad mortem, sed absolutus ad re-
quiem, & per hoc manifestissima ratione viuere est, non
periisse.

Primus omnium in ipso iniquitatis iudicio de pon-
 tificali concilio, de Rege, & Præsidente, iudicatus &
 simul spoliatus Rex Martyrum, triumphum egit,
 & de iniqua morte triumphauit, vt pellem pro pel-
 le dare homo nec recusaret, nec formidaret, quem-
 admodum notat Richardus Victorinus Sermone de
 Paschat. *Homines qualibet patiebantur, ne morerentur.*

Iob 2, 4.

Pellem pro pelle, & omnia dabit homo pro anima sua. Saluator vero voluntariè mortem suscepit, & moriendo mortem destruxit, & sic homines à timore mortis eripuit. Vnde Sancti iam mortem non timent, sed cupiunt dissolui, & esse cum CHRISTO. Ea propter, cùm instar BARTHOLOMAEI carne spoliaretur Laurentius Iustinianus, dixit è lecto suo: Pudeat nos mortem timere, cùm Dominus noster propter nos mori voluerit. Hic iudex noster est, cuius memor agens animam Eleazarus Comes ait: Totum me diuino iudicio submitto.

*Extrema
verba mo-
rientis.*

Proferatur nunc in publicum sancti SIMEONIS Episcopi exemplum; in quo siquidem, tamquam in præclarissimo speculo, fulget imago ferentis senectam & morbum.






6. *Prisca fides fideat fabulosa Colchidos artes.
Decrepito reparat crux iuvenile decus.*

EMBLEMATICA IMAGO VI.

S. SIMEONIS EPISCOPI CRVCIFIXI

EXPLICATA.

 VMMI Pontificis CHRISTI, & sanctorum ^{Martyrolog. Surius.} Apostolorum, primi & primarij heredes sunt Pontifices & Episcopi, qui quasi hereditario iure, non modò sanctam Ecclesiam gubernandam, sed etiam crucem CHRISTI sustinendam acceperunt. En, vnā & alteram obtinuit in primis Simeon Episcopus filius Cleophae, CHRISTI consanguineus, qui Iacobo fratri eiusdem CHRISTI successit, & secundus ab eo Ierosolymorum Præsul creatus est. Post varios cruciatus, Imperatore Traiano, eodem passionis genere, quod CHRISTVS subierat, affectus est; mirantibus omnibus, quòd homo ætate confectus (erat enim 120. annorum) acerbissimos crucis dolores constanter pateretur. Consummatus in breui multa tempore CHRISTVS expleuit, simul iuuenis & antiquus dierum, florem iuuentutis cum senectæ infirmitate coniunxit; & ex infirmitate mortuus est, vt ^{Sympathia Christi & Simeonis Artificum ferenda senectæ.} infirmos ac debiles senes ad tolerantiam passionis suo exemplo concitaret. Concitauit SIMEONEM,

bonum senem : qui viris ætate prouectis proponitur in speculum , vt crucem senectæ ferentes , eiusque vestigiis inhærentes , CHRISTVM sequantur.

CRUX SIMEONIS, Crux senectutis.

Crux senectutis instrumentum artis bene viuendi.
Psal. 89,
10.

Senectæ res quædam molesta est , & crux ita fastidiosa , vt dixerit Rex Dauid , *Anni nostri sicut aranea meditabuntur , dies annorum nostrorum in ipsis septuaginta anni. Si autem in potentatibus, octoginta anni: amplius eorum, labor & dolor.* Nulla quidem ætas sine labore est : laboriosæ ætates sunt infantia , pueritia , iuuentus , & senectus ; ad quam crucem , quasi per quosdam gradus difficiles ac molestos , ascenditur. Augustinus lib. II. de Verbis Domini Serm. I. & libro 50. Homiliarum , Homil. 22. *Quia mortales sumus, inter casus ambulamus ; si vitrei essemus , minùs casus timeremus. Quid fragilius vase vitreo ? Et tamen seruatum durat per sæcula. Etenim si casus vitro timetur , senectus ei & febris non timetur. Nos ergo fragiliores & infirmiores sumus , quia & casus omnes , qui non cessant in rebus humanis , fragilitate utique nostra quotidie formidamus. Et si ipsi casus non accidant , tempus ambulat , vitat homo ictum ; numquid vitat exitium ? Curandum verò seni est , vt suæ senectæ crux egena fructuum non sit. Habeat præ oculis SIMEONEM , & simul senescen-*
tem

Excitatio laborantis.

tem iam Augustinum, & secum loquentem lib. de Duodecim abusio. cap. 12. *Plus omnibus, inquit, religioni dare operam senibus competit, quos presentis seculi florida ætas transacta deseruit: sicut namque in lignis ipsa reprobæ arbor comparet, quæ post flores fructus cultori suo non exhibet; sic & in hominibus reprobus est, quem flos iuventutis deseruit, & tamen in sui corporis senectute bonorum operum fructus proferre parui pendit.*

CRUX SIMEONIS, Crux ægrotantis.

Senectus ipsa morbus est, ac proinde prouectus Instrumentum artis bene moriendi. ætate vir tunc incipit malè habere, cum senectutem ingreditur. Quod si postea contraxerit ægritudinem, illa ætatis morbo accedit, non succedit. Accessit SIMEONI noua crux, sed non successit. Et quidem Paulus in senio suo dicebat: *Ego enim iam delibor, & tempus resolutionis meæ instat.* Libandus in martyrio Paulus erat, qui iam in senio suo delibabatur. 2. Tim. 4, 6.

Sub veste lacera & fracta corpus validum & robustum est, & sub carne annosa & trita, quæ vestis Excitatio agrotantis. instar est animæ, fortis ac vegeta anima existat, vt prouectus ætate senex lecto affixus agat mysticum SIMEONEM, qui senectutis canis floruit, & fructus gratos crucifixus protulit, & obtulit. Quisquis præ nimia senectute laborat, & affixus lecto iacet, habet quò

56 SACRI SANCTVARIi CRVCIS PARS I.

quò conuertat oculos suos, & vnde se in fenestra sua soletur. Contempletur SIMEONEM non solùm decumbentem in crucis lecto, sed cruci CHRISTI incumbentem, atque dicentem: *Virga tua, & baculus tuus, ipsa me consolata sunt.* Cùm pueris & iuuenibus crux CHRISTI virga quædam leuis sit, & senibus iam ætate prouectis fortis baculus, cui innitantur, existat, discat qui confectus senio iacet, non solùm crucem suam cum CHRISTO ferre, sed etiam eidem cruci inniti, & loco baculi vti, vt quod vitæ lassæ ac fessæ reliquum est, perficiat. *Cor suum dabit in similitudinem picturæ*, considerabit imaginem crucifixi SIMEONIS; ad eius exemplum se componet, & patientiâ suâ cursum vitæ suæ conficiet.

Leuamen laborantis & ægrotantis.

*Virtus Eu-
charistia.*

R Ex gloriosus primos omnium participes Sacramenti sui Presbyteros facit; & Presbyter est, qui Missarum solemnia celebraturus in ingressu altaris dicit: *Introibo ad altare Dei, ad Deum qui lætificat iuuentutem meam.* Hæc vis venerabilis Sacramenti est, vt Presbyteris, ac senibus annis ac laboribus oneratis, animos iuueniles afferat. Cùm ergo CHRISTVS ad Corporis & Sanguinis sui pretiosum libamen pariter omnes vocat, *Venite ad me omnes, qui laboratis,*

boratis, & onerati estis, & ego reficiam vos, seniores in primis accersit, vt tanti virtute Agni reflorescant ac iuuenescant. Accede Presbyter, accede senex ad Sacramentum, & renouabitur *vt aquila iuuentus tua.* Psal. 102. Aquila in altum volat; & anima, quæ ex vi Eucharistiae renouatur, post sumptionem sacri Viatici sublimem edit volatum, & ad cæli cacumina ascendit. *Viaticum.*

Gloriosum opus Artis Crucis & patientiæ,
Aurea & aureola corona.

CONSTITUIT Deus in tabernaculo plenam panibus, ornatam coronis & corollis aureis mensam, imaginem altaris summi, quod Presbyteris & senioribus commissum est, vt non solum tractent de mysteriis Eucharisticis, sed agant de coronis etiam aureis, quæ sanctæ & venerabili ipsorum senectuti sunt decretæ. Quod si senectus grauis est, acerbato martyrio non absimilis, meminerint esse seniores, quos insignitos aureis coronis antiquo dierum CHRISTO assidentes cap. 4. Apocal. contemplatus est Ioannes: *Et in circuitu sedis sedilia viginti quatuor, & super thronos viginti quatuor seniores circumamicti stolis albis, & in capitibus eorum coronæ aureæ.* Deus, qui in singulis ætatis gradibus coronare voluit homines, ætatibus singulorum varios annexuit labores, quorum

*Honor alie
artem be-
nè viuen-
di & mo-
riendi.
Exod. 25.*

*Aureola
senum.*

H

rum

rum sancta tolerantia dignos se efficerent cælesti regno. Verùm enimuerò cùm seniores maiore præceteris præmio cumulandos præfinisset, maiorem crucem laborum, dolorum & morborum apposuit prouectis & grauatis annis, vt proluxa eorum patientia maioris gloriæ coronas adipisceretur. Vnde Basilii Magnus senex Epist. 71. quæ est ad Alexandrinos, scribit: *Corpus habeo diuturno morbo confectum, ita vt nec è lecto quidem descendere queam.* Cùm esset senili morbo afflictatus, solabatur se bonus senex, & alios sibi similes consolabatur, sursum oculos attollens, vbi viginti quatuor seniores regnabant pariter & triumphabant, quorum contemplatione & ceterorum Beatorum recreatus, in eadem Epistola ait: *Expectant nos, fratres, Martyrum corona, parati sunt Confessorum chori, vt manus nobis porrigant, inque numerum suum nos recipiant.* Hanc considerationem versabat animo Seraphicus Patriarcha, qui positus in extremis, extrema hæc protulit verba; *Me expectant iusti, donec retribuas mihi.*

*Extrema
verba mori-
entis.*

Proferatur nunc in publicum sancti DIONYSII Episcopi exemplum; in quo, tamquam in præclarissimo speculo, forma scientis laborem & infirmitatem conspicitur.

EM-



Si nequijt mea lingua satis diuina probare
 Dogmata; quod superest, mors generosa probet.

EMBLEMATICA IMAGO. VII.

S. DIONYSII EPISCOPI CRVCIFIXI

EXPLICATA.

DIONYSIVS Areopagita, diuinus scriptor, Surius in Octobr. Baronius tom. 1. Martyr verò diuiniore, sub Hadriano Imperatore flagellis Parisiis tunditur, flammis ac feris obiicitur, à quibus non lædatur: mox in crucem attollitur, & inde depositus capite plectitur, quod ad duo millia passuum propriis manibus deportat. Cælestia mysteria, quæ raptus in cælum didicit à cælesti CHRISTO Paulus, hæc eadem à Magistro suo Paulo didicit in terris DIONYSIVS. Qualis Paulus, talis extitit & DIONYSIVS. Licet sublimibus cælorum arcanis imbutus Paulus esset, scientiam tamen CHRISTI crucifixi tanti faciebat, vt quasi immemor ceterarum rerum quas nouerat, nihil aliud se scire nisi CHRISTVM, 1. Cor. 2, 2. & hunc crucifixum, fateretur. Fatebatur & DIONYSIVS, qui sola cruce contentus, sacramenta illa sublimia, quibus antea discendis atque docendis sedulus incubuerat, quasi minimè curaret, crucem CHRISTI solum curat, crucem amplectitur. Am- Sympathia Christi & Dionysij Artificum disciplina laboriosa. Heb. 5, 8. plectitur crucem, in qua Rex ipse gloriosus *didicit*

ex iis , quæ passus est. Didicit diuinus Rex , Paulum docuit , Paulus diuinum DIONYSIVM instituit & erudiuit : nos DIONYSIVS informat , nos instruit , diuini speculi instar nos componit.

CRUX DIONYSII, Crux scientiæ Sanctorum.

Eccle. 1,
18.

Crux scien-
tiæ Sancto-
rum in-
strumen-
tum artis
benè vi-
uendi.

Heb. 12,
11.

Sap. 10,
10.

Excitatio
laboran-
tis.

Heb. 12,
11.

Q*ui addit scientiam , addit & laborem.* Maiori scientiæ maior labor correspondet. Omnes dum viuimus in schola sumus , & rerum cognitiones acquirimus , & non sine magno labore , quemadmodum scribit Paulus : *Omnis disciplina in præsentiquidem videtur non esse gaudiij , sed mæroris.* Laboriosa CHRISTI schola , laboriosa Sanctorum scientia , quæ in vna crucis sapientia & experientia consistit. *Iustum deduxit per vias rectas , & ostendit illi regnum Dei , & dedit illi scientiam Sanctorum.* Bernardus in hæc verba, *Scientia*, inquit, *Sanctorum est, hîc temporaliter cruciari , & delectari in æternum , & in contrarium scientia malorum relabitur.* Ergo qui mysticus DIONYSIVS est , & ad culmen arcanæ scientiæ Sanctorum venit , voluptatem non quærit , sed dolorem , cùm audiat Paulum dicentem : *Omnis disciplina in præsentiquidem videtur non esse gaudiij , sed mæroris.*

Crux

CRUX DIONYSII, Crux ægrotantis.

EX arbore scientiæ boni & mali morbum natura contraxit, & ex illius arboris fructu pri-^{Instrumentum artis bene moriendi.} mæ corporum nostrorum ægrotudines promanarunt. Nouimus tunc temporis quid morbus esset, cum antea nesciremus. Qui iacet in lecto vt laboret, nec cogitat de æternitate, lectum sibi ex illâ arbore construxit, & in eo infirmus iacet. Qui temporaliter cruciatur, & per cruciatus ægrotudinis nouit se ad æternitatem disponere, Sanctorum scientiam profitetur, & lectum sibi ex arbore vitæ componit, in quo DIONYSIVS decubuit. Hæc scientia Spiritus sancti, de qua Bernardus de Septem donis cap. 7. dicit: *Septimum donum est Spiritus sapientiæ, quidam diuinus sapor, ac suauissimus gustus. Unde Psalmista: Gustate, & videte, quoniam suavis est Dominus. Qui* ^{Psal. 33. 9.} *mentem pacificam & serenam habent, de supernis dulcius sapiunt, & subtilius vident. Nam quò quisque patientior, eò probatur esse sapientior. Vnde Salomon: Doctrina* ^{Prou. 9. 11.} *virum per patientiam dignoscitur. Consonat sibi Bernardus cap. 3. Vera, inquit, scientia est, scire nos mortales, & caducos, & fragiles esse, & in hoc exilio & in hoc ergastulo, in hac peregrinatione, in hac valle lacrymarum dolendum & lugendum esse. Laudabilis ab hac scientia*
æger

Excitatio
agrotan-
tis.

æger Eudoxius est, ad quem Epist. 118. apud Basilium scribit Nazianzenus in hæc verba: *Benè habet, quòd in afflictionibus philosopharis, multisque factus es exemplar tolerantia in rebus tristibus; & quemadmodum ad optima quæuis corpore, cum rectè valebas, es usus; ita & nunc illo dextrè vteris, quandoquidem imbecillis cum sis, non es otiosè, vt ita dicam, otiosus: philosopharis enim, & quod Diogenem olim febricitantem, inque febrili calore tolerantem dixisse ferunt, hoc & ipse visendum exhibes cum in corpore, tum in anima.* Collaborabant, & simul ægrotabant D. Bernardus, & vitæ eius scriptor, & ambo præfatæ scientiæ vacabant. ait enim historiæ auctor: *Infirmi ergo ambo tota die de spiritali Physica animæ conferebamus, de medicamentis virtutum contra languores vitiorum.* Exclamat deinde ipse: *Deus bone, quid mihi boni contulit illa infirmitas, feriæ illa, vacatio illa!* Crux cathedra DIONYSIO fuit, in qua diuinam suam doctrinam perfecit & consummauit; nec quidem sine virtute patientiæ perficere potuisset, cum sit scriptum Prouerbiorum cap. 9. *Doctrina viri per patientiam noscitur.* Ergo qui Pastor & doctor est, cum iacet in lecto æger, è lecto cathedram construat, & sapientiæ suæ sociam patientiam adiungat, quandoquidem verum est id quod ait Augustinus libro de

de Patientia, cap.6. *Patientia est comes sapientiae, non famula concupiscentiae.*

Leuamen laborantis & ægrotantis.

R Ex gloriosus, quam scientiam in cruce docuit, eandem prorsus in altari suo docet: sed in cruce plenam afflictione atque dolore, in altari verò decoratam & ornatam dulcedine ac voluptate, ut qui socij sunt passionis in laborum & morborum inæstitudine, socij sint consolationis, quæ datur & capitur in sacrosancta Eucharistia: Ergo, qui affixi sunt CHRISTI cruci, & discunt ex tormentis quæ patiuntur, vocantur ad Communionem, vocantur ad Agni consolationem, *Venite ad me omnes, Matth. 11, qui laboratis, & onerati estis, & ego reficiam vos.* Fructus crucis Eucharistia est, & cui benè sapit fructus, placeat arbor necesse est. Hinc fit, ut accepto iam Viatico, viri sancti maiore cum affectu deuotionis sacram CHRISTI crucem appetant, accipiant, & amplectantur.

Gloriosum opus Artis Crucis & patientiæ,
Aurea & aureola corona.

Mensa Eucharistica est tota diuina & Theologica, cuius scopus est reddere Theologos hono-
I mines,

Virtus Eucharistia.

Matth. 11, 28.

Viaticum.

*Honor alit
orem be-
nè viuen-
di & mo-
riendi.*

mines , diuinos condere similes planè DIONYSIO, qui diuinum egit Theologum in crucis cathedra, quam viuens & moriens occupauit. Semper egit de maiestate diuina , in quam sacra Theologia collimat. Contemplabatur in martyrio suo Deum , & cognoscebat in eo suam splendere coronam , auream simul & aureolam , cuius forma fuerat fabricata in antiquo tabernaculo. Diuinus quidem Theologus patiens est : qui dum patitur martyrium, vel simile quid martyrio , agit de Deo & cum Deo, cui dicit Ecclesia sancta:

*Rex gloriose Martyrum,
Corona confitentium,
Qui respuentes terrea,
Perducis ad caelestia.*

*Aurem benignam protinus
Appone nostris vocibus , &c.*

*Aureola
scientia
Sancto-
rum.*

Corona confitentium est ; & de eius confessione si quis agat, de propria corona agit, cuius contemplatione & expectatione recreatus , labores ipsos non curat, nec sentit ; & si sentit, non ægrè fert ægritudinem. Quòd si lecto affixus , mysticus DIONYSIUS existat , & pacato animo in acerbitate pœnarum se planè gerat , diuinus censendus est æmulus Regis CHRISTI, qui licet infirmitate doleret , maiestate

iestate diuinitatis in eadem cruce eius tormentis & pœnis superior omnino erat. Est ergo vox illa hominum diuinorum : *Quis nos separabit à charitate* Rom. 8, *CHRISTI ? tribulatio ? an angustia ? an fames ? an nudit* ^{35.} *tas ? an periculum ? an persecutio ? an gladius ? (sicut scriptum est : Quia propter te mortificamur tota die : estimati* Psal. 43, *sumus sicut oves occisionis.) Sed in his omnibus superamus* ^{22.} *propter eum qui dilexit nos.*

Considerabat se humanum esse Dauid, cùm diceret, *Non est sanitas in carne mea*, & deplorans suam Psal. 37, 4. *miseriam clamaret, Miser factus sum, & curuatus sum* Verf. 7. *usque in finem.* Non iam humanum, sed hominem se diuinum deprehendebat, & aiebat, *In Deo meo* Psal. 17, *transgrediar murum.* Magister DIONYSII loquebatur ^{30.} vt humanus, cùm assereret, *Infelix ego homo, quis* Rom. 7, *me liberabit de corporis morte huius ?* Loquebatur vt ^{24.} diuinus, cùm affirmaret, *Omnia possum in eo qui me* Phil. 4, 13. *confortat.* Mysticus Paulus extitit diuinus DIONYSIVS, cuius præclarum exemplar datum & visum proponitur ægrotanti, vt nouerit sapienter in Deo obire, & è viuis benè sperans abire. Sic abiit, sic obiit princeps omnium Theologorum, diuinus Paulus, cuius abscissum caput ter IESV nomen pronuntiauit, ter scilicet, in cultum & honorem sanctissimæ Trinitatis, cuius sublimis scientia diui-

*Extrema
verba morientis.*

num reddit Theologum : & vt Theologus mereretur Almarus Abbas , dixit iam obiturus ministro : Affer mihi epistolam S. Leonis ad Flavianum ; & cùm legeretur articulus , qui est de Deo trino & vno , exclamauit : *Sic credo , ô Trinitas ineffabilis , ita confiteor Deus omnipotens : ita de te sentio , Fili Dei* CHRISTE IESV : *sic de te intelligo Spiritus sancte eterne Deus , atque ita vnum Deum in Trinitate , trinumque in vnitatem confiteor.* Dixit , & excessit.

Proferatur nunc in publicum sancti SIXTI Pontificis exemplum ; in quo , tamquam præclarissimo speculo , fulget imago ferentis mundi & morbi onus.





Quid frustra infamū vis mergere funere vitam ?
8 Non poteram fato nobiliore frui .

EMBLEMATICA IMAGO VIII.
S.SIXTI PONTIFICIS CRVCIFIXI
EXPLICATA.



VB Decio & Valeriano Imperatoribus ^{Prudent.}
sanctus SIXTVS Papa crucis patibulum ^{Hymno 2.}
subiit. Consule Prudentium Hymno 2.
de sancto Laurentio:

*Fortè hoc Sacerdos dixerat,
Jam SIXTVS affixus cruci,
Laurentium flentem videns
Crucis sub ipso stipite:
Desiste discessu meo
Fletum dolenter fundere,
Præcedo frater, tu quoque
Post hoc sequêris triduum.*

Culmen & apex tiaræ Pontificalis, sicut in effigie
proponitur, crux est, & simul testatur, virtute pas-
sionis suæ regnum summum, medium, & infimum
sibi CHRISTVM comparasse, *ut in nomine IESV om-* Phil.2,10.
ne genu flectatur, celestium, terrestrium, & infernorum.
Hoc triplex imperium & regnum, PETRO, SIXTO,
ceterisque Pontificibus commissum est: in cuius rei
testimonium definit in crucem tiara, ut supremum
Ecclesiæ

Sympathia Christi & Sixti Pontificis ferendi regiminis Orbis. Isai. 9, 6.
 Ecclesiæ dominatum in cruce natum, & sine cruce esse non posse moneantur. Principatus summi Pontificis CHRISTI crux extitit. *Factus est principatus eius super humerum eius.* Quotquot igitur eius succedunt loco, & ad regimen vniuersale assumuntur, ad regnum & crucem, ad honorem & onus simul vocatos se esse arbitrentur. Sedes Apostolica crux honoraria est, in qua fuit gloriosus Rex, & in qua SIXTVS gloriosus decedit. Pulchrum speculum & Emblema proponitur summi honoris, & grauis oneris. *Minuit laborem ponderis spes præmiorum*: vt Hieronymus Epist. ad Cyrillum scribit.

CruX SIXTI Pontificis, CruX regiminis
totius Ecclesiæ.

CruX sancti regiminis, instrumentum artis bene viuendi.
Pontificalis tiara crux oneris & honoris est, in quam apprimè cadit illud Chrysostomi Homil. 66. ad populum: *Non ita corona caput circumdat, sicut animam sollicitudo.* Tantus quantus orbis est, tanta est sollicitudo Pontificum, quorum humeris totus mundus innititur & incumbit. *Domini sunt cardines terræ, & posuit super eos orbem.* Nemo meliùs quam CHRISTVS nouit, quanti ponderis & oneris esset crux regiminis Ecclesiæ, cui ferendo parem se solum inuenit: *Factus est principatus eius super humerum*

humerum eius. Secundus à CHRISTO Pontifex nomen à Petra accepit. *Tu es Petrus, & super hanc petram edificabo Ecclesiam meam.* Constructa domus non tam est honor, quàm onus positi fundamenti, supra quod fabrica domus assurgit. Quidni onus Ecclesiæ graue Pontifici sit, cùm eius rationem reddere teneatur? *Cui multum datum est, multum queretur ab eo; & cui commendauerunt multum, plus petent ab eo.* Hinc sæpè accidit, vt ouilis Ecclesiastici Pastores summi reddendæ rationi iam proximi, maluissent vltimum Ecclesiæ locum, quàm primam sedem occupasse.

Matth. 16.
18.Excitatio
laboran-
tis.Luc. 12.
48.

Crux SIXTI Pontificis, Crux ægrotantis.

Coronatus SIXTUS apparet, & affixus crucis lecto: & quidem cùm Pontifex coronatur, leuis quædam stupa comburitur, & alta voce clamatur, *Pater sancte, sic transit gloria mundi.* Quid homo? quid humana gloria est? leuis quædam stupa est concipiens lumen, & in fimum euanescens. Accensa stupa, vita mortalis est: deficit stupa, cùm valetudo deficit; & cùm deficit vita, stupa in fimum abit. Interim tamen, more SIXTI, iacens in lecto æger gloriosâ coronâ ornatur, cùm Sermone de Iacob & Esau dixerit Augustinus: *Multi coronati*

Instrumen-
tum artis
benè mo-
riendi.Excitatio
ægrotan-
tis.

K

sunt

*sunt in amphitheatro pugnantes ad bestias , multi in lecto
vincentes diabolum coronantur. Iacebat in lecto S. Ba-
silius , & in eo pro corona decertabat , sicut & ipse
Epist. 60. declarat : Sine namque pœnas peccatorum dam-
no , valebunt ad hoc flagella , vt posthac iram Dei , que
imminebat , auertant : siue in certaminibus , quæ pietatis
gratia decertamus , per tribulationes corroboramur , iustus
athlotheta , vt non sinat nos tentari supra id quod ferre pos-
sumus , sed pro toleratis iam laboribus patientiæ nobis &
spei in ipsum coronam reddat. Felix æger , qui cùm sit
affixus lecto , de regno cæli & eius coronis cogitat.
Haud dubiè qui cum variis morbis luctatur , pro
multis coronis certat , & similis SIXTO euadet.
Quotus quisque seipsum regit , & spiritaliter se gu-
bernat , sibi ipsi , qui paruus mundus est , Rex &
Pontifex est , dignus tiara pontificali , quæ tres co-
ronulas , vt vides , secum importat. Debentur tres
laureolæ Martyribus, Doctoribus, & Virginibus, &
totidem ægris debentur , si patienter se in grauibûs
morbis gerant. Quid enim aliud terribilis morbi
tormentum , nisi quædam species martyrij ? Qui
sic torquentur , sacros Martyres referunt , & cum
ipsis coronantur. Multi quippe coronati sunt in
amphitheatro pugnantes ad bestias , & multi in le-
cto iacentes diabolum vincentes coronantur. Doctri-*

na viri per patientiam noscitur. Vnde efficitur, vt quis-
 quis in lecto patienter se gerat, procedat ita sapien-
 ter, vt sibi Doctoratus laureolam promereatur.
 Quod si integritas virginalis in virginibus laurea-
 tur, laureabitur patientia in ægris, vt euadant per-
 fecti & integri, quales Iacobus desiderat. *Patientia*, Iacob. 1, 4.
inquit, opus perfectum habet, vt sitis perfecti et integri.
 Vocatur ad tres laureolas æger, qui mysticus SIX-
 TVS est, quem vt in lecto referat, *Cor suum dabit in* Eccli. 38.
similitudinem picturæ. 28.

Leuamen laborantis & ægrotantis.

R Ex gloriosus toti mundo, cuius potestas in *Virtus Eu-*
 manu eius sita est, se in cibum & potum de- *charistia.*
 dit, vt qui totum mundum sustinet, & in eius la-
 borat regimine, recurat ad CHRISTI Carnem &
 Sanguinem, cuius virtute tanto oneri ferendo par
 existat, animo superior euadat. Euadet mundo, &
 quod amplius est, euadet seipso superior, qui se sa-
 num & ægrum epulo sacrosancto Agni refecerit.
 Hæc est refectio Eucharistiæ, quam summus & æ-
 ternus Pontifex offert, cum dicit: *Venite ad me om-* Matth. 11,
nes, qui laboratis, & onerati estis, et ego reficiam vos. 28.
Vos, inquam, qui cardines mundi estis, & vestris
humeris totum Orbem sustinetis. Mos est, vt fa-
 K 2 cien-

ciente solemniter iter Pontifice, præcedat venerabile Sacramentum. Et quidem satis celebre, satisque solemne iter in cælum est, cùm decedente è viuis homine, & ad astra contendente, sacra præmittitur *Viaticum*. Eucharistia. Tunc præmittitur, cùm sacrum Viaticum percipitur.

Gloriosum opus Artis Crucis & patientiæ,
Aurea & aureola corona.

*Honor alit
artem be-
nè viuen-
di & mo-
riendi.
Exod. 25.*

ANte summi Sacerdotis oculos structa & instructa erat in tabernaculo typica Eucharistiæ mensa, & in ea magna & parua corona, vt nosset Pontifex, sibi non solùm paratam & instructam mensam, sed aureas constructas etiam coronas, si merita digna suppeterent. *In veste poderis totus erat orbis terrarum*, & pro tanto mundi onere leuando prouiderat Deus de sacra annona; & pro labore remunerando, aureas futuras in cælo coronas ostendebat & offerebat. Summus Pontifex SIXTVS suis humeris impositum totum planè orbem cognoscebat & sentiebat, cumque ab hac tam graui cruce ad aliam, quam passus est in martyrio, iniuste fuerit condemnatus, vt leue onus tanti ponderis redderet, Eucharistia se muniebat, & vt suaue martyrium efficeret, auream & aureolam præ oculis patiens

*Aureola
Pontificis.*

tiens habebat. Summus Pontifex Gregorius erat, & hac eadem tractus consideratione dicebat Hom. 37. in Euangelia, & quidem adhuc in vnius Martyris solemnitate per vniuersam Ecclesiam loquitur in hæc verba: *Si consideramus, fratres charissimi, quæ & quanta sunt, quæ nobis promittuntur in calis, vilescunt animo omnia quæ habentur in terris. Terrena namque substantia supernæ felicitati comparata, pondus est, non subsidium. Temporalis vitæ æternæ vitæ comparata, mors est potius dicenda, quàm vita. Ipse enim quotidianus defectus corruptionis quid est aliud, quàm quedam prolixitas mortis? Quæ autem lingua dicere, vel quis intellectus capere sufficit, illa supernæ ciuitatis quanta sint gaudia; Angelorum choris interesse, cum beatissimis spiritibus gloriæ conditoris assistere, præsentem Dei vultum cernere, incircumscriptum lumen videre, nullo mortis metu affici, incorruptionis perpetuæ munere letari? sed ad hæc audita exardescit animus, iamque illic cupit assistere, vbi se sperat sine fine gaudere. Sed ad magna præmia perueniri non potest, nisi per magnos labores. Unde & Paulus egregius 2. Tim. 2, 5. prædicator dicit: Non coronabitur, nisi qui legitimè certauerit. Delectet igitur mentem magnitudo præmiorum, sed non deterreat certamen laborum. Hæc oracula SIXTI è cruce, hæc monita Gregorij è lecto, cui ægra semper valetudine affixus erat, hæc vtriusque sententia,*

2.Tim.2,5. *Non coronabitur, nisi qui legitime certauerit; hæc vtriufque conclusio, Delectet igitur mentem magnitudo præmiorum, sed non deterreat certamen laborum.* Conclufit ad hanc formam suum martyrium Pontifex Pontianus, qui iam humi prostratus, vt manu carnificis cæderetur, perorauit: *Gratias tibi ago omnipotens Deus, qui me ad hanc horam perduxisti, vt per agonem passionis diabolum confunderem in tuo nomine: & tu nunc Domine suscipe spiritum meum in pace.*

*Extrema
verba morientis.*

Proferatur nunc in publicum sancti MACARII Patriarchæ exemplum; in quo, tamquam præclarissimo speculo, ferentis onus mortalitatis & morbi forma conspicitur.





9 *Remigio alarum virtus caua nubila findit:
Nunc age, si potis es, corpora fige solo.*

EMBLEMATICA IMAGO IX.

S. MACARII PATRIAR. CRVCIFIXI

EXPLICATA.

SANCTVS MACARIVS Patriarcha Antio-
 chenus iacens in terra , & totus in ea ex-
 tensus in crucis formam , clauis affixus
 est. Accidit verò, vt terra ipsa clauos à se
 reiiceret , nec tamen Iudæorum Saracenorumque
 MACARIVM crucifigentium ira conquieuit. Affi-
 xus terræ MACARIVS , & viuebat , & moriebatur:
 & terreo nos corpori innexi , dum mortales sumus,
 viuimus simul & morimur : *Omnes morimur, & qua-*
si aqua dilabimur : singulis horis , singulis momentis
 vitæ iacturam facimus , & lenta morte perimus.
 Ne terræ affixi terræ afficeremur , mortalem vitam
 nostram Deus reddidit onerosam. Consonat Chry-
 sostomus Homil.6. ad Antioch. *Ne igitur & nos ter-*
ræ affixi , & præsentibus inbiantes torpeamus , & futu-
rorum obliuiscamur , vitam Deus nobis fecit laboriosam.
 Constituit in vita mortali crucem, cùm scriptum sit:
Homo nascitur ad laborem , sicut avis ad volatum. Ela-
 tus igitur in cruce CHRISTVS, sicut aquila prouocat
 ad volandum filios ac pullos suos, vt, relictis rebus

Surius ex
 Anonymo
 in Aprili.

2. Reg. 14.
 15.

Iob 5. 7.
 Sympathia
 Christi &
 Macarij
 Artificum
 ferenda
 mortali-
 tatis.

L

ter-

terrenis, superiora bona affectent, & more MACARII, funestæ terræ vitæque mortali renuntient, ad hoc se speculum componentes.

CRUX MACARII, Crux mortalitatis humanæ.

Crux mortalitatis, instrumentum artis benè viuendi.

Psal. 119, 5.

Rom. 7, 24.

Phil. 1, 2. Excitatio laborantis.

Psal. 54, 7.

GRaue iugum, crucem magnam imposuit Deus super omnes filios Adæ, quos terreos & luteos condidit, & terræ simul affixit. Cruci mortalitatis suæ adstrictus gemebundus Dauid ait: *Heu mihi, quia incolatus meus prolongatus est; habitavi cum habitantibus Cedar, multum incola fuit anima mea.* Hanc eandem crucem Apostolus patiebatur, & exclamabat: *Infelix ego homo, quis me liberabit de corpore mortis huius?* Optabat Paulus, ut clavis è terra diuulsis, facultas sibi auolandi concederetur. Cupiebat dissolui, & esse cum CHRISTO. Cui terra & terrea vita crux est, auolandi sursum inest desiderium, continere se non potest, nec contineri clavis, quò minus mysticus MACARIUS sit, & exclamet: *Quis mihi dabit pennas sicut columbæ, & volabo, & requiescam?* Carnea columba est, nec tamen caro impedit, quò minus in altum volet. Pulchrè Basilii Epist. 166. *Qui namque curis huius vitæ admodum sunt occupati, instar auium carnosarum sunt, quæ frustra alata humi cum pecudibus detinentur.*

Crux

CRUX MACARII, CRUX ægrotantis.

CVM valet homo mortalis , ita super terram Instrumen-
tum artis
benè mo-
riendi.
degit, vt quasi clavis adstrictus esse videatur.
Nequit à rebus terrenis auelli, earum affectionibus
alligatus : superuenit ægritudo , & omnes illos af-
fectus voluptatum, diuitiarum, & honorum, qui-
bus fortiter tenebatur, seponit & abiicit. Iacet in
lecto MACARII, qui cùm terræ affigeretur, clauos
ferreos, quibus constrictus erat, reiecit à se, & se in
libertatem asseruit, qui antè captiuus erat. Captiuus
ille erat, qui & dicebat: *Adhæsit pauimento anima mea.* Psal. 118,
25.
Morbum incurrit: *Non est sanitas in carne mea.* EX- Psal. 37, 4.
pertus liberationem, & à nexibus liber cecinit: *Di-* Psal. 115,
16.
rupisti vincula mea, tibi sacrificabo hostiam laudis. Felix
illa ægritudo est, quæ hominem eximit à vinculis
terrenarum rerum. Quæ autem hæc vincula sint,
scribit Epist. 39. Augustinus: *Vincula huius mundi aspe-
ritatem habent veram, iucunditatem falsam; certum dolo-
rem, incertam voluptatem; durum laborem, timidam quie-
tem; rem plenam miserie, speciem beatitudinis inanem.*
Graue iugum, & simul vinculum filiorum Ada-
mi est: vtrumque tunc præcipuè homo experitur,
cùm lecto affixus ægrotat. Ægrotabat virgo Elisabe-
tha, &, vt eius tradit historia, postulauit enixè à

CHRISTO, *vt ab intolerabili vinculo languoris sui misericorditer eam absolueret. Respondit ei CHRISTVS: Cito venio, & absoluo te.* Graue iugum mortalitatis humanæ, cùm dixerit S. Ambrosius Sermone 7. in Iob: *Tantis malis hæc vita repleta est, vt comparatione eius*

*Excitatio
agrotan-
tis.*

mors remedium putetur esse, non pæna. Quisquis in terra degit, laborat, & ægrotat, MACARIVM sibi non modò considerandum, sed etiam imitandum proponat. Consideret qualis genitus sit conditionis Adæ

*I. Cor. 15,
47. 48.*

filius. Primus homo de terra terrenus, qualis terrenus, tales & terreni. quorum singulis competit illa vox,

*Psal. 118,
25.*

Adhæsit pavimento anima mea. Consideret, qualis euadat is, qui vestigia sequitur venientis de cælo CHRI-

*I. Cor. 15,
47. 48.*

STI, vt cælestes nos omnes reddat. Secundus homo de cælo est cælestis: qualis cælestis, tales & cælestes. Primus ille è cruce auolauit, & in cruce & lecto iacentes ad volandum prouocauit. Cælestis MACARIVS est, qui sursum æger & sanus aspirat, & simul suspirat. MACARIVS imitator CHRISTI est: nos MACARII, sicut & ille CHRISTI, vt nullis nexibus, nullis terrenis vinculis detineri patiamur, quò minùs superna affectemus. Præit MACARIVS, & vt illum sequatur patiens morborum & laborum, *cor suum dabit in similitudinem picturæ.*

*Eccli. 38,
28.*

Leuamen laborantis & ægrotantis.

R Ex gloriosus nobiscum in terra mansit, vt, *Virtus Eucharistia.*
 cum sacram & cælestem percipimus Eucharistiam, non quæ super terram sunt, more mortalium, quæramus, sed quæ super cælum sunt, immortalium ritu affectemus: ac proinde facta iam consecratione, sustollitur in altum Agnus, qui nos ad cælestia vocat; &, ne deficiamus in via, sacro nos confirmat cibo, ad cuius esum nos omnes mortales excitat. *Venite ad me omnes, qui laboratis, & onerati estis, & ego reficiam vos.* Mortalem agebat Elias, cum sub vmbra iuniperi totus fatigatus succumberet: verum cum mysticum panem Angelicis manibus ministratum gustasset, immemor mortalitatis humanæ, de terra, in qua iacebat, surrexit, nec quieuit, donec in montem Horeb ascenderet.

Matth. 11,
28.
Viaticum.
3. Reg. 19,
4.

Gloriosum opus Artis Crucis & patientiæ,
 Aurea & aureola corona.

A Vrum è terra gignitur, & tamen suo splendore refert cælestem Solem. Corona digni sunt aurea, qui cum è terra suam originem ducant, terrena non sapiunt; sed sapiunt illis cælestia, cum & ipsi cælestes sint. *Qualis celestis, tales & celestes.* Cum

Honor alie
artem bene
viuendi & moriendi.

1. Cor. 15.
48.

Ioan. 6,
59.

*Aureola
mortali-
tatis.*

*Extrema
verba mo-
rientis.*

Psal. 113,
17.

sint tales non naturæ conditione, sed sublimitate morum, aluntur cibo cælitus dato. *Hic est panis, qui de cælo descendit.* Aluntur cælesti epulo, ut inde vires acquirant ad rumpendos carnis nexus, quibus terræ inuiti affiguntur, semelque soluti ac liberi ad aureas aspirent coronas, quæ sunt in regno cælorum laborantibus & ægrotantibus destinatæ. Sarcina mortalitatis humanæ, martyrium certè dirum, sed dignum corona vitæ immortalis, qua soluta & libera anima ornabitur. Huius martyrij finem desiderans in extremo agone positus Eugendus Abbas, ac cælestis coronæ auidus, dicebat Monachis: *Parcat vobis omnipotens Deus, qui me tanta inæqualitate constri-ctum non permittitis corporeis vinculis iam exolui. Et ideo rogo, si quid seni, si quid paternæ pietati præstatis, ne me retinete diutiùs, sed tandem transire permittatis.* Accedit & Nicolaus Tolentinas, qui assistenti sibi ministro, cum animæ & corporis instaret enodatio, adiurabat: *Vide ne cesses pronuntiare in aures meas: Dirupisti Domine vincula mea, tibi sacrificabo hostiam laudis.*

Proferatur nunc in publicum sancti NESTORIS Episcopi exemplum; in quo, tamquam in præclarissimo speculo, fulget imago ferentis mortificationem & morbum.

EM-




10. *Ne tu Neſtoreæ Neſtor certato ſenectæ;
Vitæ, quam ſequeris, præualet vna dies.*



EMBLEMATICA IMAGO X.

S. NESTORIS EPISCOPI CRVCIFIXI

EXPLICATA.

 ANCTVS NESTOR Episcopus sub Decio Surius 14. Febr. ex Martyrolog.
 Imperatore Deum vnum esse prædicauit,
 & cultum inanium simulacrorum vanum esse declarauit: quam ob causam de
 mandato Præsidis Pollionis in crucem actus, æter-
 nis annis auctus est. Mortales omnes NESTORIOS
 annos viuere concupiscimus, & vt illos acquiramus,
 necesse est vt carnem nostram crucifigamus. Assum-
 ptum probat Apostolus, & tandem concludit: *Ergo* Rom. 8. 12.
fratres debitores sumus non carni, vt secundum carnem
viuamus. Si enim secundum carnem vixeritis, moriemini;
si autem facta carnis mortificaueritis, viuetis. Crucis
 instar mortificatio carnis est, quæ mortalem in no-
 bis hominem crucifigit, vt nouus homo immorta-
 lis & æternus reuiuifcat. Totus viuus apparet in
 cruce NESTOR Episcopus, veræ mortificationis spec-
 culum, vt vel eius effigiem contemplantēs nouerint
 vitam in cruce esse. Vnde & CHRISTVS iam resusci-
 tatus gestat in manu crucem, vt sine cruce vitam
 immortalem esse non posse manifestet & ostendat. Sympathia Christi & Nestoris Artificum propria mortificationis.

M

Crux

CRUX NESTORIS, Crux mortificationis.

Crux mortificationis, instrumentum artis bene viuendi.
1. Petr. 2, 11.

Excitatio laborantis.

NEgotium satis difficile, degere in carne, & carnis ritu non viuere. Rem magnam postulat Petrus, cum dicit: *Obsecro vos tamquam aduenas & peregrinos abstinere vos à carnalibus desideriis.* Hæc prima lex mortificationis est, cui duas alias adiungit S. Bernardus Sermone de Peregrino, mortuo, & crucifixo. *Felices, inquit, qui se presenti sæculo nequam aduenas & peregrinos exhibent, immaculatos se custodientes ab eo. Abstineamus ergo à carnalibus desideriis, quæ militant aduersus animam, tamquam aduenæ & peregrini.* Peregrinus quippe via regia incedit, non declinat ad dextram, neque ad sinistram. Secunda lex mortificationis est, ut instar hominis mortui homo se gerat. Omni-
no felix mors, quæ sic immaculatum seruat, imò potius alienum facit ab hoc sæculo! sed necesse est, ut qui non uiuit ex se, uiuat CHRISTVS in illo. Hoc est enim quod Gal. 2, 20. ait Apostolus: *Viuo autem iam non ego, uiuit verò in me CHRISTVS. quasi diceret, Ad alia quidem mortuus sum, non sentio, non attendo, non curo; si quæ verò sunt CHRISTI, hæc viuum inueniunt.* Tertia lex mortificationis est, ut hominem cruci addicat, quemadmodum Paulum addixit. Audi igitur ipsum de hac tanta Gal. 6, 14. altitudine non in se gloriantem, sed dicentem: *Mihi absit gloriari*

gloriari nisi in cruce Domini nostri IESV CHRISTI, per quem mihi mundus crucifixus est, & ego mundo. Non solum, inquit, mortuus sum mundo, sed & crucifixus, quod est ignominiosum genus mortis.

CRUX NESTORIS, CRUX ægrotantis.

CRUX NESTORIS, crux mortificationis est, nec Instrumentum artis bene moriendi. dubium, quin homo per morbos & ægrotudines in eum statum reduci soleat, vt & aduenam & peregrinum, mortuum & crucifixum mundo se esse consideret. Refert NESTOREM in lecto, vt hunc eundem referat in æternitate. Qui morbo pulsatus CHRISTVM iam pulsantem per ægrotudinem sentit, non tam moriturus, quàm in æternum victurus, ad formam NESTORIS in lecto est, quemadmodum notat Gregorius Homil. 13. in Euang. Qui autem de sua spe & operatione securus est, pulsanti confestim aperit, quia letus Iudicem sustinet; & cum tempus propinquæ mortis aduenerit, de gloria retributionis hilaris erit. Hac eadem cogitatione, cum æger esset Basilii, se muniebat, quemadmodum Epist. 60. scripsit ipse: *Amplectenda enim tribulatio super tribulationem, spes super spem, adhuc modicum, adhuc modicum.* Excitatio ægrotantis. Ad istum modum alumnos suos Spiritus sanctus futurorum promissione recreare nouit. Post tribulationes enim se- Isai. 10. 25.

quitur spes. Quæ verò sperantur, è vicino subsequuntur. Nam etiamsi uniuersam hominum vitam quis obiecerit, breuissimum tamen est illius spatium respectu infiniti sæculi quod in spe nostra reconditum est. Ad nutriendam hanc spem occurrit ægro Patris instar NESTOR Episcopus, & monet vitæ lignum esse sacratissimam CHRISTI crucem, & hanc eandem esse, quam affectus morbo ipse in lecto doloris patitur. Dum cruciatur, considerare oportet, cruciatus esse vitales, qui vitam æternam afferunt. Afferunt patienti, oranti, & deprecanti: Rex gloriose, qui mortificatus carne, viuificatus autem spiritu æternitatis adiutum reserasti, exaudi preces & gemitus ægrotantis, qui variis morbis mortificatur, vt sibi vitam acquirat. Hoc votum ægrotantis NESTORIS est, & pro voto suo è ligno vitæ vitam leget, si colat ipse patientiam, quam coluit & seruauit NESTOR, cuius vel vna dies antiqui NESTORIS diuturnis præualet annis. Dies hæc æternitatis est, quam noctibus suis laboriosis virtute patientiæ transactis homo infirmus promeretur: & ne meritum suum amittat, vel diminuat, fugiat omnem impatientiam, seruet omnem tolerantiam; & vt illam semper seruet, semper illæsam inuiolatamque retineat; *Cor suum dabit in similitudinem picturæ.*

Eccli. 38.
28.

Leua-

Leuamen laborantis & ægrotantis.

R Ex gloriosus mortificatus carne, viuificatus Virtus Eucharistia. autem spiritu, æternitatis aditum reſerauit, & nobis æternæ futuræ vitæ pignus dedit & tradidit. Et quidem Eucharistia cùm sit Caro & Sanguis CHRISTI, nec carnem nec sanguinem sapiat, efficit, vt qui particeps eius est in carne, nec secundum carnem viuat. Quapropter, qui affectibus subiiciendis ac subiugandis laborant, recurrant ad Eucharisticum Agnum, acceptent sibi factam oblationem, *Venite ad me omnes, qui laboratis, & onerati estis, & ego reficiam vos.* Contendimus, dum viuimus, superbiam vitæ mortificationis gladio vincere ac superare, nec quidem possumus hanc victoriam comparare, nisi adsit Eucharistia, cuius tanta virtus est, vt Vaticum. qui illam dignè sumat, non sibi, sed Deo viuat, non Deo, sed sibi moriatur.

Gloriosum opus Artis Crucis & patientiæ,
Aurea & aureola corona.

C Vm Rex gloriosus onere crucis grauatos & afflictatos vocat ad refectionem, vocat ad mentem, in qua non solum porrigitur Eucharistia, sed etiam coronæ & corollæ proponuntur & offeruntur Honor alitatem bene viuendi & moriendi.

*Aureola
mortifica-
tionis.*

*Extrema
verba mo-
rientis.*

iis, qui nouerint persequi se, afficere se martyrio, & pretio mortificationis suæ æternam immortalitatem mercari. Reformatur hîc imago cordis & animæ voluptatum abnegatione, & carnis maceratione, in cuius studio & exercitio corona vitæ æternæ fabricatur. *Solus CHRISTVS*, vt lib. 10. in Luca cap. 9. affirmat Ambrosius, *est plena imago Dei, propter expressam in se paternæ claritudinis imitationem. Iustus autem homo ad imaginem Dei est, & propter imitandam diuinæ conuersationis similitudinem mundum hunc Dei cognitione contemnat, voluptatesque terrenas verbi perceptione despiciat, quo alimur in vitam. Vnde & Corpus CHRISTI edimus, vt vitæ æternæ possimus esse participes. Non enim victus & potus nobis præmij loco spondetur & honoris, sed communicatio gratiæ cælestis & vitæ. Vitæ cælestis & diuinæ gloriæ auidus ibat ad crucem NESTOR, & cùm esset crucifixus, tamquam è cathedra docebat, & dicebat: Filioli, stabilis sit nostra confessio ad Deum. Compatiamur ei, vt conglorificemur. Et cùm dixisset, Amen, obdormiuit & quieuit.*

Proferatur nunc in publicum sancti ASTII Episcopi exemplum; in quo, tamquam in præclarissimo speculo, ferentis amoris & morbi flammæ conspicitur.

EM.



11 *Dia mihi penitas populatur flamma medullas :
Parce rogis, potero, tortor, amore mori .*

EMBLEMATICA IMAGO XI.
S. ASTII EPISCOPI CRUCIFIXI
EXPLICATA.



ANCTVS ASTIVS Dyrrachij vrbis Episcopus, Imperatore Traiano primò cruci affixus est, flammis deinde addictus, ne crux deesset igni, nec cruci ignis deesset.

Martyrol.
Roman.
17. Iulij.

Flamma amoris diuini ligno crucis alitur, lignum-que sacræ crucis flammis charitatis ardescit. Crux amoris, & amor crucis, miro sibi modo respondent.

Fortis est vt mors dilectio. Similis morti est, quæ per Cant. 8, 6.

crucem Martyri infligitur. Confirmat hoc ipsum

Gregorius Homil. II. in Euangelia. *Rectè per Salomo-*

nem dicitur, Fortis est vt mors dilectio; quia videlicet

sicut mors corpus interimit, sic ab amore rerum tempora-

lium æternæ vitæ charitas occidit. Nam quem perfectè

absorbuerit, ad terrena foris desideria insensibilem red-

dit. Pendens ASTIVS è cruce, & ad pedem crucis

flamma, consonant inter se, & simul indicant, vt.

quemadmodum interimit corpus crux, sic etiam

ignis cælestis amoris mundanis affectibus animam

emortuam reddit. CHRISTVS ipse sic crucifixus

est, vt amorem suum ostenderet: sic amorem suum

*Sympathia
Christi &
Astij Ar-
tificum fe-
rendi flam-
mas amo-
ris.*

N

osten-

ostendit, vt crucifigeretur, quoniam nos omnes dilexit. Ad pedem crucis ASTII excitat ignem tortor, & quidem flamma charitatis flatu tribulationis accenditur. Ad hoc igitur speculum patiens se amator componat.

CRUX ASTII, Crux amoris.

Crux amoris, instrumentum artis bene viuendi.
Ephes. 3,
17.

Similes nos omnes ASTIO esse cupit ac petit Paulus: *In charitate radicati, & fundati, vt possitis comprehendere, quæ sit latitudo, & longitudo, & sublimitas, & profundum.* Quid hîc lateat, detegit Augustinus in Psalm. 103. *Fortassè crucem Domini significat. Erat enim latitudo, in quâ porrectæ sunt manus; longitudo à terrâ surgens, erat totum corpus infixum; altitudo, ab illo innexo ligno sursum, quod eminet; profundum, ubi erat crux, & ubi spes omnis vitæ nostræ.* Paulus ipse radicans & fundatus erat in charitate, & simul affixus cruci, dicebatque: *Quis nos separabit à charitate CHRISTI? tribulatio? an angustia? an fames? an nuditas? an periculum? an persecutio? an gladius?* (sicut scriptum est: *Quia propter te mortificamur tota die, æstimati sumus sicut oues occisionis.*) Mortificabatur tota die, quoniam tota die diligebat: & quidem amoris crux sic firmiter amantem tenebat, vt ab ea nulla posset vi diuelli. *Certus sum enim, ait Paulus,*
quia

Excitatio laborantis.

Rom. 8,
35.

Psal. 43,
23.

Rom. 8,
38.

quia neque mors, neque vita, neque Angeli, neque Principatus, neque Virtutes, neque instantia, neque futura, neque fortitudo, neque altitudo, neque profundum, neque creatura alia poterit nos separare à charitate Dei, quæ est in CHRISTO IESV Domino nostro. Ignis non accenditur sine labore; nec sine labore diuinus excitatur amor. Hinc sanctæ memoriæ Syncletica in Apophthegm. Patrum: *Qui ignem accendere volunt, prius fumantur, & ex fumi molestia lacrymantur.* Ita & nos oportet diuinum ignem cum lacrymis atque laboribus in nobis ipsis accendere. Etenim iuxta tritum sermone prouerbum, *Absque labore & dolore non viuitur in amore.* Crux igitur amoris crux ASTII est, qui cum diuino Ignatio exclamat: *Amor meus crucifixus est.* & cum diuo Paulo, diuino isto amore captus & virtutis ecstasticæ particeps factus, ait: *Viuo ego iam non* Galat. 2,
20. *ego, viuit verò in me CHRISTVS:* tamquam verus amator & qui excessit è se Deo, & iam non vitam suam, sed amati tamquam vehementer dilectam viuens. Hoc utique modo primi illi diuini amoris præceptores pro CHRISTO quotidie morientes, testificabantur, vti par est, & sermone & opere se nil aliud nosse neque diligere præterquam CHRISTVM, eumque crucifixum.

CRUX ASTII, Crux ægrotantis.

*Instrumen-
tum artis
benè mo-
riendi.
Cant. 2, 4.*

*Excitatio
ægrotan-
tis.*

Felix lectus ægritudinis, cui adiungitur amor diuinus, vt qui febribus ardet, ardeat magis diuino amore, & dicere queat, *Amore langueo*. Qui sic affigitur lecto, vt amanter ægritudinem patiat, similis est ASTIO Episcopo, quem sacra CHRISTI charitas cruci suæ adiudicauit, damnauit morte; & dum tormentis affligeretur, insensilem Martyrem reddidit. Reddit & ægrum, qui tactus sublimi affectu exulat ipse à se, & acerbos dolores non sentit, nec curat. *Sed neque hoc mirum* (vt loquar cum Bernardo Sermon. 61. in Cantic.) *si exul à corpore dolores corporis non sentiat. Neque hoc facit stupor, sed amor. Submittitur enim sensus, non amittitur. Nec deest dolor, sed superatur & contemnitur.* Ad hunc amorem alligere conatur ægrotum S. Augustinus Tract. de Visitatione infirmorum. Sermon. 1. *Si igitur Deum diligis, disciplinam Dei te flagellantem diligis, flagellum Dei sustines. Tussis laboras, pulmone deficis, cibum stomachus respuit, phthisi decoqueris, dysenteria sauciaris, multimodo morborum genere afficeris? sed hæc, si oculum habes, si cordatus es, Dei dona sunt. Quidquid Midas tangebatur, in pretiosum aurum vertebatur, quemadmodum narrat fabula. Hoc autem verissimum est, vt quidquid graue*
amator

amator diuinus tangit, licet aliàs malum sit, totum
 vertatur in bonum. *Diligentibus Deum omnia coope-* Rom. 8,
rantur in bonum : vt & morbi & infirmitates, quibus 28.
 pulsantur, beneficiorum loco accipiantur. Dilige-
 bat Andreas Deum, & eius amor crucem illam, cui
 fuerat adiudicatus, bonam reddebat : vnde & ipse
 exclamauit, *O bona crux!* Bona crux est, cui diuini
 amoris ignis accedit : accessit & cruci ASTII, & id-
 circò mala censenda non est, nec malus censendus
 lectus, nec morbus, cui flamma sacræ dilectionis
 adiungitur. *Charitas patiens est, benigna est*, & qui 1. Cor. 13,
 tactus amore laborat, & non valet, cultor patien- 4.
 tiæ existat, vt referat in cruce ASTIUM, qui tole-
 rantiam cum igne amoris coniunxit : coniunxerat
 antea Rex gloriosus Martyrum CHRISTVS. Ne se-
 pararet æger, quæ Deus simul connexuit: *Cor suum da-* Eccli. 38,
bit in similitudinem picture. 28.

Leuamen laborantis & ægrotantis.

REx gloriosus, *cùm dilexisset suos, qui erant in* Ioan. 13, 1.
mundo, in finem dilexit eos, auctor & institutor Virtus Eu-
charistia.
 venerabilis Sacramenti. CHRISTVS tunc temporis
 ardebat intus amore, & quodammodò se leuauit
 ac recreauit, cùm foras flamma charitatis erupit,
 & sacram Eucharistiam condidit. Hoc sibi leua-

men exoptabat sponsa CHRISTI, cùm diceret Cantic. 2, 5. *Fulcite me floribus, stipate me malis, quia amore langueo.* Ad hos Eucharisticos flores, & mystica mala languentes amore vocantur, & quidem à

Matth. 11, 18. CHRISTO: *Venite ad me omnes, qui laboratis, & onerati estis, & ego reficiam vos.* Faceſſant ex hoc conuiuio qui amare nesciunt; conuiuium enim amoris est. vnde Sponsa Cantic. 5, 1. delibuta gaudio dicit: *Comedi fauum cum melle meo, bibi vinum meum cum lacte meo: comedite amici, & bibite, & inebriamini charissimi.* Accersit amicos & charissimos, vt participes sacrorum mysteriorum fiant, & Agnum paschalem fumant. Monet vt comedant, bibant, & inebrientur. Laudabilis ebrietas venerandi Sacramenti est, cùm ita hominem possidet, vt extra se illum constituat, & immemorem sui reddat. Habet hanc vim Eucharistia, vt hominem diuino accendat amore, & semel accensum sursum ferat, sursum trahat humanarum rerum immemorem, memorem diuinarum. Felix ebrietas, quæ suæ infirmitatis oblitam inflamat animam, vt virtute accepti

Viaticum. Viatici magnos animos concipiat ad pugnam, & luctam cum hoste & morte futuram.

Gloriosum opus Artis Crucis & patientiæ,
Aurea & aureola corona.

IN ardentis ignis formam ardet & ignescit amor, Honor alie
artem be-
nè uiuen-
di & mo-
riendi.
ignescit & fulget aurum, ex quo corona construi-
tur danda pro meritis iis, qui flammæ diuinæ cha-
ritatis patiuntur more A S T I I, & Augustini, qui
cruci amoris affixus, & simul eius ardore accensus,
cap. 18. Meditationum, postquam dixit, *Tu es Deus
meus, panis meus viuus, Sacerdos meus in æternum, dux
meus ad patriam*; constitutus in eius præsentia sub-
iungit: *O splendor paternæ gloriæ, qui sedes super Cheru-
bim, & intueris abyssos, lumen veridicum, lumen illu-
minans, lumen indeficiens, in quem desiderant Angeli pro-
spicere! Ecce cor meum coram te est: discute tenebras
eius, ut amoris tui claritate plenius perfundatur. Da mi-
hi Deus meus te, redde mihi te: en amo te; & si parum
est, amem validius. Non possum metiri, ut sciam quan-
tum desit mihi amoris tui ad id quod satis est, ut currat
vita mea in amplexus tuos, nec auertatur, donec absconda-
tur in abscondito vultus tui.*

Hanc patiebatur crucem S. Franciscus noster Xa-
uerius, magnus, & ita augustus amator, ut clama-
ret: *Sat est Domine, sat est.* nec diceret cum Augu-
stino: *Non possum metiri, ut sciam quantum desit mihi
amoris*

amoris tui ad id quod satis est, vt currat vita mea in amplexus tuos. Mensus est magnitudinem crucis suæ, & esse satis putabat, vt in amplexus diuinos rueret & corrueret, & de manu Omnipotentis in cælis aurea corona & aureola feruidus amoris Martyr coronaretur. Et quidem coronatus est. Nec quidem

*Aureola
corona
amoris.*

*1. Cor. 13,
5.*

contra nobilem conditionem charitatis, quæ non querit quæ sua sunt, appetentia cælestium coronarum est, cùm nihil velit & quærat extra Deum, qui Sanctorum omnium corona est. Ad hanc coronam trahebat amoris ignis sanctam Austrebertham virginem, quæ in lecto iacens clamabat: Ecce ego ad te venio quem amavi, ad te propero quem desideravi, ad te sitio peruenire, quem semper ardentissimo amore dilexi: in te spero, non confundar: tu meum suscipe spiritum in pace sempiterna, ne aduersum me praualeant inimici iacula.

*Extrema
verba morientis.*

Proferatur nunc in publicum sancti PETRI Episcopi Damasceni exemplum; in quo, tamquam præclarissimo exemplo, scandali tollendi & morbi accipiendi forma conspicitur.




12. *Quid moror in terris, cum sint præcisa laboris
Organa? me rutilis asfere Christe polis.*

EMBLEMATICA IMAGO XII.

S. PETRI EPISCOPI DAMASCENI

CRVCIFIXI

EXPLICATA.

 ANCTVS PETRVS Episcopus Damascenus, amputatis manibus, pedibus, linguaque simul auulsa, à Principe Agarenorum in crucem sublatus est. Sine pedibus cælum ingreditur, sine manibus accipit palmam, sine lingua loquitur Deo, & monet nos omnes, vt & manus & pedes præcidamus, si fortè impedian, quò minùs in cælum veniamus. Huc pertinet, quod frater Ægidius discipulus S. Francisci monebat: *Si vis benè & acutè cernere, erue tibi oculos. Si vis audire perfectè, obtura aures, vt sis surdus. Si vis rectè & præclarè loqui, præcide tibi linguam, vt obmutescas. Si vis probè efficere omnia opera tua, amputa manus tuas. Si cupis esse membris omnibus integer & perfectus, mutiles ea.* Hoc ipsum est, more PETRI Damasceni, mysticè carnem propriam crucifigere. Prætereà crux satis grauis est, in eum statum hominem esse redactum, vt coniunctos sibi amicos teneatur à se repellere, si velit regnum cælorum sibi promereri.

Martyrol.
Menolog.

Luc. 14,
26.

Quamobrem CHRISTVS charorum omnium renuntiationem cum laboriosa cruce coniunxit. *Si quis venit ad me, & non odit patrem suum, & matrem, & uxorem, & filios, & fratres, & sorores, adhuc autem & animam suam, non potest meus esse discipulus.* Pars arboris abscissa crux est, & hæc arbori, terræ, radicibusque renuntiat, vt fiat crux; & quisquis se ad formam crucis componit, debet abnegare parentes, propinquos, omnes charos & amicos. Sic PETRVS Damascenus suadet, persuadet item CHRISTVS, qui passioni iam propinquus abire permisit Apostolos, amicos nimirum suos, & in passione sua religiosus cultor silentij, valedixit Matri & Ioanni, suisque se charis pignoribus orbavit & priuauit.

Sympathia
Christi &
Petri Da-
masceni
Artificum
vitandi
scandali.

Ioan. 19,
26.

CRUX PETRI Damasceni, Crux scandali vitandi.

Crux vita-
ti scandali,
instrumen-
tum artis
benè vi-
uendi.
Matth. 18,
8.
Excitatio
laboran-
tis.

Satis magna crux censenda est, quam Redemptor noster iniunxit, & simul apposuit, cum dixit: *Si manus tua, vel pes tuus scandalizat te, abscide eum, & proiice abs te: bonum tibi est ad vitam ingredi debilem, vel claudum, quàm duas manus vel duos pedes habentem mitti in ignem aeternum.* Quanta crux ista sit, exponit in hunc locum Hieronymus. *Igitur omnis truncatur affectus, & vniuersa propinquitas amputatur,*

tatur, ne per occasionem pietatis vnusquisque credentium scandalo pateat. Si ita est tibi coniunctus, vt manus, pes, oculus, & est utilis atque sollicitus, & acutus ad perspiciendum, scandalum autem tibi facit, & propter dissonantiam morum te pertrahit in gehennam, melius est, vt & propinquitate eius, & emolumentis carnalibus careas, quàm dum vis lucrificare cognatos & necessarios, causam habeas ruinarum. Accedit & Augustinus libro de Salutar. docum. cap. 22. Amicus est, oculus est, manus est; amputa, & proiice abs te. Noli consentire. Membra etiam nostra in corpore nostro confusionem faciunt. Unitatis coniunctione viuunt, & connexionem inuicem connectuntur: vbi dissensio, ibi morbus & vulnus est. Accedit & Cyrillus lib. 12. in Ioannem cap. 22. Discimus quando tempus ad certamina vocat, ne si etiam qui charissimi nobis sunt, prohibeant, turpe forsan putantes, mentem villo modo illis adhibeamus. Non enim à satanà differt, qui scandala ponit, & quibuscumque modis à recta sententia homines seducit. Quod etiam CHRISTVS ostendere videtur. Si oculus, inquit, dexter scandalizat te, erue eum, Math. 5. & proiice abs te. Quod enim à felicitate nostra nos semo- 29. uet, etiamsi amicitiae lege nobis coniungitur, etiamsi natura ipsa & sanguinis proprietate copulatur, non nostrum; sed alienum & hostile putandum est.

CRUX PETRI Damasceni, Crux
ægotantis.

*Instrumen-
tum artis
benè mo-
riendi.*

CUm morbus ingruit, & vsum manuum, pe-
dum, & linguæ impedit, PETRI Damasceni
instar lecto affigitur ægotus. Quòd si æger mani-
bus, pedibus, & lingua labi consueuerit, soletur se
ipsum, cùm videat peccandi instrumenta & organa
defecisse. Cùm manus & pedes deficiunt laboranti
podagra & chiragra, si lecto fixus inhæreat, reda-
ctus ad eum statum est, in quo PETRVS Damasce-
nus depingitur. In hoc ipso statu erat Gregorius
Magnus, sicut & ipse scribit lib.7. Epist.127. *Pecca-
tis meis exigentibus, ecce iam vndecim menses sunt, quòd
valdè rarum est, si de lecto aliquando surgere potuero.
Tantis enim podagræ, tantisque molestiarum doloribus pre-
mor, vt vita mea mihi grauissima pœna sit. Quotidie enim
in dolore deficio, & mortis remedium expectando suspiro.*

*Excitatio
ægotan-
tis.*

Redactus ad hanc necessitatem infirmus, cùm ia-
ceat in lecto, corporis orbatus functionibus, nec
se, nec statum suum despiciat, sed audiat Ambro-
sium lib.1. de Iacob & vita beata, cap.8. *Sed fortè
aliquis putet, ægritudinem atque imbecillitatem corporis
impedimento esse ad perfectionis munus implendum, eò
quòd non possit opera manuum vlla factaque prodere. Ve-
rùm*

rùm ea sibi iustus impedimenta esse non sentiet, imò etiam eum, qui illa mirabiliter defleat, corripiet, & quasi ignauum arguet, quòd plus in corporis vsu, quàm in animæ virtute constituat. Elucebat hæc virtus in Bernardo affixo lecto; qui cùm extremè ægrotaret, ne ceteris scandalo esset, mori malebat. *Viuerè*, inquit, *erubesco*, quia parum proficio: mori timeo, quia non sum paratus: malo tamen mori, & misericordiæ Dei me committere & commendare, quia benignus & misericors est, quàm de mala mea conuersatione scandalum facere. Discat æger mori potius quàm scandalum dare: discat & orare: Rex gloriose, cuius crux diligentibus legem tuam scandalum non est, hanc mihi gratiam concede, legem & crucem amanti, vt corporis ægritudo quam patior, tollat & abscindat omnia offendicula, quæ salutem animæ impediunt. Quisquis hoc in votis habet, componat se ad formam PETRI, qui legem de scandalo latam religiosè seruauit, & seruandam è cruce docet; docet & patientiam, quæ necessaria est iis, qui cum ipso laborant & ægrotant.

Leuamen laborantis & ægrotantis.

REx gloriosus nec manus, nec pedes, nec linguam ad vindictam in cruce habuit, & idem

*Virtus En-
charistia.*

Agnus

Agnus nec manus, nec pedes, nec linguam videtur habere consecratus in Eucharistia: ad leuamen feruorum suorum, qui propter custodiam legis huiusmodi membrorum usu sese priuant, & eorum functionem patientes in lecto non exercent. Hos

Matth. 11,
28.

vocat CHRISTVS cum dicit: *Venite ad me omnes, qui laboratis, & onerati estis, & ego reficiam vos.* Et quidem iacens in lecto homo nec pedes habet nec manus, vt tendat in cælum, & illud apprehendat. Succurrit eius indigentia CHRISTVS, qui post sumptum iam

Viaticum.

Viaticum exierit è sacra Hostia pedes illos sacrosanctos, quibus in cælum ascendat, manus, quibus illud capiat, ac fortiter teneat.

Gloriosum opus Artis Crucis & patientia,
Aurea & aureola corona.

*Honor alit
artem be-
nè viuendi
& moriendi.*

GLoriosus Rex, qui propter vitandum scandalum, scissionem pedum & manuum, priuationemque visus ordinauit & intimauit, meminit remunerationis futuræ in cælis, cum dixit in Evangelio: *Bonum tibi est ad vitam ingredi debilem vel claudum, quàm duas manus vel duos pedes habentem, mitti in ignem æternum.* Bonum quidem PETRO est se in cælesti patria præsentare, pro cuius amore & defensione permisit se manibus pedibusque truncari. Deco-

Matth. 18,
8.

rum

DE SVPERIORIB. CRVCIF. ET CRVCIFERIS. 113

rum satis est pro patria similia pati ; pro cælo & regno Dei eiusmodi iacturam facere , multò gloriosius est. Terrena patria decorare potest eos , qui pedum & manuum detrimenta propter ipsam subierunt , reparare tamen & restaurare minimè potest: cælestis verò patria magna cum gloria factas pro se iacturas omnino tollit , & membra amissa reddit ac restituit. Nouerat hanc gloriosi Regis virtutem puer ille Machabæus , qui iussus extrahere linguam , & manus extendere, vt carnificis gladio amputarentur, *linguam postulatus citò protulit , & manus constanter extendit, & cum fiducia ait : E cælo ista possideo , sed propter Dei leges nunc hæc ipsa despicio , quoniam ab ipso mea recepturum spero : ita vt Rex , & qui cum ipso erant , mirarentur adolescentis animum , quòd tamquam nihil duceret cruciatus.* Ad stuporem etiam hostium nihil tormenta curabat , cùm sciret pati se pro cælo & Deo , cuius potentia erant cum magno fœnore membra perdita resarcienda. Hæc fortis ac valida meditatio & cogitatio est , qua patiens in ipsa sectione membrorum despiciet cruciatus , despiciet & amicos , notos & propinquos , expectans plenam & plenariam compensationem cùm ingreditur ad vitam , & ad vitæ simul coronam admittetur. Hac spe & expectatione suffultus cùm Laumarus Abbas

2. Machab.
7, 10.

Aureola
tollentis
ex se scandala.


P

affi-

*Extrema
verba mo-
rientis.*

affixus lecto, & priuatus suorum membrorum vfi-
bus esset, in extremis affirmabat: *Ego letus sum ani-
mo, ineffabilem Dei misericordiam appello, vt ianuam pie-
tati suae velit mihi patefacere, meamque spem & expecta-
tionem certa promissionum suarum remuneratione solari.*

Proferatur nunc in publicum sancti CLEMEN-
TIS Episcopi & sociorum exemplum; in quo, tam-
quam in præclarissimo speculo, ferentis zelum &
morbum forma conspicitur.





13. *Clarescant alij numerosæ stragis æceruo :
Vobis perpeſſa gloria morte venit .*

EMBLEMATICA IMAGO XIII.

S. CLEMENTIS EPISCOPI,
ET SOCIORVM PHENGONIS
ET EVCARPI CRVCIFIXORVM

EXPLICATA.



LEMENS, Agathangelus, & socij pro confessione IESV CHRISTI, dominante Maximiano, protrusi in calcis viuæ fornacem, custodia militari seruabantur. Aderant in militari cohorte PHENGON & EVCARPVS, qui sanctorum Martyrum verbis & miraculis attracti, partibus CHRISTI adhæserunt. Quam ob causam vterque crucifixus est, & vterque zelo accensus commilitones suos in partes CHRISTI trahere conatus est. Hoc signum, hoc argumentum perfectæ conuersionis est, vt qui reuocatus à Deo piissimo fuerit, ceteros reducere ad Deum conetur. Audiamus Ambrosium lib.2.de Poenit.cap.6. *Subiiciamus nos Deo, vt non subditi simus peccato, & tanta fiat conuersio, vt qui Deum non agnoscebamus, ipsi eum iam aliis demonstremus.* Ardebant CLEMENS & Agathangelus in fornace illa calcaria, non tam visibili quàm inuisibili flam-

Metaph.
Menolog.

ma, qua zelator animarum Paulus flagrabat, cùm
 2. Cor. II, diceret: *Quis scandalizatur, & ego non vror?* Diuinus
 29. hic ignis in CHRISTI pectore ardebat: *Zelus domus*
Sympathia Christi & Martirum tuæ comedit me. qui & dicit: *Ignem veni mittere in ter-*
Artificum zeli feren- ram, & quid volo nisi vt accendatur? Accensus est in
 di. CLEMENTE & Agathangelo, qui Deo PHENGVM &
 Psal. 68, EVCARPVM pepererunt. Quales patres, tales & pro-
 10. les euaserunt flagrantes & ardentes zelo conuer-
 Luc. 12, sionis animarum, quæ contra ipsum Deum milita-
 49. bant, & pro Deo iam conuersæ decertarunt, & di-
 uini zeli speculum illustrarunt.

CRUX PHENGONIS & EVCARPI, CRUX
 zeli animarum.

*Crux zeli
 animarum,
 instrumen-
 tum artis
 bene vi-
 uendi.*

*Excitatio
 laboran-
 tis.*

Zelator conuersionis animarum suam portat
 crucem, & cruciatur, dum mores peccatorum
 sustinet, & dum amore tractus ipse, errantes homi-
 nes à perditionis via retrahere contendit. In hanc
 ipsam sententiam CHRISTVS loquitur lib. 4. Reue-
 lat. cap. 129. S. Birgittæ, concluditque post multa:
Ergo, qui ardua vincere proponit, attendat ad tentationes
suas, & caueat ne per inordinata desideria minuatur Dei
zelus, quia toto desiderio & zelo diuino, & cum omni pa-
tientia currendum est ad peccatorem, opportunè & impor-
tunè, vt conuertatur, & vbi iustus nihil proficit loquen-
 do,

DE SUPERIORIB. CRVCIF. ET CRVCIFERIS. 119

do, vel admonendo, ibi zelus est exercendus, orationum-
 que instantia continuanda. Conditionem zeli huius
 CLEMENS & Agathangelus in sua calcaria propo-
 nunt, & quasi exponunt verbis Ambrosij Serm. 18.
 in Psalm. 118. *Zelus charitas est. Denique valida est* Cant. 8, 6.
sicut mors charitas, durus sicut inferi zelus. Durus ze-
lus, quem vitæ huius nulla vincit illecebra. Durus zelus
inferi, per quem peccato morimur, ut viuamus Deo. An-
geli quoque sine zelo nihil sunt, & substantiæ suæ amit-
tunt prærogatiuam, nisi eum zeli ardore sustentent. Du-
rus zeli ardor, qui & Angelos & Agathangelos ac-
cendit. Facis Angelos tuos spiritus, & ministros tuos Psal. 103, 4.
ignem vrentem. Talis & minister Paulus erat, de quo
 lege Augustinum lib. 3. de Verbis Domini Serm. 26.
Pugnat ergo pro omnibus, zelatur omnes Dei zelo, accen-
ditur pro omnibus, & inflammatur pro iis qui extra le-
gem sunt, & pro iis qui in lege sunt, Magister gentium.

CRUX PHENGONIS & EVCARPI, CRUX
 ægrotantium.

PHENGON & EVCARPVS teneri & infirmi adhuc
 in fide crucibus adiudicantur, quorum salutem
 curantes CLEMENS & Agathangelus, viuâ calce com-
 buruntur. Testatur exterior ignis charitatem inte-
 riorem, quo flagrabant in crucifixos infirmos. Hæc
 lex

*Instrumen-
 tum artis
 benè mo-
 riendi.*

lex summæ charitatis est, vt cùm ipse malè habeas, decumbas in lecto, & labores, immemor ægritudinis tuæ fratrum ægrotantium curam habeas, feruenter & ardentè eorum valetudinem procures. In morbi & infirmitatis fornace Timotheum Apostolus esse volebat, cùm laborare eum sineret, diceretque: *Modico vino vttere propter stomachum tuum & frequenter tuas infirmitates.* Causam reddit Chrysostomus Epist. 4. *Nec ipse morbum profligauit is, qui mortuos ad vitam reuocabat, verum eum in morbi fornace versari permisit, quò amplissima libertatis & fiduciæ opes hinc ipsi cogerentur.* Quisquis ad hunc statum redactus est, in fornace CLEMENTIS & sociorum se esse consideret, & zelator salutis animæ suæ lubens ac volens ardores febriles patiatur.

1. Tim. 5,
23.

Excitatio
ægrotan-
tis.

Leuamen laborantis & ægrotantis.

Virtus Eu-
charistia.
Matth. 11,
28.

REx gloriosus zelo salutis alienæ flagrantès & laborantes vocat ad se, *Venite ad me omnes, qui laboratis, & onerati estis, & ego reficiam vos.* Hoc valdè mirabile est, quòd cùm sit sub panis & vini formis fornax cælestis ardoris, is, qui sumit Eucharistiam, in æstu flagrantis zeli diuinam temperiem sentiat. Eucharisticus quippe ignis illuminans est, non comburens. *Lucerna eius est Agnus.* Agnus est,

Apoc. 21,
23.

est, dum consecrat & consecratur nocte suprema in
 coenaculo, quo tempore simul & loco summum
 animarum zelum cum summa suauitate coniun-
 ctum ostendit. Et quidem verba consecratoria, quid
 nisi zelum sonant, cum mysticum Agni corpus, &
 pretiosus eius Sanguis, pro culparum humanarum
 remissione consecrentur. Ritè ac rectè verba conse-
 crationis non elata voce, sed submissa proferuntur,
 vt vel ex ipso vocis sono diuini zelatoris mansuetu-
 do magis innotescat, magis patefiat. Cum cælestis
 Agnus Dei seipsum tunc temporis dederit per sacri
 formam Viatici, & in eo salutis humanæ ardentem *Viaticum.*
 suum zelum ostenderit, quisquis hunc ipsum com-
 meatum moriturus accipiat, expendat, & perpen-
 dat quantam de anima sua seruanda CHRISTVS ha-
 buerit semper curam, & tunc maximè habeat.

Gloriosum opus Artis Crucis & patientiæ,
 Aurea & aureola corona.

CVM species quædam martyrij sit passio diuini
 zeli, quisquis æmulator est, cogitet de præmiis,
 cogitet de coronis, quæ decretæ in cælis sunt Mar-
 tyribus per ignes & flammæ in cæleste regnum
 migrantibus. Meminerit magni zelatoris Eliæ, qui
 totus in igne erat, & viuum martyrem agens ad

*Homor alie
 artem be-
 nè viuen-
 di & mor-
 riendi.
 Aureola
 diuini zeli.*

Q spe-

speluncam se recepit , & in eius sepulchro & ca-
uea se occultauit , cùm rogatus quid ibi ageret,
3.Reg.19,
10. respondit : *Zelo zelatus sum pro Domino Deo exerci-
tuum.* Viuus hic martyr , qui paulò antè cibo typico
fuerat recreatus , vidit in monte specimen cælestis
gloriæ , cuius mirabili contemplatione magnos
concepit animos , vt magis ac magis zeli diuini ar-
doribus animam suam exponeret : cùm tamen ante
1.Reg.19,
4. propositam sibi gloriā *petiuit animæ suæ , vt more-
retur.* Non petebat Elias post visum præmium iam
mori , vlteriùs pati appetebat. Hoc ipso spiritu du-
ctus , cùm esset in extremis vicinus gloriæ Martinus,
Extrema
verba mo-
rientis. dicebat Deo : *Si adhuc populo tuo sum necessarius , non
recuso laborem , fiat voluntas tua.*

Proferatur nunc in publicum sancti LIBERATI
Abbatis & sociorum exemplum ; in quibus , tam-
quam præclarissimo speculo , transitus mundi &
morbi forma conspicitur.



14. Cedat sepositas Argo quæ vexit in oras :
Hæc pinus cæli vos statione locat.

EMBLEMATICA IMAGO XIV.

S. LIBERATI ABBATIS, ET
SOC. CRVCIFIXORVM
EXPLICATA.

CARTHAGINE sub Hunerico tyranno Victor in
Histor.
VVádalor.
Martyrol.
Roman.
LIBERATVS Abbas, BONIFACIVS Dia-
CONUS, SERVVS & RVSTICVS Subdiaco-
ni, & MAXIMVS puer, in naui cruci-
fixi sunt, at naui adiecto igne, vt omnes pariter
concremarentur. Admotus ignis diuinitus extinctus
est, carnifices verò, igne furoris accensi, remorum
içtibus Martyres contriuerunt & mactarunt. Sacri-
ficiu hoc Pontificale est quod Abbas celebrat: as-
sistunt ministri Sacrificio, & ipsi sacrificantur. Ne-
mo sine naue mare nauigat, nemo sine cruce transit
mundum, & appellit in portum. Cælestem patriam
olim eminus mortales contemplantur, & aspi-
cientes à longè illam salutabant. Ignis & aqua si-
mul interiacebant, & accessum in cælum impedi-
bant: hinc dolor, hinc gemitus. Venit CHRISTVS Sympathia
Christi &
martyrum
Artificum
transitus
mundani
ferendi.
in mundum, de rate ac cruce prouidit, qua nobis
in cælum viam aperiret. Fauet dictis Augustinus
libro de Opere Monach. cap. 31. *Sanè omnibus, nobis*

*Et vobis pro nostro gaudio & officio laborantibus, Et ar-
cta est via in labore & arumna, Et tamen in spe gauden-
tibus iugum eius leue est, & sarcina leuis; qui nos voca-
uit ad requiem, quò prior transitum fecit à conualle plora-
tionis, vbi ipsemet sine pressuris non fuit. CHRISTVS
ignem pariter & aquam tribulationum passus est, &
liber vel inter mortuos euasit, & fecit liberos, non
crucifixos modò, sed etiam cruciferos suos, qui por-
tum iam cæli tenentes, Liberatori suo canentes ce-
leuma, dicunt: Transiuimus per ignem & aquam, &
eduxisti nos in refrigerium.*

Psal. 65,
12.

CRUX LIBERATI & sociorum, Crux transitus mundani.

*Crux
transitus
mundi, in-
strumen-
tum artis
benè vi-
uendi.*

Matth. 3,
17.

Matth. 4,
1.

*Excitatio
laboran-
tis.*

Rom. 8,
14.

Psal. 142,
10.

CVM CHRISTVS in Iordane esset Filius à Pa-
tre proclamatus, Hic est Filius meus dilectus, in
quo mihi complacui, consequenter addit Euangelista:
Ductus est à Spiritu in desertum, vt tentaretur à diabolo.
Duxit illum Spiritus ad ieiunia, ad tentationes &
labores. Hæc est Dei filiorum conditio, vt quò Spi-
ritus sanctus eos trahit, eò pergant. *Qui spiritu Dei
aguntur, ij sunt filij Dei.* Nauis vento agitur & agita-
tur, & nauis instar à diuino Spiritu sancti viri mo-
uentur & impelluntur. Sanctus planè vir, qui dice-
bat: *Spiritus tuus bonus deducet me in terram rectam.*

Deducet

Deducet me, inquam, in portum per maria, per fluctus, per tempestates. Per fluctus: *Omnes fluctus* Psal. 87, 8.
tuos induxisti super me. Per tempestates: *Veni in altitudinem maris, & tempestas demersit me.* Psal. 68, 3. Sic itur ad astra. Committamus nos mari, fluctibus & tempestatibus, vt & in portu cantemus: *Transiimus per* Psal. 65,
ignem & aquam. Rubrum mare rubore suo ignis colorem præ se ferebat, quod filij Dei transferunt: & nos non aquam modò, sed ignem etiam virtute Crucis superemus. Transeunt probi, transeunt improbi: probi de mundo, improbi cum mundo, sicut notat Augustinus Tract. 55. in Ioannem. *Aliud est, inquit, transire de mundo; aliud, transire cum mundo; aliud, ad Patrem; aliud, ad hostem. Nam Aegyptij transferunt, persequendo Israëlem transferunt, sed non transferunt per mare ad regnum, sed in mari ad interitum.* Concludit: *Salubris transitus est, cum à diabolo transimus ad CHRISTVM, & ab isto instabili sæculo ad fundatissimum regnum.* Audi Naclere. *Naclero quidem profectio non permittitur, ait Basilii Epist. 166.*
vt tranquillum vbi velit reddat infensum pelagus: nobis verò admodum facile est, vt vitam nobis ipsis reddamus tranquillam, si internos animi tumultus, qui ex affectionibus inordinatis aduersum nos insurgunt, compescuerimus. Neque enim facultatum dispendia, neque morbi corporis,

poris, neque quæcumque reliquæ vitæ molestiæ cautum ac studiosum pietatis ledent, donec animo ita comparatus est, ut cum Deo ambulet, ut de futuris cogitet, eosque fluctus, qui infernè excitantur, alacriter & expeditè superet.

CRUX LIBERATI & sociorum, Crux ægrotantium.

*Instrumentum artis
benè moriendi.*

*Excitatio
ægrotantis.*

TEmpus vitæ nostræ, tempus nauigationis est. Nauigamus in corpore, & cum venimus ad portum, ægrotamus, affigimur lecto, febribus inflammamur, ut LIBERATO ac sociis similes effecti, liberi iam à scopulis & tempestatibus humanæ nauigationis, portum intremus ac teneamus. Benè monet Olympiadem ægram Chrysostomus Epist. 4. *Quantò magis aurum inflammatur, tantò etiam purius redditur. Quantò longius nauigat mercator, tantò plures merces cumulat. Quocircà ne paruum nunc tibi propositum esse certamen putes, verum omnium, quæ sustinuisti, altissimum, maximumque & sublime; de eo loquor, quod in corporis aduersa valetudine situm est.* Sanctus Bernardus Abbas, sicut eius tradit historia, plenus iam mercibus ac onustus meritis, cupiebat, euectus nauæ, ex miseriis & ærumnis vitæ mortalis liberari. Accidit extremè iam laboranti, videri sibi nauem, quæ

quæ se transfueheret, expectare. Et quidem illa quasi in littore apparuit, & cùm Bernardus ingredi festinaret, nauis disparuit. Cognouit necdum tempus migrationis suæ aduenisse. Crescebat dolor, & morbus ingrauescebat; & hoc habebat solatij, quòd esset reditura nauis, & se suasque merces tandem in cælestem portum intromissura. Cùm æger febribus ardet, cogitet se in proposita LIBERATI & sociorum naue lecto crucis alligatum. Si puer sit, puerum crucifixum intueatur: si iuuenis, iuuenes affixos cruci contempletur: si virum iam agit, viros suspendio addictos attendat: si senex prouectus ætate est, pendentem è nauis arbore senem præ oculis habeat, vt cuiuslibet ætatis homo nouerit, sibi è mortali vita nauigandum, nec certum tempus aliquod præfinitum, quo quis perueniat in portum, iam puer, iam iuuenis, iam vir, iam senex ardente feбри corripitur, & festina morte abripitur. Transeunt per ignem & aquam omnes, quos nauis exhibet crucifixos, vt in refrigerium veniant, & æger, qui eandem patitur probationem, *Cor suum dabit in similitudinem picturæ.* Ecclesi. 38, 28.

R

Leua-

Leuamen laborantis & ægrotantis.

*Virtus Eu-
charistia.*

REx gloriosus, cùm iret de mundo ad Patrem, in leuamen transeuntium sacram Eucharistiam condidit & reliquit. Et quidem adhuc in Ecclesia sua Agnus è Petri nauicula clamat ad eos qui in mari laborant, & amaros fluctus tranant, mundi Oceanum transeuntes, *Venite ad me omnes, qui laboratis, & onerati estis, & ego reficiam vos.* Ecclesia sancta *facta est quasi nauis institoris de longè portans panem suum,* & inde CHRISTVS super transeuntes aquas panem Eucharistiæ mittit, vt mare tranquillum faciat, & nauigantes suos ducat & inducat in portum. Ne iam accedentes ad portum, naufragium ægrotantes patiantur & submergantur, succurrit per *viaticum.* eandem Eucharistiam, in qua diuinus Agnus Dei porrigitur & ministratur, vt quæ mortis tempore exoriri & sæuire tempestates solent, imperio eius remittantur atque sedentur.

Gloriosum opus Artis Crucis & patientiæ,
Aurea & aureola corona.

*Honor alit
artem be-
nè viuen-
di & mo-
riendi.*

CVm tingimur aqua lustrali, satis nobis in-
nuatur, qualis sit mundanus transitus, per
quem datur in cælum accessus & ascensus. Fit per
aquis

aquas transmigratio, quæ est aperta nauigatio im-
 posita iis qui *in Spiritu sancto & in igne* baptizantur. Math. 3.
11.
 Hæc nauigatio Christiana, quæ fit virtute Baptismi,
 formam martyrij importat. Confirmat assumptum
 Augustinus lib. de Ecclesiast. dogmat. cap. 74. *Bapti-
 zandus confitetur fidem suam coram Sacerdote, & inter-
 rogatus respondet: hoc & Martyr coram persecutore facit,
 qui & confitetur fidem, & interrogatus respondet. Ille
 post confessionem vel aspergitur aqua, vel tingitur: & hic
 vel aspergitur sanguine, vel contingitur igne. Ille manus
 impositione Pontificis accipit Spiritum sanctum: hic habi-
 taculum efficitur Spiritus sancti, dum non est ipse qui lo-
 quitur, sed Spiritus Patris qui in eo loquitur. Ille commu-
 nicat Eucharistiæ in commemoratione mortis Domini: hic
 ipsi CHRISTO commoritur. Ille profitetur se immundis
 actibus renuntiaturum; hic ipse renuntiat vitæ. Illi pec-
 cata omnia dimittuntur, in isto extinguuntur.*

Hæc nauigatio Christianorum simul & Marty-
 rum est, hæc communis tranatio & transmigratio,
 quam nauis LIBERATI & sociorum transeuntium
 per aquam & ignem ostendit & declarat. Cùm verò
 species nauigationis sit vita Christianorum, ritè ac
 rectè coniungitur cum Baptismo mysterium sacrae
 Eucharistiæ, ne in mari annona deficiat. Verùm
 enim verò, cùm in pelago nauigantibus cælum pa-
 teat,

*Aureola
nauigationis
mundana.
Psal. 65,
12.*

*Extrema
verba morientis.*

teat, cuius aspectus recreat ferentes graues molestias tum maris tum nauis, erit occasio & causa cælestis recreationis facienti transitum laboriosum, erigere oculos ad præmium sibi in cælis destinatum, si prosperè confecerit nauigationem, more LIBERATI & sociorum, qui salui & incolumes in portu festiuum celeuma dicunt & canunt, *Transiimus per ignem & aquam, & induxisti nos in refrigerium.* Erat iam vicinus portui Adelhardus Abbas, cùm frequenter iteraret: *Hinc ibo, & ad Deum meum veniam, letus moriar, letusque transibo ingentes huius vitæ foveas; quoniam ad gaudia peruenturus sum sempiterna, longè mihi antè promissa.* Proximus iam cælo Nicolaus Tolentinus postulauit sibi crucem. *Crucem, inquit, meis oculis inspicendam offeratis, vt eius virtute ceu baculo altissimæ potestatis fultus, Jordanem huius mundi liberè transmittere, & ad paradisi gaudia faciliè peruenire queam.*

Proferatur nunc in publicum sancti PAPHNVII Abbatis exemplum; in quo, tamquam præclarissimo speculo, triumphantis in labore & morbo forma conspicitur.



Quam bene iuncta tuæ Paphnuti præmia pugnae?
15. Palma crucem, palmam crux generosa dedit.



EMBLEMATICA IMAGO XV.

S. PAPHNVTVII ABBATIS CRVCIFIXI

EXPLICATA.

SANCTVS PAPHNVTVS Abbas, cùm di- Metaph.
Martyrol.
ram in Christianos persecutionem esse in
Ægypto cognouisset, contendit eò, &
sua sponte Ariano Præfecto seipsum præ-
sentauit, & paratum se mori pro defensione Chri-
stianæ fidei declarauit. Quam ob causam variis pœ-
nis cruciatibusque tentatus, affixus tandem palmæ
palmam consecutus est. Nouit patientia CHRISTI
vel in ipsa cruce triumphare, canitque propterea
Ecclesia:

*Pange lingua gloriosi
Lauream certaminis,
Et super crucis trophæo
Dic triumphum nobilem,
Qualiter Redemptor orbis
Immolatus vicerit.*

Redemptor quidem orbis tempore sacræ passionis Sympathia
Christi &
Paphnutij
Artificum
passionis
trium-
phantis.
Matth. 21.
festiuium Palmarum diem egit & coluit, vt trium-
phatorem se in ipso prælij conflictu declararet, &
commilitones suos crucifixos & cruciferos non so-
lùm

lùm post labores iam transactos , sed etiam in eorum tolerantia triumphum celebrari posse doceret.

- Cant. 7, 8. Triumphauit in cruce anima , quæ dixit : *Ascendam in palmam , & apprehendam fructus eius*. Et ille etiam Gal. 6, 14. qui scripsit : *Mihi autem absit gloriari , nisi in cruce Domini nostri IESV CHRISTI*. Placet pulchra sententia Doctoris Ecclesiæ Ambrosij in 1. ad Corinth. cap. 1. *Victor existit , qui iniuste occiditur , reum constituens eum à quo occiditur*. Consonat Bernardus Serm. 61. in Cantica : *Stat Martyr tripudians & triumphans , toto licet lacero corpore ; & rimante latera ferro , non modò fortiter , sed alacriter sacrum è carne sua circumspicit ebullire cruorem*. Existit quoque victor , quo iniuste vexatur , reum faciens à quo diuexatur & exercetur.

CRUX PAPHNVTHII , Crux patientiæ triumphantis.

Crux passionis patientia triumphantis, instrumentum artis bene viuendi.

MAgnum quid est , in ipsis passionibus vincere , & in ipsis laboribus cum PAPHNVTHIO triumphum agere. Crux ipsa Martyri palma fuit. Vnde , quod Leo Pontifex Sermone de S. Laurentio obiecit Datiano , obiici quoque potest Ariano : *Sæuisti persecutor in Martyrem , sæuisti , & auxisti palmam , dum aggeras pœnam*. Nam quid non ad Victoris gloriam ingenium tuum reperit , quando in honorem transferunt triumphi,

triumphi, etiam instrumenta supplicij? Crux quoque ipsa nobis pœna & palma sit, quemadmodum de Elia & ieiun. cap. 5. Ambrosius monet. *Diuinum*, in-
 quit, ad Patres resultauit oraculum, vt cùm egrederentur ^{Num. 10.}
 ad bellum, tuba canerent, cuius sonitu Dominus remini-
 sceretur populi sui, quo petatum conferret auxilium, plus-
 que misericordiæ suæ incentiua cognoscentes in diebus leti-
 tiæ suæ, in Neomeniis suis concinerent tubarum sonos.
 Unde & David dicit: Canite initio mensis tuba in die ^{Psal. 80, 4.}
 insignis solemnitatis vestræ. Veniet igitur nobis sollemnis
 dies, & iam appropinquat, canamus tuba, & annuntie-
 mus solemnitatis diem simul nobis, & certamen imminet,
 & victoria repromittitur. Victoria nostra Crux CHRISTI
 est, trophæum nostrum Pascha est Domini IESU. Ergo
 cùm vocamur ad crucem, ad palmam, ad victo-
 riam, & triumphum inuitari nos à CHRISTO exi-
 stimemus, & cum PAPHNVTIO in cruce ipsa, quam
 ferunt cruciferi, exultent & glorientur. Etiam in
 morte ipsa, more Gerardi, de quo S. Bernardus Ser-
 mone 26. in Cantica dicit: Accitus sum ego ad id mira-
 culi, videre exultantem in morte hominem, & insultantem
 morti. Vbi est mors victoria tua? vbi est mors stimulus ^{1. Cor. 15,}
 tuus? Iam non stimulus, sed iubilus. Jam cantando mori-
 tur homo, & moriendo cantat. Vsurparis ad letitiam ma-
 ter mœroris, vsurparis ad gloriam gloriæ inimica.

CRUX PAPHNVTH, Crux ægrotantis.

*Instrumen-
tum artis
benè mo-
riendi.*

*Excitatio
ægrotan-
tis.*

Natura nostra mortalis de morbis triumphum agit, cùm ab eorum periculo libera euadit: anima verò immortalis in ipso vitæ discrimine nouit de morbo triumphare. Qui nouit in lecto magis se animæ immortalitate quàm corporis mortalitate duci, nouit etiam triumphare. Morbum superat, mortem vincit, & in ipso lecto decumbens solemnem triumphum auspicatur. Quidni triumphet in lecto, cùm subiugauerit aduersarium? Benè & opportunè satis lib. i. de Prouident. Saluian. *Infirmi-
tas carnis vigorem mentis exacuit, vt, affectis artu-
bus, vires corporum in virtutes transferantur animorum,
& sola exultet anima læta affecto corpore, quasi aduersa-
rio subiugato.* Quisquis ita vincit aduersarium, non tam lecto affixus quàm palmarum censendus est, & ipso Adamo felicior, priusquam amitteret innocentiam, vt adstruit Augustinus lib. ii. de Ciuitate Dei, cap. 12. *Quantum pertinet, inquit, ad delectationem præ-
sentis boni, beatior erat primus homo in paradiso, quàm
quilibet homo in hac infirmitate mortali: quantum attinet
ad spem futuri boni, beatior est quilibet in quibuslibet cru-
ciatibus corporis, cui non opinione, sed certa veritate ma-
nifestum est sine fine se habiturum omni molestia carentem*
socie-

*Societatem Angelorum in participatione summi Dei, quàm erat ille homo sui casus incertus in magna sua felicitate paradisi. Triumphat æger, qui lecti palmæ affixus, de spe certæ suæ beatitudinis hilarescit, & hilaris rogat & orat: Rex gloriose, qui à ligno & in ligno sanctæ tuæ crucis regnasti atque triumphasti, præsta supplicanti & ægrotanti, ne victus morbo deiciar, sed victor in lecto ipso decumbam. Hoc est velle patientem ægrum triumphare, & more Pauli gloriari, dum ait: *Mihi autem absit gloriari, nisi in* Gal. 6, 14. *Cruce Domini nostri IESV CHRISTI. Concludit ipse, cum se infirmum recognosceret: Libenter igitur glo-* 2. Cor. 12, 9. *riabor in infirmitatibus meis, vt inhabitet in me virtus* CHRISTI. Hæc vox infirmantis Pauli est, & eadem sit ægrotantis & triumphantis, qui cor suum dedit in similitudinem picturæ, & virtute patientiæ suæ perficit opus.*

Leuamen laborantis & ægrotantis.

Rex gloriosus crucis suæ victoriam agit, & celebrat in venerando altaris Sacrificio ac Sacramento; in quo vir patiens labore & morbo afflictatus, immemor suæ afflictionis, totus lætus & exiliens præ gaudio dicit: *Cor meum & caro mea exultauerunt in Deum viuum,* qui viuæ vocis oraculo mo-

Virtus Eucharistia.

Psal. 83, 3.

Matth. II, 28. riens simul & resurgens clamat, *Venite ad me omnes,*

qui laboratis, & onerati estis, & ego reficiam vos. Conficitur & perficitur Agni mystici Sacrificium & Sacramentum in memoriam Passionis, Resurrectionis & Ascensionis eius, vt qui communicant crucifixi Regis Passioni, communicent etiam gloriosæ ac triumphanti eiusdem Resurrectioni & Ascensioni, impleaturque votum solemne Ecclesiæ agentis *Vaticum.* de Crucis Exaltatione. *Felix ille triumphus, sit salus agris, vitæ lignum, mortis remedium.* Hoc ipsum votum nostrum solemne sit, dum sanctos Præsules crucifixos contemplamur, & nobis in laboribus & infirmitatibus nostris propitios esse desideramus & postulamus, vt virtute sacre Eucharistiæ victoriam non in cælis solum, sed etiam in terris, dum patimur, celebremus, quam & ipsi celebrarunt, de quibus Ambrosius lib. I. de Viduis p. 3. *Possunt pro peccatis rogare nostris, qui proprio sanguine etiam quæ habuerunt peccata lauerunt. Isti enim sunt Dei Martyres nostri Præsules, speculatores vitæ actuumque nostrorum. Non erubescamus eos intercessores nostræ infirmitatis adhibere, quia & ipsi infirmitatem corporis etiam dum vincerent, cognouerunt.*

Gloriosum opus Artis Crucis & patientiæ,
Aurea & aureola corona.

Conuertitur crux in palmam, cum de palma Honor alit
artem be-
nè viuen-
di & mor-
riendi. cæli cælestique triumpho consideratio est. Ver-
tebat in palmam crucem, quam in se Paulus gesta-
bat, & victoris instar dicebat: *Mihi autem absit glo-* Gal. 6, 14.
riari, nisi in Cruce Domini nostri IESV CHRISTI. Ac-
cedit Ambrosius in Psalm. 118. lit. 5. vers. 6. *Si oppro-*
brium tuum gloria est, Domine IESV, quanta est gloria
tua? Tuae igitur gloriæ participatione quid erimus, cuius
sumus opprobrio gloriosi? Quanti Ambrosius faciat op-
probrium istud gloriosum, intelligi facile potest ex
iis quæ statim addit: *Hoc opprobrium auferri à nobis*
nolumus, opprobrium Crucis Domini IESV, quo nostra au-
feruntur opprobria. Hæc vox PAPHNVTTII est, & glo-
riantis Pauli, qui & dicit: *Superabundo gaudio in omni* 2. Cor. 7, 4.
tribulatione nostra.

Et quidem Præsules crucifixi lætitia sic abunda-
runt, vt gloria eorum redundaret, qua fruebantur
in mediis ipsis tormentis, & in nos adhuc redun-
det. Confirmat hoc ipsum Ambrosius lib. 1. Episto-
larum, Epist. 31. *Nos sanguine gloriamur, illos dispendium*
manet. Nos hæc victoriæ loco ducimus, illi iniuriam pu-
tant. Numquam nobis amplius consuluerunt, quàm cum

verberari Christianos, atque proscribi, ac necari iuberent. Præmium fecit religio, quod perfidia putabat esse supplicium. Videte magnanimos, per iniuriam, per inopiam, per supplicium nos creuimus.

Crescunt instar PAPHNVTII, & instar palmarum cruciferi, quibus Crux & passio CHRISTI, dum laborant & ægrotant, gloriosa est. Eapropter S. Pater noster Ignatius honoris & gloriæ loco Crucem & passionem CHRISTI reliquit nobis in Regula. Diligenter animaduertant oportet (magnificiendo, summiq[ue] momenti id esse ducendo in conspectu Creatoris ac Domini nostri) quantopere iuuat ac conferat ad vitæ spiritualis profectum, omnino, & non ex parte abhorre ab omnibus quæ mundus amat & amplectitur, & admittere & concupiscere totis viribus quidquid CHRISTVS Dominus amauit & amplexus est. Quemadmodum enim mundani homines, qui ea quæ mundi sunt sequuntur, diligunt, & querunt magna cum diligentia, honores scilicet, famam, magni nominis existimationem in terra, sicut mundus eos edocet; sic qui procedunt in spiritu, & seriò CHRISTVM Dominum nostrum sequuntur, amant & ardentè exoptant, quæ iis omnia contraria sunt, indui nimirum eadem veste & insignibus Domini sui pro ipsius amore ac reuerentia, adeò vt, sine offensione vlla diuinæ maiestatis, & absque proximi peccato foret, vellent contumelias, falsa testimonia

simonia & iniurias pati, & stulti haberi & existima-
 ri (nulla tamen ad id per eos data occasione) eò quòd ex-
 optent assimilari, & imitari aliquo modò Creatorem ac Do-
 minum nostrum IESVM CHRISTVM, eiusque vestibus
 & insignibus indui: quandoquidem ille ipse propter maio-
 rem profectum nostrum induit, nobisque exemplum dedit,
 vt in omnibus, quoad eius fieri poterit, diuina gratia ad-
 spirante, eum imitari & sequi, cum vera sit via, quæ du-
 cit homines ad vitam, velimus. Sic vertitur crux in pal-

*Aureola in
 cruce & le-
 sto trium-
 phantis.*

lam, quoties vir patiens de vita cælesti, eiusque co-
 ronis ac corollis sedulò & ferìò cogitat. Hinc fa-
 ctum, vt cum Basiliscus martyr Chrysostomo ap-
 parens dixerit, Bono esto animo, & gaudio exulta inef-
 fabili, frater Ioannes; cras enim simul erimus, in morte
 ipsa exultauerit. Splendida se veste induit, vt, more
 triumphatoris, venientem mortem exciperet. Egit
 triumphum, qui dixit iam moriturus, Gloria Deo per
 omnia: & facto signo crucis, per crucem ad palmam
 venit. Apprehendit hanc palmam in morte sua Elea-

*Extrema
 verba mo-
 rientis.*

zarus Comes, qui sacrum emittens spiritum, Planè,
 inquit, vici. Qualis palma, talis & crux, talis & pa-
 tientia Principum in ipsis pœnis laborum & mor-
 borum gloriosa triumphatrix, cuius formam & ima-
 ginem lib. de Patientia cap. vlt. descripsit, & depin-

*Descriptio
 patientia
 trium-
 phantis in
 cruce &
 lesto.*

xit. Age iam, inquit, si & effigiem habitumq; eius compre-

hendamus. *Tertullian.*

hendamus. Vultus illi tranquillus & placidus, frons pura, nulla mœroris aut iræ rugositate contracta : remissa æquè in latum modum supercilia, oculis humilitate non infelicitate deiectis. Os taciturnitatis honore signatum. Color qualis securis & innoxius. Motus frequens capitis in diabolum, & minax risus. Ceterùm amictus circa pectora candidus, & corpori impressus : vt qui nec inflatur, nec inquietatur. Sedet enim in throno spiritus eius mitissimi & mansuetissimi, qui non turbine glomeratur, non nubilo liuet, sed est teneræ serenitatis, apertus & simplex, quem

3. Reg. 19, 12. tertio vidit Elias. Nam vbi Deus, ibidem & alumna eius, patientia scilicet. Cùm ergo Spiritus Dei descendit, indiuidua patientia comitatur eum. Si nos cum spiritu admiserimus, in nobis morabitur semper : imò nescio an diutius perseueret sine sua comite ac ministra. Omni tempore ac loco tangatur necesse est : quodcumque inimicus eius inflexerit, solus sustinere non poterit, carens instrumento sustinendi. Hæc patientiæ ratio, hæc disciplina, hæc opera cælestis & vera.

S A C R I
S A N C T V A R I I
C R V C I S

E T

P A T I E N T I A E

P A R S S E C V N D A

D E

S V B D I T I S C R V C I F I X I S
E T C R V C I F E R I S.

Figura C R V C I S vbiq̃ue inuenitur, apud Prin-
cipes, apud S V B D I T O S, apud mulieres.

Chrysostomus, Quòd Christus sit Deus.

T

INSTITUTIONES
ARITHMETICAE
LIBER PRIMUS

DE
ARITHMETICA
LIBER SECUNDUS

DE
ARITHMETICA
LIBER TERTIUS

DE
ARITHMETICA
LIBER QUARTUS

I M A G I N E S

E M B L E M A T I C Æ

P A R T I S S E C V N D Æ

S A C R I S A N C T V A R I I.

*Boni Latronis.**Discipulorum Petri & Pauli.**S. Vitalis.**S. Agricola.**SS. Cosma & Damiani.**S. Vincentij.**S. Alexandri.**S. Theodori ducis.**S. Theodori militis.**SS. Marci & Marciani.**Exercitus decem millium Mar-
tyrum.**S. Lycarionis.**S. Lucilliani.**S. Venantij.**S. Timonis Diaconi.**S. Fausti.**S. Pionij.**S. Apollonij.**S. Theoduli.**SS. Scillitanorum.**S. Balsami.**SS. Theophimi & Thali.**SS. Leontij & Carpophori.**SS. Zotici & Discipulorum.**SS. Claudij, Asterij & Neonis.**SS. Diomedis & sociorum.**S. Gemelli.**S. Philemonis.**SS. Decem crucifixorum.**SS. Incognitorum.**SS. Cleonici, Eutropij & Basi-
lisci.**S. Marini.**BB. in Iaponia crucifixorum.**Hiorami.**Alphonfi Castrij.**Venerabilis Sacerdotis.**Petri Helcij.**Puerorum crucifixorum,**Simonis,**Guilielmi,**Hugonis,**Richardi,**Christophori.*


Sanctus Laurentius Iustinianus cap. 21.
de Humilit. Sanctoꝝ.

Religionis præclarum speculum, ac diuini cultus quamdam prætendebant imaginem, per quam ad benè viuendum alliciebantur, considerantes illos tantò vehementiùs, quantò ardentius proficere cupiebant. Et quidem in hoc perlucido speculo, & vita Sanctoꝝ perfecti viri conspiciunt.

Prodeat in publicum spectaculum bonus LATRO, in quo perlucido speculo apparet effigies ferentis iustum supplicium & morbum.



*Mille mihi lucas peperissent mille dolores:
16. Unica nunc peperit gaudia mille dies.*



EMBLEMATICA IMAGO XVI.
BONI LATRONIS CRVCIFIXI
EXPLICATA.

P RIMVS subditorum crucifixorum apparet in Sanctuario bonus LATRO, qui pro Rege suo glorioso primus stetit : stetit ille, socius corruit. *Vnus autem de his, qui* Luc. 23, pendebant, latronibus, blasphemabat eum dicens : Si tu es ^{39.} CHRISTVS, saluum fac te metipsum, & nos. Respondens autem alter increpabat eum, dicens : Neque tu times Deum, qui in eadem damnatione es. Et nos quidem iuste, nam digna factis recipimus : hic verò nihil mali gessit. Bonus LATRO se reum esse fatetur, & supplicium sibi inflictum æquum ducit, & admittit. Quàm pretiosa sit, & quanti valeat iniunctæ pœnæ acceptatio cum vera CHRISTI fide & fideli confessione rei coniuncta, hæc declarant : *Et dicebat ad IESVM : Do-* Luc. 23, *mine, memento mei, cùm veneris in regnum tuum. Et di-* ^{42.} *xit illi IESVS : Amen dico tibi : hodie mecum eris in paradiso.* Dignas pœnas luis pro culpis atque flagitiis *Sympathia Christi crucifixi & boni Latronis. Artificum acceptati supplicij.* commissis ; patiens esto, vt boni huius LATRONIS crucem feras & sustineas. CHRISTVS ipse quæ non rapuit exsoluebat, soluebat tamen, vt bonum doce-
ret

ret LATRONEM, pro rapinis, quas exercuit, dignam reddere solutionem. Quid inde? Respondet Augustinus Serm. de bono LATRONE: *Latro de crucis ligno vindemiat immortalitatem, & latrocinatur cæleste imperium. Vim facit regno calorum, non virtute propria, sed* Matth. 11.
12. *per fidem vincens, ipso Domino dicente: Regnum calorum vim patitur, & violenti rapiunt illud.* Iterum Augustinus lib. de Origine animæ cap. 9. *Nemo fit membrum CHRISTI, nisi aut Baptismate in CHRISTO, aut morte pro CHRISTO. Unde & LATRO ille non ante crucem Domini sectator, sed in cruce confessor, de quo nonnumquam præiudicium captatur, siue tentatur contra Baptismatis Sacramentum, à Cypriano sancto inter Martyres computatur, qui suo sanguine baptizatur.*

Crux boni LATRONIS, Crux acceptati
supplicij.

*Instrumentum artis
benè viuendi.*

Nihil prorsus inultum, nihil omnino impunitum Deus relinquit: Deus enim ultionum est. Cum pius ac clemens sit, pœnis nostris ille non gaudet: cum sit Iudex æquus & iustus, exigit debitam à nobis satisfactionem. Quæ quidem crux in commodum nostrum vertitur, dum pro meritis inflictum nobis supplicium, & à nobis patienter admissum Deo offertur. Huc pœnitentiæ impositæ in
Confes-

Confessione, huc amissiones honorum & fortunarum, huc iactura parentum, propinquorum & amicorum, huc detrimenta salutis siue valetudinis pertinent. Qui culpam dolet, poenam non sentit: dicit enim S. Bernardus de Altitudine cordis: *Culpa ipsa, si intus sentitur perfecte, utique exterior poena parum aut nihil sentitur.* Non sentitur poena, ex qua ^{Excitatio laborantis.} provenit lucrum, quod ex sententia Cyrilli Ierosolymitani memorat Petrus Damianus cap. 2. de Principis officio: *Mors quæ poenæ causa infertur pro peccato, purgatio est peccati ipsius pro quo iubetur inferri.* Sic itur ad Paradisum: iuit LATRO, nec non fortissimi Martyres, de quibus agit Ephræm Sermone de Poenitent. & patient. *Martyres, inquit, in terra certantes crimina deleuerunt, & munera non acceperunt in hac vita, sed, quod amplius est, regnum cælorum atque paradisum consecuti sunt.*

Crux boni LATRONIS, Crux morbi pro meritis acceptati.

Nemo salutis gaudet dominio. *Domini est salus:* ^{Instrumentum bene moriendi.} hic est, qui dat salutem Regibus. Deus est, qui ^{Psal. 3, 9.} sanitatem impendit, ut benè valentes sibi debitum ^{Psal. 143, 10.} obsequium reddant. Cùm quis salutis abutitur beneficio, & in malos vsus impendit, inuito Domino

V

facit,

facit, & furtum committit. Furti reus lecto crucis affixus æger caueat, ne mali latronis instar impatienter crucem ferat, & pereat; boni potius LATRONIS exemplo ductus, recognoscât crimen suum, pœnam accipiat & dicat: *Iustus es Domine, & rectum iudicium tuum.* Discat in lectulo infirmus agere bonum infirmum, cum bono fateatur LATRONE, *Nos quidem iuste, nam digna factis recipimus.* Non id solum fateatur cum patitur infirmitatem, sed etiam cum Medici & medicinæ non profunt. Nouit Deus iustus & æquus iudex scientiam Medicorum fallere, & vim à medicinis auferre, ut iuste puniat ægrotum. Nouit sibi reservare facultatem restaurandæ sanitatis, & tunc potestate sua utitur, cum æger peccatum suum recognoscit. Reservauit sibi Paralytici curationem, quem cum in Euangelio curasset, monuit, cauere sibi in posterum, ne recidiuam pateretur. *Ecce sanus factus es, iam noli peccare, ne deterius tibi aliquid contingat.* Interim dum lecto affixus luit pœnas miser homo, cor suum dabit in similitudinem boni LATRONIS, totusque supplex orabit: Rex gloriose, qui LATRONEM exaudisti, audi miserum ægrum gementem, & simul reum confitentem atque dicentem: *Nos digna factis recipimus.* Sic itur ad paradysum, sic salus æterna comparatur.

Excitatio
ægotan-
tis.
Psal. 118,
137.

Luc. 23,
39.

Ioan. 5,
14.

Luc. 23,
39.

Leua-



*Fax, hostia, corona
Subditi, leuaminis, honoris.*

Leuamen laborantis & ægrotantis.

R Ex gloriosus in ara crucis suæ, quæ non ra- *Virtus Eucharistia.*
puit exolvebat, vt furta boni LATRONIS
compensaret: idem ipse nunc consecratur, & immo-
latur pro venia & indulgentia peccatorum, & simul
proponitur laborantibus & ægrotantibus, vt suppli-
cium sibi inflicturn melius & facilius ferant. Hæc
virtus venerabilis Sacramenti, cuius institutor & au-
ctor morbis, laboribus, & etiam peccatis grauatos
vocat & inuitat ad se, dum ait, *Venite ad me omnes,* *Matth. 11,*
28.
qui

qui laboratis, & oneratis estis, & ego reficiam vos. Confirmat hoc ipsum S. Bonaventura in Compendio Theologiæ lib. 6. cap. 15. vbi munitus D. Bernardi testimonio, inquit: *Corpus CHRISTI est agris medicina, peregrinantibus via, debiles confortat, languorem sanat, sanitatem conseruat.* Errat igitur ægrotus, cum existimat actum esse de se, si Viaticum percipiat: sæpè namque è lecto sacratissimum Corpus CHRISTI fanos eleuat, quos facinora commissa lectulo doloris addixerunt.

Gloriosum opus Artis Crucis & patientiæ,
corona aurea & laureola.

*Honor alit
artem be-
nè viuen-
di & mo-
riendi.
Psal. 50,
19.*

PER crucem boni LATRONIS itur ad illud martyrium, siue sacrificium illud, quod est gratissimum Deo, *sacrificium Deo, spiritus contribulatus, cor contritum & humiliatum Deus non despiciet.* Accedit Iustinianus disceptans de Iustitia, cap. 6. *Quemadmodum omnis professio, omnisque ars certum habet modum & exercitium, quo ad sui finem facilius ducatur; ita & virtus iustitiæ tantò efficitur Deo propinquior, quanto in his exequendis extiterit promptior, quia reuerà nulla maior est iustitia, quàm seipsum Deo offerre sacrificium immaculatum.* Primum enim sacrificium, propter quod homo ad perfectam proficit iustitiam, est sacrificium contriti cordis,

cordis, pro perpetracione scelerum suorum. Quisquis in ^{Laureola}
mente tolerat hoc martyrium, vt iustitiam sibi ac- ^{tolerati}
quirat, propter iustitiam patitur, cui merces magna ^{supplicij.}
in cælo promissa est.

Hæc laureolæ illustris merces respondet sacrifi-
 cio iustitiæ, quo delicta omnia tolluntur, additque
 propterea citatus Iustinianus: *Aliud quoque est sacri-*
ficiu iustitiæ, quo nihil in hac peregrinatione perfectius
gratiusque Deo offerri potest, de quo sic legitur: Tamquam ^{Sap. 3. 6.}
aurum in fornace probauit eos, & quasi holocausti hostiam
accepit illos. Utique tales sunt, qui pro veritate & iusti-
tia animas suas tradiderunt tormentis, conuitiis, & mor-
ti. Consummatio autem huius est introitus ad gloriam. Ad-
eò enim placet hoc sacrificium Deo, quòd per ipsum omnia
mundantur peccata. Huic patent regna cælorum. Nulli
namque tam securè datur exire de corpore, quàm cui do-
natum est per iustitiam se Deo offerre. Hic est cursus, &
hæc est perfectio veræ iustitiæ, pro qua quicumque occu-
buerit, perpetuam recipiet à Domino coronam gloriæ.
 Hanc optabat, hanc postulabat bonus LATRO,
 cùm esset constitutus in extremis, & extrema verba
 pronuntiaret, & rogaret, *Domine, memento mei, cùm* ^{Extrema}
veneris in regnum tuum. Exaudiuit Deus LATRONEM, ^{verba mor-}
 donauit veniam & regnum. Hoc ipsum cupiebat si- ^{rientis.}
 bi, cùm animam ageret, clarissima & sanctissima ^{Luc. 23.}
 42.

femina Galla, cui D. Petrus apparuit, & intrepida rogauit, *Quid est, Domine mi, dimissa sunt mihi peccata mea? Cui ille, benignissimi, vt est, vultus, inclinato capite annuit, dicens: Dimissa, veni.* Hæc Gregorius libro 4. Dialog. cap. 13.

Prodeant in publicum spectaculum DISCIPULI
PETRI & PAULI, perlucidum speculum patientiæ in labore calumniæ & morbi.



17. *Sæuiat immanis ferro, flamma, cruce tortor;
Hoc plures aditus aula Tonantis habet.*

EMBLEMATICA IMAGO XVII.
DISCIPVLORVM PETRI ET
PAVLI CRVCIFIXORVM
EXPLICATA.

DISCIPVLI Principum Apostolorum PE-
TRI & PAVLI per calumniam delati
sunt apud Neronem, quòd urbem variis
in locis inflammassent; quam ob cau-
sam de mandato eiusdem Cæsaris multi feris, mul-
ti flammis, multi crucibus addicti sunt. Calumnia
impiorum hominum grauissima crux est. Confir-
mat idipsum Ambrosius Serm. 17. in Psalm. 118. *Non
unum genus est nostræ afflictionis: est & tentatio, est &
calumnia; sed tentatio leuior, calumnia grauior: siquidem
tentatio potest esse calumnia, calumnia in se & tentatio-
nem habet. Est humana tentatio, quam ferre possumus; ca-
lumpnia autem grauis est. & ideo Dominus quæ sunt gra-
uiora suscepit, & calumpniis appetitus silentium detulit
triumphale. Quanto maior & acerbior est humanæ
calumpniæ afflictio, tantò maior & sublimior pa-
tientia est, quam DISCIPVLI Apostolorum in suo
martyrio ostenderunt, præ oculis habentes CHRIS-
TVM, & hunc crucifixum, grauibz calumpniis af-*

Martyrol.
Rom. Ba-
ron. tom. I.

Sympathia
Christi
crucifixi
& marty-
rum Arti-
ficum to-
lerata ca-
lumpnia.

Heb. 12, 1. *fectum, de quo Paulus : Ideoque & nos tantam habentes impositam nubem testium, deponentes omne pondus, & circumstans nos peccatum, per patientiam curramus ad propositum nobis certamen : aspicientes in auctorem fidei, & consummatorem IESVM, qui proposito sibi gaudio sustinuit crucem, confusione contempta, atque in dextera sedis Dei sedet. Recogitate enim eum, qui talem sustinuit à peccatoribus aduersum semetipsum contradictionem : Ut ne fatigemini, animis vestris deficientes.*

CRUX DISCIPVLORVM PETRI & PAVLI,
CruX calumniæ.

*Instrumen-
tum artis
benè vi-
uendi.
Psal. 118,
134.*

DVra ac dira crux falsa calumnia est, à qua liberum se esse cupiens Dauid, orabat : *Redime me à calumniis hominum, ut custodiam mandata tua.* Magnum obstaculum seruandæ legis, calumnia ; & species quædam redemptionis est, ab ea posse liberari. Nouit Salomon quantus sit iste labor, cum testis oculatus fateatur, & simul deponat : *Verti me ad alia, & vidi calumnias quæ sub Sole geruntur, & lacrymas innocentium, & neminem consolatorem : nec posse resistere eorum violentiæ, cunctorum auxilio destitutos. Et laudaui magis mortuos quàm viuentes : & feliciorum utroque iudicaui, qui necdum natus est, nec vidit mala quæ sub sole fiunt. Cum sit adeò grauis crux, vix inueniun-*

ueniuntur homines, qui pares ferendo sint: sunt DISCIPVLI Apostolorum, & quidem non omnes, cùm lib.2.de Perfect. Religiosor. cap.36. dixerit Bonauentura: *Plures videmus castos, abstinentes, pauperes, semetipsos humiliantes, eleemosynas facientes, bona discentes, fide constantes, sed paucos admodum contumelias, & detractiões, & despectiões humiliter portantes.* Inuenietur vnus Achilles Abbas, cuius memoria est inter Apophthegmata Patrum, cùm ex ore eiiceret sanguinem, rogatus quid esset, respondit: *Sermo contumeliosus est cuiusdam fratris, qui me contristauit. Et deprecatus sum Deum, vt auferretur à me, & factus est sermo ille sanguis in ore meo. Ecce expui illum, & requieui, & dolorem illum oblitus sum.* Cruci huic subiecta vita humana est, vt Epist.54. Athanasio scripsit ^{Excitatio laborantis.} Basilii: *Quòd quidem vita hominis calumniis non sit obnoxia, difficillimum esse, ne dicam impossibile, & ipse persuasus sum, & bonitatem tuam non ambigere.* Ferebat hanc crucem Gregorius, de quo Basilii Epist.84. *Lugget & ipse cum omnibus aliis, irremissis contumeliis quasi quibusdam insolentibus plagis percussus.*

CRUX DISCIPVLORVM PETRI & PAVLi,
CRUX ægrotantium.

*Instrumen-
tum artis
benè mo-
riendi.*

PRinceps calumniatorum diabolus est, & tunc maximè calumniatur, cùm in extremis est homo. Felix æger, quem calumniæ istæ non tangunt, per omnia similis DISCIPVLIS Apostolorum, & simul beato Martino, qui cùm ageret iam animam, increpauit calumniatorem. *Quid adstas*, inquit, *cruenta bestia? nihil in me funeste reperies.* Felix ille, in quo tantus calumniator nihil damnationis esseprehenderit. *Etenim generosi athletæ*, teste Basilio Orat.27. *quamuis omni tempore vitæ suæ superarint, tamen cùm animam agunt, à principe huius sæculi examinantur, num vulnèra in luctaminibus acceperint, aut maculas aliquas, vel typos à peccatis impressos retineant. Quòd si nulla vulnèra accepisse reperiantur, nullasque maculas concepisse, tamquam inuicti existentes ac liberi, à CHRISTO reficiuntur: atque hoc ab ipso discere potes, qui tempore passionis suæ dixit: Venit princeps huius mundi, & in me non habet quidquam.* Satis generosè certauit S. Catharina Senensis, & tamen cùm ageret iam illa animam, vt eius historia tradit, quasi aliquid ipsi obiiceretur, respondit: *Vanam gloriam numquam, sed veram gloriam & laudem Domini vtique.*
Felix

Ioan.14,
30.

Felix anima, quæ in extremo agone posita, suam sic ^{Excitatio} agere causam possit. Interim vir Christianus, dum ^{agrotantis.} calumniis impetitur, exercetur & instruitur ad subeundum certamen, quod cum dæmone calumniatore tandem initurus est. Quisquis in hoc exercitio est, virtutem patientiæ colat, imitator sanctorum Martyrum factus, qui per calumnias satanæ & ministrorum eius crucibus adiudicati, cælestem aulam intrarunt. Quotusquisque sanus & æger similes labores patitur, *Cor suum dabit in similitudinem picturæ*, ^{Ecclesi. 38.} recurret supplex ad Deum, orabitque: Rex ^{28.} gloriose, in quo nihil damnationis esse deprehendit princeps mundi huius, *redime me à calumniis hominum*, ^{Psal. 118,} dum apud homines viuo; & à calumniis ^{13.} dæmonum, dum morior: vt tam viuens quàm moriens mandata tua custodiam. Non est cur timeat calumnias, nec timeat satanam calumniatorem, qui viuens & moriens CHRISTVM suum habet patronum, defensorem ac redemptorem, suadentem excitantemque ad patientiam, de qua agens S. Ephræm ait: *Quantum in nos malignus insurgit, tantò nos in patientia inueniamur viriles ac strenui vsque ad mortem, sicque omnes eius insidiæ mox dissoluentur.*

Leuamen laborantis & ægrotantis.

*Virtus Eu-
charistia.*

REx gloriosus in sacra sua passione summus est impetitus calumniis, quarum passionis memoria agitur in sacrosancta Eucharistia, quæ virtutem hausit ex cruento sacrificio, ut sumentibus se afferat robur, quo falsas criminationes facilius sustinere queant. Magnum hoc munimentum est, quo se munit æger contra diaboli calumnias; Viatico hoc refectus, vel ipsi dæmoni terribilis in lecto apparet. Hostiæ apud veteres dicebantur sacrificia, quæ immolabantur antequam exercitus ad copias ho-

viaticum.

stium accederet: & dux noster IESVS CHRISTVS sacram obtulit hostiam, & adhuc offert & præfert commilitonibus suis, ut tanto sacrificio innixi, non solum cum morte, sed etiam cum ipso mortis auctore, animosè confligant. Quod si veteres pro comparanda victoria suas hostias immolabant, & post hostes iam deuictos victimas sacrificabant, utrumque hoc sacrificium inuenitur in Eucharistia, quæ victima est & hostia: hostia, cuius vi atque virtute mors vincitur, atque prosternitur hostis: victima, cuius ope & opera parta de hoste victoria celebratur ab eo, qui post acceptum Viaticum victor & triumphator post obitum in cælum recipitur.

Glo-

Gloriosum opus Artis Crucis & patientiæ,
corona aurea & laureola.

CAlumnias patientis martyris vox illa esto: *Honor alit
artem be-
nè viuen-
di & mo-
riendi. •
Psal. 118,
161.*
*Principes persecuti sunt me gratis: & quidem ex
ore & calamo diui Ambrosij Serm. 21. in Psalm. 118.*
*Benè hoc martyr dicit, quòd iniustè persecutionum tormen-
ta sustineat, qui nihil rapuerit, nullum violentus oppressè-
rit, nullius sanguinem fuderit, nullius torum putauerit es-
se violandum; qui nihil legibus debeat, & grauiora latro-
num cogatur sustinere supplicia: qui loquatur iusta, & non
audiatur: qui loquatur plena salutis, & impugnetur; vt
possit dicere: Cùm loquebar illis, impugnabant me gratis.
Gratis igitur persecutionem patitur, qui impugnatur sine
crimine: impugnatur vt noxius, cùm sit in tali confessione
laudabilis: impugnatur quasi veneficus, qui in nomine Do-
mini gloriatur; cùm pietas omnium virtutum fundamen-
tum sit. Hic martyr sic impetitus calumniis, dixerat
paulò antè: Principes persecuti sunt me gratis; subiun- *Psal. 118,
161.*
gitque consequenter: Lætabor ego super eloquia tua,
sicut qui inuenit spolia multa.*

Spolia multa aureæ coronæ, & laureolæ martyrio *Laureola
tolerata
calumnia.*
calumniæ debentur, & pro meritis suis patiens gra-
ues calumnias rogat & orat Dauid, *Psal. 118,
134.*
*Redime me à ca-
lumniis hominum. postulatque dein præmium: Faciem
tuam*

Matth. 5,
11.

tuam illumina super seruum tuum. postulat visionem Dei, coronam nimirum gloriæ, & illam quidem illustrem, cælesti laureola decoram. Hæc magna & debita merces, quæ persecutionem patientibus falsasque calumnias subeuntibus adiudicatur in Evangelio: *Beati estis, cum maledixerint vobis homines, & persecuti vos fuerint, & dixerint omne malum aduersum vos, mentientes, propter me. Gaudete, & exultate, quoniam merces vestra copiosa est in calis.* Verbum quidem asperum calumnia est, de quo Dauid Psalm. 90. *Ipsè liberabit me de laqueo viuentium, & à verbo aspero.* Basilii in Scholiis: *A calumnia dixit. Tales autem sunt calumniatores. Attamen & horum multi sunt per spem in Deum facti victores, utpote magnus Ioseph, & Susanna, & alij quotquot in calumniam inciderunt, coronatique sunt.* Liber à criminationibus, verbisque asperis calumniatorum Leo martyr agens iam animam dixit: *Lætor, quòd in manus Angelorum tuorum, Domine, trado spiritum, liber conseruandus à iudicio improborum.*

Extrema
verba morientis.

Prodeat in publicum spectaculum sancti VITALIS, in quo veluti in speculo apparet imago ferentis feruitutem & morbum.



Hic vitalis erit: disrumpere liuide serpens.
 18. *Si mortem intuleris, sic magis talis erit.*

EMBLEMATICA IMAGO XVIII.

S. VITALIS CRVCIFIXI

EXPLICATA.

DIVVS VITALIS seruus Agricolaë Marty- Ambros.
Beda.
Surius.
ris, post varios ac diuersos cruciatus vi-
tali crucis ligno adstrictus est. Seruitutis
cruci adstrictus, CHRISTI Domini cru-
ci affigitur. Et quidem in vna & altera conditio- Sympathia
Christi &
Vitalis
ne instructionem CHRISTI habuit, cùm CHRI- Artificum
tolerata
seruitutis.
STVS accipiens formam serui, seruituti natus sit. Matth. 20,
28.
Non enim veni ministrari, sed ministrare. Huc pertinet
quod dicit Bernardus Homilia 1. super Missus est:
*Disce homo obedire, disce pulvis obtemperare. De auctore
tuo loquitur Euangelista: Et erat subditus illis, haud du- Luc. 2, 51.*
*bium quin Mariae & Ioseph. Erubescere superbe cinis: Deus
se humiliat, & tu te exaltas. Deus se hominibus subdit,
& tu dominari gestiens hominibus, tuo te praeponis au-
ctori. Utinam mihi aliquando tale aliquid cogitanti, Deus
respondere dignetur, quod & suo increpando respondit
Apostolo, Vade post me satana, quia non scapis ea quae Dei Matth. 8,
35.
sunt. Accedit Basilius in Regula breuiori 125. Alij
aliis obedientiam prestabimus tanquam serui dominis,
conuenienter praecepto Domini: Qui vult esse in vobis Luc. 22,
26.*

magnus, sit omnium ultimus, & seruus omnium: sicut filius hominis non venit vt ministraretur ei, sed vt ministraret. Humana seruitus, quæ homini propter hominem impenditur, mortalis est, vitalis verò Christiana, quæ homini propter Deum exhibetur.

CRUX VITALIS, Crux seruitutis Christianæ.

*Instrumentum artis
benè viuendi.*

*Excitatio
laborantis.*

Qui se mancipat alieno seruitio, se alterius iure constringit: & cum homo homini obsequium præstat, adstrictus in crucem agitur. Quisquis hoc patitur iugum, non terram inspiciat, sed cælum sublime intueatur. Cælum, non terram; Deum, non hominem suspicit in cruce seruus VITALIS, & officij sui Christianum famulum monet è cruce, quod monuit S. Augustinus Serm. 3. de Dedicat. Ecclesiæ: *Audi quisquis temporaliter seruus es, & quisquis teneris iure dominationis adstrictus. Quisquis conditione qualibet obnoxius es, esto seruus, & esto liber: esto seruus, humiliter obediendo; esto liber, fideliter seruiendo.* Hic seruus funibus seruitutis adstrictus, liber aliquando dicet, *Psal. 115, 6. ac simul canet: Funes ceciderunt mihi in præclaris, etenim hereditas mea præclara est mihi.* Et quidem Christiana obedientia, quid nisi decora seruitus est? Rogat Basilii Epist. 115. quomodo alius alteri obedire debeat. Respondet: *Sicut seruus Dominis, iuxta quod à Domino*

Domino praeceptum est: Qui vult inter vos esse magnus, ^{Luc. 22, 26.} sit omnium postremus, & omnium seruus. Præstat alienæ voluntatis seruum esse, quàm suæ, quemadmodum adstruit Ephraem, agens de rectâ viuendi ratione. Propriæ voluntati, inquit, ne te seruum feceris. Filij Israël è seruitute liberati, incolumes mare rubrum transierunt, in continenti naufragati sunt, quòd propriæ voluntatis imperio nimium se subderent.

CRUX VITALIS, Crux ægrotantis.

DVM homo iustus in hoc mundo detinetur, ^{Instrumentum artis} corruptioni suæ seruit; tunc incipit esse vitalis, ^{benè moriendi.} cùm ad vitam accedit æternam. accedit autem, cùm iam extremè laborat. *Iustorum animæ in manu Dei sunt, Sap. 3, 1.* & non tanget illos tormentum mortis. *Visi sunt oculis insipientium mori, illi autem sunt in pace.* Ergo vir sanctus, ^{Excitatio ægrotantis.} cùm desinit esse mortalis, incipit esse immortalis; & affixus lecto suo, similis est VITALI. Excitet seipsum, & dicat: *Conuertere anima mea in requiem tuam, quia Psal. 114.* Dominus benefecit tibi. *Quia eripuit animam meam de morte, oculos meos à lacrymis; pedes meos à lapsu. Placebo Domino in regione viuorum.* Hæc regio cælestis est, quæ mortuos & mortales reiicit, admittit vitales & immortales. Mortalis non potest non ægrotare; non potest, dum viuit, valere & benè habere; ac proinde

de neceſſe eſt vt, adhuc vitalis cùm ſit, ſuſtineat crucem VITALIS. Homo ſemper vtitur medicinis, ſemper enim occulta ægritudine laborat, vt oſtendit Auguſtinus in Pſalm. 102. *Stando laſſatus eras, ſedendo reſiceris: ipſum ſedere medicina eſt laſſitudinis. In ipſa medicina ruruſus laſſaris, diu ſedere non poteris. Quidquid enim eſt, vbi fatigationi ſuccurritur, alia fatigatio inchoatur. Quid ergo iſta deſideras languidus? Aliquando egrotat homo in domo ſua, in lecto ſuo ægritudine manifeſtiore. Semper ſuæ corruptioni ſeruit, tunc manifeſtiùs, cùm iam laborat in lecto, & gemens ſub onere crucis, diuinumque implorans auxilium ait: Rex glorioſe, qui natus es ſeruituti, & conditionem ſeruilem VITALI tuo tribuiſti, ſuccurre miſero homini corruptioni naturæ ſuæ ſeruienti, & pro libertate ſua ſuſpiranti. Haud dubiè, dum homo viuit, libertate ſua caret, cùm in carcere corporis ſit: & ſi quis è miſeris vinculis, quibus captus detinetur, exire non curat nec optat, VITALIS non eſt. Captiui, qui in publica detinentur cuſtodia, ſi ſuam ſperant liberationem, exitum ſuum deſiderant: ij verò, qui adſtricti vinculis ſunt, & reos ſe eſſe cognofcunt, timentque pro meritis damnationem & extremum ſupplicium, egreſſum è carcere minimè amant, ſed horrent. Myſticus ergo VITALIS corſuum dabit in ſimilitudinem*

nem pictura, & optabit se à nexibus corporeæ seruitutis liberari, & in libertatem filiorum Dei cooptari.

Leuamen laborantis & ægrotantis.

Rex gloriosus formam seruilem induit, nec illam ad extremum vsque spiritum posuit: in cuius seruitutis memoriam, sacram Eucharistiam reliquit, quam seruis humilibus elargitur, vt onus humanæ & mortalis subiectionis patienter tolerant. *Vitæ Eucharistia.* *O res mirabilis, manducat Dominum seruus, pauper & humilis!* Manducat Dominum pauper, & ditescit; manducat seruus, & in libertatem vindicatur; manducat humilis, & in cælis exaltatur. Qui corruptioni naturæ seruit, de carne CHRISTI, quam sumit, non corruptionem metet, sed potius incorruptionem. Eapropter cùm vicina iam est mors, & vt metat, falcem mittit, sapienter æger recurrit ad sacram Hostiam, vt pro carne sua mortali immortalem *viaticum.* CHRISTI carnem sibi assumat. Magnum certè hoc scœnus est, vt pro serua, domina, pro humana, diuina caro detur & accipiatur, in quam mors nullam iam habet ditionem. *Mors illi ultra non dominabitur:* Prou. 6, 9. quin potius in mortem illa suum exercet dominatum, & ad eius postea imperium, quam humanam carnem capit, tempore suo restituet.

Glo-

Gloriosum opus Artis Crucis & patientiæ,
corona aurea & laureola.

*Honor alie
artem be-
nè viuen-
di & mo-
riendi.*

VEra seruitus propriæ voluntatis abnegatio est, cui adiunctum martyrium est, quemadmodum Thomas Kempensis libro de Fidei dispensat. cap.3. notauit: *Si est aliquod genus supplicij, quod martyres facit, tunc maximè illi martyres fiunt, qui toties verbo Dei tamquam gladio submissi plectuntur, quoties sibi ipsis per obedientiam moriuntur.*

*Laureola
tolerata
seruitutis.*

Ephel.6,8.

Hoc igitur genus martyrij dignum corona, dignum laureola est, cuius consideratione animans seruos Apostolus, *Scientes, inquit, quoniam vnusquisque quodcumque fecerit bonum, hoc recipiet à Domino, siue seruus, siue liber.* Accedit Ambrosius cap.3. ad Coloss. *Si benè egerit, non erit apud Deum seruus despectui, sed remunerabitur quasi liber inter homines.* Liber vtique inter homines cupiebat Simeon esse, cum re & no-

*Luc.2,29.
Extrema
verba morientis.*

mine seruus obediens foret, dicens: *Nunc dimittis seruum tuum Domine secundum verbum tuum in pace.*

Prodeat in publicum spectaculum sanctus AGRICOLA; in quo, veluti in speculo, conspicitur forma amoris Dei & patientiæ in morbo.



19. *Parcite tot clavis: me lanca vincla ligabunt:
Hæc si defuerint, in cruce figet amor.*

EMBLEMATICA IMAGO XIX.
S. AGRICOLÆ CRVCIFIXI
EXPLICATA.

BONONIAE S. AGRICOLA martyr, Mar- Ambros.
Paulin.
Lipoman.
tyris Vitalis Dominus, sub Diocletiano
Imperatore in crucem sublatus est, in
qua sacri eius corporis iuncturæ clavis
perforatæ sunt, cuius tormenti vi, breui temporis
interuallo, vitæ suæ finem imposuit. Celebrarunt
sacrosanctam eius memoriam Paulinus, Gregorius
Turonensis, & Ambrosius, qui in Exhortatione ad
virginem ait: *Nomen utique habuit AGRICOLA*
aptum Martyris: nam et bonus agricola cum parat ter-
ræ solum vertere, & vitæ alimenta perquirere, non nisi
per signum crucis facere conatur. Dum enim aratro denta-
le subiicit, affigit aures, stivam ingerit, formam crucis
imitatur. Qui timore Dei percellitur, alter AGRICOLA
est, qui & crucem CHRISTI portat, &
clavis simul configitur. Expende axioma non mi-
nùs certum quàm sacrum illud Apostoli, *Qui sunt* Gal. 5, 24.
CHRISTI, *carnem suam crucifixerunt.* Non manus &
pedes solum, sed totum etiam corpus crucis clavis
confixerunt. Prædicti clavi diuini timoris sunt, qui-

bus artus omnes sui corporis transfigi cupiebat, simulque petebat Dauid, cum diceret: *Confige timore tuo carnes meas.* CHRISTVS ipse tempore passionis timuit, cepit pauere, & tedere: cum expauit, sacrosancta eius caro quasi quibusdam clavis confixa est.

Psal. 118,
120.

Sympathia
Christi &
Agricolae
Artificum
diuini timoris.

Marc. 14,
33.

CRUX AGRICOLAE, CRUX timoris Domini.

Instrumentum
artis
bene viuendi.

Dan. 13,
22.

Luc. 23,
40.

Excitatio
laborantis.

Psal. 118,
120.

QVI Deum timet, ad omnem eius offensam omnino immobilis est, eius voluntati ac legi infixus adhæret. Cruci diuini timoris affixa Susanna erat, cum diceret: *Angustiae sunt mihi undique.* Hærebat prorsus immobilis, nec vlla violentia poterat dimoueri. Quanti referat in cruce clavis AGRICOLAE capi, vel ex hoc intelligi potest, quod cum illis malus latro careret, vel in ipsa cruce peccauit, & illum peccantem plenus diuino timore socius redarguerit, *Neque tu times Deum, qui in eadem damnatione es?* Si timuisset, non deliquisset: nec bonus latro perstitisset fidelis, nisi clavis timoris diuini confixus foret. Crede Basilio in Psalm. 33. *Nisi timor instituenda vitæ nostræ rudimenta iaciat, impossibile fuerit castitatem sanctimoniamque legitime obseruari.* *Confige, inquit Dauid, timore tuo carnes meas.* Nam quemadmodum qui corporis membra habent

habent confixa, ad actionem quamlibet immobilia ea retinent: sic ij quorum animam occupauit Dei timor, omnem prorsus importunam peccati & obstreperam occasionem vitant. Accedit & Augustinus in Psalm. 118. Tali timore carnes crucifiguntur, quando carnales delectationes, quæ legis litera vetantur potius quàm vitantur, spiritualium bonorum delectatione vincuntur, & eadem vsque ad perfectionem, crescente victoria, perimuntur. De his clauis Iustinianus cap. 2. de Sobrietate benè monet. Non est in hac vita tempus euellendi clauos, de quibus Psalmus, Psalm. 118,
120. Confige clauis à timore tuo carnes meas.

CRUX AGRICOLÆ, CRUX ægrotantis.

Q Vis tam fortis ac robustus æger, vt diram Instrumentum artis
benè moriendi. mortem non timeat? Fortis ac robustus Abbas Elias erat, & relatus in Apophthegmatis Patrum ait: Ego tres res timeo: Unam, quando egressura est anima mea de corpore; aliam, quando occursurus sum Deo; tertiam, quando aduersum me proferenda est sententia. CHRISTVS ipse, cùm partes infirmi ageret, cœpit Marc. 14,
23. pauere & tædere. Tædium & pauorem tulit, cùm diceret, Spiritus quidem promptus est, caro autem infirma. Matth. 26,
41. Magnus Arsenius, vt memorat Metaphrastes, mori timebat, rogantibusque discipulis, Et tu, Pater, times mortem? Reuerà, inquit, hic metus, quo nunc me

*videtis affici, numquam omnino à me recessit, ex quo factus sum Monachus. Non derogat sanctitati, quòd vir iustus, more CHRISTI, mortem timeat, & affixus suo lecto martyris AGRICOLAE clavis transfigatur. Transfixus CHRISTVS clauos ipsos dulces omnino reddidit. Dulce lignum, dulces clauos, dulcia ferens pondera. Et quidem ita timet iustus mortem, vt & non paruam suauitatem & dulcedinem experiatur, illam hauriens à crucifixo Rege, qui pendens è cruce crucem & clauos dulces effecit. Habes in cruce Martyrem totum confixum clavis, qui & exemplo suo confirmat, quod iam antè cap. i. dixerat Ecclesiasticus: Timenti Dominum benè erit in extremis, & in die mortis suae benedicetur. Certus & verus hic aphorismus est. Timor diuinus salutaris est medicina, & hæc cum agricultura magnam habet consonantiam. unde mirum non est, quòd AGRICOLA partes medici è cruce agat. Basilii in Ascet. Postquam paradiso exules in hanc terram venimus, & sententiam hanc à Deo
 Gen. 3, 19. *audiuimus, In sudore vultus tui vescèris pane tuo; per longam experientiam, propter accisum terræ prouentum, agricolandi artem ad solatium molestiæ, quæ est ex terræ maledictione, intellectu cognitionem nobis eius artis largiente Deo, instituimus, ita etiam posteaquam iussi sumus reuerti ad terram de qua sumpti sumus, & dolorosæ carni*
 ad*

Excitatio
 agrotan-
 tis.

ad corruptionem propter peccatum condemnata coniuncti,
 & ob eam causam passionibus istis subiecti, data est nobis
 etiam hinc laborantibus ex medendi arte refocillatio, quæ
 vel aliquò vsque nos recreet. Et quidem in eo posita
 est ars agriculturæ, vt terram purget, scindat &
 componat, vt iacta semina recipiat, foueat & fru-
 ctum ferat: & ars medica circa terram corporis no-
 stri negotiatur, vt illam scissione venarum & purga-
 tionum medicamine curet, aptet & ordinet, vt sa-
 lutarem recipiens cibum homo alatur ac sustente-
 tur. Terra non nisi in patientia fructum producit,
 nec æger sine tolerantia poterit corpore & animo
 conualescere.

Leuamen laborantis & ægrotantis.

R Ex gloriosus, dulce lignum, dulces clauos cru- Virtus Eu-
charistia.
 cifixus mirabiliter effecit, & ad perpetuam sui
 recordationem, *memoriam fecit mirabilium suorum mi-* Psal. 110,
sericors & miserator Dominus, escam dedit timentibus se. 4.
 Dedit se timentibus escam, non vt clauos diuini ti-
 moris tolleret, sed vt eos dulces ac suaues redderet.
 Eapropter qui vel ipsam timent mortem, admo-
 nendi feriò sunt, vt sacra se reficiant Eucharistia, Viatium:
 cuius ea virtus est, vt cor humanum confirmet, &
 totum hominem contra mortis impetum firmet.
 Habet

Habet hic mundus magnam consonantiam cum mari, in quo tres virgines vel potius meretrices. frangebantur, sirenæ scilicet, quæ illectos nauigantes suo cantu in naufragia traherent. Vna canebat voce, altera tibiis, tertia verò lyra mulcebat auditum. Et ne earum melodia deciperetur, & simul traheretur Vlysses, dum nauigaret, nauis arbori se fortiter alligari permisit. Nauigat in mundo homo, quem ut capiant & deducant in naufragium, cantionibus & simul incantationibus alliciunt *concupiscentia carnis, concupiscentia oculorum, & superbia vitæ*. Ne rapiatur & trahatur ad miseram ruinam, nexibus ac vinculis, quæ secum sacrosancta Hostia defert, alligetur & vinciat. Vincit & ligat, qui dicit: *Qui manducat meam carnem, & bibit meum sanguinem, in me manet. Manet clavis affixus cruci, manet affixus lecto, in quo iturus è mundo, virtute sacri Viatici appetitionibus carnis, oculorum & vitæ humanæ minimè mouetur.*

Gloriosum opus Artis Crucis & patientiæ,
corona aurea & laureola.

*Honor alit
artem be-
nè viuen-
di & mo-
riendi.
Psal. 2, 11.*

CUm dominorum Dominus vnus & solus necessariò Deus sit, omnino timendus est, ac proinde Dauid ait: *Seruite Domino in timore, & exul-*

tate

tate ei cum tremore. Comes martyrij diuinus hic timor est, quandoquidem vox illa martyri adscribitur: *Principes persecuti sunt me gratis, & à verbis tuis* Psal. 118.
161. *trepidauit cor meum.* Adscribitur, auctore Ambrosio Serm. 21. in Psalm. 118. vbi martyrem trepidantem proponit ac repræsentat in hæc verba: *Pone ergo martyrem inter pericula constitutum, cum inde immanitas bestiarum ad incutiendum terrorem infremat, aliunde candentium stridor laminarum, & flamma ardentis fornacis exæstuet, ex parte alia personent tractus grauium catenarum, hinc carnifex cruentus assistat: pone, inquam, circumspectantem omnia plena suppliciis, deinde cogitantem mandata diuina, illum ignem perpetuum, illud sine fine incendium perfidorum, illam pœnæ recrudescentis ærumnam; trepidare corde, ne, dum præsentibus cedat, perpetuis se dedat exitiis; trepidare animo, dum futuri iudicij rhympheam illam terribilem quadam conspectus specie constituetur. Nónne ad hanc trepidationem fiducia viri constantis æqualis in eundem concurrit affectum confidentia cupientis aterna, & diuina trepidatio?*

Clauis diuini timoris totus confixus Martyr, concupiscit æterna præmia, coronam gloriæ, & laureolam quæ viris virtute præditis destinata est. Quòd si timere infirmitatis est, & infirmis negatur laureola, fortibus conceditur; occurrit sapienter Ambrosius,

Aa

fius,

Laureola
timoris.

fius, qui martyris constantiam cum eius trepidatione coniungit. Constans animo vir timoratus, est dignus corona & laureola, qui martyrem clavis confixum exprimit in seipso, & de quo canit Dauid:

Psal. lxxi. 1. Beatus vir qui timet Dominum, in mandatis eius volet nimis. Potens in terra erit semen eius, generatio rectorum benedicetur. Gloria & diuitie in domo eius. Hæc gloria viri timorati est cælestis remuneratio, cuius consideratio dulce lignum, dulces clauos efficit. Mysticus Agricola clavis timoris confixus Hilarion erat, qui iam moriturus dicebat: *Egredere, quid times? Egredere anima mea, quid dubitas? septuaginta propè annis seruisti CHRISTO, & mortem times? Quibus in verbis spiritum exhalauit.*

*Extrema
verba morientis.*

Prodeant in publicum spectaculum sancti COSMAS & DAMIANVS; in quibus, velut in speculo, ferentis ingratitude & morbum forma conspicitur.



Arte Machaonia vitæ producere metas
20. Queis pia cura fuit, quî meruere mori?

EMBLEMATICA IMAGO XX.
SS. COSMÆ ET DAMIANI
CRVCIFIXORVM
EXPLICATA.

ERATRES germani COSMAS & DAMIANVS, nobiles Medici, ægrotis sine stipendio seruebant: dominante Diocletiano, rogati de fide, fidei Christianæ cultores se esse coram Lyssiâ responderunt. Quam ob causam in mare præcipites acti, & diuinitus liberati, ad palum tandem damnati, lapidibus impetiti, sagittis transfixi, cæsi gladio, martyrium suum absoluerunt. Venit è cælo CHRISTVS, vt ministraret ægrotis, quibus opitulatus gratis, loco mercedis crucem, clauos & lapides benefactor inuenit. *Sustulerunt ergo lapides Iudæi, vt lapidarent eum. Respondit eis IESVS: Multa bona opera ostendi vobis ex Patre meo, propter quod eorum opus me lapidatis? Gloriosum CHRISTI obsequium, quod humanam mercedem nec quærit, nec expectat. Pulchrè Ambrosius lib. i. de Abraham c. 3. Minuit fructum triumphi mercedis susceptio, & beneficij arrodit gratiam. Plurimum enim refert, vtrum pecuniæ, an gloriæ dimicaueris.*

Antonin.
Metaph.
Martyrol.

Sympathia
Christi &
Sanctorum
Artificum
tolerata
ingrati-
tudinis.
Ioan. 10,
31.

Alter mercenarij loco ducitur, alter dignus habitus conseruatoris gloria. Maluerunt itaque martyres COSMAS & DAMIANVS conseruatorum potius quàm mercenariorum loco haberi, vt seruatori suo similes per omnia euaderent.

CRUX COSMÆ & DAMIANI, Crux obsequij exhibiti ingratis.

*Instrumen-
tum artis
benè vi-
uendi.*

CRucem suam secum humanum obsequium adfert, & exhibitum ingratis, præter crucem, ictus lapidum & sagittarum importat. Qualis sit is qui pro meritis gratiam non refert, definit Ambrosius libro 1. de Officiis cap. 31. *Conferre gratiam bonum est, & qui referre nescit, durissimus.* Quòd si loco gratiæ lapides & sagittas simul mittat, summus iste labor est, summa iniuria, nec tamen propterea gratia omittenda est. Pecunia mutua non datur, si refundenda non sit, conferenda tamen gratia, quamuis irremunerata existat. Adhuc, quòd amplius est, benefacere oportet homini, licet malum pro bono reddat, Deus enim compensabit. Monet hoc ipsum Augustinus lib. de Verbis Apostoli Sermon. 22. *Benefecisti homini? ingratus est homo? non te pœniteat benefecisse, ne fundas pœnitendo, quòd impleuisti miserando. Dic in corde tuo: Non videt iste in quem feci, videt ille propter quem*

*Excitatio
laboran-
tis.*

quem feci. Hoc est militare gloriæ, vt dixerat ante Ambrosius. Militarunt gloriæ fratres COSMAS & DAMIANVS, militauit gloriosus noster IGNATIVS, qui gratuitum obsequiũ suum multis ingratis contulit, præcepitque Sociis, *Quæ gratis accepistis, gratis date.* ^{Matth. 10, 8.} Hanc regulam sibi propriam statuit & constituit in Societate, quæ Natalitiis sanctorum COSMÆ & DAMIANI ad maiorem Dei gloriam nata est.

CRUX COSMÆ & DAMIANI, CRUX
ægotantium.

COSMAS & DAMIANVS de ingrata eorum ma- ^{Instrumentum artis bene moriendi.}
nu, quorum prosperam salutem procuraue-
rant, mortis supplicium receperunt, & patienter il-
lud portarunt. Curam ingratorũ egisti, & morbum ^{Excitatio agrotantis.}
contraxisti adeo grauem, vt parua aut nulla spes
salutis affulgeat: ad tolerantiam morbi excitant te
COSMAS & DAMIANVS, quibus cura ægotantium
crucem & mortem attulit. Ambidexter vterque est,
quando non solum corporibus, sed curandis etiam
mentibus operam suam impendit, & instruit Medi-
cos, quales se gerere debeant in curatione infirmo-
rum. COSMÆ & DAMIANI instar procedebat Eusta-
chius medicus apud Basilium, de quo Epist. 80. ita
legimus: *Est quidem omnium vestrum officium, quotquot*
artem

*artem medendi exercetis, in philanthropia positum. At tibi maximè ambidextra est ista scientia, latioresque tibi ipsi philanthropie terminos constituis, dum non medendis dumtaxat corporibus scientiæ istius gratiam adstringis, sed & de animarum languentium restitutione cogitas. Et quidem quemadmodum salus animæ pendet à Deo, & nemo sibi eam adscribere potest; ita etiam valetudo corporalis à Deo provenit, ac proinde Medici nec debent nec possunt attribuere sibi restitutionem sanitatis. Discant ex utroque Martyre, utriusque salutis auctorem Deum ipsum recognoscere. Iudicabant sic faciendum, & instruebant ægros suos ut facerent, COSMAS & DAMIANVS. Caueant ægri, ne illum committant errorem, quem damnat S. Basilii in Ascet. *Propriæ salutis spem in manus ponere Medicorum, irrationale est & absurdum, quod miseris quibusdam accidere videmus, qui Medicos non verentur suos vocare saluatores. Saluator quidem vnus est CHRISTVS, qui cunctis laborantibus & ægrotantibus ait: In patientia vestra possidebitis animas vestras. Hoc fac, & viues.**

LUC. 21.
19.

Leuamen laborantis & ægrotantis.

*Virtus Eu-
charistia.*

R Ex gloriosus cùm instituit sacrosanctam Eucharistiam, in ipsius institutione ingratum Iudæ animum expertus est, nec tamen propterea destitit

tit tantum Sacramentum condere, vt cùm eius serui indignè compensari præstita beneficia sentirent, recurrerent ad Eucharistiam, in qua malè remuneratus CHRISTVS ipse continetur, reficit, solatur ac recreat malè remuneratos Christianos, qui post eius refectionem humanæ ingratitude iugum leue & suaue inueniunt, præsertim ægri, qui, vt ingratissimè beneficerent, grauem sibi morbum contraxerunt. Et quidem sacrosancta altaris Hostia nominatur & est *gratiarum actio*, quam exhibuit Patri Filius, & exhibendam tradidit, ac reliquit, vt quod deerat in homine gratitudinis, sua ipse gratitudine suppleret. Hæc autem virtus sacri Viatici est, vt hominis ægro- *viaticum.* tantis ingratitude medeatur, soluat & compenset per se, quod in homine desiderabatur. Si quid gratitudinis erga se deesse cognoscat infirmus, nouerit compensare defectum, quem CHRISTVS in ipso sacrorum oblatione & communicatione mysteriorum omnino suppleuit.

Gloriosum opus Artis Crucis & patientiæ,
corona aurea & laureola.

R Ex Martyrum CHRISTVS, quàm sibi acerba *Honor alit*
fuerit ingratitude Iudæ, declarat ipse Psalm. 54. *artem be-*
nè uiuen-
di & mo-
riendi.
Quoniam si inimicus meus, &c. Hæc passio adeò grauis

Bb

CHRI-

Psal. 54, 3.
 CHRISTO erat, vt dixerit in eodem Psalmo: *Contristatus sum in exercitatione mea, &c.* Hoc opus, hic labor confessoris CHRISTI est, qui, teste Ambrosio Sermon. 21. in Psalm. 118. *loquatur iusta, & non audiat; qui loquatur plena salutis, & impugnetur.* Cum hæc pars magna martyrij sit, erit etiam causa præmij & remunerationis patienti viro, qui diuino ductus obsequio beneficia ingratias confert. Nam, vt Ambrosius declarat, *minuit fructum triumphi mercedis susceptio, & beneficij arrodit gratiam.* Ergo vt maior existat triumphus, maior corona, & laureola fiat illustrior, permittit interdum Deus, ne gratia pro impensa gratia habeatur. Eapropter Eugenius Abbas suorum saluti consulens, in puncto mortis suæ exhortabatur: *Oro ergo omnes & obsecro, filioli, vt accepta ac tradita Patrum instituta in omnibus inuiolabiliter ad gaudium meum, Sanctorumque omnium ac vestrum, ad palmam victorie perducatis.*

*Laureola
tolerata
ingrati-
tudinis.*

*Extrema
verba mo-
rientis.*

Prodeat in publicum spectaculum sanctus VINCENTIVS; in quo, veluti in speculo, fulget imago ferentis carnis passiones & morbos.



Nil opus est flammis, occumbam vt victima Christo:
21. Sat mihi diuino pectus ab igne calet.

EMBLEMATICA IMAGO XXI.
S. VINCENTII CRVCIFIXI
EXPLICATA.

FERAX Sanctorum patria, quæ Lauren-
tium victorem protulit, & VINCENTIVM
martyrem laureatum produxit. VINCEN-
TIVS Diocletiano & Maximiano Impp.
sub Præfide Datiano diuersa tormenta passus, cru-
cis patibulo adiudicatus est. Non multò pòst è cru-
ce iam depositus se subduxit, & vltro ad crucem
rediit, flammisq̃ue sacra eius latera concremata sunt.
Non poterat auelli à cruce, qui crucem ardentem
amabat. Ablatus Martyr è cruce, de mandato Da-
tiani in culcitra molli iacuit; assuetusq̃ue gloriosæ
crucis deliciis, lectuli floridi pœnas ferre non potuit.
Ergo VINCENTIVS molles ac floridas delicias per-
tæsus, nec ferens mollitiem teneræ culcitrae Datia-
ni, mortem deliciosæ vitæ prætulit, & gloriosè mor-
tuus est. S. Ephræm de Patribus agens ait: *Vocem ex-
spectant quæ ipsos excitet, & instar florum suauem odorem
spirantium efflorescant.* Floridus moritur, floridus exci-
tabitur VINCENTIVS. Crux, & satis grauis, est æ-
gro, cùm ciborum fastidio laborat, ad escam capien-

Metaph.
Surius.
Prudent.

dam compelli : nec parua crux accedit & incumbit
cælestibus viris diuino amore languentibus , & car-
nales delicias horrentibus, si quando ad illas captan-
das vi tentationis impellantur. Hæc crux VINCEN-

Heb. 12, 3. TII est, imò & ipsius CHRISTI, qui *proposito sibi*
Sympathia gaudio, *Christi &* *sustinuit crucem.* Maluit CHRISTVS crucem
Vincentij quàm thronum, maluit VINCENTIUS crucem
Artificum quàm thorum, maluit cruciatum quàm volupta-
contemptus tem, maluit mori quàm non pati. *voluptatis.* Res tristes, vt scri-
bit Basilio Gregorius, *quæ sponte feruntur, coactis deli-*
ciis potiores habentur.

CRUX VINCENTII, Crux terrenæ voluptatis.

Instrumen-
tum artis
benè vi-
uendi.

Voluptas lenis & blanda, dura & dira crux est
iis qui sublimi cælo gaudent, & Deo suo re-
creantur. Arsit in cruce VINCENTIUS, cùm eius la-
tera tosta sunt, nec non cùm in lectulo molli iacuit:
& qui carnis deliciis pulsatur, vtrumque tormentum
patitur; inflammatur cum VINCENTIO, & cum
VINCENTIO decumbit. Erat in hoc statu Augu-
stinus, cùm inter molles flammæ positus ac tor-
tus diceret in Meditat. *Sæpè sine causa alicuius utili-*
tatis cum aliquo loqui incipio, in tentationem incurro, vel
vitio curiositatis ineptæ succumbo, vel malarum cogitatio-

num

num turpitudinis motus illicitos & impudicos in ipsis interioribus meis sustineo. Væ tantæ infelicitati, tantæ perditioni! Dum enim quæ retrò sunt obliuiscens, ad ea quæ antè sunt extendere me volo, subita, nescio qua, miseria relabi ad inania & noxia me conspicio, & tamquam mors subita interueniens, vel quemadmodum canis rabidus, qui nec percussus à laceratione hominis se non temperat; ita delectatio perforat mentem meam. Non defuit in cruce & ^{Excitatio laborantis.} lecto VINCENTIO martyri Deus, non defuit Augustino patienti, nec deerit tentationes istas sentientibus, si tamen mori malint, quàm earum suggestionibus acquiescere. Huc pertinet quod Dei Mater lib.4. Reuelat. cap.16. Birgittæ significauit: Qui omnem voluntatem suam committunt Deo, & stant relictantes discretè motibus carnis suæ, hos quasi gallina pullos subiicit sibi Deus, faciens eis iugum suum leue, & consolando eos in difficultatibus. Huc pertinet quod cap.2. de Sobriet. asserit Iustinianus: Congruit statui nostro, ut donec peregrinamur in hac miseriarum & periculorum valle, reprimendarum carnalium voluptatum crucem nobis ipsis faciamus, sicut Apostolus dicit cap.5. ad Galatas: Qui autem sunt CHRISTI, carnem suam crucifixerunt cum vitis & concupiscentiis.

CRUX VINCENTII, Crux ægrotantis.

Instrumentum
artis
bene moriendi.

CVM ætas iuuenilis floret, Deus efficere solet, vt flos ille iuuentutis infirmitatibus emarcescat. Præstat ægro cum VINCENTIO flammæ & ardentis febres subire, quàm blanditiis & deliciis floridæ iuuentutis perire. Cedat igitur blandus lectus Datiani asperæ & duræ cruci. Cedat lectulo grauis & molestæ infirmitatis deliciosa adolescentia. Custodia castitatis, ægritudo corporalis est, ac proinde pro eius fida custodia gaudebant Sancti se morbis & infirmitatibus affligari. De horum Sanctorum numero vnus, & satis notus propter morbos à iuuentute contractos, S. Basilus est, qui plus mœroris in deliciis quàm in morbis esse adstruit, cuius hæc sententia est in Psalm. 33. *Oblectatio humana plus habet sæpenumerò doloris quàm voluptatis. Delicia, & satietas, & mollis victus multos ac varios secum trahunt morbos, ac afflictionum varia genera.* Ex morbis itaque iuuentutis sanitas manat, ex adolescentiæ deliciis vlcerosus morbus procedit, cùm Serm. 146. dixerit Augustinus: *Periculosum vlcus est iuuentutis, quod cupiditatibus ignescit, spe tumescit, voluptatibus tabescit.* Detexit Augustinus morbum adolescentiæ, qui & morbo pellendus est, sicut & ipse Serm. 1. de Visitat. infirmorum

firmorum ostendit, & monet: *Certè si toto corpore* ^{Excitatio agrotantis}
præualeres, infirmitatem medicinalem à Deo debueras om-
nibus votis expetere, & ne sanitas corporis infirmitas es-
set animæ, metuere. Nihil aliud scio; sed quia infirmaris,
utiliter debes gaudere; quia iusta est vocatio diuina, de-
bes ei totis visibus letus adesse. Aduit crucifixo VIN-
 CENTIO Deus, aderit & crucifero, *qui cor suum dabit* ^{Eccli. 38. 28.}
in similitudinem picturæ, deprecabiturque suum Re-
 gem, vt & ipse sibi assistat: Rex gloriose, qui pro-
 posito tibi gaudio, passionem crucis prætulisti, ac
 VINCENTIO præluxisti, vt crucem spinosam sibi
 mallet, quàm floridum Daciani lectum; concede,
 vt & ego potiùs eligam tecum extremè infirmari,
 quàm sine te benè habere atque valere.

Leuamen laborantis & ægrotantis.

REx gloriosus, qui, proposito sibi gaudio, pas- ^{Virtus Eucharistia.}
 sionem crucis tulit ac prætulit, hanc indidit
 vim venerabili Sacramento, in quo memoria passio-
 nis eius celebratur, vt quisquis eius particeps efficia-
 tur, crucem laboris & morbi deliciis carnalibus an-
 teponat. Consonat Bernardus, dum Serm. de Cœ-
 na Domini ait: *Quis poterit tam efferos motus frangere?*
quis pruritum vlcis ferre queat? Confidite, quia & in
hoc gratia subuenit, & vt securi sitis, Sacramenti Domi-

nici Corporis & Sanguinis pretiosi inuestituram habetis.
 Psal. 77, 25. Hæc sacra inuestitura cælestis omnino est. *Panem*
Angelorum manducauit homo, vt desinat esse homo, &
Angelus esse incipiat, cui non officiant, sed profi-
ciant corporis & animæ febres. Clauus clauo trudi-
tur, & carnalis ignis igne hostiæ Sacramentalis ex-
stinguitur, ac proinde, sic monente & hortante Da-
mascono lib. 4. fidei Orthodoxæ, accedamus desiderio
ardenti, manus in Crucis modum formantis crucifixi corpus
suscipiamus, & apponentis oculos, & labia, & frontem
diuinum carbonem concipiamus, vt ignis in nobis desiderij
eo ex carbone comburat peccata nostra, & illuminet corda
nostra, & participatione diuini ignis igniamur & deifice-
mur. Carbonem vidit Isaïas, carbo autem simplex non est,
sed vnitus igni: sic panis Communionis non panis simplex
viaticum. est, sed vnitus diuinitati. Carbo Isaïæ emundauit eius
labia, carbo autem Eucharisticus emundat animam,
vt pura degat, & munda è mundo exeat.

Gloriosum opus Artis Crucis & patientiæ,
 corona aurea & laureola.

Honor alit
artem be-
nè viuen-
di & mo-
riendi.

COronam clari VINCENTII, & laureolam Lau-
 rentij demereri sibi contendit, qui igne tribu-
 lationis, ægritudinis & tentationis probatur & af-
 flictatur. Quisquis in hoc statu est, meminerit
 CHRI-


CHRISTI dicentis: *Sint lumbi vestri præcincti, & lu-* Luc. 12.
cernæ ardentes in manibus vestris. & vos similes homini- 35.
bus expectantibus dominum suum, quando reuertatur à
nuptiis. Expectet seruus fidelis dominum remune-
ratores, dicit enim statim ipse: Beati serui illi, quos Luc. 12.
cùm venerit dominus, inuenerit vigilantes: amen dico 37.
vobis, quòd præcinct se, & faciet illos discumbere, &
transiens ministrabit illis. Et si venerit in secunda vigilia,
& si in tertia vigilia venerit, & ita inuenerit, beati sunt
serui illi. Summa hæc felicitas est, summus honor, in
tali mensa discumbere, vbi seruitium seruitio com-
pensat Deus, coronatiq; & laureati Laurentius &
VINCENTIVS sedent. Mortifica ergo corpus tuum, &
crucifige, & accipe huius martyrij coronam. Hæc coro- Laureola
na VINCENTII est, hæc laurea vincentis Epipodij victa vo-
martyris est, qui oblatas sibi delicias recusauit, & luptatis.
dixit crudeli tyranno: Non ita me CHRISTI ac fidei Extrema
Catholicæ armauit affectus, vt sensum meum misericordiæ verba mo-
tus figmenta permoueant. Pietas enim ista crudelitas est: rientis.
vobiscum viuere, mors est æterna. Ceterum à vobis per-
ire, gloriosum est. Post hæc Martyr gloriosus purus &
mundus obiit. Mysticus certè VINCENTIVS Vrsi-
nus presbyter erat, de quo Gregorius lib. 4. Dialogor.
cap. 11. Hic ergo venerabilis Presbyter, cùm longam
vitæ impleffet ætatem, anno quadagesimo ordina-

tionis suæ inardescence grauitè febre correptus , ad extrema deductus est. Sed cùm eum presbytera sua conspiceret, solutis iam membris, quasi in morte distentum , si quod adhuc ei vitale spiramen inesset, naribus eius apposita curauit aure dignoscere. Quod ille sentiens , cui tenuissimus erat flatus , quantulo adnifu valuit vt loqui potuisset , inferuescente spiritu collegit vocem, atque erupit, dicens : *Recede à me mulier , adhuc igniculus viuit , paleam tolle.*

Prodeat in publicum spectaculum sanctus ALEXANDER ; in quo , veluti in speculo , conspicitur forma euiscerationis & infirmitatis.




*Improbe cur imas animæ scrutare latebras?
22. Quanta sit hæc, durâ certior esto cruce.*



EMBLEMATICA IMAGO XXII.

ALEXANDRI CRVCIFIXI
EXPLICATA.

 ANCTVS ALEXANDER martyr sub An-
 tonino Vero fustibus cæsus, donec eius
 viscera diffluerent, pænè iam euisceratus
 palo crucis affixus est. Retulit in cruce
 CHRISTVM, qui tempore passionis suæ viscera cha-
 ritatis suæ profudit. *In finem dilexit eos.* Post CHRI-
 STI obitum sacrum eius latus punctum ac perfora-
 tum est, & interna præcordia patuerunt, & simul
 apparuerunt exemplaria, ad quorum imitationem
 ALEXANDER crucifixus viscera sua effunderet, vt
 gratam de se victimam Deo sacraret. Carpens aua-
 ritiam, & in auaros inuehens Ecclesiasticus cap. 10, 9.
 ait: *Avaro nihil est scelestius. Quid superbit terra & ci-
 nis? Nihil est iniquius quàm amare pecuniam: hic enim &
 animam suam venalem habet, quoniam in vita sua proiecit
 intima sua. Quod vitiosum in avaro est, honestum
 in ALEXANDRO, quo patiente nihil melius. Cùm
 terra & cinis sit, sanctè & altè sic se effert, vt cruci-
 fixo similis esse affectet. Nihil æquius, quàm pre-
 tiosam crucem amare: hic enim & animam Deo*
 ipsi

Beda.
 Vsuard.
 Asto.

Ioan. 13, 2.
 Sympathia
 Christi &
 Alexandri
 Artificum
 euiscera-
 tionis.

ipsi venalem habet, quoniam in vita sua effudit viscera sua, vt de præcordiis suis oblationem arduam & sublimem, operosam & laboriosam conficiat. CHRISTVS & ALEXANDER ara crucis vsi sunt, vt in ea præcordia sua litarent. Omnes igitur qui portatis crucem CHRISTI, *effundite coram illo corda vestra*, vt gratum & acceptum Deo sacrificium immoletis.

CRUX ALEXANDRI, Crux euiscerationis.

*Instrumentum artis
benè viuendi.*

Prou. 23,

26.

Psal. 107,

2.

*Excitatio
laborantis.*

DEus maiestatis rogat: *Fili, præbe mihi cor tuum.* Quis ergo tam excors sit, vt non occurrat roganti, & petenti non respondeat: *Paratum cor meum, Deus, paratum cor meum*, addens deinde, *Quoniam ego in flagella paratus sum?* Multi Deo offerunt præcordia sua, sed an vera eorum immolatio sit, laboriosa crux probare debet. Ecce ALEXANDER euisceratus in crucem agitur, & in cruce ostendit, veram & non fictam esse cordis donationem & oblationem. Ad crucem per emblemata erectæ scalæ apponuntur & appinguntur, vt qui Deo cor obtulerit, animosè in crucem ascendat, & veraciter ostendat, quàm certa ac vera sit interna suiipsius immolatio. Ostendit sancta Catharina Senensis, dum Orat. 13. clamaret: *O resurrectio nostra, alta & aterna Trinitas, euiscera animam meam!*

Crux

CRUX ALEXANDRI, Crux ægrotantis.

SI facultas ægio non datur vt fundat vocales pre-
ces, præ oculis constituat sibi ALEXANDRVM, Instrumentum artis
benè moriendi.
cuius viscera effusa sunt, & CHRISTO simul oblata.

Lecto doloris affixus, cor suum sacrificet Deo. Da-
uid, cùm labiis orare posset, dicebat, *Tribulationem* Psal. 141,
meam ante ipsum pronuntio; cùm nequiret, corde so-^{3.}

lùm utebatur, *Tibi dixit cor meum*, & audiebatur. Be- Psal. 26, 8.

nè Augustinus in Psalm. 124. *Quia cor quærit Deus*, Excitatio
agrotan-
tis.
cor inspicit: intus testis est iudex, comprobator, adiutor,

coronator. Sufficit vt offeras voluntatem, & cùm potes,
ore confitearis ad salutem. Cùm autem non potes ore, cor-
de credis ad iustitiam, corde laudas, corde benedicis, cor-
de in ara conscientie victimas sacras imponis. Quas vt
præbeat æger, cor suum dabit in similitudinem picturæ, Ecclesi. 38,
& ita adscendet in lectum, quasi crucem ascendat. ^{28.}

Nemo crucem CHRISTI scandit nisi per scalam
patientie, scalæ instar habet gradus tolerantia, per
quas ALEXANDER, & similes ALEXANDRO ægri
ascensus suos componunt, vt patienti se CHRISTO
iungant, cuius cor in cruce patuit, & ex eo aqua &
sanguis simul promanarunt. Sanguis ille semen
Martyrum extitit, & etiam Confessorum Christia-
norum, qui patientes morbos & ægritudines cor-

porum , imitatores Martyrum euaserunt. Quòd si accidat , vt æger difficultatem patiatur in detegendo corporis morbo quo laborat , consideret apud se, quid acciderit ALEXANDRO , quando secreta præcordia propter amorem CHRISTI patuerunt , & consideratione eius martyrij conetur pudorem ponere , imò & vincere , cùm oportet , in qua quidem victoria multum solet esse difficultatis iis , quibus innata verecundia est. Tunc gloriosior , cùm pro animæ salute quidquid intus in corde habet, effundit in confessione, quam morti vicinus facit.

Leuamen laborantis & ægrotantis.

Virtus Eucharistia.

R Ex gloriosus , cuius in cruce cor patuit , viscera amoris sui aperuit , & effudit in Eucharistia , qua dignus ille est qui nouerit cordis sui penetralia examinare , & in confessione Sacramentali explicare , cùm dicat Apostolus : *Probet autem seipsum homo , & sic de pane illo edat.* Edat de pane altaris , in quo non solum CHRISTVS aperit viscera sua , sed aperta clauibus confessionis præcordia mirabiliter recreat. Vnde & communicans dicit : *Cor meum & caro mea exultauerunt in Deum viuum.* Habet ars medica certa quædam in apotheca remedia , quorum vsu per violentiam renitentes intus humores foras attrahat;

1. Cor. II, 18.

Psal. 83, 3.

attrahat ; ars verò sanctæ Crucis inuenit & dedit
 Confessionis Sacramentum , cuius virtus nec tor-
 quet nec extorquet viscera , sed sponte ac volunta-
 riè aperit & reseat. Vnde monetur vnusquisquē no-
 strum : *Probet autem seipsum homo ; & omnibus sua-* Psal. 61, 9.
detur, Effundite coram illo corda vestra. Cùm vltimum
 vale dicunt, solent homines notis & amicis sua secre-
 ta detegere , & quamuis viri Christiani , sani & in-
 columes sua corda aperuerint in Confessione , tunc
 maximè id præstent, cùm extremum vale dicunt, &
 sacrum accepturi sunt Viaticum.

Viaticum.

Gloriosum opus Artis Crucis & patientiæ,
 corona aurea & laureola.

CRUX euiscerationis , qua seipsum immolat Honor alie
 artem be-
 nè viuē-
 di & mo-
 riendi.
 Deo, martyrium secum importat. Auctore Isi-
 doro lib. 7. Originum cap. 11. *Duo sunt martyrii gene-
 ra, vnum in aperta passione, alterum in occulta animi vir-
 tute.* Talis est qui tanto est animo præditus, vt quod
 intus in corde habet, effundat exterius, & commissa
 sua Deo & eius Vicario aperiat. Rubet cruore mar-
 tyrium , rubet & roseo sanguine vultus verecunda
 confessio, vt & ipsa martyrium colore, præmio, &
 remuneratione referat & æmuletur.

Pulchrum monitum Ecclesiastici : *Pro anima tua* Ecclesi. 4, 24.

*Laureola
villi pu-
doris.*

*Extrema
verba mo-
rientis.*

ne confundaris dicere verum. Est enim confusio adducens peccatum, & est confusio adducens gloriam & gratiam. Euiscerata confessio, & veræ poenitentiae erubescencia atque confusio gloriosam secum adducit coronam vitæ. Quapropter Pacianus agens de Poenitentia & confessione, inquit: Desinite vulneratam tegere conscientiam. Peccator erubescat perpetuam vitam præsentis pudore mercari? Nec solum dignus est corona gloriæ, qui sic aperit præcordia sua, sed etiam laureola triumphatoris, cum S. Gregorius Nazianzenus Orat. de Baptismo, idem argumentum vertat in eius elogium, qui detegit conscientiam suam: Hoc quoque sempiterni illius supplicij pars est, atque perspicuum facies, te seriò atque ex animo peccatum odisse, dum illud tamquam contumelia dignum traducis, ac velut ludibrio exponis, deque eo triumphum agis. De tanto hoste triumphus dignus palma, dignus laureola est. Hunc eundem celebrem triumphum agens de peccato Leo Martyr, morti vicinus dicebat: Lætor iis, quæ facta sunt, nempe quòd pro meis prioribus peccatis nouum Vaticum accipio martyrium.

Prodeat in publicum spectaculum sanctus THEODORVS Dux; in quo, veluti in speculo, carentis superiore & laborantis capite forma conspicitur.

EM.



Funereas agetum lunate in vulnera taxos;
23. Dummodo de patulo vulnere vita fluat.

EMBLEMATICA IMAGO XXIII.

S. THEODORI DVCIS CRVCIFIXI

E X P L I C A T A.



ANCTVS THEODORVS Dux & martyr Metaph.
Nicephor.
Martyrol.
 sub Licinio Imperatore , delatus quòd
 pauperibus fracta idola distribuisset , elatus in crucem , sagittis transfixus , capite tandem truncatus in cælum receptus est. THEODORVS crucifixus pro CHRISTO, & pro CHRISTO capite plexus, ornamentum suum amisit, vt ab eodem CHRISTO in cælestibus ornaretur. Quò maior ornamenti iactura in terris , eò maior ornatus in cælis est. Pertinet huc quod Serm. 20. in Psalm. 118. de capitis portione affirmat Ambrosius : *Caput est, vt formam generis humani consideremus , quod fouet membra omnia, & dirigit, atque implet sensibus ; sensus enim sapientis in capite est. Inde ductus venarum, meatusque spiritus, sanguinis vires, & totius corporis partes deriuantur. Lustrat omnia, ornat omnia. Sublato capite corpus sine nomine est, non agnoscitur, nec vlla superest vsura viuendi. Propterea, qui in aliquo damnantur crimine, eò quòd ornamentum est totius corporis, capite abdicatur. Miserum sine capite corpus, totum informe, totum indecorum* Eccles. 2, 14.

216 SACRI SANCTVARIi CRVCIS PARS II.

decorum est. Magna & summa miseria, ingens labor, cū corpus Reipublicæ, exercitus, & etiam domus sine capite est, ac truncum è cruce priuatum regimine pendet. Hunc eundem laborem Ecclesia experta est, cū CHRISTVS eius sponsus defecit, cuius defectum plorans & lamentans Ieremias, clamabat: *Recordare Domine, quid acciderit nobis, intueri & respice opprobrium nostrum. Hereditas nostra versa est ad alienos, domus nostræ ad extraneos. Pupilli facti sumus absque patre, matres nostræ quasi viduæ.* concludit: *Cecidit corona capitis nostri.*

*Sympathia
crucis Ec-
clesiæ &
Theodori
Artificum
patientia
in iactura
superioris.
Thren. 5, 1.*

CRUX THEODORI, Crux amissi capitis
regentis.

*instrumen-
tum artis
benè vi-
uendi.*

CORpus, si capite careat, cunctis opprobriis exponitur: sic exposita sine viro mulier, sine Duce exercitus, sine Principe Respublica, quibus omnibus dira ac dura crux ista est. Quam ob rem septem illæ mulieres Reipublicam Hebræorum adumbrantes, nec pares crucem ferendo, apprehenderunt virum vnum, atque dixerunt: *Panem nostrum comedemus, & vestimentis nostris operiemur, tantummodò inuocetur nomen tuum super nos, aufer opprobrium nostrum.* Hoc idem periculum, hoc discrimen imminere solet Reipublicæ, cū Princeps officio suo non vacat, guber-

Isai. 4, 1.

gubernationem deferit, ac publica negotia quasi aliena omittit, arma non attendit, nec curat. Clamat populus, nec Princeps audit. Clamores verò ^{Excitatio laborantis.} populi Deus non respuit, prouidebit de capite, totumque Reipublicæ corpus, ne pereat, ipse seruabit. Et quidem THEODORVS Dux, & qui similis illi est, non carent optimo capite, si Deum apud se habent, quemadmodum de recta viuendi ratione monet Ephræm: *Quemadmodum inter corporis tui membra nullum est tibi præstantius capite, & siue lapide, siue claua, siue etiam gladio petaris, reliqua tui corporis membra obuias, vt ictum à capite repellas, certò sciens te absque illo non posse viuere; ita rebus tibi anteponenda est omnibus fides sanctæ & consubstantialis Trinitatis, quòd sine ea vitam, quæ verè vita sit, viuere nemo queat.*

CRUX THEODORI, Crux ægrotantis.

Humana vita species militiæ est, in qua ducum suum gerit caput, quod imperat, ordinat & disponit ceterorum aciem membrorum. ^{Instrumentum artis bene moriendi.} Quòd si ingruente & simul sæuiente infirmitate, suo officio & simul functionibus caput priuetur, corpus totum quasi truncum est: lecto affixum, ictibusque dolorum transfixum refert Ducis THEODORI corpus, quod truncum capite in cruce apparet.

E c

Cùm

Cùm caput suis functionibus caret, iam desit esse, rogandusque corde CHRISTVS, vt vices capitis gerat. Dicat æger: Rex gloriose, qui caput omnium gentium es, adesto mihi ægrotanti, vt qui functionibus capitis sum omnino destitutus, à te, qui meum caput es, non destituar, sed instituar, quo pacto corpus infirmum regere ac moderari valeam. Ergo, cui forma huius regiminis desit, quæ in capite constituta est, *cor suum dabit in similitudinem picture*, & eam sibi formam resumet, & loco capitis substituet, quam assignat Ambrosius lib.i. de Iacob & vita beata, cap.8. *Illam formam iusti quis abnuat, vt nihil metuat, nihil reformidet, nisi virtutis dispendia, aliorumque vanas formidines comprimat, quas habeat è periculis sollicitudine, mortis timore, corporis infirmitate, vt doceat dissolui in corpore, & cum CHRISTO esse melius, vt ostendat, quia merita non impediuntur debilitatibus corporis, sed augentur.* Augentur capitis ipsius diminutione, si tamen non minuatur, sed potius crescat patientia, in qua salus & vita animarum sita est, dicente CHRISTO: *In patientia vestra possidebitis animas vestras.* Serpens, cuius tota vita pendet à suo capite, illud omnibus modis seruat, & reliquum corpus periculis opponit & obicit; patiens verò ægrotus, cùm non tam à capite quàm à virtute patientiæ pendere

Eccli. 38,
28.

Luc. 21,
19.

dere sciat salutem suam , more THEODORI , non capitis , sed patientiæ potius sedulam curam habeat. Nihil metuat , nihil reformidet nisi virtutis dispendia. Cùm è duobus vnum amittere debeat quis , vel caput corporis , vel virtutis ac patientiæ iacturam facere , præstat caput amittere , quàm virtutem perdere patientiæ , quandoquidem sine capite vita animæ stare potest , sine patientia verò stare nequit, cùm dixerit CHRISTVS : *In patientia vestra possidebitis animas vestras.* Luc. 21, 19.

Leuamen laborantis & ægrotantis.

Rex gloriosus , qui caput est corporis Ecclesiæ suæ , defecit in passione sua , cuius memoria recolitur in Eucharistia , & in ea destitutis capite subuenit. Nec solum Sacramentum condidit , vt mœstos de absentia sui consolaretur , sed etiam tristes de amissione chari sui superioris recrearet. Quisquis boni sui rectoris iacturam fecit , reficiat se venerabili Sacramento , & semel refectus dicet: *Dominus regit me, & nihil mihi deerit, in loco pascuæ ibi me collocauit.* Siue caput politicum desit , siue naturale caput deficiat , cuius regimine corpus gubernatur & administratur , nihil refert , si sacra Hostia sumatur , qua dignè sumpta , viuimus in CHRISTO, Psal. 22, 1.

mouemur & sumus. Viuimus, ne vñquam pereamus; mouemur, ne vñquam deficiamus; sumus, ne vñquam emoriamur. Quòd si agamus iam animam, & omne subsidium deficiat, quod nobis nostrarum rectores animarum subministrabant, & sensus omnis, qui residet in capite, desit, nihil nobis deerit, cùm adsit Deus, quem, Viaticum sumendo, accepimus, & capitis loco illum elegimus, vt nos difficili mortis hora, qua cessat humanum penitus gubernaculum, ipse nos regat, ipse nos gubernet. Hinc pulehrè S. Dionysius sacram hanc communionem & synaxim *Sacramentum Sacramentorum*, & spiritale nostrum *caput* appellat, dicens: *Ceterorum Hierarchicorum symbolorum participationibus ex diuinis huius perfectiuisque muneribus accedere consummationem*. Et paulò post ibidem ait: *Finis autem omnium est, & caput, cùm eum qui initiatur, præcipuorum Dei mysteriorum participem efficiat*.

Eccl. Hierarch. c. 3.
Parte 1.

Gloriosum opus Artis Crucis & patientiæ,
corona aurea & laureola.

Honor alit
artem bene
viviendi &
moriendi.
Colos. 1,
18.

Capitis mystici ablatio tolerata propter Deum, secum martyrium affert. Haud dubiè CHRISTVS (de quo testatur Apostolus, *Ipse est caput corporis Ecclesiæ*) cùm sacra præsentia moriens Ecclesiam suam

suam priuauit, martyrio illam addixit. Eapropter, cum totius Ecclesiæ forma virgo MARIA foret, ex sancta Crucis passione euasit Regina martyrum, sic & ipse CHRISTVS gloriosus Rex Martyrum extitit. Corpori itaque mystico mystici capitis amissio similis martyrio est, & idcirco cum populus Turo- nensis priuandus esset Præsule suo Martino, dixe- runt discipuli: *Cur nos, pater, deseris? aut cui nos de- solatos relinquis? inuadent enim gregem tuum lupi rapa- ces.* Inuadent lupi, gregem tuum mactabunt, & di- ro martyrio afficient.

Cum caput mysticum Ecclesiæ Ecclesiam suam reliquit, vt de mundo ad Deum Patrem transfiret, & in cælum ascenderet, magna fuit occasio gau- dendi, cum dixerit ipse: *Vado parare vobis locum.* LO- Ioan. 14, 2.
cum cælestem parauit, coronas & corollas adapta- uit. Magna fuit causa gaudendi, cum Serm. i. de Ascens. annuntiauerit Leo: *Quia igitur CHRISTI ascensio, nostra est prouectio, & quò processit gloria capi- tis, eò spes vocatur & corporis: dignis, dilectissimis, exul- temus gaudiis, & pia gratiarum actione lætemur.* Hodie enim non solum paradisi possessores firmati sumus, sed et- iam cælorum in CHRISTO superna penetrauimus. Magna hæc consolatio est, cum sanctum moritur caput, Princeps, aut pastor in regnum cælorum vocatur;

vt in eius prouectione , & simul coronatione corpus mysticum , quod in terris deserit , assumatur sursum in ipso , & in ipso tamquam in suo capite coronam gloriæ recipiat. Ergo , vt ceteri commilitones sequerentur Ducem suum , proximus morti THEODORVS in hæc verba illos monuit : *Fratres, ne succenseatis Licinio, est enim minister patris sui diaboli, & me de cetero oportet ire ad Dominum meum.* Deinde cruce sacra se obsignauit , & plexus capite , victoriam martyrij sui consummavit.


*Laureola
iactura to-
levata su-
periorita-
tis.
Extrema
verba mo-
rientis.*

Prodeat in publicum spectaculum sanctus THEODORVS miles ; in quo , veluti in speculo , ferentis CHRISTI militiam & morbi malitiam forma conspicitur.



Nunc Gradiue vale, tibi bellica cingula pono:
24. Virtutis cotem crux mihi chara dabit.

EMBLEMATICA IMAGO XXIV.
S. THEODORI MILITIS CRVCIFIXI
EXPLICATA.

ANCTVS THEODORVS miles apud Pergen Metaph.
in Pamphilia, Antonino Imperatore, Præ- Nicephor.
fide Theodoto, pro tuenda veritate cru- Martyrol.
ci suffixus est. Totus in armis, totus for-
tis de carnis imbecillitate triumphauit. *Arma militiæ* 2. Cor. 10.
nostræ non carnalia sunt, sed potentia Deo ad destructio-
nem munitionum, consilia destruentes, & omnem altitudi-
nem extollentem se aduersus scientiam Dei, & in captiui-
tatem redigentes omnem intellectum in obsequium CHRI-
STI. Natura nostra genuit infirmos & inermes ho-
mines, gratia verò virtutibus armatos ac munitos
generat. Quid aliud virtutes nostræ sunt, quàm ani-
mæ nostræ arma? Armatus miles in crucem THEO-
DORVS ascendit fide, charitate, virtutibusque mu-
nitus, vt in patibulo crucis cum morte ipsa confli-
geret. Conflixit & in cruce CHRISTVS: *Mors & vi-* Sympathia
ta duello conflixere mirando, munitusque sua diuinita- Christi &
te, & armis virtutum ornatus, duellum pariter & Theodori
triumphum egit. Commendatur à CHRISTO ipso Artificum
cælestis Angelus apud Birgittam lib. 1. cap. 36. quòd militia
nostra.

semper armatus causam animarum egerit. *Tu es quasi miles Domini, qui numquam deposuit galeam suam propter tadium, & qui præ timore numquam diuertit oculos suos à præliis.* Commendetur & THEODORVS, qui vixit semper in armis, & in armis obiit, se ipsum vincens, & calcans suæ carnis imbecillitatem pariter & infirmitatem. Commendetur miles CHRISTI, de quo Bernardus Sermon. 61. in Cantic. *Vult bonus dux deuoti militis vultum & oculos in sua sustolli vulnera, ut illius ex hoc animum erigat, & exemplo sui reddat ad tolerantiam fortiolem.*

CRUX THEODORI militis, CRUX militiæ Christianæ.

*Instrumentum artis
benè viuendi.*

1. Pet. 5, 8.

Laboriosa militia est, quæ milites suos semper vigilantes, semper armatos requirit. Hæc est militia Christiana, in qua promulgatum est, *Sobrii estote, & vigilate, quia aduersarius vester diabolus tamquam leo rugiens circuit, quærens quem deuoret, cui resistite fortes in fide.* Memor officij sui, & memores nos omnes reddens Bernardus, loquitur in hæc verba Sermon. 2. de S. Andrea: *Nos miseri & miserabiles vicinis tot serpentibus, & igneis telis undique volantibus, insurgentibus inimicis, nihilominus perniciose securitate, & negligentia dormitamus, torpentes otio, Vanitatibus & scurrilitatibus*

rilitatibus indulgemus, pigri ad spiritalia exercitia, ac si
 iam pax sit & securitas, & non sit militia hominis super
 terram. Concludit: Propterea obsecro vos, dilectissimi, ^{Excitatio laboran-}
 ipsa nos excitet hostium malitia peruigil, & instantia eo-
 rum maligna, qua tam seduli tam solliciti sunt in nostram
 perditionem, nos quoque sollicitos faciat & circumspectos,
 ut in timore & tremore nostrorum ipsorum salutem ope-
 remur. Ecce enim in cruce salus nostra tantum, ut ei vi-
 riliter inhereamus. Viriliter inhæret suæ cruci arma-
 tus THEODORVS, & similis THEODORO Christianus,
 qui crucifer CHRISTI, & CHRISTO totus
 armatus, viuens & moriens carnis infirmitatem pes-
 sumdat & calcat, dicitque: Omnia possum in eo, qui ^{Phil. 4, 1.}
 me confortat. Mysticum THEODORVM armis omni-
 bus munitum describit Iustinianus lib. 1. de Inter-
 conflict. cap. 7. & agens de galeâ dicit: CHRISTVS
 caput tuum veluti spiritualis galea salutis ab inimicorum
 protegat iaculis. Hac quippe galea si fueris decenter orna-
 tus, corporis animæque tuæ custodies sensus, non poterit
 mors habere ingressum, ubi vita suum collocauerit domici-
 lium. Cum hoc eodem loquitur S. Ephræm agens de
 agone spirituali: Cupis in agone ac luctamine decertare?
 Indue te armaturâ Dei, sicut vestimento. Indue te virtuti-
 bus animæ, caue exuas.

CRUX THEODORI, CRUX ægrotantis.

*Instrumentum artis
benè moriendi.*

DVrus ac dirus mortis conflictus expectat nos omnes : aut vincendi à morte sumus, aut mortem victuri. Si velimus esse victores, curemus ne inerimes & nudos nos vltima hora deprehendat, vltimus finis reperiat, mors inueniat. Quòd si THEODORVS miles non nisi munitus & cinctus internis potius quàm externis armis, cum morte certamen iniit, quis audeat lectum doloris ascendere, & cum morte manus conferere, nisi totum prius se spiritua-liter communierit? Christianum militem æger in lecto se præbeat, & quidem militem agebat Iobus, in cuius elogium Ambrosius cap. i. de Secunda interpellat. Dauidis asserit : *Quasi athleta fortis in stercore sedens, in tantis vibicibus, & sauis doloribus vulneris, totum corpus diris perfusus vlceribus mysticè loquebatur, nec acquirendis propriis remediis ægritudinis, sed sacris vacabat sermonibus. Fortiores itaque sermones ægri hominis, quàm illorum qui non ægrotabant.* Quanta sit hæc sæuientis morbi militia, vel ex hoc intelligi potest, quod in Psalm. 5. dicit S. Chrysostomus : *Morbi tempore huius maximè pugne tempus est, quando dolores undique perturbant animum, quando tristitie obsident, quando adest diabolus incitans, vt acerbum aliquod verbum dicamus.*

camus. Incitat diabolus , vt acerbum verbum proferamus in Deum , qui nobis infirmitates immit-
tit ; in homines , qui nobis ægrotantibus assistunt.

CHRISTVS econtrà nos excitat ad tolerantiam, <sup>Excitatio
ægrotan-
tis.</sup> suadet vt gratias agamus Deo , qui nostrorum est
auctor morborum , patientiâ nos componit & ar-
mat , vt victoriam de diabolo reportemus. Excitat
quoque nos , vt & assistentibus gratos nos exhibea-
mus , & cupiamus benefactoribus nostris officia ac-
cepta rependere & compensare. Hæc lex militiæ
Christianæ est, vt, qui nobis in lecto assistunt, gra-
titudinem nostram sentiant & experiantur , quem-
admodum CHRISTO assistentes in cruce Mater,
Ioannes & bonus Latro , eius beneficentiam expe-
rimento didicerunt. Nec vnus persecutorum , nec
tortorum acerbum aliquod verbum à CHRISTO
iam cruci affixo excepit. Tunc maximè apparuit be-
nignus , cùm humana crudelitas magis in eum sæ-
uiebat. Ergo vt per omnia militem THEODORVM
referamus, *præbeamus nos veluti milites strenuos pro Re-
ge nostro promptè alacriterque mortem appetentes,* quem-
admodum hortatur agens de Patientia & Pœniten-
tia Ephræm.

Leuamen laborantis & ægrotantis.

Virtus Eucharistia.

R Ex gloriosus , qui non venit pacem mittere, sed gladium , & prodiens in campum cum morte ipsa digladiatus est , prouidit de militari annona Eucharistiæ, vt qui eius castra sequuntur, tanti Sacramenti virtute ferre labores militares queant. Gratum & faustum nuntium sanis & ægris , qui in castris CHRISTI versantur , vt se Eucharistia reficiant , & nouas vires acquirant, quales in vltima infirmitate post sumptum Viaticum D. Franciscus acquisiuit , & non multò post, militariter loquendo,

*Viaticum.**Psal. 141, 3.*

Educ de custodia animam meam, sanctam animam exhalauit. Hæc sacra Hostia, hæc militaris annona extra sanctæ Ecclesiæ castra nec inuenitur , nec datur. Conceditur Christiano militi , qui viuut semper armatus ; nec arma sua deponit , nisi deponat vitam, & tunc porrigitur in Viaticum sacer panis munitio- nis , quo munitur contra mortem, & vallatur contra hostem.

Gloriosum opus Artis Crucis & patientiæ,
corona aurea & laureola.

*Honor alit
artem be-
nè viuen-
di & mo-
riendi.*

Luc. 12, 50.

S Acrum suum martyrium CHRISTVS vocauit *Baptismum.* ait enim : *Baptismo habeo baptizari, & quomodo*

quomodo coarctor vsque dum perficiatur? Hinc ortum & originem habuit, vt sacrum Confessorum martyrium Baptismus sanguinis appellaretur. Christianus miles sanctæ se militiæ adscribit, & castris CHRISTI tunc assistit, cùm tingitur aqua lustrali, cuius laucarum miram habet consonantiam cum sacrosancto martyrio. non enim solùm titulo & nomine, sed re ipsa martyrium nominatur Baptismus, & est. Ea propter professori artis militiæ Christianæ Homil. de Machabæis dicit Leo: Renuntia voluptati, auertere ab immunditia, pelle luxuriam, & cùm videris te multiplicem habere pugnam, tu quoque imitator Martyrum numerosam quære victoriam.

Cùm homo militiæ adscribitur per Baptismum, admittitur *in nomine Patris, & Filij, & Spiritus sancti.* Matth. 28, 19. in quarum visione diuinarum personarum corona gloriæ consistit. *Qui crediderit, & baptizatus fuerit,* Marc. 16, 16. *saluus erit:* sed ita saluus fiat, vt candidato numero Martyrum aggregetur, sicut aggregata Paula Romana est, de cuius morte dolentem atque lugentem consolatur filiam D. Hieronymus in hæc verba: *Secura esto, Eustochium, magna hereditate ditata es. Pars tua Dominus, & quò magis gaudeas, mater tua longo martyrio coronata est. Hæc Paula, & Paulus necdum* Laureola militiæ nostræ. à Nerone adiudicatus morti, sibi martyrij laureo-
lam

lam promittebat, cùm miles iam emeritus assereret:

2.Tim.4,8. *Bonum certamen certavi, cursum consummaui, in reliquo reposita est mihi corona iustitiæ.* Magnum certamen morientis, cuius extremo agoni corona iustitiæ respondet. vnde & agonizans, & cum morte simul luctans Antoninus Florentinus diuinum implorat auxilium:

Psal. 37. *Deus in adiutorium meum intende: & præ oculis coronam iustitiæ habens subiungit, Servire Deo, regnare est.*
 69.
 Extrema
 verba morientis.

Prodeant in publicum spectaculum sancti MARCVS, MARCIANVS, & SOCII; in quibus, velut in speculo, constantiæ in labore & morbo forma conspicitur.




*Crux mentem haud satiat; variant tormenta Tyranni.
 25. Quidlibet ut variant, Crux tamen istud erit.*

EMBLEMATICA IMAGO XXV.

SS. MARCI, MARCIANI, ET SOCIOR.

CRVCIFIXORVM

EXPLICATA.

 ANCTI Martyres MARCVS & MARCIA-
 NVS sanguine & spiritu fratres, cum So-
 ciis, imperante Maximiano, variis sunt
 affecti suppliciis; vna pars addicta flam-
 mis, altera in mare præcipitata, nonnulli capite ple-
 xi, MARCVS & MARCIANVS recto corpore cruci-
 fixi, inuerso capite alij crucibus adacti sunt. Mar-
 tyres siue recto siue inuerso corpore cruci inhæ-
 reant, semper stant: quoniam ad CHRISTI for-
 mam & similitudinem crucifiguntur. Nescit pa-
 tientia ruinam, crux CHRISTI casum ignorat: cru-
 ci affixus semper stat, statumque suum vir patiens
 semper conseruat. Consonat his S. Bonauentura di-
 cens: *Seruum Dei crux defendit, comprehendit & osten-*
dit vitam rectitudinis. Quos nos habemus antipodas
 corpore inuerso primo aspectu, primo iudicio cen-
 semus; sed cum res se aliter habeat, & reipsa nobis-
 cum stent, in prima illa censura planè nostra mens
 lapsa est: omnes quidem recti stamus, quoniam in

Euseb.
Martyrol.Sympathia
Christi
crucifixi
& crucifi-
xorum Ar-
riscum
constan-
tia.

236 SACRI SANCTVARIII CRVCIS PARS II.

vno eodemque terræ globo versamur, & cælestem orbem eodem modo spectamus. Cernimus stantes ac rectos MARCV M & MARCIANVM, Socioſque in- uerſos in effigie contemplamur, ſed Martyres om- nes recti reipſa ſunt, vel ex eo maximè, quòd vnā & eandem IEſV CHRİſTI crucem ferunt, & eum- dem crucifixum reſpiciunt atque ſectantur. *Sic ſtate in Domino, chariſſimi. Iterum Paulus 1. Corinth. 15. Sta- biles eſtote, & immobiles, abundantes in opere Domini ſemper, ſcientes quòd labor veſter non eſt inanis in Do- mino. Accedit & Auguſtinus Serm. de Decoll. Ioan. Si procella tempeſtatum fremuerit, ſtabiles eſtote in Domino. Nolite ab ipſo cadere, qui ſemper ſtat, & pugnātem ex- ſpectat, & adiuvat nos, vt ſtando & pugnando vincamus, & tunc demum coronandi veniamus.*

CRUX MARCI, MARCIANI, & Sociorum,
Crux magnæ conſtantiæ.

*Inſtrumen-
tum artis
benè vi-
uendi.*

ARdua reſ eſt ſtatum hominis mutari, & ho- minem non mutari; reſ difficilis, ſurſum ac deorſum omnia verti, & hominem ſemper ſtare, ſi- bi conſtare ac non peruerſi. Confirmat Ambroſius lib. 1. Offic. cap. 38. *Quid tam difficile, quàm deſpicere tamquam ex arce ſapientiæ opes, aliaque omnia quæ pluriſ- que videntur magna & præcelſa? Deinde, vt iudicium*

tuum

tuum stabili ratione confirmes, & quæ iudicaueris leuia,
 tamquam nihil profutura contemnas? Deinde, vt si quid
 acciderit aduersi, idque graue & acerbum putetur, ita fe-
 ras, vt nihil præter naturam accidisse putes, cum legeris,
 Nudus sum natus, nudus exibo, quæ Dominus dedit, abs- Iob 1, 21.
 tulit. Et vtique filios amiserat & facultates. Seruesque in
 omnibus personam sapientis & iusti, sicut ille seruauit, qui
 ait: Sicut Domino placuit, ita factum est, sit nomen Domini Iob 1, 22.
 benedictum. Confirmat quoque Augustinus in Psal. 86.
 Attendite similitudinem quadrati lapidis; similis debet esse Excitatio
laboran-
tis.
 Christianus: non cadit; & si impellitur, & quasi euerti-
 tur, non cadit, nam quacumque quadratum lapidem ver-
 teris, stat. Sic ergo conquadrmini ad omnes tentationes,
 parati quidquid impulerit vos non euertat. Stantem te in-
 ueniat omnis casus. Fortis, vt ait Cyrillus in Leuitic.
 lib. 12. omnia tolerat, omnia suffert, & numquam cadit.
 Huc pertinet quod lib. de Prouidentia vel Ethnicus
 Seneca docuit: Non video quid habeat in terris Iupiter,
 si conuertere animum velit, quàm vt spectet Catonem, iam
 partibus non semel fractis stantem, nihilominus inter rui-
 nas publicas rectum. Accedit Basilii Epist. 166. Et-
 enim qui animo sunt inconstanti, illis haud immerito &
 vita est inconstans; quibus verò animi sententia est solida,
 semper constans ac eadem, consentaneum est istos vitam age-
 re simili proposito congruentem.

CRUX MARCI, MARCIANI, & Sociorum,
CruX ægrotantium.

*Instrumen-
tum artis
benè mo-
nendi.*

*Excitatio
ægrotan-
tis.*

COrpus, quod variis rerum mutationibus, tem-
porumque varietatibus non cedit, idem ac si-
bi simile validum perseverat: anima quoque, quæ
modò has modò illas patitur in carne sua infirmi-
tates, & inter diuersas vicissitudines morborum ea-
dem semper manet, nec deiicitur, sed semper firma
stat, benè habet, licet corpore non valeat, sicut de
seipso censuit Augustinus Epist. 149. quam iacens in
lecto scripsit: *Quoniam & Domino placet, quid aliud
dicendum est, nisi quia rectè sumus.* Consonat Augusti-
no Basilus, & ipse æger, Epist. 60. *Ne igitur ad decer-
tandos pietatis agones defatigemur, neque per desperatio-
nem, quæ iam decertata sunt, amittamus (non enim uno
actû fortitudinis, neque modico quodam labore constantis
animi specimen datur; sed quia corda nostra probat, longa
nos ad prorogata probatione vult iustitiæ coronam adeptos
demonstrare) dumtaxat constans ac fidelis seruetur animus
noster, fidei nostræ propositum in CHRISTVM custodiatur
immutum.* Constantia laborantium atque ægrotan-
tium sine patientia consistere nequit. Haud dubiè
languidum constantia reddit patientem, reddit pa-
tientia constantem. CHRISTVS ipse summus serua-
tor

tor patientiæ, constantiæque magister, firmus in cruce stetit, & tamen totus mundus versus & inuersus est, clareque satis ostendit inter mundanas varietates ac mutationes virtutem constantiæ atque patientiæ posse seruari. Solet interdum Deus domesticum rerum statum fursum & deorsum vertere, solet humores & qualitates corporum immutare, vt animum patientem & constantem exploret. Accidit hoc B. Iobo, in cuius elogium Spiritus sanctus ait: *Vir erat in terra Hus, nomine Iob, & erat vir ille simplex* Iob 1, 1. *& rectus.* Vir vnus erat, quia sibi similis, rectus, quia eiusdem tenoris, ac propositi tenax erat, cum tamen bonis omnibus ac valetudine corporis esset omnino priuatus. Quisquis malè habet, rectusque esse cupit, *cor suum dabit in similitudinem picturæ.* Satis benè Ambrosius Epist. 82. *Assuesce vnus esse, vt vita tua quamdam picturam exprimat, eandem seruans imaginem quam receperat.* Eccli. 3, 28.

Leuamen laborantis & ægrotantis.

REx gloriosus, qui constantiæ suæ, dum patetur, præclarum dedit argumentum, & simul exemplum, vt redderet sibi similes laborantes & ægrotantes, sacram condidit Eucharistiam, in qua sibi semper similis est, tenet eandem formam, & rectam

Virtus Eucharistia.

Cant. 2, 9. rectam quidem, in Hostia, cum stet perpetuò. *En ipse stat post parietem nostrum, respiciens per fenestras, prospiciens per cancellos.* Respicit ac prospicit per fenestras & cancellos accidentium, & excitat ad constantiam in labore & morbo suos. CHRISTVS in Eucharistiâ sic consecratus est, vt si frangatur Hostia, calix vertatur, inuertatur & effundatur, eius status & statura non minoretur, non minuatur: manet semper idem, & idem omnino in CHRISTO, *Ioan. 6, 58.* qui CHRISTVM participet in Sacramento. *Qui manducat meam Carnem, & bibit meum Sanguinem, in me manet, & ego in illo.* Septem alia Sacramenta certis verbis formantur, conficiuntur ac perficiuntur, & statim desinunt, Sacramentum verò altaris post factam consecrationem permanet ac perseverat, vtpote constantiæ symbolum, cuius admirabili virtute stantes atque constantes homines in finem vsque *Viaticum.* perdurant, & in fine vitæ, sumpto Viatico, constantiam suam confirmant.

Gloriosum opus Artis Crucis & patientiæ,
corona aurea & laureola.

*Honor alie
artem be-
nè viuen-
di & mo-
riendi.*

CONSTANTIA Martyrem facit: fecit & puerum Machabæum, qui cum variis promissis & minis alliceretur & deterreretur, vt vero Deo cultum debitum

debitum negaret, coleret falsos deos, audacter & simul constanter respondit, *Non faciam*. Hæc viri constantis responsio, cùm tentatione graui pulsatur vt à Deo suo deficiat, & suis obsequium deferat. Hoc propositum laudabile, vt instar Martyris dicat; *Non faciam*: firmum & perpetuum votum; *Juravi, & sttui custodire iudicia tua*. Hæc firmitas & constantia ornauit martyrem Stephanum, qui vidit stantem in regno cælorum CHRISTVM, & ipse ad eius exemplum stetit. Satis benè Ambrosius in Psalm. 61. *Sacerdos præterit, Leuita pertransiit, stetit ille, qui inflicta vulnera curauit*. Concludit: *Ideò Sacerdos non potuit coronari; Leuita non potuit, quia transierunt, & tamquam Umbra præterierunt. Stephanus autem martyrio coronatus est, quia stantem videbat Dominum IESVM, immobilem, non prætereuntem. Immobilis ergo fide Stephanus immobilem CHRISTVM videbat; nullo erat mortis timore commotus. Non mouit se Stephanus, non mouit & CHRISTVS.*

Dignus corona & laureola, qui stetit immobilis, nec ipse instantis mortis timore se turbauit, sed fixus ac firmus permansit. Præcessit ille martyrio & virtute constantiæ simul coronatos laureatosque crucifixos & cruciferos, de quibus diuina Sapientia loquitur: *Stabunt iusti in magna constantia aduersus eos*, Sap. 5, 1.

Hh

qui


qui se angustiauerunt, & qui abstulerunt labores eorum.
 Cùm perfidi homines præter spem videbunt eos
 Sap. 5, 4. laureatos & coronatos, clamabunt: Nos insensati vi-
 tam illorum æstimabamus insaniam, & finem illorum sine
 honore. Ecce quomodo computati sunt inter filios Dei, &
 inter Sanctos fors illorum est. Hæc dignitas, hæc fors
 gloriosa virorum constantium est. Præditus virtute
 constantiæ Ambrosius, qui cùm rogaretur à suis vt
 Deum pro longiore vita oraret, constantissimè re-
 spondit: Non ita inter vos vixi, vt pudeat me viuere;
 Extrema
 verba mo-
 rientis. nec timeo mori, quia bonum Dominum habemus.

Prodeat in publicum spectaculum Exercitus DE-
 CEM MILLIVM crucifixorum; in quibus, veluti in
 speculo, vitæ humanæ & infirmitatis forma conspi-
 citur.



*Macte animis generosa phalanx, noua bella capeſſe:
26. Vincitur hic letho vita, labore quies.*

EMBLEMATICA IMAGO XXVI.
EXERCITVS DECEM MILLIVM
CRVCIFIXORVM
EXPLICATA.

VB Cæsare Hadriano exercitus DECEM MILLIVM Christianorum primùm flagellis cæsus, postea spinis coronatus, deinde in terra prostratus, in ea extensus, clavis confixus est. Miseri peccatores in terram sic deiecti corruunt, vt in sua misera ruina conterantur & confringantur. *Contritio & infelicitas in viis eorum.* Psal. 133. Felices iusti, quos vis humana deiicit, nec tamen deiecti læduntur, nec colliduntur: *Cùm ceciderit iustus, non collidetur.* Ad dexteram Dei iustus cadit, peccator ad sinistram ruit: felix est casus iustorum, infelix peccatorum. Exercitus DECEM MILLIVM Martyrum in terra confixus iacet, iacet ad dexteram Dei. *Cadent à latere tuo mille, & decem millia à dextris tuis.* Rex gloriosus, flagellatus, coronatus, & crucifixus copiosum Martyrum fructum sibi per omnia similem in terra produxit. *Nisi granum frumenti cadens in terram mortuum fuerit, ipsum solum manet: si autem mortuum fuerit, multum fructum affert.* Dum in

Antoninus
in Chro-
nico. Vin-
cent. in
Speculo.

Psal. 133.

Psal. 36.

24.

Psal. 90. 7.

Sympathia
Christi &
Decem mil-
lium Mar-
tyrum Ar-
tificum to-
lerata mor-
talitatis.

Ioan. 12.

24.

terra sumus & viuimus, in consortio sacrorum Martyrum terreni corporis crucem nobiscum ferimus & portamus. Accepimus ex Annalibus Ecclesiasticis, Christianorum persecutores grande & graue tormentum inuenisse, vt Martyres viuos cadaueribus mortuorum alligarent, & alligatos teneant, donec in mutuo complexu Martyres viui animam suam efflarent. Mortales omnes corporibus innexi sumus, & quid simile patimur, dicente Paulo: *Infelix ego homo, quis me liberabit de corpore mortis huius?* Mori crux est, crux etiam & cruciatus est ita viuere. Accedit Bernardus de Modo benè viuendi, Sermon. 10. *Vita præsens mors est, quia est plena miseriis.* Hinc fit, vt Pontius Diaconus, sicut in actis passionis S. Cypriani legimus, cum esset adiudicatus iam morti, clamauerit: *Gratias ago Deo omnipotenti, qui me à vinculis huius corporis absolvere dignatur.*

Rom. 7,
24.

CRUX EXERCITUS DECEM MILLIVM,
CRUX vitæ humanæ.

*Instrumentum artis
benè viuendi.*

Iob 7, 20.

TErream crucem singuli nobiscum gestamus, terrena quippe vita pondus & onus est, quod sentiebat Iob in se, cum diceret: *Factus sum mihi metipsi grauis.* Sub crucis huius onere gemebat Dauid, *Miser factus sum, & curuatus sum vsque in finem.* Nouit

Psal. 37, 7.

Nouit suam conditionem in Panoplia S. Ephræm,
 oratque : *Respice Domine , & vide , quia terra sum & puluis , nihilque sustinere valeo.* De cruce vitæ humanæ hæc accipe ex D. Bernardo Sermon. de Obed. patient. & sapientia: *Nunc in regione corporum habitantes corporibus sumus obnoxij , & ex quo dissipauerunt legem Domini parentes nostri , non modò faciendi tempus est , sed etiam patiendi , & omnium nostrum amplius labor & dolor.* Durus quidem cibus est hordeaceus panis , sed offenso Rege pulsus palatio miles , quamuis delicatus , ad unum fortè , quem solum habet , seruulum diuertere opus habebit , ibi fouere latebras , & insolita capere prandia , apud eum regales delicias pultibus rusticanis , ac nobiles status sterquilinio mutari seruili , iuxta illud Prophetica lamentationis : *Qui nutriebantur in croceis , amplexati sunt ster-* Thren. 4,5.
cora. Ibiq; hoc maximè Propheta deplorat , oblitus propriæ conditionis ingenuas creaturas tantam dissimulare miseriam : nec modò non reputare quod tolerant , sed tamquam bona magna amplecti , quæ paulò minùs extrema sunt mala. Propterea siquidem & de seipso ait : *Ego vir videns paupertatem meam in virga indignationis eius.* Gemamus nos sub hoc onere , fratres , & presentes deploremus ærumnas , frequenter quisque nostrum in vocem pie querimonie erumpat & clamet : *Infelix ego homo , quis me liberabit de corpore mortis huius ?* Nihil ergo miri , quòd
Rom. 7.
24.

quòd cùm S. Elifabetha in extremis versaretur , & sorores flentes cerneret , miserata humanam earum vitam dixerit, vt tradit Seraphica historia ; *Nolite super me flere : magis autem super vos fletu madescite.*

CRUX EXERCITUS DECEM MILLIVM,
Crux ægrotantium.

*Instrumentum artis
benè memoriendi.*

CVm premitur homo ægritudine , perpendat, Quot millia terra sustineat , quæ eandem crucem patiuntur. Cùm sint milleni & milleni , qui malè habentes , peiores moribus fiunt , quique meliores & sanctiores efficiuntur : his se militibus CHRISTI adiungat , vt composito cum illis agmine super terram , more DECEM MILLIVM Martyrum , vim regno cælorum inferat. Humana castra validos ac fortes milites postulant , ægrotos verò & infirmos reiiciunt ; castra verò cælestia debiles & humiles quærunt, si tamen animosè se gerant, sicut Paulus se gerebat , cùm diceret : *Cùm infirmor , tunc potens sum.* Concludit inde Ambrosius in Psalm.37. *Noli ergo timere carnis infirmitatem , quia sanctus cùm infirmatur , potens est.* Admonendus est æger , ortum ex limo duxisse suum, ex terra habuisse principium, & in terram futurum eius regressum , ac proinde cùm regreditur , præ oculis terram habere , & eam contem-

*Excitatio
ægrotan-
tis.
2. Cor. 12,
10.*

plari debere. Consideret sibi datam & innatam conditionem, quam scribit & describit Paulus cap.8. ad Romanos : *Vanitati creatura subiecta est, non volens, sed propter eum qui subiecit eam in spe : quia & ipsa creatura liberabitur à seruitute corruptionis in libertatem gloriæ filiorum Dei. Scimus enim, quòd omnis creatura ingemiscit & parturit vsque adhuc.* Hæc pensio humana est, detrectet nemo, nemo recuset ferre naturæ crucem, quam terra ipsa, ex qua ortus est humilis homo, producit ac generat. Si quis crucem ferre vel sanus vel æger detrectauerit, occurrit recusanti Cyrillus lib. 12. in Ioan. cap. 27. *Dominus quidem noster IESVS CHRISTVS debitā nobis baiulans crucem, & hoc propter nos, non erubescit : nos autem calamitosi, quorum mater hæc terra est, qui ex nihilo ad esse producti sumus, non audemus labores vel paruos pro pietate suscipere : sed si fortè pro CHRISTO quidpiam nobis acciderit, erubescimus. Ita inanem huius mundi gloriam sequentes in superbiam incidimus. O temeritatem maximam!* Ad hanc deponendā ægri cor suum aptabunt picturæ, quamdiu sub vexillis CHRISTI in castris militabunt mundanis. Ad hanc formam Eugenius Episcopus Carthaginensis mori voluit, de quo Gregorius Turonensis : *Ad sepulchrum Martyris Aramanthi diu orauit solo prostratus : deinde expansis manibus et brachiis super pauimentum, spiritum cælo reddidit.*

Leuamen laborantis & ægrotantis.

Virtus Eu-
charistia.

R Ex gloriosus , cùm pro nobis pateretur , non
 solùm deleuit quod erat contra nos chirogra-
 phum decreti , sed & terram ipsam deleuit , ac pro-
 inde *tenebræ factæ sunt super vniuersam terram* , vt vir-
 tute passionis suæ terram in cælum conuerteret. Hu-
 ius conuersionis memoria recolitur in Eucharistia,
 de qua Chrysostomus Homil. 24. in 1. ad Corinthios
 asserit : *Dum in hac vita sumus, vt terra nobis cælum*
fit, facit hoc mysterium. Ergo qui in terra laborat , in
 terra infirmatur , reficiat se cælestibus Sacramentis,
 vt onere , quod patitur , liberetur. Et quidem Pau-
 lus , cùm esset in tertio cælo , & ab infirmitate eripi
 desideraret & rogaret , ad sacram Eucharistiam re-
 missus est , cùm dicat ipse : *Ego enim accepi à Domino,*
quod & tradidi vobis. Accepit quidem in cælo , quod
 terræ tradidit Eucharisticum mysterium , vt qui par-
 ticipes eius forent , desinerent esse terreni , cælestes
 fierent : *Qualis cælestis, tales & cælestes.* Cælestis totus
CHRISTVS in Eucharistia est , & vt Christianos suos
Viaticum. cælicos omnino faciat , è terris iam decedentes Via-
 tico cælesti donat.

Luc. 23,
44.1. Cor. 11,
23.1. Cor. 15,
48.

Gloriosum opus Artis Crucis & patientiæ,
corona aurea & laureola.

Breuis vita humana est, & simul prolixa mors, Honor alit
artem be-
nè viuen-
di & mo-
riendi.
cuius compendio Martyres vitam æternam
possident. Hoc mortis compendium quærebat &
appetebat cum exclamaret Apostolus: *Infelix ego ho-* Rom. 7.
24.
mo, quis me liberabit de corpore mortis huius? Cum
mortalis omnis, dum viuit & degit in terris, secum
gerat corpus mortis à natura sibi impositum, artem
crucis & patientiæ profiteatur necesse est, vt non
tam vitam quàm mortem acceptam offerat Deo,
qui inflictas iustè pœnas nouit in præmia conuer-
tere. Breuitas humanæ vitæ in prolixam mortem
abiit propter primum Adæ delictum. Venit in ter-
ras CHRISTVS, & docuit Martyres suos non mo-
dò mortalem vitam, sed etiam mortem corpoream
Creatori consecrare, & quidem cum aureæ coronæ
& laureolæ remuneratione.

Canit propterea Ecclesia in elogium S. Stephani
primi ac primicerij Martyrum: *Patefactæ sunt ianuæ
cæli CHRISTI martyri beato Stephano, qui in numero
martyrum inuentus est primus. Et ideò triumphat in cælis
coronatus: mortem enim, quam Saluator noster dignatus
est pro nobis pati, hanc ille primus reddidit Saluatori.* Cum

*Laureola
mortis ob-
lata.*

*Extrema
verba mo-
rientis.*


Stephanus vitæ seu potiùs mortis humanæ accepit
vsuram, pœnam infectæ atque vitiatæ naturæ in se-
ipso expertus est; sed edoctus CHRISTI passio-
ne, didicit abnegare se & suam mortalem vitam, vt
non iam mortem Adami, sed illam quam Saluator
noster dignatus est pro eo subire, eandem ipsam
Saluatori redderet; triumpharetque propterea in cæ-
lis coronatus & laureatus. Similis huic per omnia es-
se optabat Richardus Episcopus Cicestrensis, qui po-
situs in extremis, coram crucifixi imagine protesta-
tus est: *Tu nosti Domine, quòd, si placeret, omnia oppro-
bria atque tormenta, & ipsam denique mortem pro te pa-
ratus sum tolerare; & sicut tu nosti me vera dicere, ita
quæso memineris mei, quia tibi commendo animam meam.*
Dum commendaret animam Remaclus Episcopus,
accedebat ad numerum DECEM MILLIVM Marty-
rum, & dicebat: *Mors vltima rerum linea est. Pulvis
& vmbra sumus.*

Prodeat in publicum spectaculum sanctus LYCA-
RION; in quo, veluti in speculo, salutis animæ &
infirmitatis corporis forma conspicitur.



Fruges beet campos Nilus Memphitidos ora:
27. Latior ex isto sanguine messis erit.

EMBLEMATICA IMAGO XXVII.
S. LYCARIONIS CRVCIFIXI
EXPLICATA.

 ANCTVS LYCARION apud Hermen in Martyrol. Menolog. Ægypto cruci adstrictus, membratim in ea cæsus est, vt virum dolorum CHRISTVM ad viuum exprimeret. Hanc sortem sibi cupiebat Ignatius martyr cum diceret: *Ignis, crux, bestia, confractio ossium, membrorum diuisio, & totius corporis contritio, & tota tormenta diaboli in me veniant, tantum CHRISTO fruar.* Cum vestis rumpitur, & corpus intactum manet, totum corpus sanum est: cumque caro vestis humana sit, quamuis illa laceretur, tota LYCARIONIS anima integra perseuerat. Non frangunt patientis animum labores, pœnæ, dolores, quin potius per mysticam antiperistasin carnis infirmitatibus spiritus roboratur. Hoc mysterium sacrosanctum primus omnium Sympathia Christi & Lycarionis Artificum salutis animæ. CHRISTVS inuenit, primus sensit. *Spiritus*, inquit, Matth. 26, 41. *promptus est, caro autem infirma.* Quò maiores & acerbiores cruciatus CHRISTVS experiebatur, eò maiores, eò sublimiores animos in sua passione gerebat & ostendebat. Hoc sublime sacramentum in tertio
calo

cælo Paulus nouit , cùm CHRISTVS ibi respondit:
 2. Cor. 12, 9. *Virtus in infirmitate perficitur.* Perficitur in LYCARIONE , dum caro in cruce infirmatur , disrumpitur , dilaniatur. Multi sæua tormenta pro salute corporis patiuntur , quid ni Christianus homo pro animæ suæ salute pœnas atroces ferat? Hoc argumento vtitur Augustinus lib. de Patient. *Intueamur , quanta in laboribus & doloribus homines sustineant , dura pro rebus quas vitiosè diligunt , & quantò se his feliciores fieri putant , tantò infeliciùs concupiscunt.* Concludit : Deinde , vt illud dicam quod culpabile non est , si tanta suffert pro salute carnis inter manus secantium & vrentium Medicorum , quanta debet sufferre pro sua anima inter furores quorumlibet inimicorum.

CRUX LYCARIONIS, Crux saluationis animæ.

*Instrumentum artis
 benè viuendi.*
 Gen. 3, 18.

Post primum lapsum mulier partus doloribus addicta est. *In dolore paries filios.* nec illos enititur , nisi priùs doloribus angatur & discerpatur. Natalitia sua post obitum viri cælestes celebrant , qui quodammodò ex seipsis generantur atque oriuntur , necesse idcirco est , vt antequam cælo nascantur , more LYCARIONIS infirmantur , pœnas atque dolores sustineant. Consonat dictis CHRISTVS : *Amen amen dico vobis , quia plorabitis & flebitis vos , mundus autem*

Ioan. 16,
 21.

autem gaudebit, vos verò contristabimini, sed tristitia vestra vertetur in gaudium. Mulier, cùm parit, tristitiam habet, quia venit hora eius; cùm autem peperit puerum, iam non meminit pressuræ propter gaudium, quia natus est homo in mundum. Et vos tristitiam habebitis. Iterùm autem videbo vos, & gaudebit cor vestrum.

CRUX LYCARIONIS, CRUX ægrotantis.

Augustinus lib. de Grat. noui Testam. q. 2. Cùm caro in doloribus est & in pœnis, profectò anima tunc habet magnum agonem patientiæ, in quo ne deficiat, laborandum & orandum est. Oraſti, nec tamen meliùs habuisti; recipe verba eiusdem Augustini in Psalmum 21. Multi clamant in tribulatione, & non exaudiuntur, vt intelligat homo Medicum esse Deum, & tribulationem medicamentum esse ad salutem, non pœnam ad damnationem. Sub medicamento positus ureris, secaris, clamas. Non audit Medicus ad voluntatem, sed ad sanitatem. Sectiones & aduſtiones patientem visitat idem Augustinus ægrotum, & Serm. 1. de Visitat. infirmor. addit: Vis scire quia infirmitas corporis salutem animæ parturit? audi Dominum Apostolo respondentem: Virtus in infirmitate perficitur. ac si dicat: Complectere quam pateris infirmitatem, quia ita proficies de virtute in virtutem. Sed in infirmitate virtus augmentatur: virtus

Excitatio
laboran-
tis.

Instrumen-
tum artis
benè mo-
riendi.

Excitatio
ægrotan-
tis.

1. Cor. 12,
19.

enim salus est animæ, infirmitas corporis; quandoquidem per virtutem animæ parit salutem, donum Dei est. Quòd si æger non solùm corpore, sed etiam animâ secatur & aduritur dum ægrotat, audiat Basilium in Asceticis. Quemadmodum in curandis corporibus incisiones, vstiones, & acerba pharmaca sanitatis gratiâ toleramus, ita & in animarum cura incisiones reprehensionum, & amara increpationum pharmaca, ut & illæ curentur, admittere debemus. Debet itaque æger admittere pro animæ curatione incisiones Confessarij reprehendentis, & amara etiam pharmaca eius culpas increpantis. Quisquis hæc patitur, non solùm exterius, sed etiam interiùs mysticus LYCARION est, totumque se componens in picturæ eius similitudinem, saluationis suæ causam ager, & virtute patientiæ suæ opus perficiet, perficiet messem, quæ non sine falce aut sectionibus metitur & colligitur, nec sine sectionibus eam LYCARION collegit & messuit.

Leuamen laborantis & ægrotantis.

Virtus Eucharistia.

R Ex gloriosus, cùm esset affixus cruci, vitæ corporalis suæ curam non habuit, habuit tamen summam de salute animarum nostrarum sollicitudinem, quam adhuc in sacra sua Eucharistia seruat. Propter nos homines & nostram salutem descendit

è cælis , & in crucem ascendit , & propter eandem animarum sanitatem descendit sæpè sæpiùs in altare, vbi memoria eius recolitur. Hinc salus , hinc vita pendet. *Qui manducat hunc panem , viuet in æternum.* Ioan. 6, 51. Qui multa pro salute animæ patitur, salutare habebit in Eucharistia leuamen, gustabit & clamabit, *Dic anima mea : Salus tua ego sum.* & addet : *Dominus sollicitus est mei.* ^{Psal. 34, 3.} ^{Psal. 39, 18.} Cùm quis sollicitus est, nescit quiescere. Parens iunioris Tobiaë sæpè recurrebat ad vias , per quas charissimum filium ad propria rediturum arbitrabatur. Frequens quidem itus & reditus in locum eundem est signum & argumentum magnæ sollicitudinis. Cùm toties è cælis CHRISTVS descendat, quoties in altari consecratur, perspicuum est, quàm sit de salute humana sollicitus. Eapropter consecratam Hostiam Sacerdos ostendit populo non solum in cultum & venerationem, sed etiam in testimonium descensus, itus & reditus CHRISTI, & eius curæ ac sollicitudinis de salute animæ nostræ, vt dicat vnusquisque nostrum : *Dominus sollicitus est mei.* Tunc maximè sollicitus est, cùm affixus lecto ægrotus, diris tormentis exponitur, doloribus variis disrumpitur, & ne salus animæ periclitetur, in eius custodiam de sacro Viatico prouidet.

Viaticum.

Gloriosum opus Artis Crucis & patientiæ,
corona aurea & laureola.

Ioan. 12,
25.

Honor alit
artem be-
nè viuen-
di & mo-
riendi.

Laureola
salutis
anime.
Psal. 115,
19.

Rex Martyrum ait : *Qui perdiderit animam suam in hoc mundo, in vitam æternam custodit eam.* Custodit animã, vt corona decoretur: custodit animam, vt etiam ornetur laureola, si tamen pro eius salute tantum patiatur agonem, vt Martyribus, imò & Regi Martyrum assimiletur. Et quidem *pretiosa in conspectu Domini mors Sanctorum eius est*, non illa solum qua Martyres affici solent, sed etiam illa qua zelator salutis suæ occiditur mundo, non terminatione sensuum, sed fine vitiorum. Laudabilis ex hac parte S. Benedictus Anglus, in cuius Homilia Beda venerabilis ait: *Sic longis virtutum studiis exercitatus, longo insuper anno semper infirmitatis martyrio excoctus, post centupla gratiæ præsentis munera ad vitam transiuit æternam.* Hanc vt acquireret Epipodius martyr, lubens corpus suum secandum ferro & offerebat, dicebat-
que zelator salutis suæ: *Nos pro anima aduersus corpus bella suscipimus, nos pro anima aduersus vitia dimicamus.*

Extrema
verba mo-
riens.

Prodeat in publicum spectaculum sanctus LVCELLIANVS; in quo, veluti in speculo, ferentis prauæ naturæ habitus & morbos forma conspicitur.

EM.



Numinibus vanis Panchæa mæsse litaram :
 28. Parce precor, tibi nunc sanguine, Christe, lito.

EMBLEMATICA IMAGO XXVIII.
S. LVCELLIANI CRVCIFIXI
EXPLICATA.

LVCELLIANVS sub Aureliano Imperatore ^{Martyrol.}
 falsorum simulacrorum sacrificulus, ac ^{Menclog.}
 deinde cælestis Numinis cultor, Constan- ^{Metaph.}
 tinopoli post varia alia tormenta missus
 in ardentem rogam, mirabiliter euasit, ac denique
 actus in crucem, in crucis ara se suaque omnia pa-
 riter immolauit. Dixerat Moyſes Exodi cap. 8. *Abominations*
Ægyptiorum immolabimus Domino Deo nostro.
 Fecit idem ipsum LVCELLIANVS, qui eundem pro-
 fanum habitum, in quo idolis antè seruierat, vero
 Numini crucifixus immolauit. Nec timuit, vt in-
 gredienti cælum sibi diceretur, *Amice, quomodo huc* ^{Matth. 22.}
intraſti non habens veſtem nuptialem? Ornatur veſte nu- ^{12.}
 ptiali, qui nouit in cruce Deo abominationes gen-
 tium immolare. *Qui ſunt CHRISTI, carnem ſuam* ^{Gal. 5, 24.}
crucifixerunt cum vitiis & concupiſcentiis. Habitus pra-
 uos vitiorum ſecum homo crucifigit, cùm prauæ na- ^{Sympathia}
 turæ motibus ac paſſionibus reluctatur. CHRISTVS ^{Chriſti &}
 ſuper Adami ſepulchrum crucifixus eſſe traditur, & ^{Lucelliani}
 quidem in forma Adami crucem ipſe paſſus eſt, vt ^{Artificum}
^{crucifixa}
^{natura}
^{praua.}

nos

nos omnes informaret, veteris hominis carnem cum vitiis ac vitiosis concupiscentiis crucifigendam, & in ara crucis, more LVCELLIANI, maētandam & immolandam. Ergo hoc ipsum quod Ambrosius libro de Fuga sæcul. cap. vlt. asseruit, è cruce sua loquitur LVCELLIANVS: *Etenim vetus ille homo noster affixus est cruci, distractum est peccatum, obtusus aculeus, vacuata culpa, vt vlteriùs seruire flagitiis desinamus.*

CRUX LVCELLIANI, Crux prauī habitus.

*Instrumen-
tum artis
benè vi-
uendi.
Rom. 7.
21.*

CRucem prauī habitus expertus Paulus aiebat, *Condelector legi Dei secundum interiorem hominem: video autem aliam legem in membris meis, repugnantem legi mentis meæ, & captiuantem me in lege peccati, quæ est in membris meis. Infelix ego homo, quis me liberabit de corpore mortis huius? Ad crucem istam portandam tolerandamque se excitabat, proponens sibi diuinum exemplar CHRISTI, in quo vetus noster homo crucifixus est, vt destruat corpus peccati, & vltra non seruiamus peccato. Infert ex dictis Apostolus: Non ergo regnet peccatum in vestro mortali corpore, vt obediatis concupiscentiis eius. Anselmus in Commentariis: Non ait, Non sit, sed, Non regnet peccatum; quippe in corpore mortali non prohibuit esse, sed regnare, quia in carne corruptibili non regnare potest, sed non esse non potest.*

*Excitatio
laboran-
tis.*

Rom. 6, 6.

Vcl. 12.

Hoc

Hoc ipsum namque de peccato tentari, ei peccatum est. Quo, quamdiu viuimus, perfectè omni modo non caremus. Apostolus verò quoniam hoc expellere plenè non potuit, ei de cordibus nostris regnum tulit, vt appetitus illicitus, et si plerumque bonis nostris cogitationibus occultè se quasi fur ingerit, saltem, si ingreditur, non dominetur. Si verò diu dominetur iniquitas, accidet id quod scribit Basiliius in 1. Psalm. In peccatis diuturnitas habitum quemdam vix mobilem constituit in animis. Antiquus enim animi morbus, & mali exercitatio longitudine obdurata, vix remedium, vel potiùs nullum reperiet.

CRUX LVCELLIANI, Crux ægrotantis.

Magna virtus sanctæ Crucis, quæ in profano etiam habitu virum religiosum facit. LVCELLIANVS indutus veste profana cruci affigitur, & in ea tantus Dei cultor existit, vt possit esse sitque norma cunctorum Religiosorum. Magna quoque virtus lecti, cui æger alias profanus affigitur, & religiosè disponitur ac componitur. Nouit Deus per morbos peccatores iustos reddere, nouit conuersos corporea sanitate donare. Quòd autem viros profanos reddat iustos, pios, religiososque ægritudo, testis est nobis Chrysostomus Epist. 4. in qua solatur Olympiadem ægrotantem, ac dicit: *Tantum bonum*

*Instrum-
tum artis
benè mo-
riendi.*

Excitatio
agrotan-
tis.

*istud est iis qui forti ac strenuo animo ferunt, vt etiam-
si hominem aliquem, qui maximis peccatis sese deuinxerit,
nanciscatur, grauissima peccatorum sarcina eum liberet.*
Haud dubiè per morbos & infirmitates peccatis ac
passionibus nostris Deus sapientissimè medetur.
Deus quippe, testante hoc D. Basilio in Asceticis,
*aliquos cum morborum molestia certare permisit, probatos
eos per experientiam reddens. Ita & nos aliquando inuisi-
biliter in occulto contingit, si quando id animabus nostris
prodesse cognouerit, aliquando etiam corporalibus remediis
ad curandas passiones nostras vt dignatur, curandi proro-
gatione diuturnam gratiæ suæ memoriam efficiens, vel for-
mam quamdam, vt dixi, curandarum animarum propo-
nens.* Sentiebat in se vel ipse Apostolus Paulus mo-
lestam carnis passionem, cui medicamen infirmita-
tis Deus medicus animarum adhibuit & apposuit,
*dixitque infirmo Paulo, Virtus in infirmitate perfici-
tur; vt morbum sibi inflictum æstimaret, & medi-
camento eius vteretur, vt passione carnis liberaretur.*
Cum iacet in lecto æger, nudus iacet, & externis
vestibus exuitur & spoliatur, sed nequit ita nudari,
vt prauis passionibus exuatur: proinde decumbit
æger in lecto, si introspicias eius animam, sicut ap-
paret in cruce sua LVC ELLIANVS habitu profano
indutus, quem cum vita ipsa deposuit. Deponet &
æger;

2. Cor. 12.
9.

æger ; interim tamen *cor suum dabit in similitudinem* Eccli. 38. 28.
picturæ, vt qui ex prauo naturæ habitu infirmatur,
 patientia LVCELLIANI firmetur.

Leuamen laborantis & ægrotantis.

R Ex gloriosus in sacra sua passione cruci se to- Virtus Eu-
charistia.
 tum addixit, vt veterem hominem cum acti-
 bus & habitibus suis crucifigeret, & crucifixit qui-
 dem, ac docuit virum Christianum, vt veteri homi-
 ni & eius passionibus renuntiaret. Lignum arboris,
 & eius fructus, veterem hominem induxerunt & in-
 uexerunt : nouum hominem crearunt & perfecerunt
 crux CHRISTI & eius fructus ac cibus, cuius refe-
 ctionis virtute seipso homo spoliatur, CHRISTVM
 sumit, & in CHRISTVM totus transformatur.
 Ascendit æger in lectum, vt in eo constitutus vestem
 humanam deponat, & vt illam facilè exuat, sacrum
 Viaticum sumit, sine cuius adiumento sua se natura Viaticum.
 ac vita nudare atque spoliare nullus mortalis nouerit.

Gloriosum opus Artis Crucis & patientiæ,
 corona aurea & laureola.

Q Vi carnem suam cum vitiis & concupiscentiis Honor alie
artem be-
nè viuen-
di & mor-
riendi.
 crucifixerunt, voluerunt haud dubiè spoliari,
 non superuestiri, & vt prauo naturæ habitu spolia-

rentur, vñ sunt sanctæ Crucis instrumento, quod tantæ virtutis est, vt hominem passionibus nudum & liberum reddat. Interim tamen, donec mortalis homo ad eum statum perueniat, necesse est, vt crucietur & torqueatur. Torquebatur Apostolus, & clamabat: *Infelix ego homo, quis me liberabit de corpore mortis huius?* Hoc habebat in cruciatu ille solatium: *Compatimur, vt glorificemur.* Qui prauas affectiones sibi subiicit, eas terit, & victor agit triumphũ, insignem aurea corona, illustrem cælesti aureola, nobilem stola gloriæ, quæ crucifixis & cruciferis in cælo exhibetur.

Rom. 7,
24.
Rom. 8,
37.

*Laureola
denicti
prauis ha-
bitus.*

*Extrema
verba me-
rientis.*

Pulchra itaque ars sanctæ crucis & patientiæ quæ sic naturam reformat. *Huiusmodi arte, testante Iustiano cap. 7. de Casto connub. propitiante gratia, debilitatur consuetudo inueterata, & natura rebellis reformatur in melius.* Consonat Iustiniano patiens pro iustitia Epipodius, qui cùm esset in theatro, & afficiendus extremo supplicio foret, *Mihi, inquit, vita non tollitur, sed mutatur in melius. Nec interest, infirmitas corporea quo fine soluatur, dummodò anima calis inuicta ad suum reuertatur auctorem.*

Prodeat in publicum spectaculum sanctus VENANTIVS; in quo, veluti in speculo, ferentis impios & morbos forma conspicitur.


E M.



*Iam mihi non vno torsistis corpora fumo:
29. Nam tormenta mihi praeuia fumus erant.*



EMBLEMATICA IMAGO XXIX.
S. VENANTII CRVCIFIXI
EXPLICATA.

 ANCTVS VENANTIVS martyr, quindecim annos natus, primùm fustibus cæsus, deinde feris obiectus, denique capite inuerso cruci affixus est, igni supposito, vt eius fumo obrutus suffocaretur. Passus est sub Decio Imperatore. Crux grauis, impiorum hominum iactantiam, & eorum vanos & inanes fumos tolerare. Nouit tamen Deus elatum sopire fumum, nouit & humilitate suorum tumentem arrogantiam retundere. Hinc apud Isaiam: *Vide vt fileas, noli timere, & cor tuum ne formidet à duabus caudis titionum fumigantium istorum.* Interim verum & satis verum est, quod affirmat Dauid, *Dum superbit impius, incenditur pauper.* Pauper iste CHRISTVS est, qui dicit de se, *Respice in me, & miserere mei, quoniam vnicus & pauper sum ego.* Superbiebat valdè impius, cùm esset in cruce pauper & dolens CHRISTVS, & per eius arrogantiam inflammabatur & pariter obruebatur. Pauper quoque iste VENANTIVS est, qui fumigante superbia, ipse accenditur, ipse suffocatur. Rutilantis

Metaph.
Surius.
Prudent.

Isai. 7, 4.

Psal. 9, 23.

Psal. 14,

16.

Sympathia
Christi &
Venanti
Artificum
tolerata
impietatis.

Sap. 3, 7.

lantis ignis splendorem fumus præcedit, & post fumi obscuritatem splendor flammeus succedit. *Fulgebunt iusti, & tamquam scintilla in arundineto discurrent.* Fulgebit VENANTIVS, fulgebit & ille, qui noverit mores pravorum hominum sustinere, & eorum arrogantiam humilis & humiliatus portare.

CRUX VENANTII, CRUX alienæ impietatis.

*Instrumentum artis
benè viuendi.*

QVanta crux ista sit, considerat Augustinus libro de Vera innocent. cap. 122. & post sedulam considerationem concludit: *Magnus labor bonorum est, mores tolerare contrarios; quibus qui non offenditur, parum proficit. Tantum enim torquet iustum aliena iniquitas, quantum recedit à sua.* Probantur inter pravorum mores cruciferi IESV CHRISTI: qui fumo non offenduntur, parum proficiunt; & quidem ad profectum iustorum crux alienæ impietatis data est. Accipe luculentum testimonium B. MARIAE lib. I. Reuelat. S. Birgittæ, cap. 22. *Considera quòd mali viuere permittuntur ad bonorum probationem, vt ex eorum moribus exasperati patientiæ fructu remunerentur, sicut etiam per exemplum intelligere poteris. Rosa enim suauiter redolet, pulchra est visu, lenis tactu, & tamen non crescit nisi inter spinas, quæ sunt asperæ tactu, deformes visu, nihil boni redolentes. Sic etiam boni & iusti homines, licet*
lenes

*Excitatio
laborantis.*

lenes sint patientia, pulchri moribus, suaues bono exemplo, non tamen possunt proficere vel probari, nisi inter malos. Proficit rosæ elegantia inter spinas aculeatas, proficit inter tetros & tetricos fumos luminis claritas: perit fumus, splendor manet. *Novit Dominus dies im-* ^{Psal. 36.}
maculorum, & hereditas eorum in æternum erit. Non ^{18.}
confundentur in tempore malo, & in diebus famis satura-
buntur: quia peccatores peribunt. Inimici verò mox vt
honorificati fuerint & exaltati, deficientes quemadmodum
fumus deficient. Non deficit iustus, qui omnem à se
novit iniquitatis fumum propulsare. Pertinet huc
quod ait Ephræm, agens de cordis compunct. Quæ
fieri potest, vt fumum arceamus, quò minùs per eas quæ
patent egrediatur fores, igne contrà assiduè succenso? Quòd
si fumum repellere velis, fores obserato, ne tua per res sen-
sibiles nigrescat domus.

CRUX VENANTII, CRUX ægrotantis.

Quid rei homo est? Humus & fumus. Humus, ^{Instrumentum artis}
 quæ calcatur & atteritur; fumus, qui extenua- ^{benè moriendi.}
 tur & evanescit. Cùm ita sit, vana vitæ specie homo
 decipitur, si quid maius se esse arbitretur. Incipiet
 sapere, cùm in lectum deiiciatur, & more VENAN-
 TII iam æger conditionem suam meditetur, & se
 nihil aliud præter humum & fumum esse deprehen-
 det.

Excitatio
agrotan-
tis.

det. Pulchra hæc meditatio est, de qua Nazianzenus Epist. 70. scribit : *Honestum esse censeo, dolori resistere, atque animo vel nunc maximè expurgari : at morbum nihil aliud esse ducere quàm vtilem quamdam institutionem, hoc est, vt corporea omnia, & quidquid fluxum est & caducum, aspernans, totum celesti patriæ addicas, sed futuro æuo viuas, mortisque meditationem, vt ait Plato, hanc vitam existimes.* Lucidus ignis est, cui Deus obscurum adiunxit & simul apposuit fumum, vt cedat luminaribus cæli, nec cum illis de splendore contendat. Prouidet quoque Deus, vt qui virtutum fulgore promicant, aliquando infirmentur, ne se efferant ac superbiant. Rutilabat Apostolus Paulus, & ne se extolleret, infirmitate detinebatur & deprimebatur. Testatur hoc ipsum de se 2. Corinth. 12. *Ne magnitudo reuelationum extollat me, datus est mihi stimulus carnis meæ, angelus satanæ, qui me colaphizet.* Loco fumi stimulus carnis erat, & hic ipse morbus erat : cùm rogaret liberari, responsum habuit, *Virtus in infirmitate* 2. Cor. 12, *te perficitur.* vnde & Paulus concludit : *Libenter igitur gloriabor in infirmitatibus meis, vt inhabitet in me virtus CHRISTI.* Nec solùm rutilantibus virtute ac sanctitate infirmitas corporalis accidit, sed etiam potestate ac dignitate fulgentibus, vt fumum & humum naturæ suæ considerantes, desinant superbire. Hanc ob

ob causam in lectum decidunt qui regnant & dominantur. Et quidem quisquis naturæ fumo sic tangitur, & morbo pulsatur, *cor suum dabit in similitudinem picturæ*, referetque VENANTIVM, caput non extollet vt superbiat, inuertet capitis sublimitatem, vt humilis existat, & in omnibus se submittat. Eccli. 38, 28.

Leuamen laborantis & ægrotantis.

REx gloriosus impietatem, & simul infirmitatem humanam expertus in cruce est, in cuius Virtus Eucharistia. Passionis memoriam condidit sacram Eucharistiam, in qua pro vtroque malo salutare antidotum remediumque reliquit. *Dum superbit impius, incenditur pauper.* Psal. H. 10, 2. dum superbit morbus, accenditur & inflammatur æger, accensusque & inflammatus recurrit ad Eucharistiam, in qua inuenit ventum roris flantem, dissipantem fumos, extinguentem incendium, & sopientem ardentes morborum flammæ. Non sic refrigerat nix in summis caloribus æstus, quàm recreat in magnis ardoribus febrium Eucharistiæ Sacramentum. Ergo quisquis sic in lecto iacet, vt febriles ignes ferat, & naturæ humanæ fumum patiatur & experiatur in se, sacrum sic Viaticum sumat, Viaticum. vt balnei temperati loco habeat, cuius virtute liber ab igne & à fumo *in refrigerio erit.* Sap. 4, 7.

Gloriosum opus Artis Crucis & patientiæ,
corona aurea & laureola.

*Honor alit
artem be-
nè viuen-
di & mo-
riendi.*

Qui sua prius insequitur more VENANTII, submittitur & humiliatur : & qui aliena carpit peccata zelo amoris, exemplo eiusdem Martyris accenditur, inflammatur, & martyrium sine ferro patitur. Dignum fanè corona & laureola martyrium, cui cæleste refrigerium promittitur & conceditur :

Sap. 4. 7. Iustus si morte præoccupatus fuerit, in refrigerio erit. Erit in refrigerio VENANTIUS, & similis VENANTIO

*Laureola
sustinentis
præuos a-
liorum
mores.*

Sap. 4. 13.


martyr, qui habitat in medio prauæ nationis, & improbos eius mores sustinet, sicut & sustinuit ille, de quo Sapiens : *Consummatus in breui, explevit tempora multa : placita enim Deo erat anima illius : propter hoc properauit educere illum de medio iniquitatum.* Hac ipsa consideratione solabantur se Paulus & Iuliana, qui immolandi iam per martyrium, ambo vno ore, vna voce dixerunt : *Saluasti nos ab affligentibus nos, & odientes nos confudisti.*

*Extrema
verba mo-
rientis.*

Prodeat in publicum spectaculum sanctus TIMON Diaconus ; in quo, veluti in speculo, candoris vitæ & morbi forma conspicitur.



Si μισανθρώπω Τίμονι vita negatur;
 30. Anne φιλανθρώπω vita neganda fuit?



EMBLEMATICA IMAGO XXX.

S. TIMONIS DIACONI CRVCIFIXI

EXPLICATA.



ANCTVS TIMON è septem Diaconis ^{Beda.}
 vnus, assumptus est vt socius & adiutor ^{Vuard.}
 Apostolorum esset. ^{Ado.} Memorat eius assum-

ptionem & electionem B. Lucas cap. 6.

Actor. *Conuocantes duodecim multitudinem discipulorum,*
dixerunt: Non est æquum nos derelinquere verbum Dei,
& ministrare mensis. Considerate ergo, fratres, viros ex
vobis boni testimonij septem, plenos Spiritu sancto, & sa-
pientia, quos constituamus super hoc opus. Nos verò oratio-
ni & ministerio Verbi instantes erimus. Et placuit sermo
coram omni multitudine. Et elegerunt Stephanum, virum
plenum fide & Spiritu sancto, & Philippum, & Procho-
rum, & Nicanorem, & TIMONEM, & Parmenam,
& Nicolaum aduenam Antiochenum. Electus TIMON
 mensis & altaribus inseruiuit. Cùm in sacro Missæ
 Officio Diaconus cantat Euangelium, Crucis signum
 super sanctum librum format, vt vel ipsum Euan-
 gelium signo crucis obsignatum esse ostendat. Hoc
 Regio, hoc magnifico sigillo ministerium suum
 Euangelicum TIMON clausit & ornauit, qui & cru-
 cifixus

cifixus obiit candido habitu indutus. Quid sic? Respondet Isidorus lib.2.de Offic.cap.8. *Diaconi propter-
eà altari albis induti assistunt, vt caelestem vitam habeant,
candidique ad hostias immaculatique accedant, mundi sci-
licet corpore, & incorrupti pudore. Tales enim decet Do-
minum habere ministros, qui nullo carnis corrumpantur
contagio, sed potius eminentia castitatis splendeant. Qualis*

Cant. 5, 10. ergo Dominus, talis & minister, Dominus *candidus*
Sympathia Christi & Timonis Artificum candoris vita. *& rubicundus.* Candidus, propter vitæ candorem;
rubicundus, propter sanguinis effusionem: mini-
ster verò candidus & rubicundus, quia candorem
morum cum passione sua coniunxit.

CRUX TIMONIS, Crux candoris vitæ.

*Instrumen-
tum artis
benè vi-
uendi.
Psal. 50, 9.*

Candor vitæ passione acquiritur, tolerantia
comparatur. Nouerat Dauid mysterium, &
dicebat: *Asperges me hyssopo, & mundabor; lauabis me,
& super niuem dealbabor.* Niueus candor hyssopum
passionis sequitur. Quam ob rem beata Agnes apud
Birgittam lib.3. Reuelat. cap.30. concludit: *Deus est
sicut optima lotrix, quæ pannum immundum ponens inter
procellas, vt ex motione aquæ fiat purior & candidior, di-
ligenter cauet ictus vndarum, ne submergatur pannus: sic
Deus ponit in præsentis amicos suos inter procellas pauper-
tatis & tribulationis, quibus ad eternam vitam purgen-
tur,*

*Excitatio
laboran-
tis.*

tur, custodiens eos diligenter, ne vel nimia tristitia vel tribulatione intolerabili demergantur. Emerferunt viri gloriosi, quos in sua Apocalypsi contemplatus est Ioannes. Vidit in candido & splendido habitu Diaconatus proceres cæli. Hi, qui amicti sunt stolis albis, qui ^{Apoc. 7. 13.} sunt, & vnde venerunt? cui Angelus: Hi sunt, qui venerunt de tribulatione magna, & lauerunt stolas suas, & dealbauerunt eas in sanguine Agni. Cælestis Sanctorum candor pendet à Sanguine Agni, à tribulatione & cruce, cui adhærens apparet in albis TIMON, apparet candidatus æternitatis.

CRUX TIMONIS, Crux ægrotantis.

A Vctor naturæ Deus tempore brumali, cum <sup>Instrum-
tum artis
benè mo-
riendi.</sup> malè tellus habet, mittere niues solet, quibus totam candidā reddit. Deus ipse gratiæ auctor, cum homo aduersa vitur valetudine, nouit & eius animam dealbare, vt æger affixus lecto TIMONEM affixum cruci referat & imitetur, vnde citatus nuper dixerat Nazianzenus: *Honestum esse censeo dolori resistere, atque animo nunc maximè expurgari.* Expurgandus animus est, vt ipsis niuibus purior & candidior fiat. Hoc exigebat ab Eudoxio suo, & quidem ægro, idem ipse Nazianzenus Epist. 118. apud Basilium: *Nolo te, neque honestum arbitror, cum philagios sis, inque diuinis* <sup>Excitatio
ægrotan-
tis.</sup>

Pfal. 65,
12.

excellenter instructus, eodem modo affici cum reliqua mortalium multitudine, neque mox malè affecto corpore consternari, aut velut immedicabilem afflictionem deplorare, sed in passione tolerantem esse, & mentem nunc maximè expurgare. Linea tela primùm aspergitur aquis, deinde ad æstum solis exponitur, vt nitidum ac candidum colorem induat. Quisquis candidari desiderat, parare se debet, vt & aquam laborum & æstum febrium & morborum patiat. Subierunt aquam & æstum laborantes & ægotantes, qui dixerunt: *Transiuimus per aquam, & ignem.* Nec quidem vna sola aspersione, vel vno ardoris æstu lintheamina candidantur; multis indigent ablutionibus, plurimis æstibus, vt tandem nitescant & refulgescant. Nec satis est semel subire laborem, semel morbum tolerare: necesse est laboribus ac morbis variis hominem exerceri, vt in eum statum veniat, quem candidus in cruce TIMON repræsentat. Repræsentarat hunc eundem CHRISTVS ipse, qui & rogandus: Rex gloriose, qui candidus & rubicundus es, & tales cupis esse ministros, dealba me, & munda cor meum, vt in Sanguine tuo candidatus, laboribus ac simul morbis dealbatus, fiam de numero eorum qui venerunt de tribulatione magna, & cælestibus stolis induti, toti albi & toti candidi in oculis maiestatis tuæ comparent.

Leua-

Leuamen laborantis & ægrotantis.

REx gloriosus candidus & rubicundus in pas-
 sione sua apparuit, vt ostenderet sine sangui-
 ne non posse fieri peccatorum remissionem, quæ est
 animæ purgatio, & spiritus dealbatio. Hinc CHRIS-
 TVS ipse candidus in Hostia est, in calice verò ru-
 bicundus, vt in Sanguine Agni candidi spiritus no-
 ster candidetur & purgetur. Vnde & Sacerdos cele-
 braturus, cùm induit se Alba nitente, dicit: *Dealba*
me Domine, & munda cor meum, vt in sanguine Agni
dealbatus, gaudiis perfruar sempiternis. Hæc vestis nu-
 ptialis est, quæ Baptismo candidatur, pœnitentiâ
 reparatur, decoratur Eucharistiâ, quam accipit de-
 cedens è viuis homo ad cælestes Agni nuptias vo-
 catus & inuitatus, nec licet ad eas ingredi sine nu-
 ptialis vestis candore atque nitore.

Virtus Eu-
charistia.

Viaticum.

Gloriosum opus Artis Crucis & patientiæ,
 corona aurea & laureola.

CVM Rex Martyrum sacræ suæ impenderet se
 passioni, *frigus erat.* Ad huc hiems non abie-
 rat, quæ condit in cælo niues. Patitur mundus in
 hieme, vt adueniente vere, floribus ornetur. Patie-
 batur frigoris tempore CHRISTVS, vt candidas se-

Honor alit
artem be-
nè viuen-
di & mo-
riendi.
Ioan. 18.
18.

cum niues inueheret in Ecclesiam , quibus sacros suos ministros virtute suæ passionis dealbaret. Hunc

Psal. 50, 9. appetebat candorem Rex ille , qui dicebat : *Asperges me hyssopo , & mundabor ; lauabis me , & super niuem dealbabor.* Postquam iam hiemales niues cessarunt , coronatur annus solaris , sicut & ipse Rex declarat :

Psal. 64, 12. *Benedices coronæ anni benignitatis tuæ , &c.*

Post niues crucifixis ac cruciferis , qui suarum candori animarum student , accessus datur securus ad coronam : Rex enim Martyrum patienti animæ

Cant. 2, 11. dicit : *Imber abiit & recessit , surge , propera amica mea ,*

Cant. 4, 8. *& veni.* Vocatur illa ad coronam & laureolam , *Veni de Libano , veni coronaberis.* Libanus à niuibus nomen

*Laureola
candoris
vita.*

habet. Inde anima inuitatur ; vt & ipsa dealbata , candidatum Martyrum numerum in sua coronatione referat , & comitetur. Vocabatur huc S. Laurentius Iustinianus , qui proximus morti suos monuit :

Hactenus , fili , per iocum res acta est , seriò nunc agitur. Propè est sponsus , eundum illi obuiam : & sublati oculis in

*Extrema
verba morientis.*

cælum , *Venio , inquit , ad te Domine IESU.* Venit ad sponsum vita candidus , moribus purus & mundus.

Prodeat in publicum spectaculum sanctus FASTVS ; in quo , veluti in speculo , propter iustitiam laborantis & ægrotantis forma conspicitur.

EM.



31. *Faustus ero, si non biberint tua tela cruorem:
Si largum biberint; tum mage Faustus ero.*

EMBLEMATICA IMAGO XXXI.

S. FAVSTI CRVCIFIXI

EXPLICATA.

SANCTVS FAVSTVS sub Decio Imperato- Metaph.
Martyrol.
Menolog.
re crucis patibulo adiudicatus, suspen-
susque, spatio quinque dierum superstes
fuit, vt, quò pœna productior, eò ma-

ior esset remuneratio. Faustus & beatus vir, qui non Psal 1, 1.

*abiit in consilio impiorum, & in via peccatorum non ste-
tit, & in cathedra pestilentiae non sedit, sed in lege Domini
voluntas eius, & in lege Domini meditabitur die ac nocte.*

*Et erit tamquam lignum, quod plantatum est secus decur-
sus aquarum, quod fructum suum dabit in tempore suo. Et
folium eius non defluet, & omnia quaecumque faciet pro-*

*sperabuntur. Mortales omnes expositi infortuniis su-
mus. Quis adeò fortunatus & felix, vt aliquando in-
felix non sit? Quis semper faustus, quis beatus sem-
per existat? Crucis ligno annexa prosperitas, an-
nexa est beatitudo perpetua. Quapropter canit qui-*

*dam: Crux præcedat omnem actum, & succedat prospe-
rè. Crux olim typus infortunii erat, postquam verò
CHRISTVS in ea passus est, imago felicitatis euasit,
& qui illam pro iustitiâ patiuntur, fausti sunt ac*

fortu-

*Sympathia
Christi &
Fausti Ar-
tificum in-
sta passio-
nis.*

Matth. 5. 10. fortunati. *Beati, qui persecutionem patiuntur propter iustitiam, quoniam ipsorum est regnum celorum.* Consonat
 1. Petr. 3. 43. & D. Petrus: *Quis est qui vobis noceat, si boni amulatores fueritis? Non officit sagittarius, nec sagitta nocet, sed, & si quid patimini propter iustitiam, beati.*
 1. Petr. 3. 14.

CRUX FAVSTI, Crux iustitiæ.

*Instrumen-
 tum artis
 bene vi-
 nendi.
 Iacob. 5,
 11.*

Ecce beatificamus eos, qui sustinuerunt, & quidem in venerando Missæ Sacrificio passionem CHRISTI beatam nuncupamus. dicimus enim: *Vnde & nos memores, Domine, serui tui, sed & plebs tua sancta, eiusdem Filij tui Domini nostri tam beatæ passionis.* Ideò beatam appellamus, quia non ex culpa, sed ex iustitia patientis ortum & originem habuit. Multùm discrepant inter se iustitia & culpa; conueniunt tamen in eo, vt sectatoribus suis portandas cruces imponant. Quanta inter cruces differentia reperiatur, sanctus Augustinus exponit in Psalm. 45. *Inter omnes tribulationes humanæ animæ nulla est maior tribulatio, quàm conscientia delictorum.* Namque si ibi vulnus non sit, sanumque sit intus hominis, quod conscientia vocatur, vbi- cumque alibi passus fuerit tribulationes, illuc confugiet, & inueniet Deum. Accedit & Bernardus lib. de Considerat. *Quid ditius, quid in corde dulcius, quid in terra quietius est & securius bonâ conscientia? Damna rerum non metuit,*

*Excitatio
 laboran-
 tis.*

metuit, non verborum contumelias, non tormentorum cruciatus, quæ & ipsa morte magis erigitur quàm deprimatur. Peccatum quidem mortem stimulat, vt sui auctores interimat, *Stimulus mortis peccatum*. Vbi peccatum ^{1. Cor. 15.} deest, stimulus etiam abest: ex quo fit, vt vir iustus ^{59.} non tam morte deprimatur, quàm deprimat ipsam mortem, & non tam ab ipsa instimuletur, quàm ipse illam instimulet. Nouerat ita esse S. Ignatius martyr. Ad Romanos scribit ille: *Vtinam fruar bestiis, quæ mihi sunt præparatæ, quas & oro mihi veloces esse ad interitum, & ad supplicium, & allici ad comedendum me, ne, sicut aliorum Martyrum, non audeant corpus attingere! Quòd si venire noluerint, ego vim faciam, ego me vrgebo vt deuorer.*

CRUX FAVSTI, Crux ægrotantis.

Quisquis propter excessum ægrotat, infaustus ^{Instrumentum artis: bene moriendi.} est, cùm morbus ex culpa procedat. Qui languidus suapte natura est, sanctus censerì non debet, cùm non ex virtute infirmetur, sed ex vitio naturæ laboret. Faustus & felix æger, qui morbum ex diuino beneplacito, virtute & charitate contraxit. Laborabat hoc morbo Eudoxius apud Basilium Epist. 118. cùm diceret: *Gratias tibi ago Pater, ô conditor hominum, quòd* ^{Excitatio ægrotantis.} *nos etiam inuitos beneficiis afficis, & per externum homi-*

nem internum purgas, & per aduersa ad beatum nos finem rationibus tibi notis perducis. Hæc Eudoxius è lecto, in quo iacens decumbebat : laborabat etiam hoc morbo Enochius, ad quem Epist. 91. scribit in hanc sententiam Nazianzenus : *Quomodo corpore habes ? De anima, quomodo illa valeat, non rogabo : noui enim, quòd admodum rectè, quandoquidem præclarè in illis, quæ corpus concernunt, philosopharis; vt qui quod accidit pro virtutis experimento, non ipsius materiæ disturbance habeas, vt beatior sis dum malè afficeris, quàm alij dum sani sunt.* Faustus ac beatus æger est, qui sic laborat & orat : Rex gloriose, qui iustus ab iniustis passus es, vt beatam tuam redderes passionem, beatos ac faustos eos qui participes eius forent, concede mihi ægrotanti, vt morbum, quem iacens in lecto patior, non ex meâ iniquitate, sed ex virtute, sanctâque tua voluntate feram. Feret ægrotus in hanc formam suas infirmitates, si cor eius similitudinem referat picturæ, & faustum se atque beatum, cùm lecto affixus fuerit, iudicauerit, & in diuinas se manus resignauerit, vt de se vitaque sua pro libito & beneplacito suo Deus decernat atque disponat. Quisquis ad hunc modum se componat, felicior seipso est cùm malè afficitur, quàm cùm benè habet & valet.

Leuamen laborantis & ægrotantis.

R Ex gloriosus Martyrum primus omnium pro-
pter iustitiam passus est, quem postea Marty-
res omnes secuti sunt, quibus ipse in Euangelio ait,
Beati qui persecutionem patiuntur propter iustitiam. Ad <sup>Virtus Eu-
charistia.</sup> Matth. 5,
10. has persecutiones ferendas & sustinendas quantum
prosit Eucharistia, vel ex hoc intelligi potest quod
scribit Cyprianus Epist. 54. *Vincentibus communicatio à
nobis danda est, vt quos excitamus & exhortamur ad præ-
lium, non inermes & nudos relinquamus, sed protectione
Sanguinis & Corporis CHRISTI muniamus.* Hoc mu-
nimento Martyres excitati ad certandum pro iusti-
tia se committebant, & victores existebant. Hoc se-
curi munimine patientes propter iustitiam reddun-
tur & efficiuntur in extremo mortis articulo sancti
viri, quos hostis inuadit, & eorum sanctitatem &
iustitiam miris modis oppugnat, non expugnat. ^{Vaticum.}

Gloriosum opus Artis Crucis & patientiæ,
corona aurea & laureola.

M Artyr faustus, & Martyrium simul felix, cui <sup>Honor alit
artem be-
ne viuen-
di & mo-
riendi.</sup> vel in ipsa Crucis passione conceditur bea-
tudo; *Beati qui persecutionem patiuntur propter iusti-
tiam.* vnde pulchrè ait Ambrosius: *Si opprobrium tuum* <sup>Matth. 5,
10.</sup>

gloria est, Domine IESV, quanta est gloria tua? Tuæ igitur participatione quid erimus, cuius sumus opprobrio gloriosi. Tanti hoc faciebat dedecus, vt tenax eius assereret, Hoc opprobrium auferri à nobis nolumus, opprobrium Crucis Domini IESV, quo nostra auferuntur opprobria.


Si tanta gloria hæc est, quanta erit gloria tua, Domine IESV, quam beatæ tuæ passionis sectatoribus
 Psal. 35, 9. *cuiusdemque imitatoribus parasti, & reseruasti? Inebriabuntur ab vbertate domus tuæ, & torrente voluptatis*
 Laureola iustitia. *tuæ potabis eos. Quoniam apud te est fons vitæ, & in lumine tuo videbimus lumen. Donec illud lumen veniat, later necessario magnitudo sublimis coronæ gloriæ, & eminentia laureolæ triumphalis, quæ viris patientibus propter amorem iustitiæ decreta est. Nec oculus*
 1. Cor. 2, 9. *vidit, nec auris audiuit, nec in cor hominis ascendit, quæ preparauit Deus diligentibus se. Propter amorem iustitiæ profitebatur pati se Patroclus martyr, cuius fuit extrema vox: In manus tuas Domine commendo spiritum meum: tu enim scis Domine, quòd propter nomen tuum has patior pœnas.*

Prodeat in publicum spectaculum sanctus PIONIVS; in quo, velut in speculo, apparet effigies ferentis incentores malorum & morbos.



Smyrna fuit quondam Plutoni $\sigma\upsilon\gamma\gamma\alpha$: sed ecce
 32. Oblita Pionij sanguine $\sigma\upsilon\gamma\gamma\alpha$ Deo est.

EMBLEMATICA IMAGO XXXII.
S. PIONII PRESBYTERI CRVCIFIXI
E X P L I C A T A.

 ANCTVS PIONIVS Presbyter sub Decio Metaph. Euseb. Imperatore delatus, quòd Christianus & CHRISTI Sacerdos esset, cruci & simul flammis addictus, sui ipsius sacrificio Sacerdotium consummauit. Cælestis CHRISTVS cælestes nos omnes voluit. *Qualis cælestis, tales & cæ-* I. Cor. I 5, 48. Cælum quidem, cùm calores æstusque magis vigent, magis nitescit, magis splendet: cælestis quoque PIONIVS torretur & inflammatur, & tortus simul & tostus magis emicat & effulgescit, similis B. Laurentio, qui martyr æstius extitit, totusque cælestis effectus respondit Datiano: *Mea nox obscurum non habet, sed omnia in luce clarescunt.* CHRI- Sympathia Christi & Pionij Artisticum tolerata criminatio- STVS Dei Agnus in ara crucis torridus extitit, & ex se tantum splendorem emisit, vt omnium oculos illustraret. Nec CHRISTO nec Christianis defunt nec deerunt vñquam persecutores & incentores malorum, quales apparent in effigie PIONII. Fouent & accendunt ignem persecutionis, qui mala præstant officia. Fouerunt passionis ignem Pontifices & Sacer-

Sacerdotes, cùm CHRISTVM innocentem fortiter accusarunt, & ita pertinaciter vrserunt & institerunt, vt morte crucis damnaretur. Incenderunt ro- gum PIONII, qui flammis & ignibus materiam subministrarunt: istos verò alij incentores præcesse- runt, qui & eum apud iudicem detulerunt, quòd Christianus & Sacerdos CHRISTI foret. Grauis Sanctorum crux, cùm apud viros potentes proce- resque delatores & criminatores se insinuant, vt ipsis noceant & officiant.

CRUX PIONII, Crux incentoris malorum.

*Instrumen-
tum artis
benè vi-
uendi.
Daniel. 3.*

CRUCEM PIONII passi sunt tres Hebræorum pueri, quos apud Regem suum malorum per- fidia accusauit & denigrauit. Fouerunt ignem, & flammæ accenderunt, quibus de Regis mandato ad- dicti fuerunt. Notat Ambrosius Serm. 20. in Psal- mum 118. duplicem esse fornacem, ferream vnā, auream alteram: vnā, in qua sectatores suos mun- dus vrit & consumit; alteram, in qua Deus affectas suos tamquam aurum probat, excoquit, & purgat. *Hebræi quamdiu in Ægypto erant, in fornace erant ferrea. Unde scriptum est, quia eduxit eos de fornace ferrea ex Ægypto. Fornax erat ferrea, quia nullius adhuc in Ægy- pto opera plena virtutum elucebant, nullius aurum illic fuerat*

*Deut. 4.
20.*

fueraſt comprobatum, nullius plumbum iniquitatis exuſtum.

Dura fornax, fornax noctis perpetuæ. Quam fornacem nullus poterat euadere, quæ omnes consumeret, in qua eſſet ſolus dolor & luctus. Hæc crux, hæc fornax mundanorum eſt. At verò fornax, in qua Ananias, Azarias, ^{Excitatio laborantis.} Miſaël hymnum Deo canebant, fornax illa aurea non ſerrea, per quam toto orbe ſapientia fide deuotionis illuxit. Erat etiã hæc fornax in Babylonia, vbi aurum non erat niſi ſpiritale, niſi fortè captiuum: captiuam enim duxit ^{Pſal. 62.} captiuitatem. Hoc erat aurum in Dei Sanctis, qui captiui ^{29.} erant apud Babylonios corpore, ſpiritu autem liberi apud Deum, ſoluti vinculis captiuitatis humane, iugo gratiæ ſpiritualis innexi. Hæc Crux, hæc fornax eorum, qui criminatores & incentores malorum, more CHRISTI & PIONII martyris generoſè patiuntur.

CRUX PIONII, Crux ægrotantis.

DEus pius ac clemens, qui non vult mortem ^{Inſtrumentum artis} peccatoris, ante mortem præmittit ignes febriles, vt cum illos delibauerit peccator, æternos ardores timeat & effugiat. ^{benè moriendi.} Descendant, ^{Pſal. 54.} Pſalter ait, in infernum viuentes. Quòd ſi cultores iuſtitia infirmi exiſtant, indigeantque purgatione, ne acribus Purgatorii flammis mancipentur, febriles ignes patiantur: ^{16.} ^{Excitatio ægrotantis.} & ſi puri ac mundi ſunt, ardor febrium ad ſplen-

dorem deferuiat animarum. Consonant sibi morbus & martirium PIONII: consonant sibi rogos & ignis Purgatorij, quemadmodum CHRISTVS ipse suæ Birgittæ exposuit libro 6. cap. 35. *Vidisti animam illius Monachi defuncti in specie stellæ, & meritò, quia idem in Vita sua lucidus & ardens erat quasi stella, quia me præ omni creatura dilexit, vixit & in obseruantia Præpositi sui. Hæc etiam anima ostendebatur tibi, antequam moreretur, in statu illo in quo tunc fuit, quando monstrabatur tibi, & hoc fuit quando ipsa venit ad vltimum terminum vitæ suæ, & quando signa ægritudinis demonstrantia mortem aderant. Hæc ergo cum ad vltimum terminum mortis appropinquaret, venit ad purgatorium, & illud purgatorium erat corpus suum, vbi purgabatur doloribus & infirmitatibus. Et ideò quasi stella in vase aperto demonstrabatur tibi, & hoc fuit, quia arsit charitate mea, & ideò nunc est in me, & ego in ea. Nec quidem talis anima euasisset, nisi inter ardores febriles cor suum in similitudinem picturæ efformaret, patientiæ virtute fulgeret, splenderet charitate.*

Leuamen laborantis & ægrotantis.

*Virtus Eu-
charistia.*

REx gloriosus passus est grauium incentores malorum. Accenderunt illi roguum, in quo torridus Agnus apparuit ipse, & ipse se comedendum patien-

patientibus incentores malorum & morborum præstitit, vt eorum malignitatem magis tolerabilem sua virtute redderet. Sacra Eucharistia cælestis roris instar est iis, qui igne accenso probantur. Et quidem dum lecto affixus febribus ardet homo, non caret incentoribus malorum, cum in se habeat humores, qui accendunt flammæ & ignes, vt intus & foris crucietur & concremetur. Socrus Simonis in hoc ipso statu erat, cum ingressus eius domum CHRISTVS Dominus *imperauit febre, & dimisit illam.* Dimisit illam ad tempus, in tempore reditura. Cum verò CHRISTVS morientis domum ingreditur, & in Viaticum accipitur, imperat morbo, imperat febre, *Viaticum.* imperat incentoribus vtriusque, vt relinquant ægro-
tantem, & liberum abire sinant in terram illam viuentium, vbi clamor vltra non erit, *nec ullus æstus.* Apoc. 7.
Non percutientur ab æstu, quorum exitum comitantur Sacramenta illa cælestia, quæ diuina pascua sunt, & tantæ quidem virtutis, vt omnem animarum esuriem tollant, omnem sitim planè extinguant.

Gloriosum opus Artis Crucis & patientiæ,
corona aurea & laureola.

Martyrium PIONII vir patiens suo experimeto facile discit verum esse quod dicit de
 Pp 2 in-
 Honor alit
 artem be-
 nè viuen-
 di & mo-
 riendi.

incentore malorum cap. 28, 11. Ecclesiasticus : *Homo iracundus incendit litem, &c. & lis festinans effundit sanguinem : & lingua testificans adducit mortem*, vt qui cius tyrannidem patitur, martyr esse censeatur, dignus profectò præmio confessoribus destinato, si tamen ignem patienter ferat, Deo suum sanguinem offerat, & inflictam mortem subeat.

*Laurea
tolerata
crimina-
tionis.*

Hoc illud præmium coronæ aureæ & laureolæ, cuius meminit Dauid Psalm. 30. *Quàm magna multitudo dulcedinis tuæ Domine, quam abscondisti timentibus te ! Abscondes eos in abscondito faciei tuæ à conturbatione hominum. Proteges eos in tabernaculo tuo à contradictione linguarum.* Sub hac protectione erat martyr laureatus, cui cùm diceret tyrannus, *Resipisce, atque sententiam muta, & auferentur clauis*; respondit martyr : *Eos inesse sensi.* Et cùm paulisper cogitabundus mansisset; Idcirco, inquit, *dormire festino, vt celerius surgam.*

*Extrema
verba mo-
rientis.*

Prodeat in publicum spectaculum sanctus APOLLONIVS ; in quo, veluti in speculo, ferentis perpetuos labores & morbos forma conspicitur.



33. *Facta perennarint tua si malefacta, Perenni;
Mors tibi, martyribus vita perennis erit.*

EMBLEMATICA IMAGO XXXIII.
S. APOLLONII CRVCIFIXI
EXPLICATA.

SANCTVS APOLLONIVS Iconij sub Præ-
fide Perennio passus crucis suspendium,
vitam absoluit, cæloque donatus est; sub
Perennio passus est, vt incorrecta perse-
cutoris malitia, & inuidta Confessoris patientia ma-
gis innotescerent. CHRISTVS cùm esset affixus cru-
ci, non admisit, sed reiecit iniquorum Iudæorum
consilia diæteriaque suadentium atque dicentium,
Descendat nunc de cruce, & credimus ei. Videbantur
quodammodò optare, & simul conari, ne perpetua
crux CHRISTI esset; CHRISTVS verò mentis alte-
rius erat, ne desereret, vt & redemptionem nostram
absolueret, & nos ad crucis perpetuitatem vocaret
& excitaret. Ergo si quis aliquando suggesserit, vt
passionem intermittas, & de patientia remittas, ne
eius suggestionibus acquieueris, memor CHRISTI
& APOLLONII, quorum crux perpetua fuit. Sub Præ-
fide Perennio patitur, quem semper hostis infestat,
opprimit semper & torquet, ne crux vniquam desit,
sed neque deesse oportet, cùm S. Leo dixerit Serm. 9.

Metaph.
Martyrol.
Menolog.

Sympathia
Christi &
Apollonij
Artificum
perpetua
patientia.
Matth. 27.
42.

Qua-

Quadrag. *Nemo est, dilectissimi, cui per conditionem temporis societas huius gloriæ denegetur, tamquam tranquillitas vacua sit occasione virtutis, Apostolus enim prædicat*
 2. Tim. 3. *dicens: Omnes, qui volunt in CHRISTO piè viuere, per-*
 12. *secutionem patiuntur; & ideò numquam deest tribulatio persecutionis, si numquam desit obseruantia pietatis.*

CRUX APOLLONII, Crux perpetui laboris.

*Instrumen-
tum artis
benè vi-
uendi.*

HAbet cum aqua tribulatio consonantiam, & quidem plures tribulationum quàm aquarum fontes sunt. Perennis fons laboris, & tribulationis Crux CHRISTI est, de qua loquitur Augustinus Serm. 12. de Sanct. & ait: *Crux Domini non tantum illa dicitur, quæ passionis tempore ligni affixione construitur, sed illa etiam, quæ totius vitæ curriculo cunctarum disciplinarum virtutibus coaptatur.* Accedit & Clemens Alexandrinus, qui lib. 7. Stromat. in hæc verba mysticum Apollonium describit: *Qui cum vera religione vitam instituerit, maximam inter homines dignitatem consecutus, nec sic quidem eò perueniet, vt dicatur in carne perfectus, quoniam hanc appellationem præoccupauit vitæ finis, cum, qui est martyr ex cognitione, iam eò peruenierit, vt perfectum opus ostenderet, sanguine per charitatem ex cognitione profectam, benignè donatum amittens spiritum.*
Excitatio laborantis. *Beatus hic fuerit, & iure perfectus vocetur, vt sublimi-*

tas

tas potestatis sit Dei, & non ex nobis. Accedit & Iustianus cap. 2. de Sobriet. In hac sobrietatis cruce per totam istam vitam quæ in medijs tentationibus posita est perpetuò debet pendere Christianus.

CRUX APOLLONII, Crux ægrotantis.

HOC APOLLONII, imò & veri Apollinis CHRISTI oraculum est: *Qui perseverauerit usque in finem, hic saluus erit.* Pulchrè Bernardus, qui semper ægrotus vixit, Serm. 1. in die Paschat. dixit: *Non cessamus tollere crucem nostram, donec dicet Spiritus, ut requiescamus à laboribus nostris.* Deus quidem, donec mundus absolueretur, more suo laboravit, postea verò quieuit, præluxitque exemplo homini, ut donec ipse mundo, in quo viuit, absoluator labore & infirmetur, expectetque donec post obitum in requiem cælestem admittatur. *Tunc temporis absterget Deus omnem lacrymam ab oculis eorum, & mors ultra non erit, neque luctus, neque clamor, neque dolor erit ultra, quia prima abierunt.* Conuenit APOLLONIVS cum CHRISTO dicente: *Me oportet operari opera eius qui misit me, donec dies est.* Cum è cruce iam penderet, opus suum absoluit ac dixit: *Consummatum est.* Diem igitur totum in Patris obedientia posuit, & sanctæ crucis passione ac patientia opus suum om-

Instrumentum artis bene moriendi. Matth. 24. 13. Excitatio ægrotantis.

Apoc. 21. 4.

Ioan. 9. 4.

Ioan. 19. 30.

nino perfecit. Conueniat & æger cum CHRISTO, & anteactæ vitæ labores, dum iacet in lecto, laudabili suæ infirmitatis tolerantia perficiat & consummet. Finis coronat opus, & transactam iam vitam mors gloriosa superueniens honorat & illustrat. Huc venerat iam moriturus Abbas Pambo, & post perpetuos labores adstantibus sibi viris ait: *Ex quo veni in hunc locum solitudinis, & fabricaui mihi cellam, & habitauī, extra laborem manuum mearum non recolo me comedisse, nec pœnituisse de sermone quem locutus sum vsque ad hanc horam. Et sic vado ad Dominum, quomodo qui nec initium fecerim seruiendi Deo.*

Leuamen laborantis & ægrotantis.

Virtus Eucharistia.

REx gloriosus ingrediens in hunc mundum, obtulit se passioni, & à primo momento creationis cœpit laborare, nec quieuit, donec in cruce expirauit. In memoriam tantæ passionis sacram Eucharistiam condidit, vt perpetua eius patientia coleatur, & cultores ac communicatores omnes acciperent tolerantiam, qua labores & infirmitates perpetuas sustinerent. Hæc natura, hæc conditio est venerabilis Sacramenti, vt quæ in eo colitur virtus, communicantibus illam dispenset ac tribuat. Requies laboris perpetui sacrosancta Hostia est, & tunc maximè

maximè suam ostendit vim, cùm natus ad laborem
 homo sacrum percipit Viaticum, cuius cælesti offi- ^{viaticum.}
 cio ac beneficio mors ipsa finis laborum est, & post
 molestum ac laboriosum humanæ mortalitatis iter
 placida quies & requies promissa datur viantibus &
 laborantibus, qui *in Domino moriuntur*: qui in exitu ^{Apoc. 14.}
 viæ ac vitæ illum in Sacramento percipiunt. ^{13.}

Gloriosum opus Artis Crucis & patientiæ,
 corona aurea & laureola.

Perpetuum quoddam martyrium professori ar- ^{Honor alit}
 tis viuendi indicitur: *Statutum est hominibus se-* ^{artem be-}
mel mori. quin potiùs semper mortificari, vti cum ^{nè viu-}
 Dauide testatur Apostolus scribens ad Romanos ^{di & mo-}
 cap. 8. *Quis nos separabit à charitate CHRISTI? tribu-* ^{riendi.}
latio? an angustia? an fames? an nuditas? an periculum?
an persecutio? an gladius? (sicut scriptum est. Quia pro-
pter te mortificamur tota die, æstimati sumus sicut oues oc-
cisionis.) Vel ob hanc causam S. Lucam celebrat Ec-
 clesia; cuius hæc oratio est: *Interueniat pro nobis, quæ-*
sumus Domine, sanctus tuus Lucas Euangelista, qui cru-
cis mortificationem iugiter in suo corpore pro tui nominis
honore portauit.

Quem ferat fructum continua & perpetua mor-
 tificatio, testatur Apostolus 2. Corinth. cap. 4, 8. *fr*

omnibus tribulationem patimur, sed non angustiamur; aporiamur, sed non destituimur; persecutionem patimur, sed non derelinquimur; deiicimur, sed non perimus: semper mortificationem IESV in corpore nostro circumferentes, ut et vita IESV manifestetur in corporibus nostris. CHRISTVS Rex viuit & regnat perpetuò, ex quo fit, Christianum virum, in cuius corpore vita eius patefit, debere corona æterna illustrari; cumque illa perpetua sit, perpetuis debet laboribus comparari. Accedit Iustinianus de Casto connub. cap. 7. Quosdam supra communem modum, & ultra humanas vires Dei sapientia tentari permittit, ut illos continua & acerrima pugna præ ceteris gloriosiores faciat. Neque ad momentum permittuntur quiescere, ut deuictò triumphatòque hoste incundius in perpetuas gaudeant æternitates: gaudeant coronati, triumphent laureati. Interim tamen dum perpetuò laborant & ægrotant, sit eorum supplicatio, quæ fuit Fulgentij Episcopi Ruspensis extremè iam ægrotantis: Domine, da mihi hîc modò patientiam, postea indulgentiam.

*Lauren
perpetui
laboris.*

*Extrema
verba morientis.*

Prodeat in publicum spectaculum sanctus THEODVLVS; in quo, veluti in speculo, ferentis iniquam seruitutem & infirmitatem forma conspicitur.



Obsequium Domino fidum Theodoule dedisti:
34. Nil potis es factis addere: liber eris.

EMBLEMATICA IMAGO XXXIV.

S. THEODVLI CRVCIFIXI
EXPLICATA.

ANCTVS THEODVLVS , Diocletiano & ^{Euseb.} Maximiliano Imperatoribus, fidus seruus ^{Martyrol.} Præsidentis Firmiliani , pro suo in herum seruitio crucis tormentum passus , mercedis loco suspendium crucis inuenit , inuenit & apud Deum, cui fideliter inseruierat, cælestis vitæ stipendium. Conditionem probi serui declarat iniqua seruitus. Castitatem & modestiam modesti & casti Iosephi heræ suæ impudicitia satis ostendit. Seruebant Hebræi Ægyptiis , & dominorum sæuitia virtutem seruorum prodidit. Laudabilis seruus , qui vel iniquo domino in rebus decoris obsequium debitum præstat ; in rebus verò indecoris suum deneget famulatum. THEODVLVS Firmiliani mandatis obtemperauit , quamdiu æqua & honesta ille imperabat : abusus est dominio suo , & fidelis seruus infidele recusauit imperium , defecit à Firmiliano , qui & eum supplicio immeritæ crucis affecit. Disce , qui seruitio alieno adstringeris , more CHRISTI , dominanti , etiam iniquo , sedulam obedientiam

*Sympathia
Christi &
Theoduli
Artificum
tolerata
iniqua ser-
uitutis.*

tiam præstare, si tamen imperata, si iussa fuerint æqua; sin minus, mandata detrecta, nega obedientiam. Nouit Deus obsequia debita heris iniquis æterna mercede soluere, cùm iura virtutis seruantur. Auctor est mihi Augustinus libro de Vera inuocat. cap. 34. *Ita à plebibus Principes, & à seruis domini sunt ferendi, vt sub exercitatione tolerantie sustineantur temporalia, & sperentur æterna: auget enim meritum virtutis, qui propositum non violat religionis.*

CRUX THEODVLI, Crux iniquæ
seruitutis.

*Instrumentum artis
benè viuendi.
1. Pet. 2,
18.*

*Excitatio
laborantis.*

AD THEODVLI crucem vocat Apostolus, cùm dicit: *Serui, subditi estote in omni timore dominis, non tantum bonis & modestis, sed etiam dyscolis; hæc est enim gratia CHRISTI Domini nostri.* Non tam æqua quàm iniqua, non tam suavis quàm aspera seruitus virtutis meritum auget: vbi maior iniuria, maius est in præmium ius. Eapropter Paulus Apostolus seruis omnibus commendat, vt non modò blandis & mitibus, sed etiam diris ac duris Principibus humile suum obsequium impendant. *Hæc est enim gratia CHRISTI Domini nostri, qui existens in forma Dei, non rapinam arbitratus est esse se æqualem Deo, sed semetipsum exinaniuit, formam serui accipiens, vt sub forma*

ma serui non Deo Patri solùm, sed & impiis ac ingratiss dominis ac Principibus vsque ad mortem, mortem autem crucis inferiret. Nec dubium, quin gratiâ CHRISTI dispositum sapienter sit, vt THEODVLVS foret sub dominio Firmiliani, quandoquidem ex iniqua seruitute gloriosum eius martyrium ortum habuerit. Benè censet ac iudicat Isidorus libro 3. Sentent. cap. 47. dum sic desinit: *Melior est subiecta seruitus, quàm elata libertas. multi enim inueniuntur Deo liberè seruientes sub dominis constituti flagitiosis, qui etsi subditi sint illis corpore, praelati tamen sunt mente.* Sub domino iniquo ac flagitioso erat Lucius, cuius meminit Nicephorus lib. 3. cap. 3. Martyr hic egit gratias Præfecto, gaudens à malis se dominis liberari, *et ad Deum Patrem, et ad Regem optimum transire.*

CRUX THEODVLI, CRUX ægrotantis.

Seruitutem corruptionis, & illam satis iniquam, ^{Instrumentum artis} Somnes homines patiuntur. Nam, vt pulchrè Dionysius Eccles. Hierarch. cap. 3. Parte 3. §. 11. ait, ^{benè moriendi.} naturam humanam, ab initio diuinis bonis imprudentiâ suâ spoliata, vita passionibus obnoxia, *et tetra mortis exitus excepit: unde homo miserè æternitatem cum mortalitate commutauit, et qui originem à corruptibili generatione acceperat, ad interitum origini suæ consentaneum iure merito*

Rr pro-

Eccli. 8, 6. *properauit. Quare memento quoniam omnes in corruptione sumus*, ait Ecclesiasticus. Et Paulus Apostolus capite 8. ad Romanos hoc ipsum confirmat: *Vanitati enim creatura subiecta est non volens, sed propter eum, qui subiecit eam in spe: quia & ipsa creatura liberabitur à seruitute corruptionis, in libertatem gloriæ filiorum Dei.* Hæc dura & dira, hæc iniqua seruitus est, à qua eximitur nemo, nemo excipitur: hæc nos lecto ægros, sepulchro mortuos nos addicit. Cùm ægotamus, & morimur, iura huius iniquæ seruitutis soluimus: nec in lecto solùm, sed etiam in ipso sepulchro debitum à nobis corruptionis exigitur, in corpore luimus, & illud pendimus. Huius seruitutis impatiens patientissimus Paulus exclamabat, *Infelix ego homo, quis me liberabit de corpore mortis huius?* Corpus mortis appellat, corruptioni omnino subiectum. Nec quidem caro nostra mortalis proprietatis iure solùm, sed etiam iure possessionis & apprehensionis ad mortem iam pertinet, quandoquidem *omnes morimur, & quasi aqua dilabimur.* Interim dum homo corrumpitur & moritur, captus tenetur spiritus, & cupit dissolui, & esse cum CHRISTO. In hoc statu erat Basilius, cùm Epist. 60. scriberet ad Ecclesiam Antiochenam: *Quis dabit mihi alas instar columba? Nunc verò non solùm alis destituor, sed ipso quoque corpore,*

Rom. 7,
24.

2 Reg. 13,
14.

Excitatio
agrotan-
tis.

pore, quod *et* longa iamdudum agrotatione, & nunc continuis laboribus prorsus attritum est. Attrita vestis corporis erat morbis atque laboribus; quæ mutanda iam in æternæ incorruptionis ornamentum sperabatur. Pater noster Deus est, qui cùm vestes charorum sibi filiorum iam tritas & corruptas videt, de indumentis incorruptionis dandis cogitat, vt habitum seruilem in gloriosum ornatum commutent. Commutauit eum THEODVLVS, commutabit & æger, si cor eius in similitudinem euadat picturæ, & in statu corruptionis suæ incorruptis moribus Deo sanus & æger ipse inseruiert.

Leuamen laborantis & ægrotantis.

R Ex gloriosus veluti verus Ioseph antè filios Israël missus est, vt iniquam seruitutem patere-<sup>Virtus Eu-
charistia.</sup> tur, & exemplo præluceret iis, quos eadem expectabat conditio seruitutis. Quòd si Iosephus fratribus de annona prouidit, vt ingredientes Ægyptum alerentur, & simul excitarentur ad seruitutis Ægyptiacæ tolerantiam; verus Ioseph nobis condidit Eucharistiam, qua refecti, iugum seruitutis humanæ, etsi iniquæ, laborantes & ægrotantes æquo animo feramus, donec, sumpto iam Viatico, ex mundi Ægy-^{Viaticum.} pto exeamus. Quàm bonus est ille exitus, in quo

CHRISTVS ducem se constituit, & offert diram & sæuam carnis seruitutem patienti, atque in extremis
 Psal. 30, 4. *dicenti: Deduces me, & enutries me.* Quem sacra sua carne fouet CHRISTVS & nutrit, hunc eundem per viam mortis arduam, dubiam & periculofam ducit ac regit. Prouidit Deus olim de Angelo incluso nube, qui præiret & præcederet Hebræos, cùm eua-derent iam liberi ex captiuitate Ægyptiaca, nec illos defereret, donec eos in tuto sisteret & statueret. Excedit hoc beneficium maiorem in modum Eu-
 charistica gratia, cuius fauore non Angelus è cælis mittitur, qui abeuntem comitetur, sed ipse Rex Angelorum nube candida Hostiæ inclusus, adhæret obeunti, vt ducatum suum illi præstet qui ex Ægypto mundi egreditur, & eius lateri adhærens, nusquam deferat, donec per auia & inuia mortis itinera in patriam cælestem reducat, vbi summa libertas est, & vbi solemniter semper agitur de iniqua seruitute triumphus.

Gloriosum opus Artis Crucis & patientiæ,
 corona aurea & laureola.

*Honor alit
 artem be-
 nè viuendi
 & moriendi.*

Satis graue iniquæ seruitutis martyrium, quod passus & expertus est vetus ille Patriarcha, cuius meminit Dauid, & martyrium eius exposuit Psalmo

MO 104, 17. *Misit ante eos virum, in seruum venundatus est Ioseph. Humiliauerunt in compedibus pedes eius, ferrum pertransiit animam eius, donec veniret verbum eius.* Ferrea hæc seruitus erat, cuius meritum adhuc in ipso seruitutis loco Deus clemens compensauit. *Eloquium Domini inflammavit eum: misit rex, & soluit* Psal. 104, 19. *eum; princeps populorum, & dimisit eum. Constituit eum dominum domus suæ, & principem omnis possessionis suæ. Ut erudiret principes eius sicut semetipsum, & senes eius prudentiam doceret.* Subiungit deinde Psalter: *Et intravit Israël in Ægyptum.* Verf. 23. Ingressus Ægyptum est, vbi iniquam passus populus est seruitutem, cuius præcursor exitit prius Iosephus, præco simul & vates præmij & remunerationis, quæ ferentibus hanc crucem diuinitus promittitur & conceditur, postquam iniqua seruitus patienter tolerata exitum suum habuerit.

Habuit exitum gloriosum seruitus illa Hebræorum, quandoquidem in egressu terræ Ægyptiæ, & transgressu maris Rubri donati iam libertate, voce consona cecinerunt: *Cantemus Domino: gloriosè enim* Exod. 15, 1. *magnificatus est, equum & ascensorem deiecit in mare.* Canticum hoc gloriosum non solum in littore Rubri maris, sed etiam in regno cæli sonant ac resonant Israëlita, de sæua mundi huius seruitute so-

lemnem triumphum agentes ac celebrantes , cùm
cap. 15. Apocalypsis Ioannes dicat : *Et vidi tam-*
quam mare vitreum mistum igne, & eos qui vicerunt be-
stiam, & imaginem eius, & numerum nominis eius, stan-
tes super mare vitreum, habentes citharas Dei, & ca-

*Laureola
iniqua ser-
uiculis to-
lerata.*

nentes canticum Moysi serui Dei. Canunt victores co-
ronati & laureati, ac celebrant suam ab iniqua ser-
uitute liberationem. Coronatus & laureatus canit
hymnum triumphalem THEODVLVS, cuius extre-
ma vox erat in martyrio suo : *Vestimenta quidem à*
corpore diuellere poteris, mentis autem fidem non auertes
in æternum.

*Extrema
verba mo-
rientis.*


Prodeant in publicum spectaculum Sancti SCIL-
LITANI, speculum & forma eorum, qui laboribus
& morbis vndique affliguntur.



35. Dum videt in stadio paribus tot currere fatis
 Christus; Non uni, Paule, βαββαῖον, ait.

EMBLEMATICA IMAGO XXXV.

SS. SCILLITANORVM
CRVCIFIXORVM
EXPLICATA.

 ANCTOS SCILLITANOS, Seuero Impe- Beda.
 ratore, Saturninus Præfectus cruci addi- Martyrol.
 xit, & affixit. Nomina Martyrum sunt:
Speratus, Natalus, Cythinus, Beturius, Fe-
lix, Aquilinus, Lætatius, Ianuarius, Generosa, Bessia, Do-
nata, Secunda, qui omnes ab insula Scilla Nomencla-
 turam suam acceperunt. Quid passio CHRISTI est, *Sympathia.*
 nisi vastus & magnus Oceanus? *Veni,* inquit cruci- *passionis*
 fixus, *in altitudinem maris, & tempestas demersit me.* *Christi &*
 Habet mare insulas suas, habet & pelagus sacrae *Scillitano-*
 passionis insulanos, & SCILLITANOS suos, in *rum.*
 quorum martyrio Deus honoratur, Deus glorifica- *Psal. 68, 3.*
 tur. *Cantate Domino canticum nouum, laus eius ab extre-* *Isai. 42, 10.*
mis terræ. Qui descenditis in mare, & plenitudo eius; in-
sula, & habitatores earum. Subleuetur desertum, & ci-
uitates eius: in domibus habitabit Cedar. Laudate habita-
tores Petra, de vertice montium clamabunt. Ponent Do-
mino gloriam, & laudem eius in insulis nuntiabunt. Con-
 templare SCILLITANOS in insulam quamdam re-
 Sf da-

daños : hinc & inde crucibus plena omnia , sicut in effigie apparet : apparet & apertum cælum , unde subsidium expectatur. Insula cingitur mari , & cum quis passionibus CHRISTI obsidetur , & vndique laborum fluctibus impetitur , similis SCILLITANIS est.

CRUX SCILLITANORVM, Crux vndique afflictorum.

Instrumentum artis bene viuendi.

Qui degunt & habitant in insulis vasti Oceani, nihil extrâ considerant, nisi sæuum mare, fluctus , procellas & tempestates : sunt & afflictæ animæ, quæ ex omni parte vexantur : quidquid vident extra se molestum sibi , graue & laboriosum est. Redacti ad insulam sunt , & tamquam cum insulanis colloquitur Bernardus in Psalm.90. *Vigilate, & orate, vt non intretis in tentationem : quoniam vndique circumdati estis tentationibus : vnde & legistis, quia vita hominis tentatio est super terram. Itaque si tot tentationibus plena est vita nostra, vt non immeritò tota ipsa tentatio debeat appellari; peruigili circumspeditione opus est, ne inducamur in eam : vnde & est illud in Oratione Domini-*
ca, Et ne nos inducas in tentationem; quia vndique circumdatus sic es tentationibus, scuto circumdabit te veritas eius, vt quemadmodum vndique bella, ita & vndique sint præsidia.

Matt. 6, 13. Excitatio laborantis.

Psalm. 90, 5.

praesidia. Attende. Ex insulis quidem non solum mare despicitur, verum etiam caelum prospicitur: ex mari labor ascendit, ex caelo vero fauor omnis descendit. Qui habitat in adiutorio Altissimi, in protectione Psal. 90, 1.
Dei caeli commorabitur. Dicet Domino: Susceptor meus es tu. Hæc vox SCILLITANORVM, & vndique afflictorum est. In hoc statu Basilus erat, ad quem Epist. 39. scribit Gregorius: Non sum veritus, ut aliquid alienum à Philosophia in hisce rebus tristibus designares: sed arbitror nunc potissimum Basilium meum conspiciuum futurum, illumque quam Philosophiam mecum amplexus est, insultusque velut altos quosdam fluctus superaturum, ac reliquis perturbatis immotè perstiturum esse.

CRUX SCILLITANORVM, CRUX
 ægrotantium.

Similes SCILLITANIS iudicandi ægri sunt, qui-
 bus ad instaurandam valetudinem omnes viæ *Instrumentum artis bene moriendi.*
 intercluduntur: cibus nocet, potus officit, medicinae non profunt, desperant Medici, morbus ingrauescit. Quisquis ita malè habet, capitur vndique morbis, vndique tenetur & obsidetur, ne subsidium corpori infirmo accedat: patet tamen caelestis via, *Excitatio ægrotantis.*
 per quam remedium descendat. In hunc statum reductus erat Chrysostomus, & ipse æger, cum Epist. 13.

scribit ad Olympiadem : *Triginta propemodum dies, aut etiam ampliùs , cùm acerbis febribus colluctari non destiti , atque ita longum hoc & molestum iter agebam, aliisque item grauissimis stomachi morbis obsessus.* Benè

Psal. 40, 4.

precatur iacenti in lecto Dauid , cùm ait , *Dominus opem ferat illi super lectum doloris eius.* Considerat Dauid cinctum vndique doloribus & languoribus hominem ægotantem , qualis ciuitas esse solet , cùm ab hostibus arctam obsidionem patitur. Hostes naturæ nostræ morbi sunt , à quibus illa obsidetur, capitur, tenetur in lecto , in morte, & in sepulchro iacet. Nouit Deus sic obsessis auxilium , subsidium &

Psal. 33,
20.

opem ferre. Multæ tribulationes iustorum, sed de his omnibus liberabit eos Dominus. Basilii in hunc locum: *Si quando in morbis, in corporis mutilatione, orbitatibus, plagis, ignobilitate, omni denique egestate, ac bonorum amissione, iustos homines constitutos videris, reminiscere verbi huius quòd multæ sunt tribulationes iustorum, & ex omnibus liberabit eos Dominus.* Confluant vndique

1. Pet. 3,
13.

hostes , vndique & morbi composito agmine inuadant, non est cur timeat æger, si tamen cultor iustitiæ sit. *Quis est, qui vobis noceat, si boni emulatores fueritis?* Muniat se scuto patientiæ, quo se CHRISTVS communiuit, vt saluus & incolumis ex morbo suo euadat , cursum vitæ peragat , & brauium cæli capiat.

piat. Redactus ad insulam erat S. Ephræm, dum loquitur in Testamento : *Omni ex parte langueo atque dissoluor, & ferre nequeo, doloresque me grauius conficiunt.* Dum impetum immanem morborum miser homo totus afflictus patitur, opem à Deo implorèt, preceturque totus supplex : Rex gloriose, qui nostra circumdatus infirmitate, semper vixisti & obiisti, adesto misero ægro, quem vndique morbi inuadunt, circumdant, ac simul conturbant.

Leuamen laborantis & ægrotantis.

R Ex gloriosus potestati sæui maris dominatur, *Virtus Eucharistia.* & frementes eius fluctus imperio suo sedat ac mitigat. In signum huius dominij apud Matthæum cap. 8. *Surgens imperauit ventis & mari, & facta est tranquillitas magna.* Idem ipse venit in altitudinem maris passionis suæ, vt ostenderet se dominatum & imperium in pelagus tribulationum & morborum habere & exercere, quandoquidem seruis suis afflictis vndique virtute sanctæ Crucis & Eucharistiæ succurrit. Mirabilis Agnus Dei in Eucharistia est, qui sedat mirabiliter sæuum mare, componitque imperio suo animos afflictorum, ne afflictionum timeant fluctus & ictus tribulationum & dolorum non solum illæsi excipiant, sed etiam incolumes

omnino eos repellant & frangant. Nouit summa Dei omnipotentia effræne comprimere mare, nouit turgidum claudere & concludere pelagus, ac proinde Deus agens de potentia sua in mare testatur:

Iob 38, 10. Circumdedit illud terminis meis, & posui vectem & ostia. Et dixi: Usque huc venies, & non procedes amplius, & hic confringes tumentes fluctus tuos. Pulchrè ad hunc locum Gregorius lib. 28. Moralium cap. 9. *Quid, inquit, est mare nisi cor nostrum furore turbidum, rixis amarum, elatione superbiæ tumidum, fraude malitiæ obscurum, cui Deus terminum posuit, ne omnia bona animæ subrueret. Circumdat illud terminis suis, quia cor nostrum tentationibus timidum, occultis donorum distributionibus mitigat, ne ad consensum mali veniat. Hinc dum electus quisque tentatur vitiis, & tamen facere mala suggesta renititur, quasi mare clausum tenetur, quod mare quidem in tumorem se erigit, sed dum fixa deliberatione cordis illiditur, fractum redit. Turgebat & tumescebat magnum*

Psal. 68, 3. passionis mare, de quo CHRISTVS: Veni in altitudinem maris. Hoc ipsum terminis Eucharisticis conclusit, & posuit vectem & ostia, ne per panis & vini accidentia daretur locus passioni, accessus & ingressus prohiberetur. *Et dixi: Usque huc venies, & non procedes amplius, & hic confringes tumentes fluctus tuos.* Huc usque venit, & amplius non procedit
 scæuum

ſæuum dolorum mare , cuius tumentes fluctus virtute ſacræ Eucharistiæ confringuntur , præſertim cùm tempeſtas mortis aſſurgit , & ſacri Viatici vi *Viaticum.* deiicitur & diſſoluitur.

Glorioſum opus Artis Crucis & patientiæ,
corona aurea & laureola.

Diuus Bernardus docuit & oſtendit ſacrum ac *Honor alis*
validum ſcutum veritatis, quo cingitur vndi- *artem be-*
que homo , cuſtoditur ac defenditur contra concur- *nè viuendi & moriendi.*
ſum aquarum, & contra confluxum turgentium tumentiumque in mari fluctuum , quibus vir patiens impetitur & verberatur. Scutum inuenit Bernardus datum & oblatum à Rege Hebræorum Dauide, qui redactus ipſe in inſulam , & ſimul concluſus dicebat : *Circumdederunt me mala, quorum non eſt numerus.* *Pſal. 39,*
& rursus : *Circumdederunt me dolores mortis.* Expertus *13.*
ipſe diuinum protegentis Dei auxilium , dixit afflicto vndique homini : *Scuto circumdabit te veritas eius.* *Pſal. 90, 5.*

Post hæc in eodem Pſalmo Dauid tentatum vndique & afflicatum iubet ſperare benè de Deo, qui amanter cum eo loquitur : *Quoniam in me ſperauit,* *Pſal. 90,*
liberabo eum : protegam eum , quoniam cognouit nomen *14.*
meum. Clamabit ad me , & ego exaudiam eum : cum ipſo ſum in tribulatione , eripiam eum , & glorificabo eum.
Longi-

Longitudine dierum replebo eum, & ostendam illi salutare meum. Loquitur cum mystico Iobo, cui bona hæc contigerunt; agensque cum eo David, certum reddit, nullum nocumentum mala inflictæ paritura, allatura potius coronam & laureolam gloriosam. Non accedet ad te malum. Basilius in Scholiis: *Diabolicos insultus vinces, nec damni quidquam ex illis patieris. Ad hunc modum domum Job diuina gratia obsepsit. Et testis huius est hostis ipse clamans: Numquid tu obuallasti interiora et exteriora eius? Ut verò Deus permisit, mox & Satan malitiam suam ostendit, & athletam iustus index victoriam consecutum coronauit. Coronauit & Martinum, cuius lecto cum accedere tentaret sæuus & immanis hostis, eum expulit infirmus. Quid, inquit, adstas cruenta bestia? nihil in me funeste reperiēs.*

Laureola omnimoda afflictionis.

Psal. 90. 10.

Iob 1. 10.

Extrema verba morientis.

Prodeat in publicum spectaculum sanctus PETRVS BALSAMVS; in quo, veluti in speculo, religiosi status, & simul morbi forma conspicitur.



*Balsama ne functum stipent tibi, Balsame, corpus :
36. E ligno vitæ nulla putredo venit .*

EMBLEMATICA IMAGO XXXVI.
S. PETRI BALSAMI CRVCIFIXI
EXPLICATA.

DI VVS PETRVS, qui cognominatus ^{Surius in} ^{Tanuar.} est BALSAMVS, imperante Maximiano roseum balsami colorem in se præferens expressit, & in odorem suauitatis, fracto corporis alabastro, in crucis ara spiritum suum effudit. Faceſſat hinc proditor Iudas, nec dicat, *Ut* ^{Matth. 26,} ^{8.} *quid perditio hæc? Nisi glorioſus PETRVS in cruce balsamum vitale effudiſſet, ac perdidiffet, actum de illo eſſet, & periiffet. Qui amat animam ſuam, perdet* ^{Ioan. 12,} ^{28.} *eam: & qui odit animam ſuam in hoc mundo, in vitam æternam cūſtodit eam. Euasit ſuo prototypo ſimilis, qui totum ſeipſum dedit, vt nos acquireret ſibi. Nifi* ^{Ioan. 12,} ^{24.} *granum frumenti cadens in terram mortuum fuerit, ipſum ſolum manet; ſi autem mortuum fuerit, multum fructum adfert. Prior CHRIS TVS pretioſi balsami inſtar in* ^{Sympathia} ^{Chriſti &} ^{Balsami} ^{Artiſcum} ^{perfectionis} ^{religioſæ.} ^{Pſal. 75,} ^{12.} *cruce ſeipſum profudit, edoctuſque ab ipſo BALSA-* ^{12.} *MVS, ſe cruoremque ſuum in cruce deuouit, monuitque cruciferos omnes, Vouete, & reddite Domino Deo veſtro. Quæ verba verſans & explicans Auguſti-* ^{12.} *nus Epist. 45. ſcribit: Et ſi non vouiſſes, quid aliud tibi*

suadendum fuit, aut quid melius ab homine fieri potest, vt ei restituat à quo institutus est, præsertim quia charitatis erga nos Dei tantum apparet atque illuxit indicium, vt Filium suum vnigenitum mitteret, qui pro nobis moreretur. Quid si monasticam vitam ingressus, & in ea professus, vota religiosa paupertatis, obedientiæ & castitatis emiseris? Cruci CHRISTI te adstrinxisti, vt mysticus balsamus esses, & incruento martyrio te totum Deo sacrares, mancipares, & afflares gratiam tam Deo quàm hominibus fragrantiam. Competit itaque tali viro, vt reliquos ad te pertrahas, ac quosdam appropinquantes tibi pretiosi cuiusdam vnguenti fragrantia, morum tuorum comitate adimpleas. Hæc Basiliius Epistola 45.

CRUX PETRI BALSAMI, Crux hominis Religiosi.

*Instrumentum artis
benè viuendi.
Matth. 19,
17.*

Petrus Apostolus cunctorum Religiosorum vi-
ces & partes agens asseriuit: *Ecce nos reliquimus omnia, & secuti sumus te.* Non coactè, sed spontaneè omnia reliquimus. Benè Chrysostomus Homil. 42. in Genes. *Dominus noster, non quanta dentur, consuevit attendere, sed voluntatis largitatem, & ob hoc etiam parua magna facit.* Secuti sumus te non necessitate compulsi, sed attracti voluntate, quæ nos in tui potestatem

tem transtulit. Benè Augustinus lib. i. Soliloq. cap. 7.

Constanter Deo crede, ei que totum te committe quantum Excitatio laboran-
potes. Noli esse velle quasi proprius, & in tua potestate, tis.

sed eius clementissimi & utilissimi Domini te seruum esse
profitere. Ita enim te ad se subleuare non desinet, nihilque
tibi euenire permittet, nisi quod tibi profit, etiamsi nescias.

Secuti sumus te, non imperio, sed consilio, castas
animas offerentes, quæ sint templum Spiritus san-

cti. Benè rursus Augustinus in Psal. 131. *Quid voui-*
mus Deo, nisi vt simus templum Dei? Nihil gratius ei pos-
sumus offerre, quàm vt dicamus ei quod dicitur in Isaia,

Posside nos. Pretiosum balsamum est, quod sponte
sua ex arbore profluit, & in possidentis manus ve-

nit. Hoc PETRI BALSAMI sacrificium est, & hoc
ipsum in ara crucis religiosæ Deo immolandum est,

cùm CHRISTVS dicat: *Si quis vult post me venire, ab-* Luc. 9, 23.

neget semetipsum, & tollat crucem suam quotidie, & se-
quatur me.

CRUX PETRI BALSAMI, CRUX ægrotantis.

Natura necessitate, voluntate gaudet gratia. Si Instrumen-
tum artis
benè mo-
riendi.
Excitatio
ægrotan-
tis.
naturam tuam consideres, necesse est vt malè
habeas, & ex hac vita discedas: si verò gratiâ ducaris, id efficias, vt quod necessarium est, spontaneum
& voluntarium reddatur. Nouerat Paulus, necessa-

Heb. 9, 27. riò sibi moriendum, cùm dixerit, *Statutum est homi-*
nibus semel mori : & necessitatem hanc libera volun-
 Phil. 1, 23. tate præueniens asseribat, velle se *dissolui, & esse cum*
 CHRISTO. Redolebat balsamum Paulus, vnde &
 2. Cor. 2, 15. dicit : CHRISTI *bonus odor sumus in omni loco*, ac pro-
 inde instar balsami desiderio CHRISTI sua spon-
 te liquefactus deperibat. Redolet balsamum æger,
 qui inuisentes se virtutum & bonæ ædificationis
 odore reficit ac pariter recreat, vnde cum ægrotis
 suis agens sanctus noster Patriarcha, Regul. 50. Sum-
 marij præscribit : *Qui ægrotat, humilitatem & patien-*
tiam præ se ferendo, non minorem ædificationem dum mor-
bo laborat, iis qui ipsum inuisent, & cum eo versabun-
tur & agent, quàm dum valebat corpore, ad maiorem Dei
gloriam præstare curet verbis piis & ad ædificationem fa-
cientibus, quæ ostendant ægritudinem acceptam, vt donum
de manu Creatoris : quandoquidem non minus donum est
quàm sanitas. Et quidem lectus ægritudinis quædam
 forma Religionis est, quam & ipse CHRISTVS in le-
 cto suæ Crucis condidit & instituit. CHRISTVS in
 Psal. 68, 30. cruce dicit, *Ego sum pauper & dolens*. Apparuit Vir-
 ginis Filius, iuxta quem Virgo MARIA stetit : totus
 Phil. 2, 8. obediens fuit, *factus obediens usque ad mortem, mor-*
tem autem crucis. Mundus paupertati, corpus castita-
 ti, dæmon obedientiæ reluctantur ; & qui nudus in
 lecto

lecto iacet, instar luctatoris cum iis tribus hostibus manus conferit. Caueat igitur qui decumbit, ne succumbat, sed hostes suos prosternat, quos BALSAMVS in cruce sua prostrauit, & odore sacrificij sui omnem cupiditatem & arrogantiam fugauit, & attraxit ad se Deum, cui se totum dedit & obtulit in odorem suauitatis.

Leuamen laborantis & ægrotantis.

Rex gloriosus non solum formam Religiosi stat- *Virtus Eu-*
 tus in cruce sua constituit, sed eandem etiam *charistia.*
 instituit in veneranda Eucharistia, siquidem Sacer-
 dotis consecrantis voci obtemperat, nihil de mun-
 do accipit, munditiem omnem præ se fert, quam
 etiam in se sumentibus exigit. Sumat æger Religio-
 sus sacrosanctam Eucharistiam, vt pro statu suo et-
 iam in ægritudine sua religiosam habeat consolatio-
 nem, & consolatorem eum, cui se in odorem sua-
 uitatis obtulit, & religiosè consecrauit. Hæc lex re-
 ligiosa est, vt quod naturæ necessitate tandem fu-
 turum est, cum mortis tempus imminet & vrget,
 spontanea prius & voluntaria mortificatione fiat.
 Quis vocanti Deo non obtemperat in morte? Quis
 in morte carne sua non exuitur? Quis omnibus for-
 tunæ bonis non priuatur & spoliatur? Hic status obe-

obedientiæ , castitatis & paupertatis , quem mors necessariò inducit , mortificatione fit spontaneus & voluntarius , vt cùm homo moriturus iam sit , ne detrectet vocanti Deo acquiescere , bonis temporalibus exui , carne propria spoliari. Præludium igitur mortis in statu suo vir religiosus agit , vt cùm illa venerit , instructum & paratum inueniat , & spontè acceptet id , quod aliàs necessarium est. Præmisit Eucharistiam CHRISTVS , in qua futurum suæ mortis statum præsignauit , & deinde *oblatus est, quia ipse voluit* : & qui Religiosus est , præmunitur *viaticum.* Eucharistia , vt non coactè , sed spontaneè mortem , quæ propriæ voluntatis , corporis & bonorum spoliatio est , acceptet & amplectatur.

Gloriosum opus Artis Crucis & patientiæ,
corona aurea & laureola.

*Honor alit
artem be-
nè viuen-
di & mo-
riendi.*

BALSAMVS martyr in cruce vir Religiosus est, qui bonum & suauem odorem paupertatis, obedientiæ & castitatis emittit ex se , quandoquidem Thomas Kempensis Serm. 12. dixerit : *Potest quilibet in ordine & statu suo religiosè & deuotè viuendo, palmam martyrij obtinere, si contra vitia sua fortiter dimicet , si castitatem illibatam strenuè seruat , si obedientiam vsque ad mortem exemplo CHRISTI custodit, si de omni-*
bus

bus terrenis & necessariis huius vitæ semper minùs quàm plus habere desiderat, si beneplacitum Dei sequitur, & suum velle relinquit.

Adhuc & ipse post multa: Cùm piger aliquis laborare cogitur, tunc manibus & pedibus ad locum martyrii traditur: & si obedierit ad omnia sibi iniuncta, præmiabitur cum martyribus, quorum manus vinculis fuere ligatae, & pedes in equuleo suspensi. Cogitare ergo debet bonus obediens Frater, quia proprii corporis non habet potestatem, sed Prælatus, cui propter Deum se resignavit liberè, ut eat & faciat quod ille iusserit, pro animæ suæ salute. Sic enim obtinebit cum Martyribus patientiæ palmam, & æternæ vitæ coronam. Balsamum, quod sponte sua fluit, Laureola
victoria
Religiosa. maiore pretio æstimatur, & quidem pretiosa est mors mystica sanctorum Religiosorum, qui non necessitate, sed propria voluntate se diuinis obsequiis per paupertatem, obedientiam & castitatem manciparunt. Hæc quidem viuendi ratio, institutio quædam est futuræ mortis, in qua summa paupertas erit, perfecta obedientia; & omnimoda carnis denudatio: quæ certè tria mortem naturalem comitantur. Ea propter qui benè atque religiosè instituuntur, planè & plenè disponuntur, ut quod necessarium est, nimirum mori, hoc voluntarium & spontaneum fiat, & sit vel ex hac parte pretiosa in conspectu Domini mors Psal. 115,
15.

*Extrema
verba mo-
rientis.*

Sanctorum eius. Pretiosa mors Prosperi Aquitanici, qui dum voluntariè moritur, ait : *Ea est meta ad quam diu propero, & ad quam semper omnia contuli vota.* Cùm ad hanc venisset metam Seruulus paralyticus, cuius meminit Gregorius lib.4. Dialogor. cap.14. ad cantum suos vocauit, & cùm ipse simul cum illis caneret Psalmos, *Tacete*, inquit. *Numquid non auditis quanta resonent laudes in celo?* Concludit Gregorius in mystici præfati Balsami elogium : *Dum ad easdem laudes, quas intus audierat, sancta illa anima carne soluta est. Qua scilicet exeunte, tanta illic fragrantia conspersa est, vt omnes, qui illic aderant, inæstimabili suauitate replerentur.*

Prodeant in publicum spectaculum sancti THEOPHIMVS & THALVS ; in quibus, velut in speculo, culturæ labores & ægritudinis forma conspicitur.



Immortale bonum quisquis sectare salutis,
37. Hæc tibi calcanda est semita trita crucis.



EMBLEMATICA IMAGO XXXVII.
SS. THEOPHIMI ET THALI
CRVCIFIXORVM
EXPLICATA.



ANCTI THEOPHIMVS & THALVS Laodi-
ceæ sub Diocletiano Imperatore pro tu-
tanda fide CHRISTI multa tormenta pas-
si, tandem crucifixi sunt. Habes in effigie
Sanctorum vnā & alteram sacræ passionis cru-
cem, habes & tortorem malleatorem, habes regu-
lam ac malleum, quibus viui Sanctorum lapides
excoluntur, vt, cū exculti iam fuerint, locis cæle-
stibus inferantur. Hoc sonat, hoc cantat, hoc mo-
dulatur Ecclesia:

*Scalpri salubris ictibus,
Et tunsione plurima,
Fabri polita malleo
Hanc saxa molem construunt,
Aptisque iuncta nexibus
Locantur in fastigio.*

Saxa siue lapides, qui domorum vsibus parantur &
aptantur, mortui sunt, & tamen cū ferro tangun-
tur & feriuntur, sonum & strepitum edunt: lapides

verò qui excoluntur & assumuntur in aulae caelestis fabricam, viui sunt, & tamen cum ferro malleo tunduntur, & cruci affiguntur, tacent, & omnino silent. *Non murmur resonat, non querimonia, sed corde impauido, mens bene conscia, conseruat patientiam.* Qui regula crucis aptatur, & malleo quatitur ac tunditur, viuis lapis est, & in aulam caelestem assumitur, si tamen graua nouerit in silentio pati. CHRISTVS ipse primus ac primarius lapis crucem & malleum expertus, siluit in passione sua, *sicut mutus non aperiens os suum*, vt angulari capiti mirabiliter infereretur, & insertus est. *Lapidem quem reprobauerunt edificantes, hic factus est in caput anguli.* A Domino factum est illud, & est mirabile in oculis nostris.

*Sympathia
Christi &
Martyrum
Artificum
sanctifica-
tionis.*

Psal. 37,

14.

Psal. 117,

23.

CRUX THEOPHIMI & THALI, CRUX culturae Sanctorum.

*Instrumen-
tum artis
bene vi-
uendi.*

NOuit Deus ex terra debili fortes lapides conficere, nouit ex puluere Adami robustos viros efformare, vt caelorum sedibus annectantur. Antequam pro structura sacri templi lapides adueherentur, iuxta mandatum Salomonis poliebantur. Mysterium erat, in quo adumbrabatur, quid facto opus viuis & electis lapidibus, vt in fabricam templi gloriae disponerentur. Non aptantur sine malleo mystici

*3. Reg. 5,
6.*

myſtici lapides. Quapropter Apoſtolus omnes ac ſingulos Patriarchas paſſionibus preſſurisſue elaboratos eſſe oſtendens, concludit: *Alij diſtenti ſunt, non* ^{Heb. 11,} *ſuſpicientes redemptionem, vt meliorem inuenirent reſur-* ^{35.} *rectionem. Alij verò ludibria & verbera experti, inſuper & vincula & carceres: lapidati ſunt, ſecti ſunt, tentati ſunt, in occiſione gladij mortui ſunt. Crucem & mal-* ^{Excitatio laboran-} *leum tulerunt, & vtrumque nos ferre oportet. Ad* ^{tis.} *crucem & malleum nos Auguſtinus hortatur Ser-* *monem 7. de Ædificat. Eccleſ. Conquadràmini, dolàmini in laboribus, in neceſſitatibus, in vigiliis & ieiuniis, ad omne opus bonum paramini, vt in æterna vita velut in compage, in ſocietate Angelorum requieſcere mereamini. Ad malleum Cruciferos CHR I S T I vocat agens de Patientia Ephræm: Simus tamquam incudes quædam, quamuis cædamur, non tamen lædamur, neque notas in nobis admittamus.*

CRUX THEOPHIMI & THALI, CRUX ægrotantium.

Vui Sanctorum lapides etiam in lecto exco- ^{Instrumen-} *luntur, vbi & regula crucis lectus doloris eſt,* ^{tum artis} *& morbus malleus. Sub cruce & malleo æger diuus* ^{benè mo-} *Franciſcus erat, cùm à cellula in cælum aſſumendus* ^{riendi.} *in puncto mortis cantauit, more cæleſtis cygni: Vo-* ^{Pſal. 141,} *ce* ^{1.}

ce mea ad Dominum clamaui, voce mea ad Dominum deprecatus sum. & concludit: Me expectant iusti, donec retribuas mihi. dein cælesti fabricæ insertus est. Acce-

*Excitatio
agrotan-
tis.*

dit & Gregorius 3. Pastoral. admonit. 13. Dicendum est aegris, ut si cælestem patriam suam esse credunt, necessariò in hac labores velut in aliena patiantur. Hinc est enim, quòd lapides extrà tumsi sunt, ut in constructione templi Domini absque mallei sonitu ponerentur, quia videlicet nunc foris per flagella tundimur, ut intus in templum Dei postmodum sine disciplinæ percussione disponamur, quatenus quidquid in nobis est superflui, modò percussio refecet, & tunc sola nos in ædificio concordia charitatis liget. Sub hoc malleo Paulus erat, cùm in Asia excoleretur, & iam excultus scriberet ad Corin-

2. Cor. 1, 8. thios: Supra modum grauati sumus, supra virtutem, ita ut taderet nos etiam viuere. Sed ipsi in nobismetipsis responsum mortis habuimus, ut non simus fidentes in nobis, sed in Deo qui suscitatur mortuos: qui de tantis periculis nos eripuit, &c. Quisquis ergo sub malleo est, patitur THEOPHIMI & THALI crucem, & excolitur cum Paulo, vnde quod præstitit Apostolus, & ipse præstet, recurat ad preces & orationes, & oret. Laborabat cùm testamentum suum conderet Ephræm, & sub malleo erat, cùm oraret: Rogo atque obsecro te seruator meus, ne me affligens miserum reddas, & conterens

me

me dolore afficias, atque condemnes. Roget sub malleo æger: Rex noster crucifixe, qui lapis malleo percussus, & in cruce sancta excultus, excultor Sanctorum tuorum es; cultor patientiæ tuæ ego sum, tunsionibus atque pressuris dolorum atque morborum redde me expolitur lapidem, vt in gloriosi templi tui fabricam tandem assumar.

Leuamen laborantis & ægrotantis.

R Ex gloriosus, cùm à Patre suo feriretur, malleo *Virtus Eucharistia.* quoque Hebræorum percussus est, ad solatium Sanctorum suorum, qui tamquam lapides viui in eandem omnino formam excoluntur & expoliuntur. Commentum Hebræorum fuit, repertum à Rege Salomone vermem, cuius sanguine lapides pro structura templi blandi ac molles redderentur, vt faciliùs malleo & regula dolarentur. Hoc certum & verum est, CHRISTVM affirmare de se, *Ego sum vermis*, Psal. 21, 7. *et non homo*, cuius pretiosus sanguis effusus & consecratus viuos lapides emolliat, vt pro cælesti fabrica meliùs elaborentur & perficiantur. Cùm viui lapides esse debeant, qui fabricæ cælesti deseruiant, virtute sacre Hostiæ obdurantur contra labores & morbos, & simul spiritaliter viuificantur, vt post acceptum Viaticum suis locis collocentur & connectantur. *Viaticum.*

Gloriosum opus Artis Crucis & patientiæ,
corona aurea & laureola.

Heb. II.
Honor alit
artem be-
nè viuen-
di & mo-
riendi.

Laurea
cultura
Sancto-
rum.

Extrema
verba mo-
rientis.

PAulus inter hanc incudem crucis & malleum tribulationis positus quatiebatur & excolebatur, nihilominus inter reciprocos ictus mirabiliter gestiebat, cùm aduerteret se de eorum numero fore, qui testimonio fidei probati, acceperunt in cælis repromissionem, & simul coronationem, necdum quidem perfectam, donec qui adhuc sunt sub crucis incude & malleo penitus excolantur. Tunc consummata erit gloriatio, erit perfecta coronatio, cùm omnes Crucifixi atque Cruciferi de incude ad lauream, de malleo ad coronam peruenerint, vt cum Rege suo glorioso agant solemnem triumphū. Cùm esset iam in procinctu Carilephus presbyter ad cælestem hunc triumphum apud Deum celebrandum, liber à malleo & incude dicebat: *Proficiscor à morte ad vitam, à labore ad requiem, ab afflictione & mœrore ad gaudium, à fame ad epulas, de tenebris ad lucem, de ignominia ad regnum & gloriam sempiternam.*

Prodeant in publicum spectaculum sancti LEONTIVS & CARPOPHORVS; in quibus, velut in speculo, curationis animæ & corporis forma conspicitur.

E M-



38. *Vni si veteres non sat plausere Poëtæ
Carpophoro, geminos quo satis ore canam?*

EMBLEMATICA IMAGO XXXVIII.
 SS. LEONTII ET CARPOPHORI
 CRVCIFIXORVM
 EXPLICATA.

NOBILES & illustres Medici LEONTIVS & Martyrol. Menolog.
 CARPOPHORVS sub Diocletiano & Ma-
 ximiano Imperatoribus palo crucis alli-
 gati, lapidibus impetiti, telis confossi, ca-
 pite demum plectuntur. Bona medicinæ ars, quæ
 circa vitam salutemque negotiatur. Præstantior ars
 crucis est, de qua Apostolus: *Mibi autem absit gloria-* Gal. 6, 14.
ri, nisi in cruce Domini nostri IESV CHRISTI, in quo
 est salus, vita, & resurrectio nostra. Ars Medica sæ-
 pè deficit, sæpè fallit ac fallitur, loco salutis & vitæ
 morbum sæpè auget, & mortem adfert. Quàm alia
 CHRISTI crux est! numquam errat, numquam la-
 bitur, nec decipit aut decipitur, certum remedium
 salutis, vitæ ac resurrectionis est. Canit hoc ipsum
 non nemo, inquiens: *Crux est mundi medicina, per*
quam bonitas diuina facit mirabilia. Crux est optima me-
dela contra zabolonis tela, valdè salutifera. Cedit ars
 medici cruci, qua sola cælestis Medicus vsus est, vt
 animas nostras sanaret & curaret. Salus nostrarum
 ani-

*Sympathia
 Christi,
 Leontij &
 Carpophori
 Artificum
 curationis
 spiritalis.*

animarum tunc perditæ, cùm proceres naturæ nostræ vetitum ligni fructum degustarunt. Notauit tunc temporis Deus lignum,

Ut medelam ferret inde,

Hostis unde læserat.

Recipe crucem, si sanus esse cupis. Sic monent LEONTIVS & CARPOPHORVS, qui per passionem crucis suæ in primis salutis propriæ, dein verò alienæ consulunt, & monent extrema pro salute animæ agenda. Faceffant hinc profani Medici, quos damnat Concilium Lateranense c.22. *Cùm anima multò sit præstantior corpore, sub interminatione anathematis prohibemus, ne quis Medicus pro corporali salute aliquid agrotò suadeat, quod in periculum animæ conuertatur.*

CRUX LEONTII & CARPOPHORI, CRUX curandæ animæ.

*Instrumentum artis
benè viuendi.*

Luc 4, 23.

*Excitatio
laborantis.
Eccli. 4,
33.*

EVangelicum illud prouerbium, *Medice cura te ipsum*, in vnoquoque nostrum, qui medicus propriæ animæ est, locum habet, vt & illam à culpa præseruet, & si lapsa interdum fuerit, animæ ægrotæ succurrat. Quàm difficilis & ardua ista curatio sit, declarat Spiritus sanctus. *Pro iustitia agonizare pro anima tua, & vsque ad mortem certa pro iustitia, & Deus expugnabit pro te inimicos tuos.* Non dixit, *agoni-*

agonizare pro corpore, sed, pro anima tua, vt & illa iusta ac sana fiat. Hinc illa vox Vitalis martyris ad Vrsicinum Medicum paululùm in tormentis titubantem : *Vrsicine Medice, qui alios curare solitus es, caue ne te mortis aeternæ iaculo conficias.* Composuit de medicina animæ celebrem sermonem Augustinus, ex quo pauca hæc delibanda sunt. *Nostis, fratres charissimi, omnes homines sanitatem corporis quærere. Quæ quamuis sit bona, multò tamen melior est sanitas cordis. Unde omnes Christiani semper debent orare, vt anima incolumis ascendat in cælum. Nam qui solùm pro corporis sanitate sollicitè se gerit, similis est bestiis. Et quàm multi sunt, quod peius est, qui si infirmari cœperint corpore, dolent : si autem in anima non solùm vulnerentur, sed etiam moriantur, non solùm non dolent, sed nec sentiunt? Addo & alia ex eodem Augustino in Psalm. II5. Salus animæ facit, vt fiat quod faciendum esse cognoscitur, & vique ad mortem corporis, si hoc flagitat extrema tentatio, pro diuinorum testimoniorum veritate certetur. Certarunt pro salute animæ LEONTIVS & CARPOPHORVS, certemus & nos, vt spiritu valeamus. Legimus in libro Apophthegmat. sanctorum Patrum, quòd cùm vrgeret matrem filius pro venia intrandi monasterium, ac diceret : *Saluare volo animam meam*, tandem obtinuit. Factus monachus, vixit gessitque se negliger.*

genter. Mortua est mater, & filius magna infirmitate vexatus, mentis excessum passus, raptus est ad iudicium, cui mater aderat, & aiebat; *Quid est hoc fili? Vbi sunt sermones tui, saluare volo animam meam?* Confusus ille rediit ad se, & vitam asperam egit: cumque rogaretur vt sibi temperaret, respondit: *Si improprium matris meae sustinere non potui, quomodo CHRISTI, & Sanctorum accusationem & obiurgationem potero in die iudicij sustinere?*

CRUX LEONTII & CARPOPHORI, CRUX
ægotantium.

*Instrumentum artis
benè moriendi.*

LEONTIVS & CARPOPHORVS affixi crucibus, salutem animarum consulunt. Cùm ægrotudo ingrauescit, omnes impedit functiones, vt vna tantum sit de spiritali valetudine cura. Antequam LEONTIVS & CARPOPHORVS crucibus affigerentur, sanandorum corporum habebant curam: iam verò crucifixi, Medici spiritales sunt, & affixos lecto monent, vt illam salutem velint, illam quærant, quæ in cruce & CHRISTO crucifixo posita est. Hic ille cælestis Medicus, de quo virgo Elisabetha Epistola 7. scripsit ad sororem Bonon. *Sapiens Medicus concupiuit sanare languores animæ vestræ, primum apponens acerbicatem, & postea leuiter palpan, & suaue vnguentum*

guentum imponens, & sic alligauit vulnera vestra, sicut olim venit Saluator sanare egrotos. Nolite à vobis repellere Medicum salutis, quoadusque sanitatem recipiatis. Alliciendus est hic Medicus, non repellendus; vocandus, & etiam rogandus: CHRISTE sancte, nostræ salutis amator, & curator nostræ ægritudinis, qui LEONTIVM atque CARPOPHORVM salutarem crucis artem docuisti, iuxta hanc salutis methodum medere animæ meæ, propitiare omnibus iniquitatibus meis, sana animam meam, quia peccaui tibi. Quis- Psal. 40. 5.
 quis secundum salutarem artem crucis interiùs cùpit sanari, curare non debet, si exteriùs morbis vexetur; quandoquidem medicina animæ & spiritus Excitatio agrotantis. infirmitas corporalis est. Eapropter cùm quidam Monachus S. Ioannem Abbatem, vti refert in Vitis Patrum Hieronymus, rogaret, vt se à morbo & ardentissima febre, qua laborabat, liberaret, responsum accepit, *Rem tibi necessariam cupis abiicere. Vt enim corpora linimentis abluuntur à sordibus, ita animæ languoribus aliisque huiusmodi castigationibus purificantur.* Hanc tibi purgationem CHRISTVS è cruce offert, cùm laboras & ægrotas, recipe ac serua, qui quæris & affectas animo benè habere & valere.

Leuamen laborantis & ægrotantis.

*Elevata
virtus sa-
cra Eucha-
ristia.*

R Ex gloriosus princeps est medicinæ spiritua-
lis, quæ sine crucis & passionis amaritudine
non fit, sed eius amaritudo mysterio Eucharistico
mirabiliter dulcescit. Amara potio melle & saccha-
rode sua acrimonia asperitateque remittit; remittit
quoque de rigore & seueritate sua crux laboriosa, si
non sola capiatur, sed cum melle & saccharo sacrae
Eucharistiae sumatur. Hæc sacrae Eucharistiae virtus
est, vt amaritudinem tollat, & contra venenum, &
veneno infectas sagittas præsentaneum antidotum
sit. Amara mors est, & eius iacula venenata om-
nino sunt, sed qui hunc panem manducat, dulcem
mortem, eiusque salutare sagittas experietur, per
quas anima sana redditur. Ergo qui curandæ ani-
mæ vacas, monente sic Iustiniano Serm. de Euchar.

Viaticum. Hoc cibo sanctificato, hoc caelesti vtere pane, ne peregrina-
tionis huius lassescas in via, neque spiritualis mortis suc-
cumbas articulo. Nec carnis nec spiritus morti suc-
cumbit homo, qui cibo hoc sanctificato alitur &
pascitur.

Gloriosum opus Artis Crucis & patientiæ,
corona aurea & laureola.

CVratur per corpus anima, cuius salus in cor- Honor alie
artem be-
poris infirmitate est. Aphorismus Dei est: *Vir- nē viuen-*
tus in infirmitate perficitur: & iuxta hunc aphori- di & mo-
simum de se ipso Paulus loquitur: *Cū infirmor, tunc- riendi.*
potens sum. Ne superbiret caro, & anima malè habe- 2. Cor. 12,
ret, carnifex sibi Paulus erat, & se martyrio afficie- 19.
bat. *Castigo*, inquit, *corpus meum, & in seruitutem re-* 1. Cor. 9,
digo. Cū morbida dominatur in corpore qualitas, 27.
donec illa subiiciatur, ægrotat necessariò homo; &
dum prauitas carnis humanæ dominium habet in
animam, necesse est, vt spiritus malè valeat: ac pro-
inde castigandum corpus est, donec in debitam re-
digatur seruitutem, ex qua salus tota pendet. Car-
nem suam morbidam nouerat Rex, qui dicebat,
Non est sanitas in carne mea; & vt saluti animæ suæ Psal. 37, 4.
consuleret, minimè sibi parcebat, qui & aiebat:
Castigatio mea in matutinis. Psal. 72,
14.

Hæc punitio & castigatio similis est martyrio,
quod multiplex & varium pro varietate pœnarum,
quibus addicit se homo, vt propriæ animæ consu-
lat, & prouideat valetudini. Multiplex hoc marty-
rium vna CHRISTI crux importat, cū dicat Pau-

Gal. 6, 14.

lus : *Mihi autem absit gloriari, nisi in Cruce Domini nostri IESV CHRISTI, in quo est salus, vita, & resurrectio nostra, per quam saluati ac liberati sumus. Vbi crux Dominica est, ibi salus, ibi vita, ibi saluatio, ibi corona, ibi laureola est. Nec coronabitur, nisi per corporis detrimenta fecerit homo curationem animæ suæ, & per carnis infirmitatem salutem spiritus quæsierit & obtinuerit. Quæsiuit & obtinuit curationem suæ animæ per carnis detrimenta Iustinianus, qui in extremo suo morbo dolebat ita sibi prouideri, & dicebat : En quanta ob huius sacci vilis sanitatem parantur, cum interea pauperes CHRISTI non panem, non stratum, non ignem habent, vbi calefiant.*

*Laureola
salutis
anima.*


*Extrema
verba morientis.*

Prodeant in publicum spectaculum ZOTICVS & Discipuli ; in quibus, velut in speculo, festinantis & ægrotantis forma conspicitur.



39. *Ad vexilla crucis vobis qui voce prænū,
Dum vocat, accelero: vos sociate gradus.*

EMBLEMATICA IMAGO XXXIX.
S. ZOTICI ET DISCIPVLORVM
EXPLICATA.

 ANCTVS ZOTICVS & discipuli sub Cæsa-
re Maximiano in Pontica regione capti,
extremoque addicti supplicio, viam cru-
cis aggredientes magnis passibus, sicut
ostendit effigies, cælum intrarunt. Præcucurrit om-
nium primus magister ZOTICVS, sicut datur in
imagine, & vt festinent discipuli, monet, hortatur,
& iubet. Præcessit CHRISTVS omnes, omnes cur-
su suo superauit. Nisi quis seipsum accingat, suos-
que affectus constringat, non festinat. Quapropter
diuites & opulenti, cum fastu & pompa inceden-
tes, vt iter in cælum faciant, opus est vt se nudent
exuantque; sin minùs, in via hærebunt, & num-
quam portum attingent. *Quàm difficile, qui pecunias*
habent, in regnum Dei intrabunt. Facilius est enim came-
lum per foramen acus transire, quàm diuitem intrare in
regnum Dei. Patiuntur simul hanc difficultatem, qui
vanæ sapientiæ opes iactitant, turgescunt & intum-
escunt, sicut olim Philosophi intumescebant &
superbiebant, de quibus Sermone 45. Augustinus in
hæc

Menolog.
Martyrol.

Sympathia
Christi &
Martyrum
Artificum
diligentia.

Luc. 18,
24.

hæc verba: *Fuerunt quidam Philosophi de virtutibus & vitiiis subtilia multa tractantes, diuidentes, definientes, ratiocinationes acutissimas concludentes, libros implentes, suam sapientiam buccis crepitantibus ventilantes, qui etiam dicere auderent hominibus, Sequimini nos, sectam nostram tenete, si vultis beatè viuere; sed non intrant per ostium. Veniunt onusti, veniunt onerati & grauati, nequeunt festinare, porta clauditur, foris manent.*

Crux ZOTICI & discipulorum, Crux
festinantium ad astra.

*Instrumentum artis
benè viuendi.*

*Excitatio
laborantis.*

AMbrosius Sermone 10. *Hæc nostræ Christianitatis summa est, vt amantibus vicissitudinem, lædenti-
bus patientiam rependamus. Qui enim fuerit patientior ad iniuriam, potentior constituetur in regno. Non enim ad imperium calorum peruenitur superbiâ, diuitiis, præfecturâ, sed humilitate, pauperie, lenitate. Hæc via crucifixorum hæc cruciferorum est, in qua minimè cunctandum, magna opus festinatione est: sicut Apostolus monet 1. Corinth. 9. Nescitis, quòd ij, qui in stadio currunt, omnes quidem currunt, sed vnus accipit brauium? sic currite, vt comprehendatis. Omnis autem qui in agone contendit, ab omnibus se abstinet: & illi quidem vt corruptibilem coronam accipiant, nos autem incorruptam. Ego igitur sic curro, non quasi in incertum: sic pugno, non quasi aërem verberans;*

verberans; sed castigo corpus meum, & in seruitutem redigo, ne cum aliis predicauerim, ipse reprobus efficiar.
 Currebat CHRISTVS, exultauit vt gigas ad currendam Psal. 18, 7.
viam, & in suo cursu dicit: Si quis vult post me veni- Luc. 9, 23.
re, abneget semetipsum, tollat crucem suam quotidie, & se-
quatur me. Dicamus & singuli: Trahe me post te, cur- Cant. 1, 5.
remus in odorem vnguentorum tuorum.

CruX ZOTICI & discipulorum, CruX
 ægrotantium.

TOto tempore quo viuimus, in stadio sumus, Instrumentum artis
 & currimus vt brauium accipiamus: cum benè moriendi.
 ægrotamus, ad metam iam accedimus, & opus est
 vt magis acceleremus. Dictum nobis esse à Paulo
 existimemus, *Sic currite, vt comprehendatis.* Etenim 1. Cor. 9, 24.
 res omnes suapte natura ductæ, quò accedunt ma-
 gis ad centrum, eò magis properant & festinant.
 Cum extremè laboramus, centro nostro appropin- Excitatio ægrotantis.
 quamus: *Festinemus ergo ingredi in illam requiem.* Fe- Heb. 4, 11.
 stinabat in sua ægitudine Olympias, quam pro-
 pterea laudat & commendat D. Chrysostomus Epi-
 stola 6. dum scribit: *Quid ni enim, quaeso, fabulam ap-*
pelles, cum corpus mortale nata sis, & tamen mortem
perinde contemnas, vt qui exteram terram deferere, at-
que ad suam patriam redire festinant. Humanam vitam

fabulam Olympias appellabat, quæ in cælis veram vitam sperabat & affectabat, & in eius possessionem festinis gressibus rapiebatur. Hæc conditio est beatarum animarum, vt cùm iam sint in extremis constitutæ extrema præstent. Extrema præstabat S. Virgo Elisabetha, quæ vicina morti ac centro proxima, vt eius historia tradit, adstantibus sibi dixit : *Non miremini, quòd sic anxie tracto de cunctis quæ pertinent ad exitium meum, quia necesse est hoc à me fieri, dum aliquas vires habeo : ne cùm defecerit omnino virtus mea, in aliquo imparata inueniar.* Elisabetha non erat de numero illarum virginum, quæ nimis serò venientes, clausam portam inuenerunt ; erat ex prudentibus virginibus, quæ accelerarunt gradus & gressus suos, vt in tempore Sponso occurrerent. Qui festinat, *cor suum dabit in similitudinem picturæ*, vt iter magnum conficiat, & mortis foueam transiliat, quemadmodum transiliuit Aldephardus, qui exultans præ gaudio, in lecto iam moriturus ait : *Hinc ibo, & ad Deum meum veniam, letus moriar, letusque transibo ingentes huius vitæ foueas.*

Eccli. 38,
28.

Leuamen laborantis & ægrotantis.

R Ex gloriosus exultauit *ut gigas ad currendam* Psal. 12, 7.
viam, & sic festinauit in cursu, vt dixerit Isaias: *Virtus Eu-*
charistia. Isai. 8, 3. *Voca nomen eius, accelera, festina prædari.* Festinos ac
celeres sectatores suos voluit; & ne de cursu remit-
terent, & in via salutis deficerent, prouidit de vene-
rabili Sacramento, cuius ea virtus est, vt se sumen-
tes magnis passibus facere & conficere iter suum
præstet. Adumbratum est in Elia, cùm in fortitudi-
ne cibi illius, qui typus Eucharistiæ erat, ambula-
uit & festinauit vsque ad montem Dei Horeb. Eò
tendimus, transiliamus ergo metas ac terminos
mortalitatis nostræ, more ZOTICI & discipulo-
rum: toti simus Eucharistici, vt ducti spiritu Eliæ,
festinemus & properemus. Quæ motu coacto atque
violento concitantur & ducuntur, in principio pro-
perant & festinant, at in fine de sua celeritate re-
mittunt: quæ naturali motione cientur & agitan-
tur, quò magis ad metam suam accedunt, eò ma-
gis maturant, & velociùs currunt. Maturemus &
curramus, quibus mors naturalis est, & quibus sa-
cra impenditur Eucharistia, vt, more CHRISTI, *Viatum.*
non coactè, sed spontaneè vitam nostram absolua-
mus.

Gloriosum opus Artis Crucis & patientiæ,
corona aurea & laureola.

Honor alit
artem be-
nè viuen-
di & mo-
riendi.
Matth. I 1,
12.

REX martyrum CHRISTVS totus militaris est,
& militariter quidem cælestis regni amatores
hortatur & monet; *Regnum calorum vim patitur, &
violenti rapiunt illud.* Cùm sit in ciuitatem insultus,
milites inuasores certatim currunt vt illam ingre-
diantur & obtineant, opulentas diripiant domos, &
spoliis fruantur opimis. *Sic currite, vt comprehendatis.*
Crucifixi atque cruciferi more bellantis Daudis,
qui de se ipse testatur: *Cucurri in siti:* more Pauli,
qui loquitur de se ipso: *Bonum certamen certavi, cur-
sum consummaui, fidem seruaui, in reliquo reposita est mi-
hi corona iustitiæ.*

1. Cor. 9,
24.

Psal. 61, 5.

2. Tim. 4,
7.

Accedit sanctus Laurentius Iustinianus de Inte-
riore conflictu, cap. 9. in quo quales esse in pugna
debeant, qui in spiritali sunt conflicturi stadio,
optimè describit & concludit: *Semper virtutum desi-
derio munitus incedat, qui vi calorum conatur diripere
regnum. Non lassescet, non deficiet, non dormitabit vir-
tutis amator. Currunt in spiritali hoc stadio multi, sed so-
lus hic perfectionis accipit brauium. O quàm beatos dixe-
rim amantium pedes, qui per Virtutum itinera feliciter
gradientes, cælestis patriæ deliciis perfruuntur, has post
agonis*

agonis spiritualis consummatum opus perficient dapes. Non enim est eorum labor inanis in Domino. Si igitur, ô CHRISTI milites, intimæ charitatis concupiscitis pace potiri; si supernæ vocationis gloriam festinatis arripere; si imprædabilibus thesauris ditari concupiscitis; si immundorum laqueos vos euitare delectat; spirituales animæ vestræ pedes ab omni immoderato affectu excutite, interioris desidiæ vincula soluite, & seruilis onera timoris abiicite; quatenus, superatis hostibus, gradu concito ad alta tendentes, amoris hymnum Deo cantare possitis. Hoc quippe Prophe-
 ta futurum in se sperabat, cum diceret: Deus Dominus ^{Psal. 17,}
 fortitudo mea, & ponet pedes meos quasi ceruorum, & ^{34.}
 super excelsa mea deducet me victor in Psalmis canentem.
 Ceruorum itaque & vos pedes habete, si victoriæ carmen in excelsis charitatis monte cordis cum iubilo decantare nitemini. Nitebatur id ipsum præstare Gothardus Episcopus, qui tempore mortis suæ præcepit suis, vt canerent, *Benedictus Dominus Deus Israël.* & cum peruenirent ad versum, *Illuminare iis, qui in tenebris,* & ^{Luc. I, 68.}
Umbra mortis sedent, Gothardus voce languida cecinit, *Ad dirigendos pedes nostros in viam pacis:* & hymno dicto cursum vitæ mortalis feliciter absoluit. ^{Extrema verba morientis.}
 Absoluit & cursum feliciter Vrsinus Presbyter apud Gregorium lib. 4. Dialogor. cap. 11. cuius maturantis festinantisque suprema vox illa fuit: *Venio, venio,*

gratias ago. Repetitio illa *venio, venio*, vox festinantis est, & quidem ad centrum diuinitatis. agitque prætereà gratias pro dono ac beneficio, quod se accepisse recognoscit: cùm enim sanctæ animæ ad Deum properant suum; vt in eo tamquam in centro suo conquiescant, summum donum, summum beneficium est, vnde principium habet earum sempiterna remuneratio.

Prodeant in publicum spectaculum sancti CLAVDVS, ASTERIVS & NEON; in quibus, velut in speculo, fraternitatis & infirmitatis forma conspicitur.



O verè fratres! animus quos in cruce concors
40. Unus natos comprobat esse Dei.

EMBLEMATICA IMAGO XL.

SS. CLAVDII, ASTERII ET NEONIS

CRVCIFIXORVM

EXPLICATA.



CLAVDIUS, ASTERIVS & NEON fratres ^{Metaph.}
 germani in Cilicia, Diocletiano Impe- ^{Pet. Na-}
 ratore & Præsede Lysia, post varia tor- ^{tal.}
 menta crucis supplicio multantur. *Quàm* ^{Psal. 132, 1.}

bonum, & quàm iucundum habitare fratres in unum!

Quos natura fratres genuit, fratres in CHRISTO re-
 ligiosa crux effecit. Consentit in Psalm. 87. Augu-
 stinus. *Eos fratres suos facere dignatus est CHRISTVS,* ^{Sympathia}
qui sacramentum crucis intelligunt, & non solùm de illa ^{Christi &}
non erubescunt, verùm etiam in illa fideliter gloriantur, ^{fratrum}
non se de suis meritis extollentes, sed eius gratie non in- ^{Artificum}
grati, vt unicuique eorum dici possit: Ecce verè Israëlita, ^{fraterna}
^{dilectio-}
^{nis.}
^{Ioan. 1, 47.}

in quo dolus non est. Non solùm gloriosi Martyres vir-
 tute sanctæ Crucis fratres CHRISTI, & in CHRISTO
 constituuntur, sed omnes etiam Cruciferi, qui for-
 mam vitæ religiosæ sectantes fraternitatem monasti-
 cam profitentur. Religiosa haud dubiè communitas
 mutuae crucis communicatio est, ad quam hortatur
 Apostolus: *Alter alterius onera portate, & sic adimple-* ^{Gal. 6, 2.}

bitis legem CHRISTI. CHRISTVS quoque ipse associatus crucifigitur, & sociorum secum crucifixorum onera pro nostra instructione sustinuit. Fraternitas carnis & sanguinis bonorum temporalium communionem inducit: fraternitas religiosa secum adfert onerum, laborum, ægritudinum ac malorum communionem. Qui pertinent ad hanc formam fraternitatis, sibi è cælo dictum putent ab Apostolis

1. Petr. 1, 22. *Petro & Paulo: Animas vestras castificantes in obedientia charitatis, in fraternitatis amore, simplici ex corde invicem diligite attentius. Supportantes invicem in charitate, solliciti servare unitatem spiritus in vinculo pacis.*

CRUX CLAVDII, ASTERII & NEONIS,
Crux fraternitatis Religiosæ.

*Instrumentum artis
benè vi-
uendi.*

DAuid Rex omnibus modis curavit, ut quos filios ipse genuerat, mutuam inter se pacem concordiamque servarent, nec tamen obtinuit. Quod intra suam aulam consecutus Rex non est, in templo ac domo Dei esse deprehendit, cum gaudens & simul canens exclamavit: *Ecce quàm bonum, & quàm iucundum, habitare fratres in vnum!* Verus amator fratrum in sola domo religiosa Dei reperitur, cuius bonas dotes Bernardus Serm. 12. in Cantica pulchrè describit: *Omni qui in vobis fraternas in-*
firmi-

*Psal. 132,
1.*

*Excitatio
laboran-
tis.*

firmitates, tam corporum quàm animarum, non solum patienter supportat, sed insuper, si licet, & si valet, iuuat obsequiis, confortat alloquiis, consiliis informat; si hoc non potest propter disciplinam, sollicitis saltem orationibus solatiari non cessat infirmos. Omnis, inquam, qui talia operatur in vobis, bonum omnino spargit odorem inter fratres, & odorem de vnguentis optimis, balsamum in ore huiusce-modi, frater in congregatione monstratur digito, & dicunt de eo omnes: Hic est fratrum amator & populi Israël qui multum orat pro populo & vniuersa ciuitate. 2. Mach. 15, 14.

CRUX CLAVDII, ASTERII & NEONIS, Cruce ægrotantium.

CUM in sacris Religionibus charitas & amor fratrum mirum in modum eluceat, tunc splendet maximè cum Religiosi infirmantur. Omnes inuisunt ægros, solantur, excitant, recreant, ac de eorum salute solliciti, Deum salutis auctorem deprecantur, vt malè habentes sanitati pristinæ restituat. Laborant cum ægrotantibus, cum infirmis infirmantur, communem inter se crucem morborum ferentes & sustinentes. Vnusquisque fratri ægrotanti dicit, quod de Gerardo suo Serm. 26. in Cantica Bernardus asserit: *Quis ita mihi pernecessarius? cui aquè dilectus ego? Frater erat genere, sed religione ger-* Instrumentum artis bene moriendi.
Excitatio ægrotantis.

*manior. Dolete quæso vicem meam vos, quibus hæc nota sunt. Infirmus corpore eram, & ille portabat me; pusillus corde eram, & confortabat me. Hæc charitas religiosa erga fratres infirmos est. Considerant in singulis iacentem in lecto CHRISTVM, & decumbenti auxiliantur more Simeonis, qui & CHRISTVM crucem suam baiulantem comitatus est, & eius adiutor exitit. Adest CHRISTVS fratris instar, vt suis cruciferis ægris, ac crucifixis Martyribus assistat. Matth. 18, 20. *Ubi duo vel tres fuerint congregati in nomine meo, ibi sum*, sum in cruce cum fratribus crucifixis, sum in lecto cum fratribus ægrotantibus, vt solatium & auxilium eis adferam, & eos ad tolerantiam & patientiam simul excitem. Excitet se Religiosus æger, & oret: Rex gloriose, qui cunctis fratribus tuis primas in cruce tulisti, & CLAVDIO, & ASTERIO, & NEONI fratribus præcessisti; præi, sequor debilis, æger te infirmum, afflictus afflictum, lecto affixus crucifixum. Hic est fratrum amator, adiutor & consolator, qui bonum spargit odorem, & simul balsamum, vt recreet, reficiat, & sanet ægrotos.*

Leuamen laborantis & ægrotantis.

Virtus sacra Eucharistia.

REx gloriosus in peruigilio passionis suæ recumbens cum fratribus, instituit & condidit Eucha-

Eucharistiam, vt eos omnes charitatis vinculo sibi annecteret, connecteretque inter se, vt se amore fraterno laborantes & ægrotantes, dum viuerent, complecterentur. Hinc Paulus 1. Corinth. 10, 16. fraterni amoris partes pulchrè agens, arguit & simul conuincit, dum scribit: *Calix benedictionis, cui benedicimus, nōne communicatio Sanguinis CHRISTI est? & panis, quem frangimus, nōne participatio Corporis Domini est? Quoniam vnus panis, vnum corpus multi sumus, omnes qui de vno pane participamus.* Nec quidem solum mysterio cælestis panis vnum hîc corpus componimus, sed etiam in regno Dei: & idcirco cùm vicinus morti est, & homo ad regnum iam appropinquat, ministratur Eucharistia, cuius virtute & *viaticum* fauore ad cælestem veniat gloriosi corporis compositionem.

Gloriosum opus Artis Crucis & patientiæ,
corona aurea & laureola.

VEræ fraternitatis elogium composuit sapientissimus Daud: *Ecce quàm bonum, & quàm iucundum, habitare fratres in vnum! Sicut unguentum in capite, quod descendit in barbam, barbam Aaron. Quod descendit in oram vestimenti eius: sicut ros Hermon, qui descendit in montem Sion. Quoniam illic mandauit Domi-*

*Honor alit
artem be-
nè viuen-
di & mori-
endi.
Psal. 132,
1.*

nus benedictionem, & vitam vsque in seculum. Satis pulchrae similitudines sunt roris caelestis & vnguenti Sacerdotalis, quibus germani in CHRISTO fratres comparantur. Ros frigidum ex se est, vnguentum calidum, & tamen tanta vis charitatis est, vt quae inter se videntur esse contraria, amica faciat, & vera fraternitate connectat. Connectit itaque nationes, conditiones, opiniones, vt nullum sit inter religiosos fratres dissidium, vna sit mens, vna voluntas. Quod si verè fratres efficit passio martyrij, hæc in religioso statu reperitur, vt dicere possit Ecclesia:

Psal. 132.
3.

Hæc est vera fraternitas. Hæc est, inquam, vera fraternitas dicata & consecrata, cui *mandauit Dominus benedictionem, & vitam vsque in seculum.* Vita hæc æterna est, quæ eos qui similes sibi existunt, in æternum beabit & coronabit. Ad hanc beatitudinis laureolam in corona fratrum suorum magnus Antonius excessit, & omnibus valedicens dixit: *Antonius migrat, & iam non erit in presenti seculo vobiscum.*


Extrema
verba morientis.

Prodeant in publicum spectaculum sancti DIO-
MEDES & socij; in quibus, velut in speculo, ferentis
suspensionem animæ & morbum forma conspicitur.



41. *Gens inimica Deo toties cur sanguine ferrum
Innocuo satiat? Gens inimica Deo est.*

EMBLEMATICA IMAGO XLI.
SS. DIOMEDIS ET SOCIORVM
CRVCIFIXORVM
EXPLICATA.

 ANCTI DIOMEDES, IVLIANVS, PHIL-Martyrol.
LIPPVS, EVTYCHIANVS, HESYCHIVS,
LEONIDES, PHILADELPHVS, MENA-
LIPPVS, & PENTAGOPE flammis, aquis,
ferro & palo adiudicati sunt. Quatuor igitur ele-
menta, aqua, ignis, terra, & aër, Martyres cælo &
Deo cælestes ac diuinos pepererunt. Mare submer-
sos produxit, terra suo ferro cæsos edidit, ignis flam-
mis combustos protulit, suspensos in cruce extulit in
sublime aër. Accedunt ad Martyres qui suspendun-
tur in aëre cruciferi omnes, quorum res in suspen-
so sunt. Pendebat in aëre Paulus cùm dicebat: Ni-
hil mihi conscius sum, sed non in hoc iustificatus sum: qui
autem iudicat me, Dominus est. Pendebat, cùm sub-
iungebat: Castigo corpus meum, & in seruitutem redigo, 1. Cor. 9,
ne cùm aliis prædicauerim, ipse reprobus efficiar. Nescit^{27.}
mortalis animæ suæ statum, nescit conditionem,
ignorat an reprobus an saluus futurus sit. Hinc la-
bor ingens, hinc opus magnum procedit, hinc crux

Bbb &

Sympathia
Christi
crucifixi
& cruci-
fixorum
Artificum
tolerata
suspensio-
nis.

& suspensio nascitur. Potuisset, si CHRISTVS voluisset, vel in mari submersus mori, vel in terra ple-cti capite, vel cremari igne & flammis, maluit tamen cruci affigi, exaltari, & in media sublimis æris regione suspensus redimere humanum genus, vt redemptos suos in suspensio teneret omnes, bono animo suspensos esse iuberet, benè de Deo sperarent, de seipsis desperarent. Appositè S. Ephræm agens de Patientia ait: *Debet anima sermonem Domini sequens, atque amplectens crucem eius ferre quotidie, sicut* scriptum est: *Qui non accipit crucem suam, & sequitur me, non potest meus esse discipulus. Hoc est paratum esse ad sufferendum amore CHRISTI tribulationem ac tentationem quamcumque, siue manifestam siue occultam, & spe à Deo aptum esse atque pendere.* Hæc crux Religiosa est. Vnde idem S. Ephræm, agens de timore, ait: *Quid porro est Monachus? Similis est Monachus viro ex alto demisso, qui funem excelsò interuallo pendentem arripit, & se illi appendit, & indefinenter pro auxilio ad Dominum clamat, sciente, si defecerit, & sumque vtriusque manus perdiderit, præcipitem illicò ruiturum & moriturum.*

CRUX DIOMEDIS & sociorum, Crux
suspensionis animæ.

DEus in corpore humano animam rationalem ^{Instrumen-}
fixit, & corpus ita efformauit, vt crucis for- ^{sum artis}
mam referret. Crux corporis recta est, quæ animam ^{benè vi-}
suspensam habet, certam quidem finis sui, mali ^{uendi.}
vel boni futuri sui prorsus nesciam. Quàm graue
suspensum huius martyrij sit, vel ex hoc intelligi
potest, quod est apud Ecclesiastem cap. 9. *Sunt iusti*
atque sapientes, & opera eorum in manu Dei: & tamen
nescit homo vtrum amore vel odio dignus sit, sed omnia in
futurum seruantur incerta, eò quòd vniuersa aequè eue-
niant iusto & impio, bono & malo, mundo & immundo,
immolanti victimas & sacrificia contemnenti: sicut bo-
nus, sic & peccator; vt periurus, ita & ille qui verum
deierat. Hoc est pessimum inter omnia quæ sub sole fiunt.
Si quis in terra premitur, contradictionis aquis sub- ^{Excitatio}
mergitur, igne persecutionis adurit, durum mar- ^{laboran-}
tyrium patitur, hoc est magis laboriosum, sed glo- ^{iii.}
riosum nescire se, dum hæc patitur, an dignus sit
amore vel odio, nec scire quò labores isti pergant,
& laborantem deducant.

CRUX DIOMEDIS & sociorum, Crux
ægotantium.

*Instrumen-
tum artis
benè mo-
viendi.*

OMnia elementa, quæ contra DIOMEDEM & socios conspirarunt, conspirant quoque in ægotum, incerto simul euentu. Quamdiu anceps res, & in ambiguo est, manet in suspenso æger, iam melius iam peius habet, modò viuit modò perit, ex quo fit vt anxius & afflictus æger in vitæ ac mortis medio constitutus, totus pendeat. Hoc suspendium patiebatur, cùm extremè laboraret, & positus in confinio vitæ & mortis assereret Ezechias; *Attenuati sunt oculi mei, suspicientes in excelsum. Domine, vim patior, responde pro me.* Pendet ægotus ad meritum, si iustus sit; si verò iniustus, ad pœnam & supplicium. Suspenditur more peccatoris Absalonis, qui pendulus è quercu periit. Pendebat ad meritum in extrema infirmitate Elisabetha, quæ in mortis agone posita, sicut eius historia narrat, assererat: *Nondum ego quidem aliquid certitudinis accepi à Domino, verumtamen iustum est, vt habeam sollicitudinem animæ meæ, vt disponam de iis quæ pertinent ad exitum meum.* Da mihi iustum virum, in quem omnia elementa conspirent, vexent, & affligant morbi, inter febriles ardores & dirorum tormenta ingentia dolorum, hæc cogitatio

gitatio quid de se futurum sit, magis animum sollicitat, oretque ille propterea: Rex noster crucifixe, qui in cruce & aëre pependisti, & Sanctos tuos pendere voluisti, respice suspensum ægrum in vitæ & mortis confinio, quid de se futurum, nescium, totumque propterea sollicitum. Quis sollicitus non sit, cum nesciat homo vtrum amore vel odio dignus sit? Soletur tamen seipsum, quod Deus non vult ^{Excitatio} mortem peccatoris, sed mauult vt conuertatur, & ^{agrotantis.} viuat. Soletur seipsum, quod *diligentibus Deum omnia* ^{Rom. 8.} *cooperantur in bonum*, etiam suspendium, vt maius ^{28.} apud Deum sibi meritum acquirant. Eapropter sanctus Iobus, cum grauitè ægrotaret, assererat: *Elegit* ^{Iob 7, 15.} *suspendium anima mea*. Vbi suspendium est, ibi & desperatio est, & quidem Iobus de seipso desperabat, vt omnem suam fiduciam in Deo suo statueret. Collocauit illam, cum enuntiaret, Dauid: *Mihi autem* ^{Psal. 72.} *adherere Deo bonum est, ponere in Deo meo spem meam.* ^{28.} Pendebat à se & à Deo sanctus Rex, pendebat à se & diffidebat, pendebat à Deo suo & confidebat. Hoc suspendium anima patientis Iobi sibi voluit, & velle sibi Christianus & potest, & debet.

Leuamen laborantis & ægrotantis.

*Virtus sa-
cra Eucha-
ristia.*

REx gloriosus suspendium in cruce elegit, vt electos suos in sua suspensione solaretur & excitaret. In hunc eundem finem sacram condidit Eucharistiam, quandoquidem certum incertæ saluationis nostræ pignus altaris Sacramentum concessum est. Exclamat propterea Ecclesia: *O sacrum conuiuium, in quo CHRISTVS sumitur, recolitur memoria passionis eius, mens impletur gratia, & futura nobis gloria pignus datur.* Sacrum hoc pignus talis conditionis est; vt si quis de digna eius sumptione & perceptione certus fiat, sciat certò se esse in eo statu, cui vita æterna responderet, cui summa gloria debetur. Accipit hoc pignus æger, vt illud deponat post obitum apud Deum, qui liberans fidem suam, fideli seruo æternam vitam & felicitatem rependet.

Viaticum.

Gloriosum opus Artis Crucis & patientiæ,
corona aurea & laureola.

*Honor alie
artem be-
nè vinen-
di & me-
riendi.*

*Prou. 13,
11.*

SVspenduntur in aëre Martyres, & torquentur: suspenditur in incertum anima, & patitur magnum tormentum. Grande martyrium, dum nescit vtrum amore vel odio digna existat. Quòd si certa spes, dum differtur, *affligit animam*, incerta omnino expecta-

expectatio maiorem afferet afflictionem: Certus de statu suo Paulus erat, & cùm adhuc expectaret, grauius cruciabatur, & inter medios cruciatus in clamores prorumpebat, & dicebat: *Infelix ego homo,* ^{Rom. 7. 24.} *quis me liberabit de corpore mortis huius?* Securus erat Apostolus de sua felicitate, & tamen se infelicem iudicabat, quòd cùm cuperet dissolui, esse cùm CHRISTO & regnare, coronatio eius futura procrastinaretur. Certus & securus erat, cùm diceret: *Sic turro, non quasi in incertum:* & ob certæ spei dilationem securus ab afflictione non erat. ^{1. Cor. 5. 26.} Si spes certa torquet animam, expectatio omnino incerta erit causa maioris & acerbioris martyrij.

In hoc spiritali martyrio, vt ait Iustinianus cap. 16. de Monastic. conuersat. cùm reluctatur CHRISTI seruus, ne succumbat, vterque homo, caro scilicet & spiritus, crucifigitur; Et nisi diuina virtute humana in tali conflictu infirmitas roboraretur, proculdubiò deficeret. Præbet autem præsidium diuina misericordia homini sic oppresso, nunc hostem repellendo, nunc virtutem fortiter resistendi præstando, nunc dolores & flagella mitigando, nunc gustum internæ pacis infundendo, nunc celsitudinem, immensitatemque æterni præmij victoribus repromisso lumine quodam ineffabili patefaciendo. Sicque spiritus sapientie de regalibus sedibus spirans in corde afflictæ quando ^{Lauacra suspensa anima.} *vult,*

*vult, & quomodo vult, eundem ab instanti pressura re-
spirare facit. Hæc Iustinianus, cum suspenſa anima
agens, ne desperet. Huc pertinet monitum illud ex-
tremum, quod moriturus Antonius discipulis suis
tradidit: Incertæ conditionis vitam ancipitem quotidie
pertractate, & celeſte vobis præmium ſine cunctatione
tribuetur.*

Prodeat in publicum ſpectaculum ſanctus GE-
MELLVS; in quo, velut in ſpeculo, laborantis cum
CHRISTO & ſimul ægrotantis forma conſpicitur.



Perculit attonitum si dextrâ Scœuola Regem;
42. In Gemino gemini causa stuporis erit.

Ccc

EMBLEMATICA IMAGO XLII.
S. GEMELLI CRVCIFIXI
EXPLICATA.

SANCTVS GEMELLVS, imperante Iulia-
no, multis pœnis & tormentis afflicta-
tus, affectus demum extremo crucis sup-
plicio, Ancyrae in Galatia victor ad cæ-
lum migravit. Nullus Martyr, præter CHRISTVM,
solus in passione sua certavit, CHRISTO soli fas est
dicere: *Torcular calcaui solus, & de gentibus non est vir* Metaph. Menolog. Martyrol. Isai. 63, 3.
mecum. Nullum adiutorem habuit, nullius subsidio
indiguit. Ceteris Martyribus CHRISTVS præstò
in tormentis & in laboribus fuit, auxilio & præsidio
iuvit, animos eorum accendit, viresque in certami-
ne dedit. Non tam nomine GEMELLVS quàm re-
ipsa gemellus erat, in quem Iulianus desæviit. Mul-
tum quidem intercedit inter cruciferos CHRISTI,
& baiulos crucis mundanæ. CHRISTVS cruciferum
suum numquam deserit, adest semper laboranti,
qui & dicit: *Cum ipso sum in tribulatione*. Vnde fit, Psal. 90, 15.
quod Paulus de se fateatur, *Omnia possum in eo, qui me* Philip. 4, 13.
confortat. Mundus verò patientem baiulū suum mi-
nimè curat, omni prorsus ope auxilioque destituit.

Eccle. 4,
10.

Væ soli, mundano scilicet homini, *quia, cùm ceciderit, non habebit subleuantem se.* Contigit aliquando, vt magnus Antonius, diram ac duram luctam cum tetro dæmone passus, amanter expostularet & postularet à CHRISTO, vbinam tempore conflictus fuisset. Respondit Dominus, cum Antonio simul certasse, & ipse cum victoriam & triumphum reportasse. Cùm ita se res habeat, GEMELLVS hic crucifixus est, GEMELLVS & crucifer CHRISTI est.

CRUX GEMELLI, CRUX CHRISTI &
hominis patientis.

Instrumen-
tum artis
benè vi-
uendi.1. Cor. 15,
11.
Gal. 4, 19.

Geminus Paulus erat, qui ferens crucem clamabat, *Non ego, sed gratia Dei mecum.* Hic idem Apostolus, cùm spiritaliter suas proles parturiret, gemellas singulas edere nitebatur, & enitebatur. *Filioli mei, quos iterùm parturio, vt formetur CHRISTVS in vobis.* CHRISTVS ipse de se nequaquam dixisset, *Ecce ego vobiscum sum vsque ad consummationem sæculi,* nisi nobis adfuturus ita esset, vt per assistentiam gratiæ suæ gemellus vnusquisque nostrum esset euasurus. Ferdinandus Rex Castellæ cognomento & ipse *Sanctus*, timor & terror Maurorum, Catholicæ fidei gloriosus propugnator, geminus erat, qui scriptum in vexillis præferebat: *Dominus mihi adiutor.* Hic
idem

idem adiutor tuus. Ergo cū crucis onus expendis, Excitatio laborantis.
& te imparem ferendo consideras, memor eris

CHRISTI Domini, qui virtutis suæ præsidio cruciferis suis assistit. Occurrit Augustinus libro de Symbolo, & monet: *Si vires tuæ in pugnando sunt parvæ, CHRISTVM inuoca Saluatorem, CHRISTVM inuoca adiutorem. Dum te prospexerit fideliter inuocantem, qui pro te pependit in ligno, victoriam & coronam victoriæ præparabit in celo.*

CRUX GEMELLI, CRUX ægrotantis.

Qui iacet in lecto æger, si CHRISTVM apud Instrumentum artis bene moriendi. Gal. 2, 16.
se habeat, in se quidem gemellus est, & cum Paulo dicere potest, CHRISTO *confixus sum cruci:* Psal. 22, 4.
potest simul & cum Dauide iactare, *Non timebo mala, quoniam tu mecum es.* Deus est, qui affirmat de se, *Cum ipso sum in tribulatione,* & quidem cum tribus Psal. 90, 15.
pueris adstitit in medio fornacis, cum Patriarcha Iosepho Sap. 10, 14.
vinctus in carcere mansit: *In vinculis non dereliquit eum.* Nec Paulum ægrum deferuit, cū scripserit ipse 2. Corinth. II. *Libenter igitur gloriabor in infirmitatibus meis, vt inhabitet in me virtus CHRISTI.*
CHRISTVS ipse est, qui de se ipso testatur: *Quoties* Matth. 23, 37.
volui congregare filios tuos quemadmodum gallina congregat pullos suos, & noluiisti. Hæc singularis pietas indi-

ta huic domesticæ aui est, vt cum infirmis pullis infirmetur & ipsa, quemadmodum expendit Augustinus Tract. in Ioan. *Videtis autem, fratres, quemadmodum gallina infirmetur cum pullis suis. Nulla alia avis, quòd sit mater, agnoscitur. Videmus nidificare passeret quoslibet ante oculos nostros, hirundines, ciconias, columbas videmus quotidie nidificare; quos nisi quando in nidis videmus, parentes esse non cognoscimus: gallina verò sic infirmatur in pullis suis, vt etiamsi ipsi pulli non sequantur, & filios non videas, matrem tamen intelligas. Quòd si ita se res habeat, cum CHRISTO infirmari quis non gaudeat? Gaudebat D. Bernardus, qui Serm. 25. in Cantica dicit: *Optanda infirmitas, quæ CHRISTI virtute compensatur. Quis dabit mihi non solum infirmari, sed & destitui, ac deficere penitus à memetipso, vt Domini virtute stabiliar?* Etsi morbo & morte ipsa ægrotus iustus deficiat, cùm apud se CHRISTVM adiutorem habeat, non est cur timeat, sed habet causam, vt animosè oret & supplicet: Rex noster crucifixe, qui torcular solus calcasti, & socius Martyrum in sua passione fuisti, assiste mihi ægrotanti.*

Nam etsi ambulauero in medio vmbre mortis, non timebo mala, quoniam tu mecum es.

Excitatio
ægrotan-
tis.

Psal. 112, 4.

Leuamen laborantis & ægrotantis.

REx gloriosus vocat nos ad ferendam secum ^{Elevata} crucem. ^{virtus sa-} Si quis vult post me venire, abneget se- ^{cra Eu-} metipsum, & tollat crucem suam quotidie, & sequatur me. ^{charistia.} ^{Luc. 9, 23.} Hic ipse Rex in sacra collocauit se Eucharistia, non solum vt nobiscum semper esset, sed etiam vt nobiscum laboraret. vnde & dicit: ^{Matth. 28,} Ecce ego vobiscum sum ^{20.} usque ad consummationem sæculi. Et cum secum laboranti dicat CHRISTVS, tollat crucem suam quotidie, vt & cum illo ipse quotidie labore, orare Patrem iubet, ^{Matth. 6,} Panem nostrum quotidianum da nobis hodie. Qui ^{11.} manducat hunc panem, mysticus Gemellus est, si quidem CHRISTVS ait: ^{Ioan. 6, 57.} Qui manducat meam Carnem, & bibit meum Sanguinem, in me manet, & ego in illo. Nouerat ita esse S. Nicolaus Tolentinus, qui extremo laborans morbo, sacrum sibi Viaticum postulabat, ^{Viaticum.} vt & dicere possit in hostes. ^{Psal. 117,} Dominus mihi adiutor, & ^{7.} ego despiciam inimicos meos.

Gloriosum opus Artis Crucis & patientiæ,
corona aurea & laureola.

CHRIŒTVS occiditur in crucifixo, CHRISTVS ^{Honor alit} patitur in crucifero, vt gemellus vterque ex- ^{artem be-} stat. Cum res de præmio cælesti agitur, solus Martyr ^{nè viuen-} ^{di & mo-} ^{riendi.}
cruci-

crucifixus, solus & crucifer patiens laureantur & coronantur. Testis mihi Paulus est, qui dum esset in laboribus, vnus erat, & geminum se ostendebat, & dicebat: *Omnia possum in eo qui me confortat.* & alibi: *Non ego, sed gratia Dei mecum.* Hic ipse cū agit de corona & de laureola, fatetur ingenuè: *Reposita est mihi corona iustitiæ.* Secūs in castris humanis plerumque accidere solet, in quibus gregarij milites robore ac virtute sua prosternunt hostes, hostilesque debellant acies; & tamen, cū duces & Imperatores parum vel nihil gesserint, sibi victoriam adscribunt, sibi palmam & lauream arripiunt, vt dicere miles queat, *Tulit alter honores.* Honores non aufert, qui seruiienti sibi dicit: *Si quis mihi ministrauerit, honorificabit eum pater meus, qui in calis est.* Hinc factum est, vt cū se gemellum in lecto consideraret agens animam Carilephus Presbyter assereret: *Confirmatum est cor meum in Domino, & exaltatum est cor meum in Deo salutari meo.*

Phil. 4. 13.
1. Cor. 15.
10.
Laureola
patientis.
2. Tim. 4.
8.
Ioan. 12.
26.
1. Reg. 2. 1.
Extrema
verba morientis.


Prodeat in publicum spectaculum sanctus PHILEMON; in quo, veluti in speculo, forma attentionis & ægritudinis conspicitur.



Esse putas Felix, cui tanta in fata potestas?
43. Quin magis hic felix, qui pia fata tulit.

Ddd

EMBLEMATICA IMAGO XLIII.
S. PHILEMONIS CRVCIFIXI
EXPLICATA.

 ANCTVS PHILEMON martyr sub Cæsa-
re Aureliano, & Præside Feliciano atro-
cia tormenta passus, in crucem actus, &
ictus in capite clauo, clauum fortunæ suæ
feliciter imposuit. Contenderunt PHILEMON & Fe-
licianus de consequenda obtinendaque felicitate, Fe-
licianus agendo, PHILEMON patiendo: victus est
Felicianus, vicit PHILEMON. *Beatus vir, qui suffert* Baronius
Tom. 2.
Menolog.
Martyrol.
tentationem, quoniam cum probatus fuerit, accipiet coro-
nam vitæ. Felicianus reipsa infelix, at PHILEMON
felix euasit, qui rotam felicitatis suæ glorioso clauo
fixit & stabiliuit. Hic clauus diuersus ab eo est, quo
fortis & animosa Iahel tempora Ducis Sisaræ pene-
trauit: *Sinistram manum misit ad clauum, & dexteram* Iud. 5, 26.
ad fabrorum malleos, percussitque Sisaram, quærens in ca-
pite vulneri locum, & tempus validè perforans. Inter pe-
des eius ruit. PHILEMON more CHRISTI in cruce
stat, ruit Sisara. Nemo quidem est, cuius caput cla-
uo confixum non sit. Si mundanus & terrenus ho-
mo existat, caput eius deorsum vergit, inclinatur in
Sympathia
Christi &
Philemonis
Artificum
attentio-
nis.

terram , & terræ affixus instar Sifaræ cadit , ac ruit.
 Si iustus ac sanctus fuerit , caput in altum erigit , re-
 bus supernis adhæret , & quasi quodam clauo ea-
 rum meditatione & conuersatione tenetur. Teneba-
 tur in cruce PHILEMON , tenebatur Paulus , cùm di-
 Phil. 3, 20. ceret , *Conuersatio nostra in cælis est*. CHRISTVS elatus
 in altum cælestia meditabatur , & Paulus , qui dicit
 Gal. 2, 19. de se , *CHRISTO confixus sum cruci*, more CHRISTI,
 sublimia firma ac fixa mente speculabatur.

CRUX PHILEMONIS , Crux sanctæ
attentionis.

*Instrumen-
tum artis
benè vi-
uendi.*

EX primo delicto ortum & originem habuit,
 vt vaga mens cogitationes colligere , ac tenere
 prorsus nequeat. Non datur facilè modus tenendi
 cogitationem , per diuersa loca discurrit , per varia
 diuagatur obiecta. Iam domi , iam foris , iam in
 templo , iam in foro , iam in cælo , iam in terra di-
 uersatur. Hæc crux exigua non est cælestibus viris,
 qui terrena bona contemnunt , affectant cælestia , &
 tamen , cùm minùs cogitant , in oratione & medita-
 tione diuertit animus ad ea quæ mundana & pro-
 fana sunt. Crux ista grauis erat contemplatiuo Hie-
 ronymo , qui cùm esset in solitudine , tenere cogita-
 tionem non poterat , quominùs ad Romana theatra
 aliquando

aliquando diuerteret. Rogandus Deus est, vt caput, in quo mens suam sedem habet, sepositis aliis curis, vni rei attendat, cui attendebat sedens ad CHRISTI pedes Maria, non sic Martha, cui dictum legimus; *Martha, Martha, sollicita es, & turbaris erga plurima:* Luc. 10. 41. porro vnum est necessarium: *Maria optimam partem elegit, quæ non auferetur ab ea.* Non poterat illa auferri, quoniam pedibus Domini caput, mens, & cogitatio Mariæ adstringebantur, & quod amplius est, affigebantur. Affixam sic animam esse cupiebat sanctus Ephræm, cum ageret de lucta spirituali, ac diceret: *Attende tibi ipsi, Frater charissime, ne in tuis orationibus extollaris, & huc illucque mente euageris, sed cum precaturus ad Deum accesseris, magno cum timore ac desiderio coram ipso consistas. Esto per omnia veluti cale-* Excitatio laborantis. *stis Angelus in oratione, & viriliter in agone decerta, vt oratio tua sit sancta ac munda, impolluta & immaculata.*

CRUX PHILEMONIS, Crux ægrotantis.

CLauus capitis infirmo est, cum lecto affixus Instrumentum artis bene moriendi. inhæret, & ratione officij sui audire cogitur, quæ caput lædunt & frangunt. Clauus capitis infirmo est, vt cum aliquando lubeat, & velit quiescere, clamantium strepitu, vel etiam præcepto Medicorum optato somno priuatur. Clauus capiti infixus

Ddd 3 est,

est, cùm fundere preces cupit, nec tamen præ capitis dolore licet. Cùm sit in hoc statu æger, meminerit dicentis Pauli : *Orabo spiritu, orabo & mente* : meminerit canentis Daudidis : *Eruclauit cor meum verbum bonum* : oret spiritu, oret corde, oret mente : Rex gloriose, cuius vertex sacrosanctus perforatus spinis acutis est ad instructionem, & simul consolationem Martyris PHILEMONIS, consolare capite dolentem, & penitus deficientem, corde orantem, & opem suam implorantem & expectantem. Respondent sibi membra, & caput perforatum PHILEMONIS; manus siquidem & pedes, ac totum reliquum corpus crucis ligno affixum est, & similiter confixum clauo eius apparet caput. Accidit ita ægrotanti, vt cùm caput diris doloribus angitur, cetera quoque membra ægrotantis capiti suo condoleant. Quòd si capitis dolor per omnia pertinet membra, necesse quoque est vt & virtus patientiæ pertineat. Cùm D. Bernardus extremè iam laboraret, clauus doloris capiti affixus erat : cumque Godefridus venerabilis Lingonicæ sedis Antistes multis cum illo ageret, nec attendere posset æger ad ipsius Antistitis admirationem, respondit paucis Bernardus : *Ne mireris, ego enim iam non sum de hoc mundo*. PHILEMON de hoc mundo non erat, qui pia fata tulit, idcirco sæpè
Deus

2. Cor. 5,

15.

Plal. 44, 2.

Excitatio
ægrotan-
tis.

Deus acerbos capitis dolores immittit iacenti in lecto homini, vt cum nequeat ille attendere, in similitudinem picturæ caput confixum habeat, & fateatur de se: *Ego iam non sum de hoc mundo*. Recipiat se ad cordis & pectoris sui sacrarium, in quo Deus cum infirmis agit, & infirmi Deo loquuntur. Gaudet Deus solitudine, vt & anima sibi attendat, & ipse animæ. *Ducam eam, inquit, ad solitudinem, & loquar ad cor eius.* Osee 2, 14.

Leuamen laborantis & ægrotantis.

Rex gloriosus, cuius caput spinis perforatum Virtus sacra Eucharistia. & simul coronatum est, nostræ sic attendit redemptioni, vt esse sui immemor videretur. Hic ipse gloriosus Rex in memoriam sacræ passionis, & simul suæ attentionis reliquit venerabile Sacramentum, cuius virtute positus extra se, non solum temporalium rerum, sed etiam suiipsum penitus obliuiscatur, vt soli Deo intentus & attentus sit, dicatque diuino refectionis cibo: *Quid mihi est in celo, & à te quid volui super terram?* Psal. 72, 25. Compertum est quotidiano experimento, vt post acceptum Viaticum homines Viaticum. aliàs rebus mundanis distracti ita se colligant & recipiant, vt attendant cælo & Deo, cuius creaturæ sunt, & cuius passionis gratia acceperunt corporis & animæ redemptionem.

Glo-

Gloriosum opus Artis Crucis & patientiæ,
corona aurea & laureola.

*Honor alit
artem be-
nè viuen-
di & mo-
riendi.*

CApit PHILEMONIS CHRISTVS erat, & capiti suo attentus, sub illo vulnerato vulnerari & ipse voluit, & diram mortem subire. Attentus Martyr attentos nos esse cupit, vt passionibus Redemptoris cum ipso communicantes, etiam cum ipso in reuelatione gloriæ exultantes gaudeamus. Igitur tamquam strenui bellatores, quodlibet tentationis genus alacri animo & virili toleremus. Nequaquam vereamur ad tempus membra CHRISTI sub CHRISTO & pro CHRISTO pati. Breuis est pugna, & sine vlllo dilabens interuallo; remuneratio perpetua & multa nimis. Exempla nos robovent Sanctorum ad patientiam, & innocens vita crucifixi. Hæc est felicitas nostra, hæc laurea, hæc corona, vt cuius mystica sumus membra, in laboriosa passione simus partes principales in gloria & remuneratione. Hinc orta vox extrema sacri martyris Platonis: *Mihi vivere CHRISTVS, & pro ipso mori lucrum & gloria.*

*Laurea at-
tentionis.*

*Extrema
verba mo-
rientis.*

Prodeant in publicum spectaculum sancti DECem MARTYRES crucifixi; in quibus, velut in speculo, custodiæ Decalogi & morbi forma conspicitur.

EM-



Cur ad Theiopolin vitales linquitis auras ?
 44. *Seruet vt æternum corpora Theiopolis.*

EMBLEMATICA IMAGO XLIV.
 SS. DECEN MARTYRVM
 CRVCIFIXORVM
 EXPLICATA.



THEOPOLI sub Cosrhoë Rege DECEN Ado.
 Christiani comprehensi, ab impiis Sa- Beda.
 racenis decem crucibus affixi, agentes Martyrol.
 de impiis & de impietate triumphum,
 vitam suam concluderunt. Consonant sibi Decalo-
 gus legis diuinæ, & Denarius Confessorum, & qui-
 dem rectè, cùm verum sit quod Damianus Sermo-
 ne de Inuentione Crucis affirmat: *Perspicuum est,*
quòd ipsa tabula Legis Crucis Dominicæ prætulerunt sa-
cramentum. Denarius enim numerus per litteram X. de-
signatur, quæ non tantum exteriorem crucis prætendit
imaginem, sed & mysticam eius quamdam videtur indica-
re virtutem, videlicet, quòd præcepta veteris Testamenti
Euangelicæ legi copularit Deus: teste Dauide, finxit labo-
rem in præcepto. Ne nos per fugam laboris custodiam
legis omitteremus, Deus ipse factus est homo, vs-
que ad mortem crucis obediens. Quòd si denarius
numerus per formam crucis signatur, Xp̄s qui Rex
summæ gloriæ est, hunc eundem numerum sacro

Ado.
 Beda.
 Martyrol.

Psal. 93,

24.
 Sympathia
 Christi &
 Decem

Martyrum
 Artificum
 custodia
 Decalogi.

suo nomine præfert, & crucifixus perfectam obedientiam Decalogi exprimit. Quare XP̄s ipse lib. i. Reuelat. cap. ii. suæ Birgittæ dixit: *Quia manus meæ extensæ sunt cum clauis, propterea opera tua, quæ figurantur in manibus, extendentur ad pauperes, & ad præcepta mea.* Crucifixum CHRISTVM suum DECEM MARTYRES contemplati sunt, & ad eius formam patientes pro sanctis Dei legibus sanguinem suum profuderunt, & cruciferos monuerunt, vt legalem crucem secum sumerent & portarent.

CRUX DECIM crucifixorum, Crux
custodiæ Decalogi.

*Instrumentum artis
benè viuendi.*

*Psal. 118.
33.
Excitatio
laborantis.*

REs vna crux est, ex duobus lignis compacta, numeri denarij typus. Lex quoque Evangelica vna est, quæ ex duabus præceptionibus charitatis Dei & proximi componitur ac resumitur. Hanc legem simul & crucem sibi imponi precabatur Dauid Rex, *Legem pone mihi Domine.* Lex crux est, crux ara, in qua religiosus custos legis seipsum per obedientiam immolat & sacrificat; cùm 1. Regum cap. 25. dixerit Samuel: *Numquid vult Dominus holocausta, & victimas, & non potius vt obediatur voci Domini? Melior est enim obedientia quàm victima, & auscultare magis quàm offerre adipem arietum.* In hanc quoque sententiam

tentiam loquitur Ecclesiasticus cap. 4. *Custodi pedem tuum ingrediens domum Dei, & appropinqua vt audias. Multò enim melior est obedientia, quàm stultorum victimæ.* Dictorum rationem reddit Gregorius lib. 36. Moral. cap. 11. *Obedientia victimis iure præponitur, quia per victimas aliena caro, per obedientiam verò voluntas propria mactatur. Tantò igitur quisque Deum placat, quantò ante eius oculos, repressa arbitrij sui superbia, gladio præcepti se immolat. Quot sunt præcepta, tot gladij, tot cruces sunt, & decies se immolat homo, cùm Decalogum legis custodit & seruat patiens. Ait enim Ephræm Orat. 2. de Patient. *Patiens in exequendis mandatis obediens est.**

CRUX DECEM crucifixorum, Crux
ægotantium.

DEcem sunt præcepta Decalogi, quæ sub vna *Instrumentum artis bene moriendi. Rom. 13, 10.* dilectione comprehenduntur: *Plenitudo legis est dilectio.* Quamuis varij morbi, & diuersæ sint ægri-
tudines, in vnum amoris morbum conuerti possunt. Laboret quis febre, stomacho, capite, latere, & ceteris id genus infirmitatibus; si tamen iustus sit, & propter Dei amorem mala patiatur, dicere fas est, *Amore langueo.* Ad vnam amoris crucem decem legis *Cant. 1, 5.* mandata referuntur, & in vno charitatis languore

omnes morbi continentur. Et quidem Paulus Apo-
 2. Cor. 11, stolus, cùm rogaret, *Quis infirmatur, & ego non in-*
 29. *firmor? quis scandalizatur, & ego non vror?* amore cha-
 ritatis ardebat, & in vno amoris morbo morbos
 1. Cor. 13, omnium complectebatur, ac sustinebat; (*charitas pa-*
 4. *tiens est*) & quisquis languet amore, patiens in mor-
 Excitatio bis erit. Felix morbus qui procedit ex amore, infe-
 agrotan-
 tis. lix ille qui ex defectu charitatis suam originem du-
 cit. Liquet hoc in paralytico, cuius meminit Ioan-
 nes. *Erat autem quidam homo ibi triginta & octo annos*
 Ioan. 5, 5. *habens in infirmitate sua.* Hæc infirmitas ex defectu
 amoris debiti procedebat, cùm asserat S. Augustinus:
Si ergo quadragenarius numerus habet perfectionem legis,
& lex non impletur nisi in gemino præcepto charitatis;
quid miraris quia languebat, quia ad quadraginta duo mi-
nus habebat? Nec datur ambigendi locus, quòd
 languidus ille ex violatione legis infirmaretur, cùm
 Ioan. 5, 14. non multò post dixerit illi CHRISTVS: *Ecce sanus*
factus es, iam noli peccare, ne deterius tibi aliquid contin-
gat. Cùm hic paralyticus ex defectu amoris in pro-
 ximum laboraret, mirum non est quòd in ægritu-
 dine sua non haberet ille hominem, cuius ministe-
 Ioan. 5, 7. rio vteretur. *Hominem non habeo,* inquit. Luit debitas
 poenas æger, cùm ab homine deferitur, cui debi-
 tum non soluit amoris. Homo derelictus ab homi-
 ne,

ne, à clementissimo Deo, quem diligere debuit, nec dilexit, non deseritur: accurrit ægrotanti, ac dicit: *Vis sanus fieri?* Impertit ægrotanti sanitatem, vt ver- Ioan. 5. 6.
bis blandis allectus, & beneficiis attractus discat diligere Deum, & ex eius amore omnes labores, omnes morbos sustinere, sicut & patres sustinuerunt, quorum exequias celebrat S. Ephræm, & ait: *Angeli Sanctos felices ac beatos prædicant, & ad eos dicunt: Beati estis vos, qui CHRISTI amore & desiderio, benè prudenterque magna cum vestra patientia scapham vestram tutò mandatis CHRISTI optimis direxistis: quapropter ad tranquillum iam portum peruenistis, & CHRISTVM recepistis, quem tantopere desiderastis & amastis.* Quàm bona sit medicina, exacta legis custodia, vel vnus agnouit ethnicus Euripides in Belerophonte. *Morbi mortalium, inquit, alij sponte, & alij & nostra culpa fiunt, alij diuinitus immittuntur, quibus lege medemur.*

Leuamen laborantis & ægrotantis.

R Ex gloriosus X^{p̄s}, qui Decalogum legis nomine suo præfert, & eius obseruantiam legalem in cruce satis ostendit, vt tædium eius obseruationis à nostris cordibus auferret, sacram instituit Eucharistiam, cuius virtute cor humanum excitatur & Virtus sacra Eucharistia.
confir-

confirmatur, vt tempore prosperæ aduersæque va-
letudinis legi diuinæ afficiatur, & per custodiam
Decalogi denarium diuinum, cuius pignus Eucha-
ristia est, lucretur & consequatur. Conueniunt in-
ter se Decalogus & Eucharistia, quandoquidem in-
stitutio sacramenti vocari solet *mandatum*, & idcir-
cò sic appellatur, quia tunc CHRISTVS legem amo-
ris fanciuit: *Hæc mando vobis, vt diligatis inuicem.* Et
quidem ad vnâ & eandem summam amoris De-
calogus legis, & mysterium Eucharistiæ rediguntur,
& è vita decedentibus simul præcipiuntur.

Ioan. 15.
17.

Viaticum.

Gloriosum opus Artis Crucis & patientiæ,
corona aurea & laureola.

*Honor alie
artem be-
nè vinen-
di & me-
riendi.*

LEx Decalogi intra Sancta sanctorum seruaba-
tur, & in Altari summo custodiebatur, vt vel
ex loco ipso colligeretur, sanctum esse sacrificium,
quo quis per Decalogi obseruationem se dicaret &
consecraret. Legis huius, quæ fit per obedientiam
oblatio & immolatio conditionem declarat S. Lau-
rentius Iustinianus cap. 9. de Contemptu mundi. *Lex
obedientiæ, quæ à Deo in paradiso primis est iniuncta pa-
rentibus, & quæ per Moysen, iubente Deo, est instituta
Hebrais, & quæ per CHRISTVM est prærogata fide-
libus, facta est merendi seu demerendi occasio, obedientie
disci-*

disciplina, liberi arbitrij doctrix, desideriorum cordis propalatrix, & custodita perennis vitæ brauium.

Hæc, inquam, lex, tametsi per diuersitatem temporum nomina varia sortiatur, vnum tamen habet effectum, idemque merendi institutum, excepto quòd legem naturæ atque Decalogi in hoc præcellit lex gratiæ, quòd obseruatorem suum transmittit ad cælos, ceteræ autem minimè; quoniam iusti, qui in ipsis militauerant Deo, præstolabantur CHRISTVM in carne venturum, qui futurus erat primogenitus mortuorum, Ecclesiæ caput, Dei & hominum mediator, redemptorque, ante quem nemo dignus fuerat transferri cælo. Transferuntur iam post CHRISTVM Decalogi obseruatores, qui ex lege ipsa Decalogi sibi conficiunt crucem, in qua Deo cæli immolati & consecrati componuntur, vt vestigiis CHRISTI inhærentes, cælestia exemplaria ingrediantur, vbi custodita lex habet & præbet æternæ vitæ brauium.

Plenitudo legis, dilectio est: & quisquis eam virtute dilectionis impleuit, gratuletur sibi vel in ipsa mortis hora de accipiendo statim brauiio & denario, cum

Polycarpo, cuius extrema fuit illa oratio: Pater dilecti & benedicti Filij tui IESV CHRISTI, per quem tui cognitionem accepimus, gratias tibi ago, quòd me huius diei & horæ celebritate donasti. Sic dum ad mortem pergunt (inquit S. Dionysius Ecclesiast. Hierarch. cap. 7.

*Laurea
Decalogi.*

*Extrema
verba morientis.*

§.I.) qui sanctam vitam traduxerunt, ad veras Dei promissiones intuentes, quarum veritatem quodammodò in resurrectione iam conspexerunt, cum firma *et* vera spe gaudioque diuino ad mortis terminum, tamquam ad finem certaminum, proficiscuntur; quòd certò sciant, sua omnia, propter futuram suam resurrectionem in tuto fore in illa perfecta aeternaque vita *et* beatitudine.

Prodeant in publicum spectaculum sancti IGNOTI crucifixi; in quibus, velut in speculo, ignobilitatis & morbi forma conspicitur.



*Sæua dies frustra Sanctorum nomina condis:
45. Hæc erit ignoto nomine nata phalanx.*

EMBLEMATICA IMAGO XLV.

SS. INCOGNITORVM

CRVCIFIXORVM

EXPLICATA.

DE mandato Diocletiani in Phœnicia ho- Niceph. Martyrol.
 mines aliquot Christiani, quorum sunt
 incognita nomina, crucis supplicium
 subierunt. Hebræi ignotum omnino Sympathia Christi & Incognito-
rum Mar-
tyrum Ar-
tificum
tolerata
ignobili-
tatis.
 CHRISTVM & sine nomine esse voluerunt, cùm
 dixerint: *Quando morietur, & peribit nomen eius?*
 Omnes vno ore & vna voce clamarunt: *Mittamus*
lignum in panem eius, & eradamus eum de terra viuen-
tium, & nomen eius non memoretur amplius. Plal. 40, 6.
 Votis eo-
 rum minimè respondit euentus, quin potius è cru-
 cis morte nomen sibi *Crucifixus* comparauit: Phil. 2, 8.
Humi-
liauit semetipsum, factus obediens vsque ad mortem, mor-
tem autem crucis, propter quod & Deus exaltauit illum,
& dedit illi nomen, quod est super omne nomen. Gloria
 quidem nominis nobilitas est, obscuritas verò fa-
 mæ crux mundanæ ignobilitatis est. Crucis igno-
 miniosæ consortes CHRISTVS Sanctos suos voluit,
 qui ignobilia & contemptibilia elegit, vt fortia quæ-
 que confunderet. vnde & Paulus ait: *Vos nobiles, nos* 1. Cor. 4,
II.

autem ignobiles. Hic idem Apostolus monet, vt seruamus omnes Deo per gloriam & ignobilitatem, per infamiam & bonam famam, sicut qui ignoti & cogniti, sicut INCOGNITI CRVCIFIXI vixerunt & obierunt. Accedit Ephræm de Vita spirituali: Ne igitur animum despondeas, videns te in hac vita inglorium, cogita hæc etiam viros iustos sustinuisse.

CRUX INCOGNITORVM CRVCIFIXORVM,
CruX ignobilitatis.

Instrumentum artis
benè viuendi.
Psal. 125,
6.

CRucifixos pariter & cruciferos Dauid contemplatus canebat: Euntes ibant & flebant, mittentes semina sua: venientes autem venient cum exultatione, portantes manipulos suos. Quod seritur, iacet in terra ignotum, iacet prorsus sine nomine; dein verò nobile & gloriosum resurgit. Seminatur in ignobilitate, surgit in gloria. CHRISTVS ignobilis fatus est, sed postea gloriosus ipse surrexit. Nisi granum frumenti cadens in terra, mortuum fuerit, ipsum solum manet: si autem mortuum fuerit, multum fructum affert. Cum cecidit in terram CHRISTVS, prorsus sine nomine fuit; Humiliauit semetipsum, factus obediens usque ad mortem, mortem autem crucis. Dein verò sublimi nomine IESV auctus est. Propter quod & Deus exaltauit illum, & donauit illi nomen, quod est super omne nomen,

vt

ut in nomine IESV omne genu flectatur, cælestium, terrestrium, & infernorum. Ad formam CHRISTI Martyres crucifixi, atque cruciferi, dum ferunt, & in terra feruntur, ignorantiam sui nominis libenter ferunt, cum nouerint in cælo nomina sua scripta, nullo tempore oblitteranda, nulla obliuione delenda. Hoc idem Christianæ humilitatis institutum, hoc consilium est Apostolicæ perfectionis, sicut adstruit Augustinus in Psalm. 150. *Omniū fidelium qui diligunt CHRISTVM, qui ambulant viam eius humiliter, quam ipse docuit humilis, nomina scripta sunt in cælo: cuiusque contemptibilis in Ecclesia, qui credit in CHRISTVM, & diligit CHRISTVM, & amat pacem CHRISTI, nomen scriptum est in cælo. Ipsa est perfectio nostræ humilitatis.* Faceſſat hinc humanæ gloriæ studiosus, cum quo rem habet S. Ephræm agens de vita spiritali: *Sed & ego, dices, in miseriis atque angustiis vitam obscurus & inglorius transigens, post mortem nullam mei memoriam relinquam. Extrema dementiæ, & animi vana gloria pleni hic morbus est. Quàm multi sunt putas, qui persecutiones pro Salvatore nostro pertulerunt, & adhuc obscuri & ignoti Deo viuunt?*

Excitatio
laboyan-
tis.

CRUX INCOGNITORVM CRVCIFIXORVM,
Crux ægrotantium.

*Instrumen-
tum artis
benè mo-
riendi.*

AD classem INCOGNITORVM Sanctorum per-
tinent ægri, qui de bonis suis testantes, magni-
ficas sui memorias non extollunt, sed pia opera pro-
mouent, ex quibus non tam nomen apud homines,
quàm apud Deum & Angelos sibi acquirant. Natus
quippe Regi & aulæ, licet rusticis sit ignotus, con-
temnit, nec curat; & vir iustus cùm Deo & Angelis
innotescat, parui facit si lateat ipse in mundo, vbi me-
rus paganismus est. Eapropter Patriarchæ, qui subli-
mem Ierosolymam affectabant, in casulis moraban-
tur, insinuantes se in vasto mundi præsentis pago ha-
bitare, donec supernam Dei ciuitatem ingrederen-
tur. Cogita, æger, de cælesti Ierosolyma, & existi-
ma, sicut monet Nazianzenus Epist. 124. morbum
corporalem tibi *pædagogiam quamdam esse ad id quod
utile est, utpote contempto corpore, & quæ corporea sunt,
simulque quidquid fluxum, turbulentum & perditum est,
totus ad cæleste consortium transeas, proque præsentis sæ-
culo, viuas futuro.* Vera quippe nobilitas ibi est, ad
quam per ignobilitatem aditus aperitur. *Seminatur,
inquit Apostolus, in ignobilitate, surget in gloria.* Quem
locum versans Basilii in Psalm. 104. dicit: *Compa-*

*Excitatio
ægrotan-
tis.*

1. Cor. 15,
43.

ra, quaeso, genesi mortem, ac desine lugere mortuum, ab ignobilitate ista liberatur. Sordidæ conditionis homo est, & tunc maximè apparet, cùm æger in lecto est, & morti tributum pendit. Ignobilis est dum viuit, quia mortalitati suæ censum præbet; ignobilior est in morbo, quia non tam mortalitati quàm morti debitum vectigal reddit. Soletur seipsum recordatione sancta optimi & maximi Regis, qui dum vixit, & dum obiit, tributarius esse voluit, voluit & ignobilis haberi, vt socios suos ignotos esse doceret. Dicat ergo æger, qui iacet in lecto ignotus: Rex noster crucifixe, qui vilis & ignobilis in cruce habitus es; præsta, vt qui ignotus & occultus æger in lecto iaceo, in cælestibus notus fiam. Hic effectus morbi est, vt qui illum patitur, deformetur quidem mundo, Deo verò & cælo formetur, quibus per patientiam suam innotescit.

Leuamen laborantis & ægrotantis.

Rex gloriosus, cùm summè nobilis esset, tam-
 quam ignobilis habitus passusque est, & in-
 de ortum suum nobilitas Christiana duxit. Nobilitas itaque nostra in cruce est, & quos seruos in ea
 CHRISTVS nobilitauit, ad epulum Eucharistiæ vocauit & inuitauit, vt eos non solum nobilium more,

Virius sacra Eucharistia.

Ggg

fed

sed etiam iitu Regum tractaret & recrearet. *Pinguis est panis CHRISTVS, & praebebit delicias Regibus.* Hæc Regum conditio est, vt non tam ex proprio nomine, quàm ex regali titulo velint cunctis mortalibus esse noti: & Reges in CHRISTI mensa parum de humano nomine curant, cùm titulo gaudeant diuino. Mysticos Reges sacra reddit & constituit Eucharistia; cuius virtus tanta est, vt eos Serenissimos efficiat, quos regaliter tractat & effert. Principes, quos orbis Serenissimos vocat vel ex eo maximè, quòd vario rerum euentu non turbentur, turbantur cùm accedit mortis sententia, & esse Serenissimi desinunt.

Viaticum. Verùm enimuerò Eucharistici Reges ac Principes suam seruant ac retinent serenitatem, etiam cùm mors appropinquat, premit & opprimit.

Gloriosum opus Artis Crucis & patientiæ,
corona aurea & laureola.

I. Cor. 4,
11.

*Honor alit
artem be-
nè viuen-
di & mo-
riendi.*

Ioan. 1, 10.


INuidebat nequaquam Paulus claris & conspicuis viris, cùm diceret: *Vos nobiles, nos autem ignobiles;* contentus quidem sorte & conditione, qua cum suo Rege conueniebat. Rex gloriæ inglorius prorsus in mundo erat. *Mundus per ipsum factus est, & mundus eum non cognouit.* Vixit ignotus CHRISTVS; & tamquam ignobilis ipse ignominiosa morte affectus

ctus est. Regis ad exemplum Paulus componebatur,
 & summæ gloriæ ducebat, esse se cum CHRISTO
 inglorium, & in ipsa crucis ignobilitate totam suam
 nobilitatem, ac nominis claritatem constituēbat,
 cū diceret: *Mihi autem absit gloriari, nisi in Cruce Do-* Gal. 6, 14.
mini nostri IESV CHRISTI.

Rex gloriæ IESVS CHRISTVS vbi summum re-
 gnum habet, ibi regalem nobilitatem & dignitatem
 ostentat. Coram Romano Præside CHRISTVS sta-
 bat, cū ingenuè fateretur; *Regnum meum non est de* Ioan. 18,
hoc mundo. Fassus est se regnare in cælo velle, & ibi-^{35.}
 dem velle se post sacram passionem triumphare. So-
 lemnem agens triumphum, cæleste regnum ingre-
 ditur, festiuus excipitur acclamationibus: *Attollite* Psal. 23, 7.
portas, principes, vestras, & eleuamini portæ æternales, &
introibit Rex gloriæ. Cū hæc sit claritas CHRISTI,
Gloria hæc est omnibus Sanctis eius, quibus in Euange- Psal. 149,
 lio annuntiatur, *De mundo non estis,* vt in mundo^{Ioan. 15,}
 ignobiles esse cupiatis, & solū de vera nobilitate^{19.}
 cogitatio vestra sit, quæ solū in regno cælesti in-
 uenitur, & quidem laureata & coronata, cuius *Laurea*
 splendore conspicui SANCTI IGNOBILES appare-^{ignobili-}
 bunt, quibus visis exclamabunt mundani & profa-^{-tatis.}
 ni nobiles: *Nos insensati vitam illorum æstimabamus in-* Sap. 5, 4.
saniā, & finem illorum sine honore. Ecce quomodo com-

*Extrema
verba mo-
rientis.* putati sunt inter filios Dei, & inter Sanctos fors illorum
est. Hinc factum est, vt nobilis Iustinianus deside-
rans esse ignotus, dixerit moriturus : *Facite quod iu-
beo, nolite pompam parare : neque enim is sum quem exi-
stimatis* ; Antonium imitatus & Hilarionem, qui in
locis obscuris, ne colerentur, sepeliri voluerunt.

Prodeant in publicum spectaculum sancti CLEO-
NICVS, EVTROPIVS & BASILISCVS ; in quibus,
velut in speculo, ferentis mundum & morbum for-
ma conspicitur.



Quis neget amplecti victricia signa Tonantis,
46. Sub queis victoris premia victus habet?

EMBLEMATICA IMAGO XLVI.

SS. CLEONICI, EVTROPII
ET BASILISCI CRVCIFIXORVM

EXPLICATA.



LEONICVS, EVTROPIVS & BASILISCVS Græcæ tabul. Martyr. ol.
 milites insignes CHRISTI, sub Maximo imperante, & Asclepiade Præsidente, quidquid mundus amat & habet
 despicientes, cruciatus atque cruces subierunt. *Omne quod est in mundo, concupiscentia carnis est, & concupiscentia oculorum, & superbia vitæ.* Tres istas concupiscentias CLEONICVS, EVTROPIVS & BASILISCVS virtute sanctæ crucis debellarunt, & à nobis superandas esse monent. *Qui sunt CHRISTI, carnem suam crucifixerunt cum vitiis & concupiscentiis.* CLEONICVS in effigie sua totus armatus comparet, & carnis concupiscentiæ bellum indicit. EVTROPIVS erecto vultu in cruce describitur, & concupiscentiæ oculorum, id est, rerum terrenarum omnino renuntiat. BASILISCVS totus curuatus & humiliatus, superbiæ & elationi humanæ se opponit. Omnes tres, & singuli cum Paulo dicunt: *Mihi mundus crucifixus est, & ego mundo.* Igitur vt mundum & tres eius affectio-

1. Ioan. 2, 16.

Gal. 5, 24. Sympathia Christi & Martyrum Artificum superata concupiscentia.

Gal. 6, 14.

fectiones pariter crucifigamus , quid efficere debeamus , è crucibus Martyres monent ; monet & S. Augustinus Serm.4. de Ascensione : *Nulla te mundi oblectamenta inclinent , nullæ aduersitates deiiciant. Absit tibi gloriari, nisi in Cruce Domini nostri IESV CHRISTI, per quem tibi mundus crucifixus est, & tu mundo crucifixus.* Accedit Bernardus de Modo benè viuendi, Serm.1. *Qui crucem portat, debet mundo mori ; nam crucem ferre, semetipsum est mortificare.*

CRUX CLEONICI, EVTROPII & BASILISCI,
Crux mundanæ concupiscentiæ.

*Instrumentum artis
benè viuendi.*

MVndus nos à tribus partibus impetit : quem si vincere velimus , à tribus nos illum partibus inuadamus. Per carnem , per oculos , per vitam nobis bellum ingerit mundus , & nos in eius appetitiones crucis arma moueamus. Cùm mundus carnis concupiscentia animam tuam inuadit , maceratione carnis te arma (CLEONICVS ait) hostem propulsabis , & victoriam comparabis. Cùm aggreditur per concupiscentiam oculorum , lacrymas funde coram Deo (sicut hortatur EVTROPIVS) & effusione lacrymarum impetum hostilem retundes, triumphumque reportabis. Quòd si impetu superbiæ deiicere te contendat , eius vanitas (vt suadet

BASI-

BASILISCVS) humilitatis amore dissoluenda est, & deprimes aduersarium. Crux triplex & grauis est, ^{Excitatio laboran-} hisce concupiscentiis sæpè impeti, & non succum-^{sis.} bere, sed per spem certæ victoriæ leuior crux ista redditur, sicut testatur in hæc verba Bernardus Ser-mone in Octaua Paschæ: *Vis ergo nosse quis est qui vincit mundum? Quæ in eo vincenda sunt, diligenter in-tuere; siquidem & hoc ipsum beatus Joannes indicat, di-cens: Charissimi, nolite diligere mundum, neque ea quæ in* 1. Ioan. 2.
mundo sunt, omne enim quod in mundo est, concupiscen- 16.
tia carnis est, & concupiscentia oculorum, & ambitio sæ-culi. Hæ sunt tres turmæ, quas fecerunt Chaldaei. Sed me-mini quoque S. Iacob fecisse tres turmas, cùm timeret à fa- Gen. 33, 1.
cie Esau, rediens ex Mesopotamia. Et vobis ergo aduer-sus triplex genus tentationis triplici opus est munimento, ut carnis concupiscentia ipsius mortificatione vincatur: oculorum verò concupiscentiam superet studium compun-ctiõnis, & assiduitas lacrymarum: porrò ambitionis va-nitatem virtus charitatis excludat. Cùm Matthæi ca-pite 10. CHRISTVS dixerit, Omnis qui non accipit cru-cem suam, & sequitur me, non est me dignus; explicat Cyrillus in Ioan. lib. 12. cap. 28. Nihil aliud significat, (vt arbitror) quàm mundo propter Deum renuntiare, & huic corporali vitæ bona, quæ per fidem speramus, antepo-nere.

CRUX CLEONICI, EVTROPII & BASILISCI,
CruX ægrotantium.

*Instrumen-
tum artis
benè mo-
viendi.*

CUm mundo & eius appetitionibus diram lu-
ctam homo gerit, & cum incidit in morbum,
totum secum mundum quasi prosternit. Prosternit
carnem, ne voluptate trahatur; deiicit oculos, ne
diuitiarum & opum falsa specie capiantur; depri-
mit omnem superbiam, ne animus inani gloria fe-
ratur & efferatur. Vnde & dicere fas est ægro, cum
Gal. 6, 14. lecto doloris affigitur: *Mihi mundus crucifixus est, &
ego mundo.* Audiamus philosophantem pulchrè Na-
zianzenum Epist. 70. ad Philagrium: *Honestum esse
censeo dolori resistere, atque animo vel nunc maximè ex-
purgari, at morbum nihil aliud ducere, quàm vtilem quam-
dam institutionem, hoc est, vt corporea omnia, & quidquid
fluxum est & caducum aspernans, totum te cælesti patriæ
addicas.* Prosternit virtute patientiæ æger mundum
& eius principem, quemadmodum Iobus & Laza-
rus prostrauerunt, & quidem cum infirmi essent, vt
astruit in Asceticis Basilii. *Fit autem, inquit, iuxta
postulationem satanæ aliquando, vt veluti magnum agoni-
stam ad certamen illi committat benignus Dominus, & in-
solentiam illius per extremam seruorum suorum toleran-
tiam deiiciat, quod in Job factum esse dicimus, vel ad
exemplum*

*Excitatio
ægrotan-
tis.*

exemplum illis, qui nihil ferre sustinent molestiæ in medium adducatur à Deo, qui ad mortem vsque in tristibus perdurare possunt, qualis erat Lazarus, qui cùm talibus obrutus esset vulceribus, nusquam commemoratur quòd præsentem calamitatem molesto animo tulerit.

Leuamen laborantis & ægrotantis.

R Ex gloriosus omnem mundi vanitatem & ^{*virtus sacra Eucharistia.*} concupiscentiam è cruce sua damnauit, & ad-
huc mundum eiusque appetitiones damnat in Eucharistia, quæ nihil carnale nihil terrenum sapit, & efficit, vt Regis gloriosi conuiuæ rebus mundanis renuntient. Quamuis in hac renuntiatione excelluerit Augustinus, pro humilitate sua cap. 13. Soliloq. exclamat, *Mundus clamat, Deficio; tu verò clamas, Reficio: & miseria mea praua magis sequitur deficientem quàm reficientem. Planè infirmitas mea hæc est.* Infirmitas planè est, cùm iacens in lecto æger, appetit ea quæ valetudini nocent: at cùm exoptat quæ saluti suæ proficiunt, in via salutis est. Cùm idem ipse mundanis affectibus ducitur, infirmus censendus est: si verò renuntians terrenis appetitionibus, cælestia quærit ^{*viaticum.*} alimenta, in via salutis & vitæ incedit & ambulat vsque ad mortem, cùm dixerit CHRISTVS: *Qui Ioan. 6, 60. manducat hunc panem, viuet in æternum.*

Gloriosum opus Artis Crucis & patientiæ,
corona aurea & laureola.

*Honor alit
artem be-
nè viuen-
di & mo-
riendi.*

*Laureola
denicta
concupi-
scentia.*

Matth. 5, 8.

Matth. 5, 3.

*Luc. 14,
11.*

Gal. 5, 24.

*Extrema
verba mo-
rientis.*

Nodus triplex concupiscentiæ carnis, & concu-
piscentiæ oculorum, atque superbiæ vitæ, im-
plicitus adeò est, vt explicari non queat, cuius disso-
lutioni annexum est regnum cælorum, decreta co-
rona & laureola conceditur. Hæc corona & laureo-
la destinata castitati: *Beati mundo corde, quoniam ipsi*
Deum videbunt. Hæc paupertati decreta; *Beati paupe-
res spiritu, quoniam ipsorum est regnum cælorum.* Hæc hu-
militati concessa: *Qui se humiliat, exaltabitur.* Pro tali
regno & imperio necesse est vt nodus ille frangatur,
& cum manuum ministerio dissolutio non succedat,
reversus ad crucem fiat, cuius ope & opera crucifixi
atque cruciferi *carnem suam crucifixerunt cum vitiis &
concupiscentiis,* & bono hoc omine & nomine regnum
cælorum intrarunt & occuparunt. Cum iam intra-
rit, & simul occuparit hoc regnum Calliopius apud
Metaphrasten, fassus ingenuè est: *Malo CHRISTI
cruce affigi, quàm caducis stulti mundi deliciis frui.*

Prodeat in publicum spectaculum S. MARINVS;
in quo, veluti in speculo, ferentis furiosos homines
& morbos forma conspicitur.

EM.



Subiacui furijsq; hominum, furijsq; ferarum :
47. Sed mihi plus homines quam nocuere feræ.

EMBLEMATICA IMAGO XLVII.

S. MARINI CRVCIFIXI
EXPLICATA.

NAZARBI in Cilicia sub Diocletiano, ^{Martyrol.}
 Præsìde Lysia, S. MARINVS senex pri- ^{Menolog.}
 mò flagris cæditur, dein ligno suspendi-
 tur, & in eo mirum in modum excarni-
 ficatur, postremò capite obtruncatur, & corpus ca-
 nibus ac feris vorandum traditur. Feras & rabidos
 canes truculentia sua homines superarunt. Benè si-
 mul & verè lib. 5. de Ciuit. Dei cap. 28. dicit S. Augusti-
 nus : *Inhumaniùs homines hominem viuum, quàm bestie*
solent decerpere cadauer abiectum. Feræ crudeles suapte
 natura sunt, homines suoapte ingenio mites & man-
 sueti, peccati verò malitia redduntur sæui, furiosi,
 truculenti. Nihil peccato crudelius, nihil sæuius.
 Quamuis culpa ita barbara & fera sit, potens man-
 suetudo est, vt vincat omnem eius sæuitiam, om-
 nem eius truculentiam. Contra hominum degene-
 rem inhumanitatem, ac feram crudelitatem S. MA-
 RINVS suam patientiam obiicit, & dum baculis
 contunditur, ait : *Frumentum CHRISTI sum, contun-*
dor baculis, vt panis mundus inueniar. Dum vnguibus
 lania-

Pfal. 29.
12.

laniatur, dicit Deo : *Conscidisti saccum meum, & circumdediti me letitia.* Vim vi repellere licet, vi nimirum

Sympathia
Christi &
Marini
Artificum
superati
furoris.
Pfal. 2, 1.

patientiae vim saevitiae & truculentiae. Sic CHRISTVS furias humanas repressit, de quibus David : *Quare fremuerunt Gentes, & populi meditati sunt inania? Adstiterunt reges terrae, & principes conuenerunt in unum aduersus Dominum, & aduersus CHRISTVM eius.*

CRUX MARINI, Crux patientis humanum furorem.

Instrumentum
artis
bene viuendi.

IMmanis hominum crudelium furor. Furor illis secundum similitudinem serpentis : sicut aspidis surdae, & obturantis aures suas, quae non exaudiet vocem incantantium, & venefici incantantis sapienter. Edoctus experientia loquebatur, furorem Regis Saulis expertus fuerat, & contenderat rabidam eius iram cantu citharae temperare David, nec tamen potuit : potuit tamen eius rabiem, & proiectam in se lanceam deui-

Prou. 19, 8.

tare. *Homines pestilentes*, ait Salomon, *dissipant ciuitatem, sapientes verò auertunt furorem.* Cum pestis saeuir, cauere sibi homines solent ne vento infecto tangantur & inficiantur; cumque pestis crudelis instar homines furiosi sint, furorem declinant sapientes, curantque omnibus modis, ne aura indignationis, & irae frementis vento per impatientiam corripiantur.

Excitatio
laborantis.

tur. Confugiunt ad CHRISTVM patientem, qui furoris humani crucem tulit, & ferre docuit eos qui dicunt: *Nisi quia Dominus erat in nobis, dicat nunc Israël, nisi quia Dominus erat in nobis, cum exurgerent homines in nos, fortè viuos deglutissent nos. Cum irasceretur furor eorum in nos, forsitan aqua absorbuisset nos. Torrentem pertransiuit anima nostra: forsitan pertransisset anima nostra aquam intolerabilem. Benedictus Dominus, qui non dedit nos in captionem dentibus eorum.* Hæc MARINI imitatores; sed, vt ait S. Ephræm agens de Pœnitent. *Martyres ob amorem Dei dissecti meruerunt accipere coronam, nos autem, cum sine tormentis Martyres esse queamus, potiùs contraria agentes, inutiles permanemus.*

CRUX MARINI, CRUX ægrotantis.

LÆditur à seipso æger; fera sibi humana est: *Instrumentum artis benè moriendi.* Quæ dum valet, vincitur & ligatur; cum malè habet, soluitur, vt à se diris pœnis discerpatur, doloribus dilanietur, & lecto affixus crucem MARINI patiatur, si tamen eius patientiam imitetur, memor regis Ezechix, qui cum grauitè vexaretur acerbis ac diris ægritudinis doloribus, quasi leonis vnguibz disrumpebatur & dilaniabatur. *Quasi leo sic contriuit omnia ossa mea.* Ita contingere solet, vt incidat in leonem, & eius vngues incurrat, qui iacens in lecto

*Excitatio
agrotan-
tis.*

*Eccli. 38,
28.*

Pfal. 68, 3.

æger diris pœnis exercetur. Interim dum exercetur, Deus orandus est : Deus & homo, qui feritatem hominum & dolorum expertus es, mitiga furentes elementares humores, qui ferarum instar miseram carnem impetunt & dilaniant. Dum caro humana dirumpitur & laniatur, virtute patientiæ æger se feruet, atque intus se custodiat. Benè Basilii in Asceticis : *Neque incisiones igitur, neque vstiones, neque graueolentiam, ac molestorum pharmacorum dolores, neque inediam, neque exactam dietæ mensuram, neque abstinentiam eorum quæ noxia sunt, recusari à nobis recta ratio dicitur; ita tamen, quod rursus dico, vt animæ iuuandæ scopus obseruetur, quæ quasi exemplo ad suam ipsius curam instituat.* Cùm æger ex vna parte doloribus diuexatur, & ex altera duris ac diris pharmacis ac medicinis curatur, *cor suum dabit in similitudinem picturæ*, & considerabit se mysticum esse MARINVM, qui ex vno & altero latere verberatur ac laniatur. Mare magnum passio CHRISTI est, dicitque propterea ipse, *Veni in altitudinem maris.* Mare tumultuatur, intumescit, sæuit & fremit, & tamen animantia, quæ ferocia in terra sunt, in pelago furenti atque frementi mitescunt. Mansuetus agnus CHRISTVS inter passionem & furias. Talis & MARINVS extitit, talis & æger existat.

Leua-

Leuamen laborantis & ægrotantis.

Rex gloriosus mansueti agni instar furias ho-
 minum passus est, & se manducandum dedit, Virtus sa-
 cra Eu-
 charistia.
 vt agnos redderet homines, qui, licet discerperen-
 tur à lupis, & diris morbis ac doloribus disrumpe-
 rentur, nihilominus & lupis & morbis euaderent
 superiores. Robur cælestis panis hoc est, vt qui se
 communicauerit, totus mitis, totus mansuetus fiat,
 & virtute mansuetudinis omnem impetum furio-
 sum frangat, furias vincat, & tam luporum quàm
 morborum omnium furorem omnino superet.
 Quòd si dæmon ipse, *sciens quia modicum tempus* Apoc. 12.
 12.
habet, inuadit ægrotum, & miris modis illum affli-
 git & torquet, meminerit magni Antonij, qui cùm
 esset in extremis, assistentes sibi monuit, primos es-
 se dæmonis feroces impetus, sed deinde vires eius
 esse prorsus effeminatas. Tunc maximè debilis & in-
 firmus est, cùm sacro Eucharistiæ Viatico præmu- Viaticum.
 nitum hominem reperit. Hæc enim virtus Eucha-
 ristia est, vt cor humanum confirmet, diabolicum
 robur infirmet.

Gloriosum opus Artis Crucis & patientiæ,
corona aurea & laureola.

*Honor alit
artem be-
nè viuen-
di & mo-
riendi.
Matth. 5,
12.*

CRucifixos & cruciferos in ipsis pœnis & cruciatibus monet CHRISTVS: *Gaudete, & exultate, quoniam merces vestra copiosa est in celis.* Ad hanc vocem Paulus excitatus & recreatus, inter furias humanas constitutus, flagris & verberibus totus ruptus

2. Cor. 7, 4. dicebat: *Superabundo gaudio in omni tribulatione nostra.*

Rom. 8, 18. Quid sic? *Non sunt condignæ passionēs huius temporis ad futuram gloriam, quæ reuelabitur in nobis.* & rursus: *2. Cor. 4, 17.* *momentaneum & leue tribulationis nostræ æternum gloriæ*

*Laurea de-
uicti furo-
ris.*

pondus operatur in nobis. Per morbidas furias & furores simul humanos itur ad regnum cælorum, vbi summa pax est, & quidem coronata & laureata; itur ad Agnum, qui splendet in cælesti ciuitate. Hac iuit Calliopius crucifixus, contusus & vulneribus incisus, qui rogatus à tyranno concitato, & actō in rabiem, *Extrema
verba mo-
rientis.* *Tormentorū sentis acerbitem?* respondit: *Dulcedinem promissæ à CHRISTO quietis degusto, & tormenta non sentio.*

Prodeant in publicum spectaculum beati MARTYRES IAPONIAE; in quibus, velut in speculo, forma spiritalis circumcisionis & morbi conspicitur.

E M-



48. *Cedite nunc Fotoqui, Christi vicere tropæa.
Germinat è nostro sanguine dia fides.*

EMBLEMATICA IMAGO XLVIII.
 BEATORVM IN IAPONIA
 CRVCIFIXORVM
 EXPLICATA.

HABVIT gloriosus Rex in Iaponia Marty-
 res suos, quos Taicosama cruci addixit &
 affixit. Affixi sunt è Societate IESV, PAV-
 LVVS, IACOBVS, & IOANNES : ex familia
 verò S. Francisci sex, PETRVS BAPTISTA, MARTI-
 NVS, FRANCISCVS, PHILIPPVS, GONSALVVS,
 FRANCISCVS. Accesserunt septemdecim laici, ALOI-
 SIVS puer duodennis, PAVLVVS, LEO, COSMVS,
 PAVLVVS, MICHAEL cum filio annorum quinde-
 cim, ANTONIVS annorum tredecim, IOACHIMVS,
 FRANCISCVS, GABRIEL, THOMAS, IOANNES,
 MATHIAS, VENTVRA, PETRVS, & FRANCI-
 SCVS. Omnes crucifixi sunt, sinistrae auris parte ab-
 lata, & dextro simul latere transfosso. Cordibus er-
 go & auribus circumcisi, caeleste regnum intrarunt.
 Circumcisionem cordis & aurium desiderabat san-
 ctus Stephanus in iis, quos cap. 7. Actuum merito
 redarguebat : *Dura ceruice, & incircumcisis cordibus
 & auribus, vos Spiritui sancto resistitis.* Nostri verò
 cruci-

crucifixis neutra circumcisio defuit, cum particula auris abscissa, & circumciso corde per crucem in aulam Dei cæli sunt admissi. Eadem disciplina est sanctæ Crucis, & doctrina mysticæ Circumcisionis, ut multis probat Ambrosius lib. 1. de Abraham. nos

Ioan. 14, 6.
Sympathia
Crucis
Christi &
Circumci-
sionis spi-
ritalis, &
viriū, que
Artifi-
cium.

inde hæc pauca desumimus. *Aduenit Dominus IESVS, qui ait, Ego sum via, veritas, & vita: qui non partem exiguam corporis in signo, sed totum circumcidit hominem in Veritate. Signum destruxit, Veritatem induxit; quia postea quàm venit quod perfectum est, quod ex parte erat euacuatum est; & ideò cessauit circumcisio partis, vbi refulget circumcisio vniuersitatis. Iam enim non ex parte, sed totus homo saluatur, in corpore scilicet & anima. scriptum est enim: Qui vult post me venire, abneget semetipsum, & tollat crucem suam, & sequatur me. Hæc crux Societatis IESV & eius sociorum est.*

CRUX BEATORVM CRVCIFIXORVM, CRUX circumcisionis spiritalis.

Instrumen-
tum artis
benè vi-
uendi.

Nihil ad perfectum lex perduxit, nec ipsam circumcisionem, quæ ante CHRISTI passionem imperfecta erat, cum CHRISTVS in cruce dixit, *Consummatum est*, omnem pariter oblationem & circumcisionem spiritus perfecit, & consummauit. Rursus Ambrosius: *Hæc est perfectio circumcisionis,*

quia

quia per corporis oblationem redimitur anima, de qua ipse Dominus ait: *Quoniam qui perdiderit animam suam propter me, inueniet eam.* Beati, qui crucis circumcissionem patiuntur, quia crucifixo CHRISTO assimilantur. Nihil in homine reformatione non eget, ac proinde non ita gladio quàm cruce CHRISTI circumcidendus est: gladius quippe partem hominis scindit, crux verò totum hominem capit, affligit atque configit. *Qui sunt CHRISTI, carnem suam crucifixerunt cum vitiis & concupiscentiis.* Lex ista cunctis imponitur & intimatur, circumcisio enim crucis, vt ait Zenon Sermone de Circumcisione, *non sexu, non ætate, non conditione depellitur, sed gloriosa in omnibus reperitur.* Hæc item in IAPONENSIBVS cernitur & spectatur.

Ioan. 12,
25.
Excitatio
laboran-
tis.

Gal. 3, 24.

CRUX IAPONENSIVM, Crux ægrotantium.

VIta quidem humana subiecta gladio est, & in partes illa diuiditur, donec accesserit mors. Cùm iam affixus lecto ægrotus est, vt vitæ suæ imponat finem, subiacet cruci, quæ totam vitam absorbit, totumque hominem abripit, sicut visum est in MARTYRIBVS IAPONIAE, quorum corporeas partes prius gladius abscidit & abstulit. Horum sacrorum MARTYRVVM passio in circumcissione fuit, &

Instrumen-
tum artis
benè mo-
riendi.

*Excitatio
ægotan-
tis.*

etiam in circumcissione consistit sæpè labor hominis ægotantis. Hinc magnum sanctitatis argumentum est si homo ita infirmetur, vt potentior efficiatur; & si infirmus ita circumcidatur, vt maior patientiæ cultor ipse reddatur. Qui seruit in castris CHRISTI, no-uerit sternendam sibi viam ad crucem Domini per tolerantiam mysticæ circumcissionis, vt passionis Dominicæ effectus socius, comes etiam fiat remunerationis, adscriptus catalogo eorum, qui Psalm. 76. loquuntur in hæc verba apud Hieronymum: *Nos filij sub IESV duce venimus, & circumcisi sumus circumcissione spirituali, & ablatum est à nobis opprobrium Ægypti. Nunc ipse IESVS dux noster gladium tenet, & semper nos præcedit, & pugnat pro nobis, & vincit aduersarios. Canimus Sacerdotalibus tubis, & circuimus Iericho, hoc est, istum mundum, & cadunt muri eius, & nos ingredimur, & victores existimus. Vincimus diuina gratia per morbos quos toleramus; triumphamus per gloriosa martyria sociorum, qui sanguinem suum pro CHRISTO & eius nomine profuderunt.*

Leuamen laborantis & ægotantis.

*Virtus sa-
cra Eucha-
ristia.*

R Ex gloriosus punctus est in circumcissione, & facer eius carnis saccus conscissus est in passione, vnde & effusus est thesaurus nostræ redemptionis,

ptionis, cuius beneficij memoria recolitur in altaris Sacramento. Quisquis illum recolit, & more debito sumit, tanti virtute mysterij, siue pungatur morbis, siue morte sacculus corporis penitus conscindatur, insensibilis efficitur; & cum effluit eius spiritus, latus obit, in cælum abit, & in eius dicit in- *Viaticum.*
gressu: *Conscidisti sacculum meum, & circumdediti me* *Plal. 29.*
lætitia. Dum viueret in corporis sacco, anima cir- *12.*
cumdata quoque erat, sed tristitia atque mœrore; sed cum è corpore egreditur, circumcingitur alacritate & lætitia, cuius primitias accipit in Viatico Eucharistiæ, cuius effectus est, desolatam animam consolari & recreare: & eius solatium in morte ipsa non extinguitur, sed accenditur, cum in cælum ascenditur. Quæ sunt terrena gaudia, cum pereunte homine pereunt: quæ verò sunt cælestia atque diuina, qualia Eucharistica sunt, post obitum non tolluntur, non minuuntur, sed augentur.

Gloriosum opus Artis Crucis & patientiæ,
corona aurea & laureola.

MYsticæ vitis palmites sunt gloriosi MARTY- *Honor alit*
RES & CONFESSORES IAPONIAE, quos mi- *artem be-*
ris modis magnus agricola excoluit virtute circum- *nè viuen-*
cisionis. Vnde pulchrè Iustinianus, *di & mo-*
riendi. *Nemo, inquit, in-*

stus, teste Apostolo, ab hac purgatione secernitur. ait enim:

2 Tim. 3, 12. *Omnes, qui piè volunt vivere in CHRISTO, persecutionem patiuntur. Quamobrem conuersis Hebræis & afflictis*

Heb. 12, 8. *dicebat: Quis enim filius, quem non corripiat pater? Quòd si extra disciplinam estis, cuius participes facti sunt omnes; ergo adulteri, & non filij estis. Quanti verò sit meriti hu-*

Heb. 12, 11. *iusmodi purgatio, eisdem intimauit, dicens: Omnis autem disciplina in præsenti quidem non videtur esse gaudiij, sed*

mœroris; postea autem fructum pacatissimum exercitatis per eam reddet iustitiæ. Propter quod remissas manus, & soluta genua erigite, & rectos gressus facite semitis vestris. Esto talis & tu, purgeris à CHRISTO: caue tamen, ne purgatus murmures, & agricola detrahas sapientiæ. Nequaquam dolorem vulneris, sed sanitatis attende dulcedinem. Purgationis incisionem abhorrere noli, si centuplicatum fructum percipere concupiscis.

Laurea circumcissionis spiritalis.

Palme in lecto erat Gallus Episcopus Auernorum, & cùm vi febris ardentis barbam & capillos simul amitteret, spiritu circumcissus, & animo simul serenus & tranquillus,

Extrema verba morientis.


dixit fratribus moriturus: Vale dicimus vobis fratres: & obiit corde & spiritu circumcissus.

Prodeat in publicum spectaculum HIORAMVS Iaponensis; in quo, veluti in speculo, natiuitatis & infirmitatis humanæ forma conspicitur.

EM-




*En populi explodor, placeam vt tibi Christe, catharma.
49. Displiceam: hoc ipsum displicuisse placet.*



ca
lus
Mo
am
cab
scrib
ella
ades
Hac
Mar
grar
sim
mere
meret
ulio
am Di

EMBLEMATICA IMAGO XLIX.

HIORAMI CRVCIFIXI
EXPLICATA.

 IORAMVS senex venerabilis à Rege Iapo- Ex litteris
Iaponicis.
nensi, qui fidem acceptam deseruerat,
Bungi comprehensus cruci adiudicatus
est. De mandato eiusdem Regis cum the-
ca reliquiaria, imagine CHRISTI, & Matris, qui-
bus pium cultum exhibebat, appensus in cruce est.
Moris solet esse in militia, vt cùm quis strangulatur
tamquam rebellionis reus, ad collum eius quædam
tabella appendatur, & in ea culpa defectionis de-
scribatur. Suspenditur HIORAMVS, & ad pectus ta-
bella Matris & Filij apponitur & appenditur, in qua
fides & fidelitas boni senis describitur & innotescit.
Hæc ipsa fides innotuit in monacho Christiano, &
Mariano summo cultore imaginis quæ MARIAM
gestantem suam prolem exprimebat. Hic cùm gra-
uissimè torqueretur à dæmone, & dæmon illi pro-
mitteret se de pœnis ac tormentis remissurum, si re-
mitteret ipse de imaginis cultu & veneratione, ex
consilio Abbatis Theodori constanter respondit: *Do-
minum Deum meum adorabo, & tibi non obediam.* Præces-
ferat

ferat antè cultor Filij simul & Matris fidus ac fidelis senex. Euangelicus ille Simeon, qui cùm Filium simul & Matrem in templo sibi assistere contemplaretur, mortem ipsam non timuit, sed cecinit:

Luc. 2, 29. Nunc dimittis seruum tuum Domine, secundum verbum tuum in pace: quia viderunt oculi mei salutare tuum, quod paraſti ante faciem omnium populorum, lumen ad reuelationem gentium.

*Sympathia
Simeonis
portantis
Christum
& Hiorami,
& utriusque
Artificium.*

Hunc ipsum senem, qui infantem intra vlnas suas accepit, Hioramus in se refert, in captiuitate & libertate, in vita & morte, in cruce & eius felice sorte. Qualis debeat esse mysticus CHRISTI Simeon, vel mysticus Hioramus, declarat Ambrosius lib. 2. in Lucæ cap. 12. *Qui vult dimitti, veniat in templum, veniat in Ierusalem, expectet CHRISTVM Dominum, accipiat in manibus verbum Dei, complectatur velut quibusdam fidei suæ brachiis: tunc dimittetur, ut non videat mortem, qui viderit vitam.* Amplectatur etiam celebres Reliquias Sanctorum, de quibus Basiliius in Psalm. 104. *Quando apud Iudæos moriebantur, abominabilia dicebantur morticinia; quando autem pro CHRISTO quisquam moritur, pretiosæ Reliquiæ Sanctorum eius.*

CRUX HIORAMI, CRUX natiuitatis
humanæ.

NOn immeritò Iobus, cùm misérias humanas Instrumen-
tum artis
benè vi-
uendi. ad summam quamdam reduceret, in capite
posuit, esse natum de muliere mortalem hominem.
Homo natus de muliere (ex quo capite proueniunt & Iob. 1, 1.
procedunt cetera) *brevi viuens tempore, repletur multis
miseriis, quasi flos egreditur & conteritur, & fugit velut
umbra, & numquam in eodem statu permanet.* Miser fi-
lij hominis status, misera conditio, indigna prorsus
æstimatione & fauore. *Quid est homo, quòd memor es* Psal. 8, 5.
eius? aut filius hominis, quoniam visitas eum? Quò
maior miseria est, eò maior crux, sub cuius onere
filius hominis gemit: *Miser factus sum, & curuatus* Psal. 37, 7.
sum usque in finem. Cùm homo tanta sarcina preme-
retur, venit de cælo, natus est de femina Deus, ut Excitatio
laboran-
tis.
filius hominis factus, cum filio hominis crucem hu-
manam portaret. Quid enim Maria CHRISTO nisi
mystica crux extitit, cùm Homilia de Laudibus Vir-
ginis dixerit Epiphanius, thronum simul & crucem
esse? Fuit CHRISTO Maria crux, *extendens enim
sanctas vlnas, Dominum portauit.* Cùm natus de mu-
liere homo grauem suam crucem portat, instar HIO-
RAMI est, nec tamen sine solatio, cùm in sua con-

ditione Deum ipsum habeat socium, ortum de Virgine matre, cui dicere fas est, *IESVM benedictum fructum ventris tui nobis post hoc exilium ostende*. Interim natus de muliere tutum aliquod quærat & petat *refugium. Deus refugium nostrum, & virtus*. In quem locum Basilius: *Homo ob insitam sibi à natura debilitatem pluribus in se rebus tristibus & laboriosis irruentibus multo indiget auxilio, ex omnibus circumstantibus refugium quærens, velut in tutum se recipiens locum ad aliquem acutum verticem, inexpugnabili circumdatum muro, ob inimicorum incursum securum sese munit*. Vertex CHRISTVS est, murus MARIA est.

CRUX HIORAMI, Crux ægrotantis
& extremè laborantis.

Instrumentum artis bene moriendi.

Excitatio ægrotantis.

CVM iaces in lecto æger, sacris Reliquiis munus, mysticus Hioramus es, si CHRISTI & eius Matris opem imploraueris: quam cum impetraueris, primæ natiuitatis tuæ miseras facile effugies. Satis benè Basilius in Psalm. 104. *Sanctorum virorum exitus in hac vita nequaquam plorandus, sed magis genesis, & in hanc vitam ingressus, qui multum secum iniustitiæ sordiumque ac malorum affert, quorum speculum si quis cerneret, viuentium nullus sustinere facile posset*. Offert HIORAMVS ægroto imaginem CHRISTI Domini,

Domini, vt cùm in lecto iacuerit, statim ad illum recurrat; prius ad salutis auctorem, quàm ad medicam artem recursus fiat. Confirmat hoc ipsum Ambrosius lib. i. de Cain & Abel. cap. 10. *Ne videamur de humanis artibus, medendi peritia, herbarumque succis sperare magis remedium, quàm de Deo, ad CHRISTVM prius est confugiendum, qui nostræ curare possit animæ passionēs. Verùm præpostero ordine antè sibi ab hominibus accersant opem: vbi autem humana subsidia defecerunt, tunc opinantur postulandam diuini fauoris gratiam.* Non CHRISTVM solùm, sed etiam sacratissimam Matrem offert ægrotanti H I O R A M V S. Huius virginis opem, cùm extremè laboraret, sensit Reginaldus: adfuit enim ægrotanti ipsa, & in eius comitatu virgines & martyres Cæcilia & Catharina. Rogatur æger quid velleret, & dubius quid responderet, nonnihil substitit. Accessit vna ex comitibus, & monuit: *Nihil certi petas, frater, sed omnia petenda illi committe; siquidem melius illa tibi dare, quod necesse est, nouit, quàm tu poscere.* Acquieuit consilio æger, & se in manus Virginis resignauit. Accepit MARIA oleum, Reginaldum vnxit, & ita conualuit, vt reliquo vitæ tempore nullum inordinatum & inhonestum carnis motum vnquam senserit.

Leuamen laborantis & ægrotantis.

*Virtus sa-
cra Eucha-
ristia.*

REx gloriosus similis sibi est in natiuitate & morte : nudus ex matre nascitur , nudus iuxta matrem moritur , vt humanæ conditionis principium & simul exitum pateretur. Hoc graue Adami iugum , quod idem Dominus virtute sacre Eucharistiæ reddidit dulce satis ac suaue. Reddidit dulce natiuitatem , cùm dicit : *Sicut misit me viuens Pater , & ego viuo propter Patrem , & qui manducat me , ipse viuet propter me.* Fecit exitum humanæ vitæ suaue , cùm addit : *Non sicut manducauerunt patres vestri manna , & mortui sunt. Qui manducat hunc panem , viuet in æternum.* Cùm CHRISTVS nascitur in Bethlehem , panis est , *Hic est panis , qui de cælo descendit : cùm moritur Ierosolymis , panis est.* hinc illa vox : *Mittamus lignum in panem eius.* Venerat in mundum CHRISTVS , vt nostræ natiuitatis , mortalitatis & mortis miseriis mederetur , & earum medicamentum constitutum esse in pane , ostendit & declarauit.

Gloriosum opus Artis Crucis & patientiæ,
corona aurea & laureola.

*Honor alit
artem be-
nè viuendi
& moriendi.*

HAbet ante oculos suos in virginalibus brachiis martyr affixum Cruci Regem martyrum

rum CHRISTVM, qui præt crucifixos & cruciferos
 passione & admonitione, *Qui vult post me venire, Luc 9, 23.*
abneget semetipsum, & tollat crucem suam quotidie, &
sequatur me. Præuiderat hoc ipsum mysterium Da-
 uid, cùm Psalm. 90. cecinit, *Scapulis suis obumbrabit*
tibi, & sub pennis eius sperabis. Mysterium obumbra-
 tionis declarat in hæc verba Basilii: *Erit enim pro-*
pugnator tuus, protegetque te, vbi impugnaberis. Posuit
autem hoc ex eorum metaphora, qui in bellis primi instant
in acie, ac scapulis suis eos, qui à tergo sunt, protegunt.
 Nec dubium, quin in acie crucis & mortis primi
 steterint CHRISTVS & MARIA vnici ac singulares
 protectores crucifixorum & cruciferorum, quorum
 vnus extitit H I O R A M V S suspensus cum imagine
 Matris & Filij, sacrisque Reliquiis Sanctorum, qui
 primi etiam in certamine steterunt & vicerunt.

Ergo quisquis ab ortu suo vsque ad metam fixam
 vitæ grauissimam crucem portat, & in acie consti-
 tutus semper pugnat & decertat, consideret ante se
 CHRISTVM, MARIAM & Sanctos, à quibus in
 certamine obumbratur protectione, patrociniis &
 subsidiis, vt quos sequitur in pugna, subsequatur in
 victoria, in gloria palmæ & coronæ, quæ debetur
 non in stadio solum certantibus, sed etiam in lecto
 diabolum superantibus. *Laureola*
vieta hu-
manitatis. Superauit tantum hostem

*Extrema
verba mo-
rientis.*

lecto affixus Richardus Episcopus Cicestrensis, qui moriturus dicebat creatori Deo: *In manus tuas com-
mendo spiritum meum*, & simul Matri:

Maria mater gratia,

Mater misericordia,

Tu nos ab hoste protege,

Et hora mortis suscipe:

præcepit insuper adstantibus ministris, vt ea verba ad eius aures pronuntiare non cessarent. Accedat & Eleazarus Comes, qui cùm esset in extremis, & luctaretur cùm hostibus, inquit: *Magna est demonum vis, sed eam penitus eneruarunt mysteria sacrosanctæ Incarnationis & passionis IESV CHRISTI.*

Prodeat in publicum spectaculum ALFONSVS CASTRIVS è Societate IESV, speculum & forma Sociorum IESV laborantium & ægrotantium.



I decus, i nostrum, tot ponti emense pericla
50. Classibus; hac melius sidera puppe petes.

EMBLEMATICA IMAGO L.
ALPHONSI CASTRII CRVCIFIXI
EXPLICATA.

ALPHONSVS CASTRIVS, natione Lusitanus, dignitate Sacerdos, Religiosus è Societate IESV, ad Malucas insulas propter fidem CHRISTI à Mauris captus, naui affixus in formam crucis, capite tandem cæsus, portum in cælo cepit. ALPHONSVS noster in ipso portu vitæ iacturam fecit, prosperè tamen nauigauit, & saluus emerfit. Qui perdiderit animam suam in mundano pelago, haud dubiè in portu cæli eam inueniet. Quid naui cum cruce? Augustinus lib. I. de Verbis Domini Serm. 54. *Quando Rex aliquis impie voluntatis, maximæque potestatis, persecutionem indicit Ecclesiæ, quantum in ipso est, Christianum nomen conatur extinguere; super nauiculam CHRISTI grandis unda consurgit, sed in iis tentationibus erigitur antenna, ut suspensa arbori crucem figuret. Hanc Christianus respiciat, ut non deficiat. Huic antennæ, id est, cruci CHRISTI, simplex conuersatio, & pura confessio, tamquam cadentia vela religentur, & hæc vela nostra fluctibus abluantur, ut sine macula & ruga inueniantur. Quid cruci cum*

Historia Indic. Maffeus;

Sympathia naui & crucis Christi, & vtriusque Artificium.

M m m naue?

naue? Ambrosius Serm. 66. *Arbor quædam in naui est crux in Ecclesia.* Suspenditur in arbore CHRISTVS, suspenditur Socius eius ALPHONSVS, socius passionis, vt sit consolationis comes, iuxta oraculum Pauli 2. Corinth. 1. *Scientes quoniam sicuti socij passionum estis, sic eritis et consolationis.*

CRUX ALPHONSI crucifixi, Crux
Sociorum IESV.

*Instrumen-
tum artis
benè vi-
uendi.
Matth. 5,
13.*

Socij CHRISTI sunt, quibus conuenit illa vox, *Vos estis sal terræ.* Accedit Chrysostomus Homilia 15. in Matth. *Attendite, quid dixerit, Vos estis sal terræ, per quod ostendit, quàm necessariò ista præcipiat. Non enim pro vestra, inquit, tantùm salute, sed pro vniuerso orbe vobis certamen erit, &c.* Hic finis vocationis eorum, quos in suam Societatem CHRISTVS adsciuit, vt propriæ saluti attendentes, & alienam quoque curantes, totum peragrent mundum, totum pelagus tra-
nent. Benè nauigant IESV Socij, *benè nauigant*, vt ait Ambrosius in Psalm. 47. *qui in nauibus CHRISTI crucem sicut arborem præferunt, atque inde explorant flabra ventorum, vt corpora sua dirigant ad sancti Spiritus gratiam in ligno Domini tuti atque securi, nec permittunt naues suas vago fluctu errare per maria, sed ad portum salutis, & ad consummationem gratiæ cursus suos dirigere contendunt,*

*Excitatio
laboran-
tis.*

tendunt, vt fida statione potiantur, quo dissoluti cursus suos possint in resurrectione reparare, vbi naufragium timere non possint. Et nos igitur circumspicemus hanc gratiam, speculatores eius simus, exploremus eam, vt fiant corpora nostra naues Tharsis. Tunc enim caro ad seruitutem redigitur, cum ad Dei intendimus gratiam, vt id quod amarum ad tempus sit, non quod dulce & voluptarium sequamur.

CRUX ALPHONSI crucifixi, Crux
ægotantis.

NAues Tharsis corpora nostra sunt. Nauigat in corpore homo, & cum benè habet, expansis velis in sæculi mari nauigat; cum morbum lethalem contrahit, tempus iam esse vela vitæ contrahendi, in sua effigie exprimit & ostendit ALPHONSVS. Contrahebat vela Paulus, cum vastum emensus mare fuisset, & appellens iam ad portum dicebat: Ego enim iam delibor, & tempus resolutionis meæ instat. Bonum certamen certavi, cursum consummaui, fidem seruaui. Non renuit ALPHONSVS pati, qui totum nauigauit mare, nec exire recusauit, qui vela in portu contraxit. Diuersus omnino erat à monacho quodam ægro, quem libro de Mortalitate proponit S. Cyprianus. Cum quidam de collegis, inquit, & consacerdotibus nostris iam in infirmitate defessus, atque de appropinquante

*Instrumen-
tum artis
benè mo-
riendi.*

*1. Tim. 4.
6.*

*Excitatio
ægotan-
tis.*

morte sollicitus commeatum sibi precaretur, adstitit deprecanti iuuenis honore & maiestate venerabilis, statura excelsus, & clarus aspectu, & quem assistentem sibi vix posset humanus aspectus oculis carnalibus intueri, nisi quòd talem videre iam poterat de sæculo recessurus. Atque ille non sine quadam animi ac vocis indignatione infremuit, & dixit: Pati timetis, exire non vultis, quid faciam vobis? Pulchrum satis exemplum, cuius lectione mirum in modum recreatum fuisse S. Augustinum, in eius Vita memorat Possidonius. Habes in vno ALPHONSO & eius effigie formam, quam in ægro CHRISTVS optabat, vt & dicas cum Terefia, & ipsa quidem infirma, *Aut mori, aut pati.* Dicas appellens ad portum cum Ludouico Episcopo Caroli II. Regis Siciliae filio, *Ego morior, & gaudeo quasi terram videns, venturusque in portum ex longa nauigatione huius vasti & indomiti maris, quod mihi diu in votis fuit.*

Leuamen laborantis & ægrotantis.

*Virtus sacra Eu-
charistia.*

*Malach. I.
II.*

Felix vitæ Religiosæ nauigatio, quæ desinit in IESV nomen, in cuius exaltationem ipsa sacra Eucharistia condita est. *Ab ortu enim vsque ad occasum magnum est nomen meum in gentibus; & in omni loco sacrificatur & offertur nomini meo oblatio munda: quia magnum est nomen meum in gentibus, dicit Dominus exercituum.*

Ab

Ab ortu vsque ad occasum magnum est hoc Sacramentum, ab ortu scilicet hominis, ad eius occasum, in quo post vitæ nauigationem optatum portum ingreditur. Appellentem iam ad portum, & accipientem Eucharisticum Viaticum, faustis suis clamoribus *viaticum.* & acclamationibus Serm. de Euchar. sequitur ac prosequitur Iustinianus. *Protegant, inquit, te sancta mysteria, & inter medios sæculi fluctus ante mystici Pharaonis faciem gradiëris illæsus: illum itaque in intellectu pelago suffocatum adspicias constitutus in littore. Tunc lætitiæ initiato carmine, magna cordis cum exultatione clamabis: Cantemus Domino, gloriosè enim magnificatus est, Exod. 15, equum & ascensorem proiecit in mare. Proiecit per Crucem, proiecit per Eucharistiam: vnā & alteram colit in altari Sacerdos, de Pharaone agens solemnem triumphum; vnā & alteram velit sibi, veneretur & teneat ægrotus, qui affixus iacet in lecto, & simul augustissimum nomen IESV, cuius socius est, imploret, vt suam victoriam perfectam & consummatam agat pariter & celebret.*

Gloriosum opus Artis Crucis & patientiæ,
corona aurea & laureola.

Quotquot è Societate IESV crucem ferunt, nauigant simul cum CHRISTO, in eadem naue cer- *Honor alie
artem be-
nè viuendi
& moriendi.*

tant & triumphant, viui Martyres habiti, quorum Abbas Piamon apud Cassiánum collat. 18. cap. 7. facit honorificam mentionem : *Illos patientia atque districtio, qui tam deuotè in hac, quam semel acceperunt professione, perdurant, vt numquam suas expleant voluntates, crucifixos quotidie huic mundo, viuosque Martyres facit.* Viui Martyres focij IESV euaserunt Maria, Ioannes & Magdalena, quorum sanguis effusus non est, sed finis eorum trium dignus corona & laureola in lecto gloriosus fuit, vt dixerit decedens Maria, *Fulcite me floribus, stipate me malis, quia amore langueo.* dixerit Magdalena : *In lectulo meo per noctes quasiui quem diligit anima mea.* & dicere potuerit Ioannes : *Lectulus noster floridus.* Lectus dolorum, lectus florum est ei, qui veniens ad portum nauigationis suæ vsurpat extrema verba Archiepiscopi Dunstani : *Ipse benignus Deus, qui direxit iter meum ad se, dirigat ad omnem voluntatem suam corda & corpora vestra in pace.*

*Laureola
Sociorum
IESV.
Cant. 2, 5.*

Cant. 3, 1.

Cant. 1, 16.

*Extrema
verba morientis.*

Prodeat in publicum spectaculum VENERABILIS SACERDOS crucifixus; in quo, veluti in speculo, ferentis hæreticam prauitatem & infirmitatem forma conspicitur.



51. *Ne fors sim nimium tibi vilis Rector olympi
Victima, me Nati nobilitabit honos.*

EMBLEMATICA IMAGOLI.
SACERDOTIS CRVCIFIXI
EXPLICATA.

HAERETICI in Gallia per ludibrium VENE-
RABILEM SACERDOTEM compulerunt, Theat. cruce-
delit. nostri
temporis.
vt in vrbe Houdam, diœcesis Carthonen-
sis, solemnia Missæ perageret. Dum cele-
braret, faciem eius manibus verberarunt, & corpus
pugionibus perfoderunt, ac denique super ligneam
crucifixi CHRISTI imaginem ipsum affixum, sclo-
petis suis traiecerunt. Verus Regis gloriosi & eius
imaginis cultor, & quidem in eam formam, quam
præscripsit Carolo Magno Gregorius Pontifex II. à
quo imaginem CHRISTI Domini petierat. *Scimus,*
inquit, quia tu imaginem Seruatoris nostri ideò non petis,
vt pro Deo aut quasi Deum colas, sed ob recordationem
Filij Dei, vt in eius amore recalescas, cuius tu imaginem
videre desideras. Et nos quidem, non quasi ante diuinita-
tem, ante illam prosternimur, sed illum adoramus, quem
per imaginem, aut natum, aut passum, aut in throno seden-
tem recordamur. Et dum nos illa pictura, quasi scriptura,
ad memoriam Filij Dei reducit, animum nostrum de resur-
rectione latificat, aut de passione demulcet. Crucifixores
Nnn VENE-

*Sympathia
Christi &
Sacerdotis
Artificum
tolerantia
circa here-
ticos.*

*Gal. 2, 16.
Rom. 6, 5.*

VENERABILIS SACERDOTIS iconomachi erant, & in despectum iconis CHRISTI, & eius ministri qui sacram colebat imaginem, & propterea idololatram impudenter nominabant, affixerunt illum imagini crucifixi, cuius amor pectus eius accendebat, passio mulcebat. Dignus altari SACERDOS, cui verè dicere licet: CHRISTO *confixus sum cruci*. Dignus gloria Sacerdotali, cui fas est gloriari: *Si enim complantati facti sumus similitudini mortis eius, simul & resurrectionis erimus; hoc scientes, quia vetus homo noster simul crucifixus est, vt destruat corpus peccati, & ultra non seruiamus peccato.* Manus crucifigentium CHRISTO famulatae sunt crucifixo, vt sacrificium suum in cruce ageret & perficeret: ministrarunt quoque VENERABILI SACERDOTI, vt in corpore suo, quæ deerant CHRISTI passionibus, in cruce ipse compleret, & crucifixus compleuit. Hoc sacrosanctum officium, hoc munus Sacerdotum est, sic in altari seruire, sic ministrare, vt CHRISTI personam gerant, & per oblationem sui CHRISTO crucifixo adhæreant. Qui personam Regis gerit, refert & ipsum Regem; & qui vices CHRISTI agit, debet ipsi assimilari. Crucifixores CHRISTI, qualis CHRISTVS, quales quoque & ipsi essent, facto suo declararunt: & sacrilegi Galliae haeretici, quales Sacerdotes, qua-

les etiam ipsi forent, ostenderunt. Ostendit quoque Paulus cap. 6. ad Hebræos: *Impossibile est enim, eos qui semel sunt illuminati, gustauerunt etiam donum caeleste, & participes facti sunt Spiritus sancti, gustauerunt nihilominus bonum Dei verbum, virtutesque sæculi venturi, & prolapsi sunt; rursus renouari ad pœnitentiam, rursum crucifigentes sibi metipsis Filium Dei, & ostentui habentes.*

CRUX CRUCIFIXI SACERDOTIS, CRUX ferentis hæreticos.

BENÈ Augustinus lib. 3. de Verbis Domini, Ser- Instrumen-
tum artis
benè vi-
uendi.
mone 8. *Hæretici comparate vos Judæis: illi con-
tempserunt CHRISTVM pendentem in ligno, vos con-
temnitis sedentem in calo: illis suggerentibus stetit titulus
CHRISTI, vobis instantibus deletur Baptismus CHRI-
STI. Magna crux hæreticorum CHRISTO & eius
ministris incumbit. Qualis illa sit, ostendit idem
Augustinus lib. 16. de Ciuitate Dei cap. 2. Callidum est
genus hæreticorum, non spiritu sapientiæ, sed versipellis
astutiæ, quo solent hæreticorum feruere præcordia, & pa-
cem conturbare Sanctorum; sed hæc in vsum cedunt profi- Excitatio
laboran-
tis.
cientium, iuxta illud Apostoli: Oportet esse hæreses, ut
probatu manifesti fiant in vobis, unde etiam scriptum est: I. COR. II,
19.
*Filius eruditus sapiens erit, impudenti autem ministro vte-
tur. Nec sunt, nec possunt esse impudentiores mi-**

nistri, quàm illi ipsi, quorum manus famulatæ sunt Redemptori. Sapiens Dei Filius eorum ministerio vsus, sacrificium suum peregit, quod & nunc Sacerdotes in altaribus suis conficiunt. Confecit VENERABILIS iste SACERDOS, & sacrum suum in ara crucis perfecit, qui filij sapientis instar impudentibus ministris vsus est. Impudentes certè hæretici tam in CHRISTVM mortuum in cruce, quàm in Reliquias Sancti huius SACERDOTIS, qui eidem CHRISTO commoritur, & mundus obit. *Ante hoc tempus, vt notat Basilii in Psalm. i. dictum est Sacerdotibus; Non contaminabitur super aliquo mortuo; nunc autem felicitate nominis Christiani, & Dei nostri ac Seruatoris nostri IESV CHRISTI munificentia quicumque Martyres eius attigerit, illius iustitiæ sanctitatisque quodammodò particeps, ob gratiam ex eorum corporibus procedentem, efficitur.*

CRUX crucifixi SACERDOTIS, CRUX
ægrotantis.

*Instrumen-
tum artis
benè mo-
riendi.*

NOs omnes genus electum, regale Sacerdotium sumus: nostræ igitur memores conditionis sub quodam Sacerdotio seruiamus, adhærentes crucifixo, vt vnusquisque nostrum in lecto iacens dicere possit cum Paulo: CHRISTO confixus sum cruci. Non

Gal. 2, 16.

Non sine causa crucifixi imago ægrotantibus exhibetur: ideò porrigitur, vt communicantes CHRISTI passionibus, adhæreant CHRISTO patienti, & eius exemplo ad tolerantiam ægritudinis excitentur. Confirmat hoc ipsum Gregorius 3. Parte Pastoralis, admonit. cap. 3. *Admonendi*, inquit, *sunt ægri, quatenus patientiæ virtutem seruent, vt incessanter, quanta* Excitatio
ægrotan-
tis.
Redemptor noster ab iis, quos creauerat, pertulit mala, considerent. Considerent in effigie conditionem suam: venerabiles Sacerdotes, qui CHRISTO crucifixo debent esse arctè & strictè coniuncti. Vnde sacra virgo Elisabetha moritura, iam è lecto adstantes sibi Sacerdotes monens officij sui, Vestrum est, inquit, dilectissimo Domino vos exhibere familiares magis ceteris hominibus, per bonam conuersationem, & sanctum ministerium vestrum, quatenus in regno suo post hanc vitam sibi familiaris vos iungat. Huic Domino Crucifixo ita se Bernardus adiunxit & adstrinxit, vt cum iam in extremis esset, & Sacerdotium absolueret, fuerit in hanc sententiam locutus: Fateor, non sum dignus ego, nec possum propriis meritis regnum obtinere calorum: ceterum duplici iure illud obtinens Dominus meus, hereditate scilicet Patris, & merito passionis: altero ipse contentus, alterum mihi donat, ex cuius dono illud mihi vendicans non confundor. Hoc ius crucis & passionis est,

Nnn 3 quod

Eccli. 38,
28.

quod tenet ac possidet VENERABILIS iste SACERDOS, & qui eodem dono & priuilegio frui desiderat, *Cor suum dabit in similitudinem picturæ*, & iacens in lecto æger non solum adhærebit, sed etiam crucifixo CHRISTO inhærebit, vt feliciter decedat. Teste enim Basilio in Psalm. 33. *Qui cum CHRISTO simul moriuntur, in bona sunt morte.*

Leuâmen laborantis & ægrotantis.

Virtus sacra Eucharistia.

REx gloriosus hominem, quem assumpserat, secum in crucem euexit, & Patri sacrificauit, & vt Sacrificium conficeret, vocatus à Deo est tamquam Aaron. Idem ipse secundum ordinem Melchisedech factus Sacerdos, panem & vinum obtulit, & præbuit seipsum edendum, qui & dixit: Ioan. 6, 57. *Qui manducat meam Carnem, & bibit meum Sanguinem in me manet, & ego in illo.* Felix, & satis felix SACERDOS, qui simul in cruce & lecto, in altari & sacrificio cum Rege glorioso manet, ac dicit, Rom. 8, 35. *Quis nos separabit à charitate CHRISTI?* Hic arctus & strictus nexus diuini amoris componitur & connectitur, operante venerabili Sacramento, quemadmodum aduertit & monet S. Laurentius Iustinianus cap. 19. Monastic. perfect. *Pia mens, inquit, tanti sponsi letificata præsentia venerando hoc mediante Sacramento reple-*
tur

tur gaudio, exultatione perfunditur, humilitate deicitur,
lumine irradiatur, pace satiatur, roboratur fide, deuotione
saginatur, atque indissolubili amoris vinculo Redemptori
interius copulatur. Hæc copula tunc perficitur, cum *viaticum*.
anima munita Viatico in cælum assumitur.

Gloriosum opus Artis Crucis & patientiæ,
corona aurea & laureola.

BEnè sancta mater Ecclesia canit de glorioso *Honor alit*
Martino: O beatum Pontificum, qui totis visceribus *artem be-*
diligebat CHRISTVM Regem, & non formidabat imperij *nè viuen-*
principatum! ô sanctissima anima, quam etsi gladius perse- *di & mo-*
cutoris non abstulit, palmam tamen martyrij non amisit! *riendi.*
Accedit Iustinianus Sermone de S. Martino: Quomo-
do martyrij gloriam ipsum non habere censendum est, qui
flagrans amore martyrij pro fidei testificatione Catholicæ ter-
renorum principum nec expauit potentiam, nec hæretico-
rum seuitiæ cessit, quin constanter veritatis propalaret re-
gulam, eorumque confutaret errores. Toties igitur martyrij
promeruit palmam, quoties se inimicis fidei disputando op-
posuit. Sapienter Deus prouidit in gratiam propugna-
torum fidei, vt licet proprium sanguinem non fun-
derent, Martyres esse possent, quoties pro veritate *Laurea*
pugnarent, corona aurea & laureola decertarent, qui- *propugna-*
bus effecti victores, in cælis ornarentur & illustra- *ta hæresis.*
rentur.

rentur. Ergo cùm hæretici fraudulentè abstinere volunt à sanguine, ne numerum augeant Martyrum, seipfos planè decipiunt, quandoquidem incruentum est martyrium, eorum errores conuellere, & insanias refutare. Toties debetur palma & corona, quoties propugnatores fidei hostibus veritatis opponunt se fortiter, & animosè aduersantur. Non augent numerum Martyrum crucifixorum, sed implent catalogum cruciferorum, zelantium videlicet ministrorum, imitatorum gloriosissimi Martini, cuius elogium concludit in hæc verba Iustinianus : *Meritò itaque sancto huic Martyri non est deneganda corona, qui Ecclesiarum curam gerens, ac proximorum salutem zelans, nec mori timuit, nec viuere recusauit. Vixerat cum CHRISTO, & cum CHRISTO mortuus est, sicut & Herulus martyr, qui ligno affixus dicebat : Esto mihi adiutor Domine, & Redemptor. cui CHRISTVS : Noli timere; sum enim tecum, & Deus tuus ego sum.*

*Extrema
verba morientis.*

Prodeat in publicum spectaculum PETRVS HELCIVS crucifixus; in quo, veluti in speculo, ferentis repulsam & morbum forma conspicitur.



52. *Nouit amor mutas in verba resolvere fauces.
I nunc, et linguam velle profana cohors.*

Ooo

EMBLEMATICA IMAGO LII.
 PETRI HELCII CRVCIFIXI
 EXPLICATA.

MAROCCI in Africa PETRVS HELCIVS Histor.
Indic. Madritanus hortatus est Mauritanos, vt partes CHRISTI sectarentur, & eos qui semel à fide Christiana defecerunt, ad primam fidem redirent. Quam ob causam captus est, & iussu Regis vrgente, linguâ auulsâ, pro valuis portæ in formam crucis affixus, animosè caput dedit, vt ferreo clauo traiceretur. Extractus è capite clauus gutturi infixus est: cumque ne gutta quidem sanguinis è vulneribus antè fluxisset, effluxit deinde, & tinctâ sanguine portâ, mundum reliquit. Cùm homo in angustias eas reducitur, vt aditus querelis non pateat, sed ex omni parte via interceptiatur & claudatur, laboriosa satis crux est. Hanc crucem passus est Iobus, cùm iustis querelis familiares aures claudebant. Hæc crux, quam tulit Iosephus, cùm eius deprecationibus sæui fratres non attenderent, & cùm esset in Ægypto captus, nec sui domini nec Regis gratas sibi aures impetraret. Ad has angustias redacta erat Susanna, cùm,

Ooo 2

clau-

clauso pomario , nemo esset qui eius voces exciperet , diceretque proinde , *Angustia sunt mihi undique*,
 Dan. 13, 12. *Sympathia Christi & Petri Helicij Artificum tolerata repulsa.* CHRISTVS quoque ipse in porta & extra portam passus est , è cruce clamabat , & tamen non audiebatur. Clamavit non tam voce linguæ quàm sanguinis , cuius vocem nemo adimere queat , licet adimere linguam , imò & ipsam vitam auferre possit. Potuit Maroci Rex euellere PETRI linguam , ne verba formaret , efficere tamen non potuit , ne eius sanguis effusus ad portam , cui confixus erat , clamaret Deo , cuius ianuæ omnibus facilè patent. *Semper porta Domini* , vt ait agens de Patientia Ephræm , *cunctis patet hominibus , paruis simul & magnis.*

CRUX PETRI MADRITANI crucifixi,
 Crux datæ repulsæ.

Instrumentum artis benè viuendi. NOUERAT Rex Salomon , quanta crux ista esset ; & vt eius onus indicaret , dixit cap. 9. Ecclesiastæ : *Ciuitas parua , & pauci in ea viri : Venit contra eam Rex magnus , & vallauit eam , exstruxitque munitiones , inuentusque est in ea vir pauper & sapiens , & liberauit urbem istam per sapientiam suam , & nullus deinceps recordatus est hominis illius pauperis . Et dicebam ego , meliorem esse sapientiam fortitudine . Quomodo ergo sapientia pauperis contempta est , & verba eius non sunt audita?*

audita? Inter summos illos labores, quibus mundus repletus est, vnus & præcipuus est, quòd monita sapientum à Principibus non audiantur. Erat ad fores palatij Mardochæus, & cùm graciosus Aman multum posset apud suum Assuerum, omnem portam obserauit, ne Mardochæi totiusque populi Hebræorum clamores ad aures Regis venirent. Verùm ^{Excitatio laborantis.} enimuerò non est prudentia, non est consilium contra Dominum, qui nouit iustis querelis aditum ac portas aperire. Dedit Estheræ Reginae accessum, coram Rege expostulauit, postulauit caput gratiosi, qui malorum caput fuerat, & impetrauit. Interim dum sanguis pauperum clamat, & clamores in palatio non audiuntur, crucem patitur Mardochæus, patitur & HELCIVS MADRITANVS. Secùs faciebat olim Alexander, cuius & exemplo & testimonio vtitur Basilii Epist. 54. *Audiuisse quidem non negamus, negamus quidem Timotheum esse, qui calumnias in te fabricauerit. Cùm autem omnino audiuerimus, si nihil aliud, vel illud saltem Alexandri dicemus, Alteram auriculam delato illibatam ac sinceram conseruamus.*

CRUX PETRI crucifixi, Crux ægrotantis.

HAnc crucem patitur æger, cùm iustè queritur, nemo tamen audit aut credit. Recurrendum ^{Instrumentum artis bene moriendi.}

dum tunc ad Deum, cuius aures attentæ & intentæ sunt clamoribus ægrotorum. Testatur ipse qui dicit,

Psal. 90,
15.

Clamabit ad me, & ego exaudiam eum. Benè Ephræm

Discept. de Patient. ait: *Quid hoc beatius, quàm consequi talis Regis beneuolas aures?* Clamauit Ezechias

æger, qui conuertit ad parietem faciem suam, & per murum clausum, obseratum & obstructum vo-

Excitatio
ægrotan-
tis.

Isai. 38, 21.

ces suas intromisit, & illas Deus excepit. Excipiet & tuas, si dicas cum Ezechia: *Sicut pullus hirundinis sic*

clamabo, meditabor ut columba. Quamuis Rex ille Ezechias multos haberet ministros, multos Medi-

cos, solum confugit ad Deum, & solum Deum consuluit, vt diuino eius fauore sanatus, & à morbo re-

creatus, soli Deo pro valetudine sua ageret & haberet gratias. Eapropter non semel, sed sæpè Deus

claudit suas portas, & vias intercludit humanas pro adipiscenda salute, vt necessitate ductus, & etiam

coactus ægrotus, recursum ad Deum habeat, cui post acceptæ valetudinis beneficium gratus existat.

Ad Regis illius exemplar componat se æger, & quidem sic monet in Asceticis Basilii: *Quemadmodum*

Isai. 38, 21.

Ezechias massam ficorum non primam duxit sanitatis sue causam, neque curandi corporis rationem illi tribuit, sed

gloriæ Dei, qui ficos condidit, gratiarum actionem obtulit: ita & nos plagas à Deo recipientes, qui benè & pru-

denter

denter vitam nostram moderatur, principio quidem inquiramus cognitionem rationis ob quam nos flagellet, deinde & liberationem à doloribus & patientiam, & præterea ut tentationi præbeat exitum, ut tolerantes esse possimus: datam verò medicandi gratiam siue per oleum vino mixtum, ut in eo qui inciderat in latrones; siue per ficos, ut in Ezechia, grato animo suscipiamus. Reddita ergo sibi sanitate, in Ecclesia referat æger actionem gratiarum, more Ezechia Regis, imitator crucifixi PETRI, cuius ut inhæreat vestigiis, pro foribus stabit, & cor suum dabit in similitudinem picturæ. Quod si statio vitæ deferenda sit, oret sicut moriturus iam, & stans pro foribus orauit Eligius, cuius meminit Surius: *Suscipe me secundum magnam misericordiam tuam, & non confundas me ab expectatione mea. Aperi mihi pro-* Eccli. 38,
28.
peranti portas tuas.

Leuamen laborantis & ægrotantis.

Rex gloriosus extra portam passus est, repul- Virtus sa-
cra Eucha-
ristia.
sus quidem à Proceribus Hebræorum, quibus monita salutis dabat, & cui portas suas clauferat humana potentia: statim ianuas suas diuina omnipotia aperuit; vnde mandatur cælestibus potestatibus.

Attollite portas, principes, vestras, & eleuamini portæ Psal. 23, 7.
æternales, & introibit Rex gloriæ. Ergo qui in porta

patitur,

patitur, & in ea repulsam subiit, soletur seipsum, & cælos apertos consideret, qui patent dignè & piè communicantibus. Huc alludens præscius cecinit olim David: *Januas cæli aperuit Dominus, & pluit illis manna ad manducandum.* Hinc Gregorius lib.4. Dialog. cap.58. *Quis fidelium habere dubium possit, in ipsa immolationis hora cælos aperiri, choros Angelorum adesse?* Repulsus Stephanus vidit cælos apertos, & IESVM stantem à dextris virtutis Dei, & virtute eiusdem fauoris *obdormiuit in Domino.* Qui pellitur iam ex mundo, & accipit Eucharistiam, eundem sub *Viaticum.* cidentibus CHRISTVM Dominum consideret, vt sacræ virtute Communionis in Domino quiescat, pieque ac sanctè dormiat, & somno tranquillo fruatur.

Gloriosum opus Artis Crucis & patientiæ,
corona aurea & laureola.

*Honor alit
artem be-
nè viuen-
di & mo-
riendi.*

LAzarus pauper ad ianuam avari diuitis erat, & cum tantum vlcerum & vulnerum martyrium patientissimè perferret, maior crux erat afflicto in necessitate extrema cum clamor non audiretur, & iusta eius petitio repelleretur. Paulò post mutatæ sunt rerum vices, quando simul repellentem & repulsum mors arripuit, & locis suis ambos addixit. Repulsus Lazarus, in sinum Abrahæ deportatus manibus

nibus & plausibus Angelorum ; diues verò purpurarius & simul avarus, in tartara deturbatus : vbi cùm à sancto Patriarcha vnā exposceret guttam aquæ, est passus semel repulsam, & iterum, cùm rogaret, vt nuntium mitteret, qui fratres de statu suo moneret, & cauere sibi à pœnis & tormentis inferorum iuberet.

Ergo qui patitur nunc repulsam, exemplo Lazari se soletur, & speret intra aulam Dei aliquando recipiendum, qua exulant tyrannicè repellentes, repulsi verò patientes in ea honorantur & coronantur. Meminerit gloriosi martyris Stephani, qui cùm à contribulibus suis expelleretur, vidit sursum gloriam Dei, & exclamauit, *Ecce video celos apertos*, & AG. 7. 56.
 IESVM stantem à dextris virtutis Dei. Cælestes videt ianuas, habet & portas apertas, qui clausas sibi hîc fores tolerat patienter. Expectat ad ianuam CHRI- Laurea repulsa.
 STVS, vt venientem cruciferum suum excipiat, honoret, & coronet virum, quem expulit à se mundus. Cùm è mundo expelleretur Longinus Centurio, monuit socios : *Jam aperta est porta quæ est in cæ-* Extrema verba morientis.
lis, & Angeli sunt nostras accepturi animas, & oblatu-
ri Filio vnigenito. Ecce & lampades video, & apparent
mihi brauia, cum quibus sistendi sumus ad iudicis tri-
bunal.

PRodeant modò in publicum spectaculum sacri Tyrones , siue Pueri honorarij gloriosi Regis : de quibus Rex ipse ait : *Confiteor tibi , Pater , Domine cali & terræ , quia abscondisti hæc à sapientibus , & prudentibus , & reuelasti ea paruulis.* Matth. II, 25.

Prodeat verò omnium primus SIMON, paruum speculum mysticæ resurrectionis, & patientiæ ægrotantis.

In speculo paruo imagines parue videntur, quia pro modo speculi videntur. S. Augustinus libro de Quantitate animæ.



53. *Paruule, quem dulci raptauit ab vbere tortor,
I nunc, cælesti nectare pelle sitim.*

EMBLEMATICA IMAGO LIII.

S. SIMONIS PVERI CRVCIFIXI

EXPLICATA.

SANCTVS SIMON puerulus Tridentinus, Surius in Martio. Martyrol. trigesimo ætatis mense nondum completo, captus & raptus à Iudæis est, vt victima Paschalis immolaretur. Ergo in ipso Paschatis die à Rabbi Moyse nudatur vestibus, circumciditur, crucifigitur, & stylis ferreis infantulus circumfoditur. Cùm esset iam in extremis, & extremum spiritum emitteret, oculos in cælum extulit, & mundam simul animam efflauit. *Quem docebit* Isai. 28. 9. *scientiam? & quem intelligere faciet auditum? ab lactatos à lacte, auulsos ab vberibus.* Crucis scientiâ & intelligentiâ SIMON ab vtero materno raptus instruitur & imbuitur, instruit & imbuit nos, vt mysteria passionis CHRISTI, & simul resurrectionis expendamus. Prouidit nobis Deus de agnello isto Paschali, Sympathia Christi & Simonis Artificum mystica resurrectionis. qui corde tactus, tangat & corda nostra, dicatque cum Augustino lib. 4. de Ciuitate Dei: *Considerate ergo diligenter ineffabilis viscera pietatis, perpendite immensum & inuestigabile pondus diuinæ charitatis: quia in rebus humanis inuenire non poterat pretium nostræ redem-*

ptionis, Redemptor noster seipsum obtulit Patri pro nobis hostiam in odorem suauitatis: sic ipse factus est Sacerdos, & Sacrificium, ipse Redemptor, & pretium. Audistis nunc reparationis nostræ mirabile sacramentum, audite etiam salutis nostræ opportunum valdè consilium. Tradidit seipsum pro nobis ad mortem, mortificemus & nos eius amore omnem in nobis terrenæ concupiscentiæ voluntatem.

CRUX SIMONIS, Crux mysticæ
resurrectionis.

*Instrumentum artis
benè viuendi.*

PVeri suapte ingenio rudes indigent Catechismo, sed sapiens SIMON Ioannem Baptistam refert, in cuius elogium modulatus est Zacharias: *Luc. 1, 76.* Et tu puer, Propheta Altissimi vocaberis, præibis enim ante faciem Domini parare vias eius, ad dandam scientiam salutis plebi eius. Non tam ad discendam, quàm ad dicendam scientiam infantulus crucem ascendit, ex qua tamquam ex cathedra mysticæ resurrectionis mysterium declarat. Ergo in sancto Paschatis die, cum puram efflaret animam, extulit in altum oculos, & puer nos catechizans monuit: *Coloss. 3, 1.* Si consurrexistis cum CHRISTO, quæ sursum sunt quarite, quæ sursum sunt sapite, non quæ super terram. Hæc mystica mentis nostræ resurrectio fieri nequit, nisi crucem feramus pro CHRISTO, & simul cum CHRISTO, qui vel in
sua

fua resurrectione crucem in manu gestans describitur. Succurrit Augustinus lib.2. de Diuin. inquisit. cap.4. *Quantò magis CHRISTO appropinquat affectu pietatis, tantò magis exterior homo corrumpitur: sed interior* ^{Excitatio laborantis.} *renouatur de die in diem, omnisque lux illa ingenij, quæ ad inferiora vrgebat, ad superiora conuertitur, & à terrenis quodammodo aufertur, vt magis magisque huic sæculo moriatur, & vita eius abscondatur cum CHRISTO in Deo.*

CRUX SIMONIS, Crux ægrotantis.

CVM pueri malè habent, ad charos sibi parentes lacrymantes oculos erigunt. Nouerat SIMON ^{Instrumentum artis benè moriendi.} Patrem sursum in supernis esse, conuertitque lumina in cælum, quasi diceret, *Pater noster, qui es in cælis.* ^{Matth.6.} Nobilis conditio hæc est, qua ductus Rex Ezechias ^{9.} in ægitudine sua sursum oculos leuauit, dixitque: *Sicut pullus hirundinis sic clamabo, meditabor vt columba.* ^{Isai. 38.} *Attenuati sunt oculi mei, suspicientes in excelsum.* ^{14.} Cùm quis affigitur lecto, ingenui nobilisque pueri instar, Patrem suum in cælis quærat, more Gerardi, qui cùm esset in extremis, vt refert Bernardus Serm.26. in Cantica, dicebat: *Quanta dignatio, Deum Patrem hominum esse! & quanta hominum gloria, Dei filios esse heredes!* Pertinet huc, quod refertur inter Apophthegmata Patrum. Cùm nuntiaretur mors patris, nuntian-
ti

ti respondit monachus, *Desine blasphemare, meus enim pater immortalis est.* Oportet in doloris lecto Patrem summum inuocare, quem inuocauit, coluit & adorauit CHRISTVS, cùm in lecto crucis infirmaretur. Hinc Gregorius p.3. Pastoral. cap.13. *Admonendi sunt ægri, quòd pro nobis Patrem, quamuis diuinitate esset æqualis, adorauit.* Magna reuerentia Patris est, & tunc maximè ostenditur, cùm ab eo morbis punitur homo, infirmitatibus castigatur, quemadmodum Serm.1. de Visitat. infirmor. decernit Augustinus, &

Prou. 3, 11.
Heb. 12, 6.
Excitatio
ægotan-
tis.

simul monet ægotantem: *Disciplinam patris tui ne abiicias fili. Nemo filius, quem non corripit pater. Sed noli deficere à disciplina Domini, & ne fatigeris, dum ab eo argueris. Quem enim Deus corripit, flagellat, & quasi pater in eo complacet sibi.* Adhuc puer erat Basilus, & dum ægotaret, disciplinam non abiiciebat, sed de manu paterna prouenire recognoscebat, ac proinde non molestè illam ferebat, nec fatigabatur longitudine infirmitatis, sed grandæuus, & adhuc æger in diuturna sua ægritudine iudicium Dei venerabatur. vnde & Epist. 77. scribit, *Corporis imbecillitate impedi-
dior, quam planè haud ignoratis, quanta mihi sit à prima ætate ad istam vsque senectam vna mecum educata, meque,
iuxta iustum Dei iudicium, qui omnia sapienter disponit,
castigans & erudiens. Castigatus & eruditus in eadem
schola*

schola cum CHRISTO, *qui didicit ex iis quæ passus est* Heb. 5, 8. *obedientiam.* CHRISTVS quidem Doctor paruulorum est, & eos in laboribus & infirmitatibus suis orare docet, *Pater noster, qui es in celis, sanctificetur nomen* Matth. 6, *tuum.* Hunc ipse vocauit & inuocauit, cum esset in lecto crucis: *Pater, dimitte illis.* & rursus: *Pater, in* Luc. 23, *manus tuas commendo spiritum meum.* Orauit Patrem, Luc. 23, 34. & inclinato capite emittens spiritum, Genitorem 46. suum adorauit.

Leuamen laborantis & ægrotantis.

MORIBUS antiquis Ecclesiæ post sacri Baptisma- *Virtus sa-*
 tis susceptionem augustissimum Sacramen- *cræ Eu-*
 tum infantibus ministrabatur, cuius solemnibus con- *charistia.*
 suetudinis Cyprianus Serm. 5. de Lapsis, & Hugo Vi-
 ctorinus lib. 1. de Ecclesiast. Officiis cap. 20. memine-
 runt. Laudabilis tunc ille vsus, quando vel ipsa Ec-
 clesia suam agebat infantiam, sacrosanctisque vbe-
 ribus Eucharistiæ lactabatur & nutriebatur. Qua-
 lem in tenera ætate infantia & pueritia suæ erga se
 Deum experiebatur Ecclesia, talem seipsam erga in-
 fantes, puerosque aqua lustrali tinctos ostendebat &
 exhibebat. Consonat dictis præscius primæ & pri-
 mæuæ domus Ecclesiæ Salomon: *Sapientia ædificauit* Prou. 9, 1.
sibi domum, excidit columnas septem. Immolauit victimas

Qq q

suas,

suas, miscuit vinum, & proposuit mensam suam. Misit ancillas suas vt vocarent ad arcem, & ad moenia ciuitatis. Si quis est paruulus, veniat ad me, & insipientibus locuta est: Venite, comedite panem meum, & bibite vinum quod miscui vobis. Relinquit infantiam, & viuite, & ambulate per vias prudentie. Cesset igitur illa antiqua la-

Thren. 3, mentatio: *Paruuli petierunt panem, & non erat qui*
4. *frangeret eis. Paruuli nunc sub Patris disciplina exi-*

Matth. 6, stentes panem petunt: *Panem nostrum quotidianum da*
12. *nobis hodie. Frangit illis panem gloriosa Patris Sa-*

Matth. 26, pientia, quæ & pueris suis ait: *Accipite, & comedite.*
17. *Accipit, & comedit mysticus Dei Simon, & ait ver-*

Psal. 22, 4. beranti Patri: *Virga tua & baculus tuus ipsa me conso-*
lata sunt. Parasti in conspectu meo mensam aduersus eos,

viaticum. qui tribulant me. Hæc mensa laborum & dolorum le-
uamen est, & in extremo agone Viaticum pro reme-
dio adhibetur, cùm homo nudus in terram reuer-
tens repuerascit.

Prodeat in publicum paruum speculum GVI-
LIELMI pueri, in quo splendet imago ferentis car-
nem & morbum.



*Lumina crudeli quid funere pascis Apella?
54. Mox dabitur propria cor satiare nece.*

EMBLEMATICA IMAGO LIV.
GVILIELMI PVERI CRVCIFIXI
EXPLICATA.



CHRISTVS *nusquam Angelos apprehendit, sed* Heb. 2, 16.
Exstat hi-
stor. An-
glican.
semen Abrahæ apprehendit. Semen Abrahæ
præcesserat in Isaac, in cuius celebri sa-
crificio præludia sanctæ crucis præluxe-
runt & apparuerunt. Apprehendit CHRISTVS mor-
talem hominum statum, qui subire crucem potuit; Sympathia
Christi &
Guilielmi
Artificum
tolerata
carnis.
immortalem conditionem Angelorum, quæ passio-
nem carnis ignorat, assumere recusavit. CHRISTVS
itaque factus homo, & Angelus magni consilij, an-
gelos homines fecit, quibus secum crucem ferre, &
mortem pati liceret. Ad hanc Angelorum classẽ
pertinet GVILIELMVS Anglus, qui cùm puerulus ef-
set, in vrbe Nordicensi à Iudæis peremptus est eo-
dem mortis genere, quo & ipse à CHRISTO redem-
ptus erat. Angelus in carne fuit, & cùm viueret in
carne, acerbam crucis passionem cùm CHRISTO
tulit. In carne ambulare, & non secundùm carnem
militare, Angelicum est. Adstruit hoc Paulus cùm
dicit: *In carne ambulantes, non secundùm carnem milita-* 1. Cor. 10,
3.
mus. Ambulat in carne Paulus, cùm terrenus homo

fit; non militat secundum carnem, cum totus angelicus viuat. Quamdiu ille in carne viuit, cum vir angelicus fit, caro crux laboriosa est. vnde & dicit:
 Rom. 7, 24. *Infelix ego homo, quis me liberabit de corpore mortis huius?* Gemit angelicus homo sub carnis passibilis onere.

CRUX GVILIELMI crucifixi, Crux corporis.

*Instrumentum artis
benè viuendi.*

Matth. 16, 24.

Nisi caro viro angelico crux foret, Angelus magni consilij non assereret, *Abneget semetipsum, tollat crucem suam, & sequatur me.* Monuit Angelorum Rex, vt homo abnegando se suamque carnem, assurgeret, & in societatem Angelorum seipsum insinuaret. Benè Bernardus Serm. 23. inter paruos: *Ceciderat à seipsa* (nempe natura humana) *à societate Angelorum, à visione Dei, id est, à libertate, à dignitate, à beatitudine.* Audiat ergo consilium, & abnegando semetipsum, id est, propriam voluntatem, seu libertatem recuperet tollendo crucem suam, id est, carnem suam cum vitiis & concupiscentiis crucifigendo per continentiae bonum, recuperet societatem Angelorum, sequendo CHRISTVM, id est, eius passionem imitando, recuperet claritatis eius visionem: quia si compatimur, & conregnabimus. Addo ex Basilio Epist. 41. ad Maximum Philosophum: Ne-
 que

Excitatio laborantis.

que enim certè parum vtilitatis habet eum, qui ex ampla familia, & illustri genere ad angelicam vitam transiuit, rationis moderamine quasi freno quodam cohibere iuuentam, & carnis affectum in seruitutem redigere rationis. Qui mysticus velit esse Guilielmus, carnem, quam fert, loco crucis habeat, & ferat, & oret cum Augustino lib. Contemplat. Fac me, quæso, dulcis IESV, pie, bone, semperque benediçte, tuo amore, & tuo desiderio onus carnalium desideriorum, & terrenarum concupiscentiarum superare & calcare.

CRUX GVILIELMI, Crux ægrotantis.

GVILIELMVS debili carni adstrictus, & simul ^{Instrumentum artis benè moriendi.} cruci alligatus, tormenta sic sustinebat, vt non tam homo passibilis quàm Angelus passionis expers esse videretur. Tolerare dira remedia, dura medicamenta sic ferre, quasi careas corpore humano, non tam humanum quàm angelicum spectaculum est. Quanti hoc habendum sit, Chrysostomus agens de Patientia pulchrè ostendit. Nihil est, inquit, tam horrendum tamque tremendum, quàm quòd hi qui vel morbo aut pœnis discruciantur, non superentur, si diuino sint amore incensi: ita vt neque ignis, neque ferrum, neque inopia, neque languor aliquis, neque mors, neque aliud quidpiam huiusmodi graue aut molestum appareat ei, qui hunc sit erga Deum

Deum amorem consecutus. Totus hoc amore accensus & totus angelicus in suis infirmitatibus & morbis, qui nihil graue nihil molestum sentiret, patientissimus Iobus erat, de quo Ambrosius Tract. 2. de Interpellat. Dauid cap. 1. dicit: *Non ægrotabat animo, et si doleret in corpore, quia non erat in carne anima eius, cuius passionibus non adhærebat, sed in spiritu, cuius virtute se texerat.* Cùm æger D. Nazianzenus esset, ad statum hunc angelicum adspirabat, & simul suspirabat Epist. 99. apud Basilium: *Vociferabor aliquid aduersum meipsum. Sit autem venia dolenti, si quæ dolentis sunt locutus fuero. O carunculam prauam & malignam, quibus me malis afficis? quæ mala perpetras?* In hoc angelico statu Ecclesiastica historia lib. 6. cap. 2. describit Beniaminum, qui cùm gratia sanitatis diuinitus esset donatus, ægris multis medebatur, ipse tamen perpetuò infirmabatur, dixitque admirantibus sociis: *Rogate Deum tantùm pro anima mea, de corpore parum estote solliciti, quia etiam dum sanus eram, ad nihil id mihi vtile erat.* Mysticus Guilielmus est, qui sic ægrotat in carne, vt carne & eius passionibus videatur esse nudatus, & vnica animæ suæ curam habeat. Quòd si Democritus dicere solebat discipulis, *Si corpus animum in ius vocaret, haud quaquam futurum, vt ille muneris malè administrati crimen effugeret,* acci-

Excitatio
agrotan-
tis.

accipiendum ita est, vt reus corporis sit, qui ratione non ducitur, sed voluptate seducitur. hic enim in corpus suum grauiter peccat, grauiter delinquit.

Leuamen laborantis & ægrotantis.

CEsset illa querimonia, *Paruuli petierunt panem*, Thren 3,
et non erat qui frangeret eis. Petierunt à cælesti ^{4.} *Virtus sa-*
 Patre panem, *Panem nostrum quotidianum da nobis ho-* *cra Eucha-*
die, quem non solum impetrarunt, sed etiam abun- *ristia.*
 danter obtinuerunt per manus gloriosi Regis, qui *Matth. 6,*
 & illis panem fregit, inuitansque ad epulum ait: *Si* *12.* *Prou. 9, 3.*
quis est paruulus, veniat ad me. Venit paruulus ange-
 licam vitam ducens, & cum eo more cælesti agi-
 tur; *Panem Angelorum manducauit homo*, vt totus an- *Psal. 77,*
 gelicus redditus, carni & eius passionibus omnino ^{25.}
 renuntiet. Benè Nyssenens Homilia 8. in Ecclesiast.
Qui hanc amat carnem, non est amicus suæ carnis; et qui
in hunc sanguinem est affectus, mundus erit à sensili san-
guine. Vnde cum res est de carnis & spiritus diuisione,
 peropportunè sacrum Viaticum porrigitur & *Viaticum.*
 administratur, vt dediscat homo diligere carnem
 suam, & discat è carne purus & mundus abire in
 consortium Angelorum, qui de pane Dei diuino
 aluntur & nutriuntur. Fuit olim apud Græcos mos,
 vt postquam maioris ætatis homines cælesti forent

pabulo recreati , ingenui pueri , & maximè puri ac nitidi accerferentur , & sacratissimis Eucharistiæ reliquiis reficerentur. Consule Nicephorum lib.17. capite 25. Consonat hic ritus cum moribus cælestis Numinis , quod cùm sublimibus dapibus gloriæ suæ diuinitus aleretur , ad gloriosas earum reliquias sumendas & accipiendas creauit & vocauit Angelos & homines , adhuc Angelis per omnia similes euocat & accersit.

Prodeat in publicum paruum speculum HVGONIS pueri , in quo splendet imago innocentiae & patientiae ægrotantis.



55. *Paruule ne plores raptæ dispendia lucis:
Maturus cælo non cadit ante diem.*

EMBLEMATICA IMAGO LV.
HVGONIS PVERI CRVCIFIXI
EXPLICATA.



INCOLNIAE in Anglia S. HVGGO puer in ^{Histor. Anglic.} odium CHRISTI crucifixi à Iudæis cruci suffixus fuit. HVGGO tenellus pendens è ligno crucis, puritatem, munditiem & innocentiam spirat, inspiratque intuentibus se, vt vitæ puritatem, & innocentiam morum semper in se custodiant. Magnus thesaurus vitæ innocentis est. *Habemus thesaurum istum in vasis fictilibus*, & ita fra- ^{2. Cor. 4.} gilibus, vt non solùm vno ictu, sed vno etiam aspe- ^{7.} ctu violentur & confringantur. Hinc fit, vt si sana & integra innocentia seruetur virtus, res miraculo similis habeatur, & mirabilis ille sit, qui puerilem, dum viuit, referat innocentiam, cuius causam egit in cruce, & peregit innocens CHRISTVS. Satis ardua res est, & proxima ipsi martyrio, depositum istud seruare. Mundus plenus periculis est, & inter omnia eius pericula innocentiam custodire, summæ sollicitudinis est. Benè Augustinus Serm. 150. *Nemo di-* ^{Sympathia Christi & Hugonis Artificum innocentia.} cat, quòd temporibus nostris martyrum certamina esse non possunt; habet enim & pax nostra martyres suos. Nam,

sicut frequenter suggestimus, iracundiam mitigare, libidinem fugere, iustitiam custodire, pars magna martyrii est. Hanc custodire quàm sit difficile & arduum, satis ostendit Ambrosius Epistola ad Heliodorum: *Quod esse discrimen putas inter eum qui moritur puer, & eum qui demoritur senex, nisi quòd hic peccatis abeat oneratio, & plurium coram Deo culparum reus, quàm ille. Præstat igitur puerum quàm senem mori.*

CRUX HVGONIS crucifixi, Crux
innocentiæ.

*Instrumentum artis
benè vi-
nendi.*

1. Tim. 6,
12.

MORUM integritatem & vitæ innocentiam seruare, magna crux est, & ad eius ferendum onus validis est opus humeris, quos Paulus in suo inuenit Timotheo. *Certa, inquit, bonum certamen fidei, apprehende vitam æternam, in qua vocatus es, & confessus bonam confessionem coram multis testibus. Præcipio tibi coram Deo, qui viuificat omnia, & CHRISTO IESV, qui testimonium reddidit sub Pontio Pilato, bonam confessionem, vt serues mandatum sine macula, irreprehensibile, vsque in aduentum Domini nostri IESV CHRISTI. Coniungit Paulus hoc loco confessionem fidei CHRISTI quæ per martyrium habetur, cum fida legis custodia, in qua integritas morum vitæque innocentia consistit. Seruemus sine macula præceptum, seruia-*

seruiamus imperanti Deo, erimusque de Martyrum
 illorum numero, qui candidati in cælis degunt. Fa-
 uet dictis Clemens Alexandrinus lib. 4. Stromat. *Qui-
 cumque Seruatoris mandata exequuntur, in unaquaque
 actione sunt martyres, facientes quidem quod vult.* Ac-
 cedit & Hieronymus Epistola ad Eustochium: *Pars
 tua Dominus, & quò magis gaudens mater tua longo mar-
 tyrio coronata est. Non solum effusio sanguinis in confes-
 sione reputatur, sed deuotæ quoque mentis seruitus imma-
 culata quotidianum martyrium est.* Custodi innocen-
 tiam ornatam non sanguinis effusione, sed diui-
 næ legis obseruatione. Maluit illam HVGGO seruare,
 quàm vitam ipsam tueri. Et quidem B. Iobus pluri-
 ma passus est, opum, honoris & prolium detrimen-
 ta generoso animo tulit, vna innocentia contentus,
 quam inter varios euentus variaque rerum discrimi-
 na tenuit ac conseruauit. Vix innocens Iobus erat,
 & agens infantem dixit: *Nudus egressus sum de vtero* Iob 1, 21.
matris meæ, & nudus reuertar illuc. Lacerauit vestes
 suas, & cum esset tantus homo, repuerascens instar
 innocentis HVGONIS in cruce positi, nudus ille &
 mundus corde comparuit. Conuersus in paruulum
 Iobus innocens est. Quomodo conuerti debeamus
 & fieri sicut paruuli, rogatus Basilii Regul. 216.
 respondit: *Ipsa nos hæc Euangelij pericope docet, quò ar-
 gumento*

Excitatio
 laboran-
 tis.

gumento dictum sit declarans: ne videlicet affectemus eminentiam, sed æqualitatem honoris ex natura prouenientem agnoscamus: diligamusque æqualitatem etiam in illis, qui in quibusdam etiam minores esse videntur. Nam tales inter se sunt & paruuli, qui nondum eorum malitiæ, cum quibus conuersantur, assueti sunt.

CRUX HVGONIS crucifixi, Crux
ægotantis.

*Instrumentum artis
benè moriendi.*

*Excitatio
ægotantis.*

PRimus innocentia status immunis erat à morbo: decidit ab illo homo, & incidit in infirmitates, & maior ab eo distantia causa fit maiorum malorum. Quapropter homo, si minuere & extenuare cupiat corporalem ægritudinem quam patitur, curet ad pristinum se statum reuocare, & corpus reformare in similitudinem picturæ, & HVGONI similis fieri. Ad eius imitationem excitant ægotantem verba illa Nazianzeni Epist. 70. *Honestum esse censeo dolori resistere, atque animo vel nunc maximè expurgari.* Item cùm more HVGONIS immaculati purgetur & expurgetur homo, vt redeat ad innocentiam, mirari non debet, si quando patiatur infirmitates, cùm & ipsa innocentia in lecto crucis laborauerit, quemadmodum aduertit Gregorius 3. Pastor. admonit. 13. *Quis sana intelligentia de percussione sua ingratus existit,*
si

si ipse hinc sine flagello non exiit, qui hinc sine peccato vixit? Rosæ instar innocentia est, nec sine spinis rosa, sicut nec sine morbis puritas vitæ est. Rectè Basiliius Sermone de Paradiso: *Rosa hinc spinis est coniuncta, externa gratia molestiam obtegens, & tantum non aperta nos voce contestans, ac dicens: Quæ iucunda vobis sunt, ô homines, tristibus permixta sunt. Nam verè in humanis bonis ita comparatum est, vt nullum eorum sincerum sit, sed confestim lætitiæ & hilaritati conglutinetur mæstitia, coniugio viduitas, puerorum educationi cura & sollicitudo, fecunditati abortus, vitæ splendori ignominia, prosperis successibus dispendia, deliciis fastidium, sanitati infirmitas. Vera rosa CHRISTVS erat, & illa coronata spinis apparuit in lectulo suæ crucis, & inde aperta nos voce monebat, quæ tacita rosa monuit. Hoc ipsum loquitur puerulus HVGGO è cruce, in qua instar placidæ rosæ corona spinarum cingitur, & simul in spinis aculeatis morborum & ægritudinum coronam sitam declarat. Non coronabitur æger, nisi legitimè certaue-rit; nec certauerit, nisi parauerit se per cultum vitæ innocentis. Refert Hieronymus in Vita Hilarionis, quòd cum puer adhuc esset, & ad eum venissent latrones, & quasi per iocum rogarent puerum, Quid faceres, si latrones ad te venirent? respondit ille: *Nudus latrones non timeo. At illi aiunt: Occidi potes.**

Possum, inquit, possum, & idè latrones non timeo, quia mori innocens paratus sum.

Leuamen laborantis & ægrotantis.

Thren. 3.

4.

*Virtus sa-
cra Eucha-
ristia.*

Prou. 9, 3.

Psalmicum.

FAcessat illa querela, *Paruuli petierunt panem, & non erat qui frangeret eis.* Petierunt & impetrarunt qui iustitiam esuriebant. Hic iustitiæ panis offertur simul & frangitur à manu ipsa Regis cælestis, qui & dicit: *Si quis est paruulus, veniat ad me.* Venit inuitatus & rogatus, sumit hostiam sanctam & immaculatam, & orat post Communionem, vt tanti virtute Sacramenti sanctum & immaculatum se in posterum custodiat ac seruet: *Corpus tuum, Domine, quod sumpsi, & sanguis quem potavi, adhæreat visceribus meis, & præsta, vt in me non remaneat vlla scelerum macula, quem tam pura & sancta refecerunt Sacramenta.* Hinc haurit moriturus homo innocentiam, vt spiritum purum reddat.

Prodeat in publicum paruum speculum RICHARDI pueri, in quo splendet imago orantis & ægrotantis.



Ut Solem Atlantes, in se redeunte sagittâ,
56. Sic Christum opprobrijs gens recutita petit.

EMBLEMATICA IMAGO LVI.
S. RICHARDI PVERI CRVCIFIXI
EXPLICATA.

RICHARDVS Gallus, adhuc puer, in no-^{Paulus}
stræ Religionis ludibrium, porrectis in ^{Aemil.}
altum manibus, cruci suffixus à perfidis ^{Richard.}
Iudæis est. Sacræ eius Reliquiæ in Ec-
clesia sanctorum Innocentium Parisiis asseruantur,
vbi & multa miracula earum veneratione patran-
tur. RICHARDVS innocens erat, & puras manus
erexit, vt dignum de se sacrificium immolaret, to-
tusque Dauidicus ait: *Eleuatio manuum mearum sacri-*^{Psal. 140,}
ficiū vespertinum. CHRISTVS ipse primus in preci-^{2.}
bus suis hæc protulit, de quo S. Augustinus Psal-
mo 64. *Extendit manus in cruce, vt diceret: Dirigatur*
oratio mea sicut incensum in conspectu tuo, eleuatio ma-
nuum mearum sacrificium vespertinum. Describit & ip-
se Augustinus libro de Vita CHRISTI, cap. 15. præ-
claras dotes, quibus Richardus mysticus insignitus
esse debet. Ille meritò *ad Deum extollit manus, ille preces*
bona conscientia fundit, qui potest dicere: Tu nosti Do-
mine, quàm innocentes, quàm puræ sint ab omni fraude,
quas ad te expando, manus. Sunt qui, dum orant, in

SIO SACRI SANCTVARI CRVCIS PARS II.

crucis formam se componant, nec dubium, quin inter se crux & oratio consonent & conueniant.

*Sympathia
Christi &
Richardi
Artificum
orationis.
Psal. 23, 4.*

Compositus in formam Crucis CHRISTVS Dominus, cùm in Caluariæ monte pateretur, sacras preces & supplicationes fudit. *Quis ascendet in montem Domini, aut quis stabit in loco sancto eius? Innotens manibus, & puro corde; RICHARDVS scilicet, & qui est Richardo similis. Erectio manuum coniuncta cum oratione, mystica est, & sacrum eius mysterium lib. 7. Stromat. Clemens Alexandrinus explanat. Caput, inquit, & manus in calum extendimus vnà cum verbo, corpus à terra ducere conantes, erectam & eleuatam animam: desiderio meliorum cogimus in sancta progredi, magno animo corporis vinculum despicientes.*

CRUX RICHARDI, CRUX orationis.

*Instrumentum
artis
benè
viniendi.*

CORpus humanum erigit & eleuat à terra crux, Oratio verò animam in altum tollit, vt Augustinus Serm. 230. de Tempore definit. *Quid oratio, nisi ascensio animæ de terrestribus ad caelestia, inquisitio superiorum, inuisibilem desiderium?* Consonat & Damascenus lib. 3. de Fide Orthodoxa cap. 24. *Oratio est ascensio mentis in Deum.* Ne palmites terrâ reperent, clauiculos, quibus innixi ad superiora contenderent

*Excitatio
laboran-
tis.*

& conscenderent, beneficio naturæ acceperunt. Nos omnes palmites sumus, vt ab ipso CHRISTO didicimus, *Ego sum vitis, vos palmites*: ne solo terræ re- Ioan 15, 5. pamus, sed in cælum ascendamus, imitemur palmitem CHRISTI, qui suarum manuum clauiculis vsus, ad sublimia gradum facit. Fecit orando Dauid: *Leuaui manus meas ad mandata tua, quæ dilexi.* Psal. 118, vnde Paulus & ipse Dauidicus ait, *Volo viros orare in* 48. 1. Tim. 2. *omni loco leuantes puras manus.* Quid sic? Respondet 8. S. Ephræm in Panoplia: *Verè arcus æreus est contra inimicos, expansæ in oratione manus in scientia orantis; sicut etiam sagitta directæ emissæ ab eo qui arcum librat.* Hinc Dauid: *Posuisti ut arcum æreum brachia mea.* Hæc Psal. 17, orandi forma sic placuit, sic arrisit Constantino, vt, 35. teste Eusebio lib. 3. cap. 3. voluerit suam statuam more precantis, manibus expansis, oculisque in cælum sublatis, in publico collocari. Quid autem sibi velit gestus prædictus oratoris, exposuit Tertullianus in Apologia cap. 30. *Paratus est, inquit, ad omne supplicium habitus orantis Christiani: quasi orans protestetur, Præsto sum, nece & plecte, si vis, aut certè miserere.*

CRUX RICHARDI, Crux ægrotantis.

QUAM RICHARDVS puer in cruce formam ser- Instrumentum artis benè moriendi. uauit, seruauerat & Martinus, cùm in lecto iaceret

iaceret infirmus. canit enim Ecclesia: *Oculis ac manibus in cælum semper intentus, inuictum ab oratione spiritum non relaxabat.* Ad hanc ergo normam & formam se omnis æger componat. Extendunt manus medicis curantibus ægrotantes, vt pulsum tangant, explorent, deque statu morbi & eius remediis decernant. Deus omnium medicorum facile princeps est, *qui dat salutem Regibus.* Cum Medico illo diuino agendum est, more crucifixi RICHARDI, porrigendæ manus sunt, vt quod libuerit, de valetudine nostra statuatur & disponat. Extendebat Eudoxius æger ad Deum & cælum manus, commendatus à Gregorio Nazianzeno Epist. 120. apud Basilium. *Nihil ita, inquit, ad reprimendos doloris affectus facundum reddit, atque ipsa animi passio. Fluebat quodammodo sermo noster; tu verò, cum loquebar, quasi quibusdam stimulis excitatus, manibus in cælum extensis, vultuque quasi ad Orientem verso (Orientem enim aspicere poteras) exclamabas: Gratias tibi ago, Pater, ô conditor hominum.* Admonendus itaque æger est, vt Deo porrigat manus, nec ita Medicis confidat humanis, quemadmodum Rex Afa fidebat, & malè cessit. *Nec in infirmitate sua quæsiuit Dominum, sed magis in Medicorum arte confisus est.* Non sic RICHARDVS, nec æger RICHARDO similis, qui Dominum salutis quærit, & ad

Psal. 143,
10.
Excitatio
ægrotan-
tis.

1. Paralip.
35, 12.

ad Deum manus extendit. Hæc manuum extensio & eleuatio signum sacrificij est, quo se totum totamque vitam suam in manibus Medici diuini generosè resignat. *Eleuatio manuum mearum sacrificium* Psal. 140, *vespertinum*. Hæc eleuatio sic frequens & chara Simone Stylitæ erat, vt in publicis solemnitatibus ab occasu ad ortum solis, sublatis in cælum manibus, totam noctem steterit, neque somno victus, nec labore defessus. Consule Surium. Hanc etiam formam seruabat deuotus Gerson, qui morti iam proximus, pueros, quos docebat, euocabat ad templum; & ostiis clausis, in medio eorum, porrectis ad sacrum manibus, dicebat, vt eius historia tradit: *Deus meus, creator meus, miserere pauperis famuli tui Joannis Gerson*. Non precatoris solum, sed & victoris hic gestus est, cum Psalm. 17. dixerit nomine Dauidis *Basilus: Dum manus ad pre-mendum in tentationibus extendo, eas vinco.*

Leuamen laborantis & ægrotantis.

NE iam vlteriùs dicatur, *Paruuli petierunt panem*, Thren. 3, 4
 & non erat qui frangeret eis, paruulis cælestem *Virtus sa-*
 panem petentibus, & simul orantibus, *cra Eu-*
charistia.
Matth. 6,
12.
strum quotidianum da nobis hodie, datur, & in mensa à
 CHRISTO frangitur. *Hic est panis, qui de cælo descen-* Ioan. 6, 59.

dit, ad cuius sacram sumptionem inuitat paruulos
 PROU. 9. 3. CHRISTVS : *Si quis est paruulus, veniat ad me. Venia-*
mus humiles omnes, mysticum Richardum in no-
bis pariter præferamus, Eucharistiam postulantes,
& in eandem formam simul communicantes. Huc
pertinet quod lib. 4. de Fide Orthodoxa asserit Da-
mascenus: Accedamus desiderio ardenti, manus in for-
mam crucis formantes, crucifixi corpus suscipiamus. Cor-
 VIATICUM. *poris loco, quod hora mortis deponimus, corpus sa-*
cratissimum CHRISTI sumamus & recipiamus, ma-
nus formantes in modum crucis, & quidem exem-
plo pueri, cuius meminit Thomas à Kempis lib. 2.
cap. 28. Achaz puer, cùm esset annorum septem, &
ad mortem æger esset, com meatumque sacrum pete-
ret, nec daretur, extensis in cælum manibus, Tu nosti,
inquit, Domine IESV, quòd summa votorum meorum fuit
hæc, vt te reciperem, petiui te, feci quod potui, spero con-
fidentiùs quòd tua præsentia non frustrabor.

Prodeat in publicum paruum speculum CHRI-
 STOPHORI pueri, in quo splendet imago ferentis
 CHRISTVM & morbum.



57. Dum Christi tormenta refers in corpore, et ipsum
Pectore, Christophori nomen et omen habes.

EMBLEMATICA IMAGO LVII.
CHRISTOPHORI INNOCENTIS
C R V C I F I X I
EXPLICATA.

APVD Guardiam in Hispania, dominan-
tibus Ferdinando & Isabella, CHRISTO-
PHORVS octennis puer omnia CHRISTI
tormenta sigillatim passus est: cumque
crudeliter ad columnam caderetur, nullum signum
doloris dedit, solum in vltimis quinque plagis, quæ
verberum CHRISTO inflictorum numerum exces-
serunt, conquestus est. Cum esset iam cruci affixus,
dexterum sibi latus effodienti dixit: *Si cor queris, la-
tus alterum effodias necesse est.* Sinistro latere effosso, &
corde per vim extracto, innocens puer regna cæle-
stia subiit. Christophorus verè erat, qui CHRISTVM *Sympathia*
passum crucifixumque in suo corpusculo tulit. Chri- *& Artifi-*
stophorus magnus atque procerus paruulum IESVM *cium Chri-*
per aquas fluuij transmisit: paruulus verò CHRI- *sti & Chri-*
STOPHORVS magnum IESVM in se suscepit, & per *stophori*
crucem secum in astra traduxit. Qui pro CHRISTO *ferentis*
crucifigitur, & pro CHRISTO crucem fert, mysti- *Christum.*
cus Christophorus est, *Ergo glorificate & portate Deum* 1. Cor. 6,
in 20.

in corpore vestro. Anselmus in Commentario: Glorificate Deum benè operando, & portate Deum, iugum eius super vos tollendo: & hoc facite in corpore vestrà, id est, in moderamine corporis vestri, vt nihil in vestro corpore notari queat, quod ad Dei contumeliam spectet, quod non eius gloriam commendet. Non verbis solùm, sed rebus

2. Cor. 4, 8. Christophorum Paulus agebat, cùm diceret, In omnibus tribulationem patimur, sed non angustiamur: aporiamur, sed non destituimur: persecutionem patimur, sed non derelinquimur: deiicimur, sed non perimus: semper mortificationem IESV in corpore nostro circumferentes, vt & vita IESV manifestetur in corporibus nostris. Apud Hispanos CHRISTOPHORVS nomine Innocentis gloriatur, cui similis ille est, quem Serimone de Ioanne Euangelista Laurentius Iustinianus describit: Meritò ab Angelis honorandus est ille, qui diuinæ charitatis flamma succensus, infatigabiliter innatas concupiscentias eradicare conatur, atque terram sui vtriusque hominis ad pristinum originalis puritatis reformare decorem. Huiusmodi plurimùm amatur à CHRISTO, qui innocentiae auctor, & puritatis semper amator extitit. Sinite (inquit ipse) paruulos venire ad me, talium est enim regnum Dei.

Marc. 10,
14.

CRUX CHRISTOPHORI, CRUX CHRISTVM
ferentis.

PAulus 1. Corint. 15, 47. *Primus homo de terra, ter-
renus; secundus homo de celo, celestis. Qualis ter-
renus, tales & terreni: & qualis celestis, tales & cele-
stes. Igitur sicut portauimus imaginem terreni, portemus
& imaginem celestis.* Excitat nos Paulus, vt non tam
Adamum quàm CHRISTVM in nobis feramus.
Commendat nobis Apostolus, vt non tam inuisa-
mus CHRISTI imaginem, quàm vt illam in nobis
portemus. Venis ad templum, venis ad Sanctua-
rium, inuisis statuas, visitas imagines, veneraris, co-
lis, oras, & adoras, recedis inde facta oratione & ad-
oratione. Amplius hoc loco quærit & requirit Apo-
stolus, vt nimirum viuam imaginem CHRISTI te-
cum portes, tecum feras, vt mysticus Christopho-
rus fias, sicut in Commentario dicit Anselmus: *Ima-
ginem terreni hominis induimus propagatione præuaricatio-
nis & mortis, quam nobis intulit generatio; imaginem ve-
rò celestis hominis induimus gratiâ indulgentiæ, viteque
perpetuæ, quam nobis per CHRISTVM præstat regenera-
tio. Vnus enim generat in mortem, alius in salutem. Car-
nis voluptate proles suas generat in mortem Ada-
mus; Crucis verò passione suas soboles CHRISTVS
enititur*

*Instrumen-
tum artis
benè vi-
uendi.*

*Excitatio
laboran-
tis.*

enititur in salutem , & quidem ad formam sui , vt patienti sibi patientes & ipsæ assistant.

CRUX CHRISTOPHORI, Crux ægrotantis.

*Instrumen-
tum artis
benè mo-
riendi.
1. Cor. 6,
20.
Excitatio
ægrotan-
tis.*

Non solùm modò sanis , sed infirmis etiam di-
ctum est, *Portate Deum in corpore vestro*. Porter
& gestet patientem in Cruce CHRISTVM lecto affi-
xus æger, dolores non ægrè sustinens. Summa gloria
CHRISTOPHORI est , passum in se patiente CHRI-
STVM Dominum tulisse ; & summus ægrotanti ho-
nor , CHRISTVM patrem futuri sæculi ex mundano
incendio plus quàm Troiano eripere in seipso, & de-
corâ farcinâ onustum de lecto in cælum ascendere.
Mysticus Christophorus est , qui per viam in se fi-
dem CHRISTVM fert , dum laborat & ægrotat, quo
cum agens Augustinus lib. de Symbol. ait : *Aduersa-
rius diabolus mortem minando terrebat, sed CHRISTVS
vitam aternam promittebat. Aduersarius diabolus carnem
perempturum se esse dicebat , Rex autem noster, vt doce-
ret , quomodo suus exercitus vinceret, in se demonstravit
mortem corporis non esse timendâ, dum prior ipse pro omni-
bus dignatus est mori, ne eius exercitus à diabolo in anima
posset occidi*. Admonendi sunt ægri , vt hunc CHRI-
STVM crucifixum gestent in corde , in humeris si-
mul & brachiis. Benè Bernardus monet Serm. 8. in-
ter

ter paruos : MARIA portat IESVM in vtero, Ioseph in humero in Ægyptum, scilicet iens & rediens, Simeon portat in brachiis. Portet æger cum MARIA CHRISTVM in corde, & expendat quanta sit in cruce passus. Admonendi sunt ægri, sicut Gregorius ait 3. p. Pastoral. cap. 13. *Ut incessanter, quanta Redemptor noster ab iis, quos creauerat, pertulit mala, considerent.* Portet cum Iosepho in humeris suis CHRISTVM, & eius crucem in lecto ferat ægrotus. Ferebat in lecto crucem S. Didacus æger, de quo Seraphica historia testatur, expirasse, dum diceret, *Dulce lignum, dulces clauos, dulcia ferens pondera, quæ sola fuerunt digna portare Regem cælorum, & Dominum.* Portet tandem in brachiis cum Simeone æger CHRISTVM crucifixum, accipiat illum in manibus, & mysticus Simeon sit, qualis erat Adelphardus Abbas, de quo Surius : *Erant oculi eius ad Deum defixi, manus verò ad cælum extensæ, inuitansque sanctum Spiritum dicebat : Nunc dimittis* Luc. 2, 29. *seruum tuum Domine secundum verbum tuum in pace, quia percepi omnia tui mysterij Sacramenta.*

Leuamen Crucis & passionis sacra Hostia.

O Sacrum Regis conuiuium ! Paruuli petierunt panem, & adepti sunt Eucharistiam, cuius singulari beneficio mystici Christophori euadunt. *Elenara
virtus sa-
cra Eu-
charistia.*

Consonat Cyrillus Ierosolymitanus Catech. 4. *Sic enim efficimur christiferi, hoc est, CHRISTVM ferentes, cum corpus eius & sanguinem in membra nostra recipimus.* Ita monet sanos & ægros CHRISTOPHORVS; & Petrus 1. Epist. cap. 2, 1. concludit: *Deponentes igitur omnem malitiam, & omnem dolum, & simulationes, & inuidias, & omnes distractiones, sicut modò geniti infantes, rationabile sine dolo lac concupiscite; vt in eo crescatis in salutem: si tamen gustastis, quoniam dulcis est Dominus.* Suavis est Dominus in sacra sua Eucharistia iis qui patienter ipsum sustinent. Cum sustinentibus se ita se CHRISTVS gerit, vt eos vice reciproca supra se teneat & ferat. Ad hoc vt mysticum suum Christophorum sursum attollat & eleuet, accedit, cum *viaticum.* Viaticum ministratur. Tunc impletur, quod Deuter. 32. præcinit Moyses: *Sicut aquila prouocans ad volandum pullos suos, & super eos volitans expandit alas suas, & assumpsit eum, atque portauit in humeris suis.* Ita reuera fit vt christifer, & simul crucifer CHRISTVM portet, & ipse à CHRISTO portetur.

Gloriosum opus Artis Crucis & patientiæ,
corona aurea & laureola.

*Honor puerorum alit
artem bene
viniendi & moriendi.*

R Ex Martyrum idem promittit, idem assignat præmium cruci martyrij, & pueritiæ cruci martyrij

martyrij pro præmio decernit regnum cælorum:

Beati qui persecutionem patiuntur propter iustitiam, quoniam ipsorum est regnum cælorum. Hoc ipsum crucifixis & cruciferis pueris diuinus amator paruulorum adscribit & attribuit: *Sinite paruulos venire ad me, tantum est enim regnum cælorum.* Matth. 5, 10.
Matth. 19, 14.

Constituit ante oculos nostros Rex gloriosus honorarios suos pueros face patientiæ fulgentes, & martyrij honore decoros, & monet in singulis pueris, *Nisi efficiamini sicut paruuli, non intrabitis in regnum cælorum.* Matth. 18, 3. Efficitur sicut paruulus Martyr, qui nouit sine sanguine se litare & immolare in eam formam, quam præscribit S. Ephræm, dum de laude martyrum agit. Huc igitur, inquit, iam age, & sanctorum te Martyrum discipulum præbe. Nam si te illis in discipulum dederis, erunt & ipsi vicissim tibi magistri optimi, addiscesque ab iis passiones quascumque superare ac nullatenus locum eis dare: disces quoque ab iisdem perfectam fidem, dilectionem Dei, ac ingentem commiserationis affectum, futurorumque bonorum desiderium; nam ardentius hi rogam atque flammam, virtute Dei, fideque perfecta extinxerunt atque vicerunt. Quare tu semper prauæ ac noxiæ concupiscentiæ flammam in te ipse restringe & vince. Varia illi tormenta superarunt, spe quæ est in

CHRISTVM, suffulti: vince igitur & tu tyrannidem

Laureola
in cruenti
martyrij.

Extrema
verba mo-
rientis.

iracundiæ iisdem instructus armis. Illi palàm martyres fuerunt : at tu in secreto saltem martyrem te præbe. Illi in aperto certamen consummarunt : perfice quoque tu certamen in occulto, vt in die retributionis coronâ cum ipsis doneris, ac in cælesti regno socius gloriæ illorum inueniaris, simulque sempiterno gaudio perfruaris. Hic finis gloriosus puerorum Deo inseruientium est, vnde meritò Iustinianus decedens in cælum ait : Mihi credite, filij, nihil est præstantius, quàm seruire Domino. Hæc consummatio vnius & alterius martyrij est, quæ pendet à tolerantia, in eius elogium Tertullianus libro de Patientia cap. 15. asserit : Patientia martyria consummat, infirmum non extendit, valentem non consumit. Amat in puero, laudatur in iuvene, suspicitur in sene, in omni sexu, in omni etate formosa est. Talis debet esse patientia, quæ comes indiuidua gloriosæ crucis est, quæ per omnes status pertinet, & vbique reperitur; Oratione enim, Quòd CHRISTVS sit Deus, Chrysostomus ait : Hoc mortis genus diademate gloriosius est : nam Reges positæ diadematis crucem suscipiunt, mortis symbolum : in purpuris crux, in diademate crux, in precibus crux, in armis crux, & in mensa sacra crux, & in toto orbe crux, & super Solem fulget crux.

S A C R I
S A N C T V A R I I
C R V C I S

E T

P A T I E N T I A E

P A R S T E R T I A

G L O R I O S Æ R E G I N Æ M A R I Æ

E T

S A C R A R V M F E M I N A R V M

C R V C I F I X A R V M.

Figura C R V C I S vbiq̃ue inuenitur, apud Prin-
cipes, apud Subditos, apud M V L I E R E S.

Chrysostomus, Quòd Christus sit Deus.

Stabat iuxta C R V C E M Mater eius. *Ioan. 19.*

THE
JANUARY
1800

THE
JANUARY
1800

THE
JANUARY
1800

THE
JANUARY
1800

I M A G I N E S
 E M B L E M A T I C Æ
 P A R T I S T E R T I Æ
 S A C R I S A N C T V A R I I.

Gloriosæ Reginae iuxta Crucem stantis.

S. Theocliæ & Calliopij.

S. Febroniae virginis.

S. Blandinae virginis.

S. Eulaliae virginis.

S. Juliae virginis.

S. Benedictæ virginis.

S. Vilgephortis virginis.

SS. Martha & Maria virginum.

SS. Tarbula & sociarum virginum.

SS. Timothei & Mauræ coniugum.

Magdalena viduæ & sociarum.

S. Gudilia indicis mysterij mortis.


Fecit

Fecit & labrum aeneum cum basi sua de speculis mulierum, quæ excubabant in ostio tabernaculi. Exod. 38, 8.

S. Laurentius Iustinianus de triumphali agone CHRISTI, cap. 21.

Clarissimum passionis CHRISTI speculum effectum erat in Virgine, nec non & perfecta mortis imago.


Appareat in Sanctuario primum & primum speculum Reginae MARIAE.



*Hic, Vitam instaurans, Morti dat funera CHRISTVS.
58. Anne igitur potuit Mors sine morte mori?*

EMBLEMATICA IMAGO LVIII.

B. MARIÆ CRUCIFIXO
COMPATIENTIS
EXPLICATA.

 ANCTVARIVM crucis & patientiæ, se- Ioan. 19.
cundum Deum & hominem crucifixum,
B. MARIAE matri eius compatiēti &
commorienti sacrum esto. Crucifixarum
omnium feminarum prima MARIA patiens pro-
dit, quæ compassa Filio suo, ceteras omnes præit,
suaque compassione passiones omnium transcendit
& complectitur. Crucifigitur in patientibus viris
CHRISTVS, in feminis MARIA patitur. Apparet an-
tefignana Deipara in crucis formam manus & bra-
chia componens, vt crucis loco esse teneram compas-
sionem ostendat, quæ non corpore, sed corde cha-
ro pignori commoritur, proinde maternum pectus
cruce signatum præsentat. Hanc ipsam Sanctuarij
imaginem videtur contemplatus Bernardus Sermo-
ne de Verbis Apoc. cum in hæc verba prorupit: *Ille
corpore mori potuit, ista commori corde non potuit? Fe-
cit illud charitas, qua maiorem nemo habuit; fecit & hoc
charitas, cui post illam similis altera non fuit.* Confirmat

Regina
crucifera
Artifex
compass-
ionis.

Bernardus Simeonis vaticinio. Prædixerat olim ille,

Luc. 2, 15. *Tuam ipsius animam pertransibit gladius, ex quo Doctor mellitus infert, Tuam ergo pertransiuit animam vis doloris, & plus quàm martyrem non immeritò prædicamus, in qua nimirum corporeæ sensum passionis excesserit compassionis affectus. An non plus quàm gladius fuit sermo ille reuerà pertransiens animam, & pertingens vsque ad diuisionem animæ & spiritus: Mulier, ecce Filius tuus? O commutatio! Ioannes tibi pro IESV traditur, seruus pro Domino, discipulus pro Magistro, filius Zebedæi pro Filio Dei, homo purus pro Deo vero. Deus ipse cum MARIA sua loquitur apud Birgittam libro 1. cap. 20. Quando cor meum in cruce præ vehementia doloris rumpebatur, cor tuum ex hoc quasi ferro acutissimo vulnerabatur, & libenter scindi permisisses, si fuisset voluntas mea.*

CRUX B. MARIAE, Crux sanctæ compassionis.

Quisquis compatitur CHRISTO, necesse est vt vnâ cum illo eandemque crucem ferat, & similis MARIAE euadat. Euasit Paulus, qui totus

Gal. 2, 16. Marianus dixit: CHRISTO confixus sum cruci. Nec dubium, quin per compassionem Apostolus crucifixo esset affixus. Hic idem Christianos omnes esse Marianos volens scribit: Si autem filij, & heredes; heredes quidem Dei, coheredes autem CHRISTI, si tamen
compa-

compatimur, vt conglorificemur. Habet myſterium ſuum vaticinium Simeonis. *Tuam ipſius animam,* inquit, *per-* Luc. 2, 15. *transibit gladius.* Haud dubiè ſignificatū eſt gladium teneræ ac deuotæ compaſſionis ex anima MARIAE Virginis in alias etiam animas tranſiturum. Quamobrem Maria Magdalena lib. 7. Reuelat. S. Birgittæ cap. 15. dicit: *Pertransibit cor meum nouus gladius compaſſionis.* Accedit quoque Bernardus totus ſpiritu Marianus, Serm. de Verbis Apoc. *Quomodo non tuam aſſeſſuoſiſſimam animam pertransiret hæc auditio, quando & noſtra, licet ſaxea, licet ferrea pectora, ſola recordatio ſcindit?* Hic ſpiritus Marianus eſt, vt ſi quis illo tanga- Excitatio laboran- *tur, dicat præ compaſſione CHRISTI, ac Chriſtia-* tis. *ni morientis: Benedictio perituri in me veniat.* Accedat Iob 29, 13. Ambroſius de Bono mortis cap. 8. *Si quem viderimus debilem, non deferamus; ſi quem in extremis poſitum, non relinquamus. Occurrat & nobis dicere: Benedictio morituri in me veniat. Reſonent te poſtrema verba morituri, & benedictionem tui egrediens corpore anima ſecum vehat.*

Speculum Marianum Sanctuarij, ſpeculum humanæ infirmitatis & patientiæ.

HVMANA infirmitas ex muliere promanauit, & ideò, cùm Iobus infirmaretur, cauſam miſeri ſtatus ſui explanauit. Homo, inquit, *natus de muliere,* Iob 14, 1.

Eccli. 38,
28.

Excitatio
agrotan-
tis.

Extrema
verba mo-
rientis.

brevi vivens tempore. Hinc humana nascitur ægritudo, vnde & homo nascitur. CHRISTVS ipse, cùm esset affixus cruci, memor fragilis natiuitatis suæ in speculo Mariano, quod præ oculis habebat, suæ infirmitatis originem attentè speculabatur, & exemplo suo declarabat, quid facto opus esset, cùm lecto affixus homo malè valeret, & haberet. *Cor suum dabit in similitudinem picturæ.* Vertet & conuertet oculos suos ad patientem & compatientem MARIAM, vt memor ortus sui ex muliere, infirmitatem suam æquo animo patiat. Ad excitandum quoque in se affectum tolerantia, passionis & compassionis, speculum hoc Marianum intuebatur S. Bonauentura in Officio de compassione, cùm diceret: *Propter doloris gladium, qui transiit animam tuam, quando Filium tuum dilectissimum cernebas nudum, in cruce leuatum, clavis perforatum, ac per omnia laceratum plagis & verberibus, nec non & vulneribus, adiuua nos, vt cor nostrum compassionis & compunctionis gladius perfodiat.* Hæc Bonauentura Virgini, quæ infirma & moriens morbum & mortem reddidit suauem, dicens Cantic. 2. *Fulcite me floribus, stipate me malis, quia amore langueo.*

Leua-



*Speculum passionis, et leuaminis
pro columba gemente.*

Leuamen Columbæ gementis in labore
& morbo.


SECUNDUM sacram Eucharistiam Regina gloriosa *Inuocatio Regina Maria.*
MARIA leuamen laborantis & ægrotantis esto. *Eccli. 30. 27.*
Ubi non est mulier, ingemiscit egens, ingemiscit & æ-
ger. Prouidit autem Deus afflictæ animæ instar co-
lumbæ gementis de sacrosancta muliere, quæ &
speculum compassionis est. Cohærent sibi specu-
lum compassionis & anima afflictæ, MARIA scili-
cet & columba. Hanc referebat in labore & mor-
bo

bo Hermannus cognomento *Contractus*, nobilissimi Comitis Sueui filius, qui cū esset omnibus membris captus, & monachus factus, summis precibus MARIAM rogauit, vt sibi valetudinem impetraret. Rogata adfuit laboranti & ægrotanti, vt refert Platus lib.2. cap.52. & interrogauit infirmum, vtrum è duobus mallet, sanusne fieri, sed vt erat rudis & indoctus permanere; an perseuerare in morbo & labore, & ornamento sacrarum scientiarum decorari. Elegit hoc vltimum, euasit mirum in modum sapiens, sed non minùs addictus Reginae gloriosæ MARIAE, cuius opem in suis continuis laboribus & infirmitatibus implorabat, recitans *Salve Regina*, quam orationem cruciferis ægris recitandam pro solamine & leuamine in Ecclesia Dei reliquit. Hanc etiam gloriosus Rex Hungarorum Stephanus è viuis iam excessurus inuocauit, dicens: *Regina calorū, mundi inclyta reparatrix, animam tuis manibus committo*. Adstitit Regina CHRISTO in lecto crucis infirmo, adstitit & morienti, & præbuit ibidem specimen, quanti leuaminis esset iis qui affixi lecto gaudent eius præsentia & assistentia, eius opera & ope fruuntur.

Appareat speculum amissæ prolis & infirmitatis
THEOCLIA cum CALLIOPIO.



*Non mihi, chara parens, dolet in cruce fundere vitam;
59. Sed, tua quòd luctu saucio corda, dolet.*



PLAN OF THE TOWN OF ...
... ..

EMBLEMATICA IMAGO LIX.

THEOCLIAE ET CALLIOPII

CRUCIFIXI

EXPLICATA.



ADERAT MARIA CHRISTO, aderat Ma-
ter Filio, & quidem iuxta cruce[m] stabat,
vt simul cum prole sua passionem cru-
cis subiret. Spectaculum non dissimile in

Metaph.
Lipoman.
Martyrol.
Græci.

hac effigie exhibetur. S. CALLIOPIVS in Cilicia sub
Maximo Præfecto, post varios diuersosque crucia-
tus virgarum, neruorum, rotarum & ignium, in-
uerso capite crucifixus est. Aderat eius mater, ad-
erat tota pia & religiosa THEOCLIA, quæ & valde
obnixè rogauit, vt formâ inuersâ chara proles cru-
ci affigeretur. MARIA prolem suam rectam genuit,
& rectam cælo reddidit. THEOCLIA suam sobolem
orientem fudit inuersam, inuersam cælo dedit, cælo
remisit. Consonat dictis Sermone de Crucis laudi-
bus D. Augustinus : *Tu semper rectus, tu semper ex-
celsus; nos secundum carnem filij hominis, qui principale
suum demisit in terram, cuius lapsus significatur specie ge-
nerationis humane: sic enim nascimur, vt proni in ter-
ram videamur effundi.* Charæ prolis amissio, dura pa-

*Sympathia
Maria &
Theoclia
Artificum
tolerantia
propter
amissam
prolem.*

rentibus est. Crucem hanc sacratissima Virgo tulit, ad cuius imitationem calamitatem eandem sustinuit deuota & pia THEOCLIA, cum in ipsius præsencia, oculis & amplexibus amabilis proles in cælum præmissa est. Discant inde parentes pro CHRISTI obsequio suarum prolium pretiosam iacturam facere, patienter ferre, liberaliter offerre. Audiant, si placet, THEOCLIAM apud Metaphrasten loquentem cum filio suo CALLIOPIO. *Beata ego, inquit, & benedicte fructus ventris mei, quoniam vt Anna dicaui te sacrum munus Domino IESV CHRISTO; vt Sara obtuli te Deo holocaustum gratum & acceptum Domino sacrificium.* Hæc THEOCLIA, & post hæc amplexata CALLIOPIVM, in eius amplexu spiritum suum Deo reddidit. Mystica Theoclia erat Melania Marcelli Consulis filia, quæ cum, necdum humato marito, prolem suam amisisset, dixit, vt refert Hieronymus in Epist. ad Paulam: *Magis expeditè tibi seruitura sum, Domine, quia tanto me onere liberaſti.*

CRUX THEOCLIAE, Crux charæ prolis
amissæ.

Dimidium animæ charus amicus est, at vnica, grata & amabilis proles tota anima parentum est: cum illa amittitur, suarum animarum censentur

tur & meritò iacturam fecisse. Hinc dolor, hinc lacrymæ, quas in iunioris Tobix absentia, longa & diuturna mora sancti & chari parentes effuderunt. Quamvis utrique parenti communis sit iste dolor, matri præsertim incumbit. Exemplo nobis sit nobilis & antiqua matrona, quæ cum precibus Elisei prolem charam impetrasset, ac tandem illa obiisset, domi se continere non potuit, quin Eliseum adiret: *Cumque venisset ad virum Dei in montem*, ^{4. Reg. 4.} *apprehendit pedes eius: & accessit Giezi, ut amoueret* ^{27.} *eam. Et ait homo Dei: Dimitte illam; anima enim eius in amaritudine est.* Crux acerba & amara est præsertim matri, prolem vnicam amisisse. Quapropter David, cum vim doloris concepti de morte Ionathæ vellet exprimere, dixit: *Doleo super te frater mi Ionatha, de-* ^{2. Reg. 1.} *core nimis, & amabilis super amorem mulierum.* Sicut ma- ^{26.} *ter vnicum amat filium suum, ita ego te diligebam.* Res ^{Excitatio laboran-} *hæc difficilis est, maximas patientiæ vires requirit,* ^{tis.} quibus munita MARIA suam prolem obtulit Deo, quibus roborata THEOCLIA suam in suo CALLIOPIO reddidit animam. Reddidit quoque suam mater illa, quæ suo Melithoni dixit: *Fili, paulisper sustine; ecce CHRISTVS ad ianuam stat adiuvans te.* Et illa, quæ cum Symphorianus suus traheretur pro CHRISTO ad necem, exclamavit: *Nate, nate, me-*

mento aeternæ vitæ, celum suspice, & ibi regnantem intueri: tibi enim vita non eripitur, sed mutatur in melius.

Speculum THEOCLIAE matris CALLIOPII,
speculum infirmitatis & patientiæ.

CVM CHRISTVS patiens ageret in cruce infirmum, ad crucis & lecti pedes aderat MARIA Virgo, adest & THEOCLIA soboli, quæ iacentem & extremè laborantem verbis piis, salutaribus consiliis, & simul vberibus lacrymis teneræ compassionis prosequitur. Satis benè Iustinianus de Regim. Prælat. cap. 9. *Iis, qui corpore infirmantur nihil sic congruit, nihil sic animam eorum mulcet, quemadmodum si eorum verbis credulitas adhibeatur, illorumque infirmitatibus intelligant sibi compassionem exhiberi ex corde.* Corde compatitur THEOCLIA CALLIOPIO filio, qui in lecto crucis decumbens considerat matrem suam, & suæ conditionis memor, in speculo infirmitatis suæ se componit ad crucem patienter ferendam, cui addictus & adstrictus est. Quisquis æger est, *cor suum dabit in similitudinem picturæ.* Memor suæ originis, dum homo extremè laborat, excitet se ad portandam ægritudinem. Consideret se mulieris esse filium, natum quidem ex illa, non quidem ut diuturnam vitam agat, sed ut illam brevè absoluat.

Nudus

*Eccli. 38,
28.*

*Excitatio
ægro-
tantis.*

Nudus nascitur CALLIOPIVS, nudus moritur. Memor suæ natiuitatis, dum obit, prorumpit in illam vocem, in quam erumpat morti vicinus ægrotus.

Nudus egressus sum de vtero matris meæ, & nudus reuertar illuc. Extrema verba morientis. Iob 1, 21.

Leuamen columbæ gementis in labore
& morbo.

VErè Mater misericordiæ MARIA est, verè Inuocatio Matris misericordiæ. Theoclia, quæ misericordiæ suæ specimen exhibet erga singulos laborantes & ægrotantes. Hæc vnguento pietatis suæ vtitur, vt attritis multitudine ac grauitate morborum medeatur, & temperet dolores eorum, qui acerbè torquentur atque cruciantur. Aberat Mater misericordiæ tunc temporis, cùm ploraret Ieremias, & doleret miseram sortem filiorum, quorum meminit cap. 2. Thren. *Matribus suis dixerunt: Ubi est triticum & vinum? cùm deficerent quasi vulnerati in plateis ciuitatis, cùm exhalarent animas suas in sinu matrum suarum.* Adest mater, quæ panem confirmantem cor humanum suppeditat & Viticum. ministrat. *Comedite, inquit, panem meum, & bibite* Prou. 9, 6. *vinum quod miscui vobis.* Ergo ab illa postulandus panis est, & illa propterea inuocanda, *Salve Regina, Mater misericordiæ*, quæ maternum implens officium,

cium , de cælesti prouides pane , cuius fauore cor hominis laborantis & ægrotantis in labore & ægritudine sua exciteretur & confirmetur. Adest *Mater misericordiæ* ægrotanti. Et quidem adfuit Serenissimo nostro Alberto Belgij & Burgundiæ Principi: qui cùm esset valdè infirmus , in sella gestatoria portari se voluit ad templum Collegij nostri , in quo expositum erat venerabile Sacramentum , & piam MARIAE imaginem , cui titulus est , *Mater misericordiæ* , & cui valdè addictus erat , coluit , & adorauit. Regressus deinde ad Aulam non minùs animosè quàm religiosè , affixus lecto morbum , sed non mortem elusit. Filius Matris misericordiæ Serenissimus Albertus obiit , obiit & eiusdem Matris filia Regia , piissima Alberti vxor Isabella Clara Eugenia , quæ pro vltima etiam statione ad hoc nostrum templum venit , & in eo sacra patebat Eucharistia , post cuius adorationem , & cultum eiusdem imaginis *Matri misericordiæ* dicatæ reuerfa in palatium , similis suo Alberto in morbum incidit , & mulieris fortis instar in nouissimo die risit.

Prou. 31,
21.

Appareat speculum splendidæ virginitatis & infirmitatis virgo FEBRONIA.

EM.



*Vre, seca, vt pascas crudeli lumina visu:
60. Vtq; ego cœlesti perfruar, vre, seca.*

EMBLEMATICA IMAGO LX.
S.FEBRONIÆ VIRG. CRUCIFIXÆ
EXPLICATA.



IBAPOLI, quæ est ad fines Assyriorum, Metaph.
Lipoman.
Galefin.
Martyrol.
Diocletiano Imperatore virgo & martyr
FEBRONIA Sileni Præsidis iussu tota nu-
da super rogam, per brachia & pedes ex-
tensa, virgis cæsa, ligno affixa, & ferreis pectinibus
tota dilaniata triumphauit. Cùm somno æger op-
primitur, ne vincatur, molesti solent accedere exci-
tatores, qui dum grauiter vexant & torquent, suis
pœnis & tormentis iuuant ægrotum, ne somno ca-
piatur, & superetur. Ne morte caperetur aut vince-
retur FEBRONIA, accesserunt varij carnifices ac tor-
tores barbari, qui dum illam excarnificant, magis
excitant, vt maiores vigilias agat, venientemque
Sponsum excipiat. Sponsus virginis CHRISTVS in
aracrucis torridus solemnem egit triumphum: ca-
nebat propterea Ecclesia:

*Ad cœnam Agni prouidi,
Et stolis albis candidi,
Post transitum maris rubri,
CHRISTO canamus principi.*

Zzz 2

Cuius

*Cuius corpus sanctissimum,
In arâ crucis torridum,
Cruore eius roseo
Gustando viuimus Deo.*

Agnus in crucis ara torretur, torretur etiam agnel-
la & virgo FEBRONIA. Discant hinc cruciferæ
CHRISTI virgines amoris igne fulgere, & charita-
tis flamma accensam lampadem portare. Discant,
quod ad ipsas scribit Bernardus Epist. 42. *Quantali-
bet venustate sui castitas eminere appareat, sine charitate
tamen nec pretium habet, nec meritum. Subtrahere oleum,
lampas non lucet; tolle charitatem, lampas non placet. Pla-
cet virginitas Deo, quæ accensam lampadem por-
tat, & eius custodiæ & conseruationi studet. Lam-
padem studiosæ FEBRONIAE carnifices non extin-
guunt, sed accendunt, flagellis, siue flabellis vten-
tes, dum flammis virginem tradunt, vt Reginam
virginum referat, quæ iuxta crucem stabat, torque-
batur, & ingenti amore flagrabat.*

*Sympathia
Maria &
Febronia
Artificum
splendida
virginita-
tis.*

CRUX FEBRONIAE, CRUX status virginitatis.

INsignia virginitatis accensæ lampades sunt. San-
cta & immaculata virginitas, lucida & splendida
est, cui conuenit illud elogium: *Lampades eius, lam-
pades ignis atque flammarum.* Hæc ipsa insignia præ-
clara

Cant. 8, 6.

clara sacrum Euangelium assignat prudentibus illis virginibus, quæ ab aliis insipientibus discernuntur. Quapropter Ambrosius Serm. 14. in Psalm. 118. prudenti virgini dicit: *Ideoque & tu habeto semper lucernam ardentem, vel lucentem facem: si enim neque lucerna neque lampas tua luceat, Virgo stulta dicæris, nec introibis in thalamum tui superioris, sed remanebis in tenebris cæcitatæ, quasi qui oderis lucem, ne opera tua flagitiosa prodantur.* Tota in igne, tota in luce splendida FEBRONIAE virginitas est. Lampadem virginitatis in suo splendore tueri, res laboriosa est, & similis ^{Excitatio laborantis.} martyrio FEBRONIAE, nec sine magna patientia potest executioni mandari. Nouit ita esse Bernardus, qui Serm. de Assumptione concludit: *Qui ergo, protegente patientia, continenter viuunt, ipsi benè cum Apostolo protestantur, & dicunt: Quis nos separabit à charitate CHRISTI? an tribulatio? an angustia? an persecutio? an fames? an nuditas? an periculum? an gladius?* ^{Rom. 8. 35.} Vide quàm solidus sit continentium murus.

Speculum virginale FEBRONIAE, speculum infirmitatis & patientiæ.

CUm quis affigitur lecto, ardet febribus, acerbis doloribus pulsatur & verberatur, *cor suum* ^{Eccli. 38.} dabit in similitudinem picturæ, & in FEBRONIA quasi ^{28.}

Excitatio
agrotan-
tis.

certo & vero speculo statum suæ infirmitatis expres-
sum patienter considerabit. Consideret æger FEBRO-
NIAM virginem sibi adstare, & speculantem adhor-
tari, quemadmodum Tract. Augustinus de Visitat. in-
firm. Sermon. I. hortatus est: *Chare mi, ad modicum migra-
turus de mundo, tantam & tam ineffabilem benignitatem
Dei tui ne spernas, flagellum eius libenter suscipe. Flagel-
lat in se quod nescis, nec iniuste, iusta enim ipsius iudicia.*
Exprimit in se FEBRONIA, quod in mente & cor-
de ægrotantis contendit imprimere. Qualis FEBRO-
NIA, talis erat virgo Clara, quæ duos de triginta an-
nos, vt Surius memorat, continenter diris morbis
afflictata & flagellata est, nec tamen vniquam esse
conquesta traditur. Quin etiam in postrema infir-
mitate, quæ fuit tam molesta & grauis, vt septem-
decim diebus ne buccellam quidem traicere in
stomachum potuerit, cùm eam Reginaldus Con-
fessarius solaretur, & ad tolerantiam in diuturno
morbi martyrio cohortaretur, respondit: *Ex quo
Domini nostri IESV CHRISTI gratiam per seruum eius
Franciscum cognoui, nulla mihi infirmitas dira visa fuit,
nulla pœna molesta, nulla pœnitentia onerosa.* Verè my-
stica Febronia venerabilis Anna à IESV fuit, sanctæ
matris Teresiæ digna proles, nota satis in Hispania,
Gallia, & Belgio, morbis ita vexata, ita doloribus
afflictata,

Extrema
verba mo-
rientis.

afflictata, ut crebrò diceret: *In securum Purgatorium
utinam me Deus deduceret!* Scripsit illa, & simul se-
ipsam descripsit in Epistola ad Episcopum Cordu-
bensem. *Nunc, inquit, extremos patior dolores, & mi-
ror posse me ita vivere. Nec stare, nec iacere licet, sed repo-
instar serpentis. Semper ardeo, & in media & rigida hie-
me tota comburor. Flagellata undique sum, & undique
torqueor podraga, chiragra, hydrope, paralyti, quæ per to-
tum pertinet corpus, nec linguæ parcit.* Hoc FEBRONIAE,
hoc Annæ laborantis martyrium. Didicit ex iis, quæ
passa est, Anna, *Aut mori, aut pati, quemadmodum*
*mater & virgo Teresia virginem quoque & venera-
bilem matrem Annam edocuit.*

Leuamen columbæ gementis in labore
& morbo.

VIta humana similis FEBRONIAE est, dum a-
cerbis morbis pulsatur, febribus vritur, & di-
ris doloribus cruciatur. Hanc viuendi rationem a-
pud Euam omnes mortales inuenimus. Apud MA-
RIAM alia methodus viuendi est, quam quærimus,
dum salutamus: *Salve Regina, Mater misericordiæ, vita.*
Hæc quidem vita erat, quam pro Adalberto filio,
glorioso postea Martyre, cum puer iam deploratus
ex ardentibus febribus esset, parentes religiosi po-
stularunt.

stularunt. Referente enim Surio mense Aprili, vnamiter orarunt : *Non nobis Domina, non nobis viuat puer iste, sed clericus in Dei matris honorem portet iugum tuum.* Conualuit puer, cui vita & anima semper Virgo MARIA fuit. Expendit hunc vitæ titulum in suis Meditationibus Bernardus æger & semper infirmus: *Nos miseri tecum de cetero consolemur, tecum amodò Domina habitemus, te mentis visceribus amplectamur, quia tu es vita. Vita verò, quæ mortem superbix humilis vicisti, & nobis vitam gratiæ impetrafti. O certè vita amabilis, vita desiderabilis, vita delectabilis! O vita, quæ nutris*
Viaticum. *tuos cælestibus alimentis!* Hæc alimenta Eucharistica, hæc vitalia & immortalia sunt pabula, quæ offert laboranti & ægrotanti Regina gloriosa, vt si viuere velit homo, qui acutis morbis tangitur & verberatur, ardet & vritur febribus, recurrat ad Eucharistiam, ex qua vitam æternam hauriat : *Qui manducat hunc panem, viuet in æternum.*

Ioan. 6,
59.

Appareat speculum clausæ virginitatis & infirmitatis BLANDINA.




61. *Quid tibi cum toruo blanda est Blandina iuuenco?
Fallor: blanditur cornibus innocuis.*

Aaaa

EMBLEMATICA IMAGO LXI.

S. BLANDINÆ VIRG. CRUCIFIXÆ

EXPLICATA.


 ANCTA BLANDINA virgo sub Antoni-
 no in Galliis acerbos cruciatus pertulit:
 cumque pertrahi non posset ad vanum
 deorum cultum, post verbera & ignes
 retibus inclusa, & ligno crucis affixa, tauro obiici-
 tur, qui sacrae virgini appensa & irretita blanditur
 & simul subiicitur. Moris est apud lasciuos munda-
 nos, laqueos struere, ut dolis ac fraudibus incautas
 virgines capiant, sed frustra ante virgines oculatas,
 circumspectas, & in sublime eleuatas lasciuia retia
 expanduntur. Non petitur à lasciuo tauro virgini-
 tas, quæ carnis omnes blanditias atque delicias re-
 pudiat. Habet itaque tendiculas suas mundus, qui-
 bus improuidas virgines irretiat, & irretitas vene-
 tur; habet & suas Deus, quibus virginitatem custo-
 diat & seruet. Cum virgines Deus ad vitam solita-
 riam, monasticam & religiosam inuitat, ad crucem
 clausuræ vocat, & simul ad retia, quibus intra do-
 mum vel etiam intra monasterium continentur.
 Hæc enim retia omnium prima inuenit MARIA,

Euseb.
 Anton.
 Niceph.

Sympathia
 Maria &
 Blandina
 Artificum
 clausura
 virginalis.

cùm in sacra Præsentatione Deo oblata intra Sacra-
rium Dei se condidit & conclusit. Hæc virginum
Regina intra domum se conclusit, non in aditu, sed
in adytis & abditis domus Angelus eam inuenit, sa-
lutauit & honorauit. BLANDINA in cruce mystica
Maria est, quæ de cruce & cathedra virgines docet
id, quod antè dixerat Cyprianus lib. de Singularitate
Cleric. *Pudicitie retinaculis omnis obscenitas frænatur,
& compedibus eius calces furenti libidini statuuntur.*

CRUX BLANDINÆ, Crux status
virginitatis.

QValis esse mystica Blandina debeat, scribit ad
sacras virgines Augustinus. *Dominica virgo nul-
lis se virorum cuiuslibet ætatis, siue grauissimarum mulie-
rum præsentia, singulari habitaculo vel colloquio credat:
& cùm sola in tabernaculo consistit, clausis super se ianuis
sedeat, nullique virorum pulsanti faciliè ianuam suam pan-
dat, ne fortè in suspensionem turpissimam, aut in pudoris sui
naufragium cadat. Caueat à tauro lasciuo, qui inclu-
sam etiam & conclusam intra retia virginem adit &
inuadit. Mystica Blandina monialis est, cui compe-
tunt eius insignia, crux & retia, crux illa quam pa-
tiebatur, retia quibus illa inferebatur. Monialis cru-
cem monasticam patitur. Quid enim vita Religiosa
est,*

est, nisi laboriosa crux? Continetur intra retia, quibus illa à CHRISTO capitur, sicut & capta est, cui libro Reuelat. Birgittæ 4. cap. 12. dicit B. MARIA: *Sicut pastor cum fasciculo florum attrahit & allicit oues in domum, postea claudens diligenter domum, licet oues discurrant per ambitum, non tamen habebunt egressum, quia domus munita est parietibus, tectum altum, ianuaque clausa. Propter quod oues assuescunt comedere fœnum de manu pastoris: sic etiam factum est tecum: illa enim quæ* ^{Excitatio laborantis.} *antea videbantur impossibilia & difficilia, facta sunt leuia, in tantum, quod te nihil iam delectat sicut Deus. Accedit & Basilius libro de Vera virginit. In cubili, si hoc sabbatum celebres, integram te purissimamque custodies; sicque facile, inquam, virginitatem, rem omnium pretiosissimam, amplissimumque patrimonium habitura es. Accedit & Bernardus Sermon. 47. in Cantica: In horto virginitas, cui familiaris verecundia est, fugitans publici, latibulis gaudens, patiens disciplinæ. Denique in horto flos clauditur, qui in campo exponitur, spargiturque in thalamo.*

Speculum appensum S. BLANDINÆ virginis,
speculum humanæ infirmitatis
& patientiæ.

NOtanda S. Basilij sententia in Psalm. 74. *Sicut animalia noxia, nos ærumnæ petere & inuadere*

*contendunt nostram patientiam exercentes. Et quidem morbus non absimilis tauro est. Taurus quippe velox in cursu est, & morbus ita velociter currit, vt omnem anteuertat spem & opinionem benè valentis hominis, & præter spem & opinionem illum capiat & arripiat. Quòd si ferox taurus, dum inuadit, solet puluerem pedibus excitare, excitat etiam & morbus. Homo puluis & cinis est: quiescit puluis, dum valet, dum morbus ingruit, puluis humanæ naturæ agitur, & tunc temporis se cinerem homo facilè recognoscit. Confirmat hoc ipsum Gregorius 3. Parte Pastoral. cap. 13. & ait: *Infirmi-
tatis memoria reformatur, vt animus, qui extra se in elationem ducetur; cui sit conditioni subditus, ex percussâ quam sustinet carne memoretur.* Condicio quidem nostra plena miseriis est. Vnde & Iobus ait: *Homo natus de muliere, breui viuens tempore, repletur multis miseriis.* Irretitus ergo miseriis, & impetitus à morbis, *cor suum dabit in similitudinem picturæ*, in qua seipsum inspiciat, & virtute patientiæ suæ morbum immitem & ferum, mitem & suauem reddat, sicut BLANDINA mansuetum taurum reddidit. Huic virgini gloriosæ S. Clarus Abbas addiçtus erat, & compositus ad hoc speculum patienter tulit lethalem infirmitatem, in qua immensum exercitum candidi & niuei coloris super cellam,*

*Excitatio
agrotan-
tis.*

Iob 14, 1.

Eccli. 38,
28.

cellam, vbi iacebat, descendere contemplatus est. Quod cùm Clarus irreuerberatis oculis læto vultu inspiceret, virgo beatissima BLANDINA consolari eum cœpit, & vt tantum exercitum sequeretur, exhortabatur, quem non multò post secutus est. *Se-* Extrema
verba mo-
rientis.
quor, sequor, inquit.

Leuamen columbæ gementis in labore
& morbo.

CVM quis affigitur lecto, totus morbis intricatus, nec potest malis, quibus impetitur, extricari & expediri, habet causam vt amaro animo sit; quem vt reddat dulcem ac suauem, recurrat ad eam, quæ non modò dulcis ac suavis est, sed etiam ipsa suauitas ac dulcedo: conueniat illam, ac dicat: *Salue Regina, Mater misericordiæ, vita, dulcedo.* Verè dulcedo est, de qua Maximus Homil. de Ramis palmarum: *Ipsam MARIAM manna dixerim, quia est subtilis, splendida, suavis, & virgo, quæ velut cælitus veniens, cunctis Ecclesiarum populis cibum dulciorem melle defluxit;* secundum Dauidicum testimonium, *Non* Psal. 104.
37.
erat in tribubus eorum infirmus, quibus cæleste manna concedebatur; & vbi MARIA est, *salus infirmorum* est. Versat hoc ipsum verbum in suis Meditationibus Bernardus æger: *Verè dulcedo, quæ amaritudinem*
peccati

peccati expellis, impetrando gratiam quæ nobis gratia dul-
viaticum. corem acquirit. Hæc dulcedo in fonte suo gustatur,
 cum percipitur Eucharistia, ad cuius epulum in sta-
Psal. 33, 9. tu laboris & morbi nos inuitat Dauid. *Gustate,* in-
 quit, & *videte, quoniam suavis est Dominus.* Hunc fon-
 tem suauitatis ac dulcedinis ægris MARIA parat.
 Quòd si laborantes illapsu fontium delectantur &
 recreantur, habent in Eucharistia placida ac blanda
 fluenta gratiarum, quibus mulceantur & exhilaren-
 tur.

Appareat speculum periclitantis virginitatis &
 infirmitatis EVLALIA.



62. *Chris ti Sponsa vocor: tortorum pronuba turba
Curua age virgineas cuspide perde comas.*

Bbbb



1888

EMBLEMATICA IMAGO LXII.
S. EVLALIAE VIRG. CRVCIFIXÆ
EXPLICATA.



HARA CHRISTI sponsa EVLALIA, quæ Martyrol. Eulog. in memoria Sancto- rum.
Barcinone in Hispania, Diocletiano Im-
peratore, tredecim annos nata, forti con-

stantique animo fidem virginitatis suæ
sartam tectamque conseruauit, extensa in equuleo,
nodosis fustibus cæsa, candenti oleo perfusa, vn-
gulis ferreis laniata, calcis aceruo viua obruta, ac
tandem de mandato Daciani in suspendium crucis
acta, martyrium suum consummauit. Tunc, quem-
admodum canit Prudentius in suo Hymno,

Emicat inde columba repens

Martyris os niue candidior

Visa relinquere, & astra sequi,

Spiritus hic erat EVLALIAE

Lacteolus, celer, innocuus.

Inter elementa ignis, inter metalla fortissimum fer-
rum est. EVLALIA verò nec igni nec ferro cedit,
vtrumque cedit EVLALIAE, quæ post partam de
ferro & igne victoriam, in palma crucis triumphauit.
Victi succumbunt ferro, & ferro victoriam de-

bent qui sunt superiores in bello: EVLALIAE verò victoria, cùm ita suprema sit, vires excedit humanas, & Deo tribuenda est. Donum Dei virginitas

Sap. 8, 21. triumphatrix est. Crede Sapienti: *Scivi, quoniam aliter non possem esse continens, nisi Deus det: & idcirco adij Dominum, & deprecatus sum illum, & dixi ex totis praeordiis meis: Deus patrum meorum, da mihi sedium*

*Sympathia
Maria &
Eulalia
Artificum
cultura
virginalis.*

tuarum assistricem sapientiam. Hæc est diuina Sapientia, quæ virginitatem donauit MARIAE, in cuius vterum & ipsa delapsa est: *Sicut pluuia in vellus descendisti, vt saluum faceres genus humanum.* Habet cum laneo vellere virginitas consonantiam. Lana gelu & æstu vritur, fustigatur, oleo perfunditur, pectitur, texitur, suspenditur, vt excolatur. Sic culta, sic ex-culta gloriosæ EVLALIAE virginitas est.

CRUX EVLALIAE, Crux status virginitatis.

FORTIS mulier, quam Salomon describit & quaerit cap. vlt. Prouerb. *Quæsiuit lanam & linum, & operata est consilio manuum suarum. Manum suam misit ad fortia, & digiti eius apprehenderunt fusum. Gustauit & vidit, quia bona est negotiatio eius.* Negotiatur in lanæ puræ cultura, quæ in candida virginitate defudat, & circa eius cultum ita se gerit, quasi lanam colat, & pectendo atque nendo circa illam laboret.

Bona

Bona hæc negotiatio est, quæ fortis mulieris requirit & exigit omnes vires, ut carnis cupiditatem extinguat. Succurrit Cyprianus de Honore pudicit.

Nulla maior est victoria, quam ea quæ de cupiditatibus Excitatio
laboran-
tis.
refertur. Qui hostem vicit fortior fuit, sed altero: qui libidinem repressit, seipso fortior fuit. Qui inimicum prostravit, externum hostem percussit: qui cupiditatem depressit, hostem domesticum superavit. Malum omne facilius vincitur quam voluptas, quia illud quidquid est, horridum est, hoc blandum est. Magna victoria quæ Martyris triumpho non cedit, cum & ipsa virginitas gloriosum martyrium sit, testante hoc ipsum Ambrosio lib. 1. de Virginit. Non ideo laudabilis virginitas, quia & in Martyribus reperitur, sed quia ipsa Martyres faciat. Hæc virginitas dabat animos immaculato Dominico, de quo Theodoricus de Apoldia. Cum iter faceret, sciretque sibi positas ab hæreticis insidias, cantans & alacer occurrit hostibus. An non, inquit, martyrium pertimescis? Quid faceres, si nos te ad mortem abripiamus? Quibus ille, Rogarem, inquit, ne mortem mihi celerem afferretis, sed paulatim singula membra præscinderetis. Cupiebat similis esse EVLALIAE, qui lilia pro insignibus habet.

Speculum appensum virginis E VLALIAE,
speculum humanæ infirmitatis
& patientiæ.

*Excitatio
agrotan-
tis.*

CVM infirmus doloribus angitur, cùm discer-
pitur & quasi vnguibus dilaniatur, è crucis
tripode secum loqui crucifixam EVLALIAM putet:
CHRISTI sponsa vocor, meus sponsus vir dolorum
est, & per cruciatus ad eius nuptias accessus datur.
Si mecum velis admitti, necesse est vt in speculo
mei martyrij te inspicias, & mecum lecto tui dolo-
ris affixus, flammis febrium & dolorum acerbita-
tem patienter subeas & superes. Benè monet EVLA-
LIA: Sic itur ad astra, sic ad nuptias Agni aditus
patet, & datur. Ad hoc speculum EVLALIAE inspe-
xit se & composuit se Leocadia martyr & virgo,
quam Dacianus post gloriosum EVLALIAE marty-
rium veniens Toletum, in carcerem tetrum detru-
sit. Cùm Leocadia in carcere detineretur, reuoluit
animo equuleos, fustes, vngulas, flammis, & ignes,
& tandem crucis suspendium quod EVLALIA passa
fuerat, & in hac speculatione fuit compassione ita
tacta, vt formata cruce in lapide, & simul adora-
ta, instar EVLALIAE animam exhalaret. Non fudit
Leocadia sanguinem, & tamen martyr euasit, quo-
niam

niam se totam ad exemplum & speculum EVLALIAE martyris adaptavit & composuit. Nec dubitandum est, infirmum hominem posse per tolerantiam dolorum & morborum coronam martyrij sibi comparare. Testatur hoc ipsum Chrysostomus Homil. 3. in Epist. ad Thessalonic. *Quid enim, dic quaeso, cum ardens febris, nempe causer, te intus vexat & urit, & aliorum suadentium excutis incantationem, an non es redimitus coronam martyrij?* Qualis EVLALIA, talis & Leocadia, talis & anima quæ in lecto detinetur, febribus ardet, & doloribus disrumpitur. Disrumpebatur Fulgentius Ruspensis, & solum petebat: *Domine, da mihi hanc patientiam, & postea indulgentiam.* *Extrema
verba morientis.*

Leuamen columbæ gementis in labore & morbo.

SCinditur aratro terra, & inde spes incipit affulgere futuri fetus ac prouentus. Caro nostra terra est, & quidem illa siluestris tunc colitur, cum morbis acutissimis scinditur & secatur. Ne cultus & cultura terræ nostræ infructuosa sit, accedat etiam firma & certa spes, quam secum affert & importat illa, quæ Mater sanctæ spei est, & quam salutare in hæc verba mos in Ecclesia est: *Salve Regina, Mater misericordiae, vita, dulcedo, & spes nostra salve.* Spes
summa

summa nostra est, de qua Anselmus libro de Excellentia virginis cap. 6. inquit: *Velocior est nonnumquam salus inuocato nomine MARIAE, quàm inuocato nomine IESV vnici Filij Dei, & id quidem non ideò fit, quòd ipsa maior sit & potentior (nec enim ipse magnus & potens per eam, sed illa per ipsum, &c.) sed quia Filius est iudex omnium, & discernit merita singulorum. Inuocato autem nomine Matris, & si merita inuocantis non mereantur vt exaudiatur, merita tamen Matris merentur vt exaudia-*

Psal. 64, 6. tur. Hæc spes omnium finium terræ, & in mari longè secundum Deum est. Hanc firmam & stabilem spem salutat Bernardus & ipse infirmus in Meditationibus suis, & concludit: Ex quo est cor meum tuo dulcore sic inebriatum, gubernam illud cum tuo, & in sanguine Agni conserua, & in latere Filij tui colloca. Cor Marianum gladius pertransiit, & CHRISTI latus mucrone diro lanceæ perforatum est, & vtrique similis EVLALIA, & EVLALIAE conformis euadit virtute Eucharistiæ caro, quæ acutis morbis ac doloribus afflicta & exercetur, cum Eucharistia memoria viua sit eius, qui clavis, spinis & lancea scissus in cruce est.

Appareat speculum Angelicæ virginitatis & infirmitatis IVLIA.




Clœlia cœset eques animos iactare viriles :
 63. *Iulia si certet, illa pedestris erit.*

Cccc

EMBLEMATICA IMAGO LXIII.

S. IVLIAE VIRGINIS CRVCIFIXÆ
EXPLICATA.


 VM Vandali Carthaginem per tyrannidem occupassent, IVLIA virgo ad Corsicam insulam deducta est. Nautas cum IVLIA venientes Felix tribunus negare CHRISTVM coëgit; coëgit & IVLIAM, quæ tamen fida ac fidelis perstitit: quam ob causam alapis cæditur, crinibus laniatur, vulneribus afficitur, & tandem cruci affigitur. Nautæ circa fidem naufragauerunt: at IVLIA nullum passa est fidei naufragium; nauem suam in tuto posuit, & portum cepit. Fortis mulieris typus nauis est. *Facta est quasi nauis institoris*, Prou. 31, *de longè portans panem suum*. Nemo est qui nesciat & infitias eat, in laboribus & periculis nauem semper versari. Nauis ortum suum à terra habet, si materiam eius consideres: in aliud elementum translata, fit peregrina in mari, & in mari semper versatur, semper peregrinatur, vndis quatitur, fluctibus quasiatur, ventis agitur, tempestatibus obruitur, impingit in Syrtes, scopulis inhæret, naufragium etiam in portu sæpè patitur. Fortis mulier IVLIA, cuius

Martyrol.
 Vuard.
 Petrus
 Natalis.

Prou. 31,
 14.

ius typus nauis est, quam secum in imagine præfert, & ostendit multis periculis expositam virginitatem virtute sanctæ Crucis immunem fuisse, & euasisse.

*Sympathia
Maria &
Iulia Ar-
tificum il-
lata vir-
ginitatis.
Prou. 31,
14.*

Regina cunctarum Virginum MARIA est, quæ, dum CHRISTVS pateretur, iuxta crucem ipsa stetit, vt sanctam virginitatem sub vmbra crucis custodiret, ac custodiendam ostenderet. Illa, illa *facta est, quasi nauis institoris*, ad cuius exemplum nauem suam IULIA composuit atque portauit, maiori quidem miraculo, quàm est illud apud D. Augustinum lib. 10. de Ciuitate Dei cap. 16. *Nauim, qua simulacrum Martis uehebatur, multis hominum boumque conatibus immobilē redditam, vna muliercula zonâ alligatam ad suæ pudicitie testimonium mouit & traxit.*

CRUX IVLIAE virginis, CRUX status virginitatis.

QVamuis antiqua Susanna viro suo coniuncta foret, ita se sanctè & castè gessit, vt eius nomen virginitatem sonaret. Lilium sonat gloriosus titulus & appellatio Susannæ, & lilium typus virginitatis est, ac proinde scriptum legimus: *Sicut lilium*
Cant. 2, 2. inter spinas, sic amica mea inter filias. & rursus: *Ego flos campi, & lilium conuallium.* Quanti laboris sit, virginitatis nomen periclitari, vel ipsa Susanna testis est, quæ

quæ cum à lasciuis senibus vim & violentiam in pomario pateretur, ingemuit & exclamauit: *Augustiæ* Dan. 13, 1.
sunt mihi vndique. Et quidem, cum vetus ac senex homo singulis virginibus adsit, ad lapsum urgeat, & ad ruinam impellat, semper IULIA, semper Sufanna, semper lilium virginitatis vim patitur, ac Excitatio laborantis.
 semper necesse est clamare & orare: *Domine vim patior, responde pro me.* Quapropter in illo libro quem ad sacras Virgines dedit Augustinus scribit: *Domini- ca Virgo, ob extinguendas libidines, vel omnes lasciuie flammæ, ieiuniis & abstinentiæ debet operam dare, orationibus diu noctuque insistere, si cupit & laqueos diaboli insidiantis euadere, & ad promissa virginitatis præmia peruenire.*

Speculum appensum virginis IULIÆ, speculum humanæ infirmitatis & patientiæ.

NE despondeat æger animum, proponat sibi virginem IULIAM è cruce sua loquentem: Bono animo esto æger, per exilium ad patriam, per maria ego ad portum veni, & tu similiter venies. Pœna exilij infirmitas est, quam meditatio & contemplatio patriæ cælestis leuem & facilem reddit. Maris æstus morbus est, certa portus expectatio excitat nauigantem, animat laborantem. Post mole-

Excitatio
agrotan-
tis.

Extrema
verba mo-
rientis.

Esther 15,
3.

Itam nauigationem gratior portus est, & post laboriosum exilium iucundior redditur patria. Benè Gregorius 3. Parte Pastor. cap. 13. *Dicendum est agris, vt si caelestem patriam suam esse credunt, necessariò in hac labores velut in aliena patiantur.* Morbos quidem ac labores in patria aliena patiebatur S. Catharina Senensis, mortique iam vicina, sicut eius Historia narrat, cum videret Fratres de suâ infirmitate morteque nimis tristes ac sollicitos, instar alterius IVLIAE erupit in illam vocem: *Non debetis, filij charissimi, de meo transitu contristari, imò potiùs congaudere mecum: sed congratulamini mihi, quia dimitto locum pœnarum, et vado ad requiescendum in mari pacifico Deo æterno.* Mare pacificum Deitatis, & Trinitatis mysterium, quod erat in desiderio venerabili Annæ de S. Bartholomæo, & in eo requieuit ipso die sanctissimæ Trinitatis, cui addictissima erat. Eo die feliciter nuper obiit chara matris Teresiæ filia, quæ & claret miraculis. Claret sancta parens vna & altera prole, vna & altera Anna, Anna de IESV, & Anna de S. Bartholomæo, non se-
cùs atque olim Esther *assumpsit duas famulas, & super vnâ quidem innitebatur, quasi præ deliciis et nimia teneritudine corpus suum ferre non sustinens; altera autem famularum sequebatur dominam, defluentia in humum vestimenta sustentans.* In vlnis & brachiis Annæ de S. Bar-

S. Bartholomæo , nimia teneritudine corpus suum
 ferre non sustinens S. Tereſia, obiit, ſequēbatur Ma-
 trem mater Anna de I E S V , ſacrum Ordinem glo-
 rioſè in terris ſuſtentans. Glorioſa trias , Tereſia , &
 vtraque Anna quieſcens in pelago diuiniffimæ Tri-
 nitatis. Non itur ad illud mare pacificum , niſi per
 ſæuum pelagus, quod I V L I A virgo tranſiuit. Sæuum
 laborum & ſimul morborum pelagus tranare priùs
 debemus , vt ad illud tranquillum & ſerenum Di-
 uinitatis mare perueniamus. CHRISTVS ipſe de ſe
 dicit : *Veni in altitudinem maris , & tempeſtas demerſit* Pſal. 68, 3.
me. Emerſit tamen cruce ſua , rate vectus & inue-
 ctus in ſecuriſſimum portum , & ſimul in mare pa-
 cificum, vbi nullus eſt morbi æſtus, nullus afflictio-
 nis fluctus, nulla mortis tempeſtas, nullum ſubmer-
 ſionis periculum.

Leuamen columbæ gementis in labore
 & morbo.

NAuigamus omnes dum viuimus ; & dum æ-
 grotamus , in ſcopulos maris incidimus , &
 quidem redacti in tantum vitæ diſcrimen nauigan-
 tium more , clamemus , & MARIÆ opem pariter
 imploremus , dicamùſque : *Ad te clamamus exules filij*
Eua. Adiungit ſe Bernardus morbo afflictus claman-
 tibus,

tibus, & in has voces prorumpit: *Clamamus ad te, quæ leuas nos à facibus peccatorum, quæ nos consolaris in cunabulis vagientes, lactas paruulos esurientes. Clamamus. Quare non clamaremus, Domina? qui vulnera sustinemus, plagas sentimus, qui inimicis vndique circumdamur. Clamamus angustiati, miseris infinitis oppressi.* Resonat in terra echo, & missos ad se clamores remittit & reii-
cit: in mari echo non est, & susceptas in se voces admittit, nec remittit. Cùm in morbis & laboribus repellit mundus clamores, recurramus ad MARIAM, vbi repulsa non est, vocem edamus in mari, & cum Ecclesia dicamus: *Ad te clamamus.* Hæc vox laborantium & ægrotantium, hic clamor incidentium in scopulos est, vt tantis exempti periculis, humanæ vitæ nauigationem iam cœptam prosequantur, & in tuto ac securo portu nauem suam collocent & constituent: nauem, inquam, suam de terra in cælum
Viaticum. panem cælestem portantem, quem extremè laborantes ægrotantesque acceperunt, nauigarunt, atque cælestem portum tenuerunt.

Appareat speculum excultæ virginitatis & infirmitatis BENEDICTA.




64. *Este procul thalami; procul hinc absiste Dione:
Crux mihi Amyclæo charior illa toro.*

Dddd

EMBLEMATICA IMAGO LXIV.

S. BENEDICTÆ VIRG. CRUCIFIXÆ

EXPLICATA.

 ANCTA BENEDICTA virgo in agro Se-
 sonico virginitatem suam illustri crucis
 martyrio decorauit. *O quàm pulchra est*
casta generatio cum claritate ! immortalis est
enim memoria illius , quoniam nota est apud Deum & ho-
mines. Hæc species & pulchritudo in BENEDICTA
 virgine splendet , quæ tota pura & munda in ara
 crucis comparet. Nota virgo Deo , nota hominibus ,
 quam non obscurat nec obumbrat labes vlla , nec
 vlla labis suspicio. Symbolum virginitatis lilium
 est, quod in se candorem habet , & odorem suauem
 emittit. Consonantiam habet cum lilio , quæ can-
 dida in cruce apparet , & simul BENEDICTA est,
 quæ benè apud omnes audit , de qua dicunt benè
 omnes, benè loquuntur. Quanti pendenda sit bona
 virginitatis opinio, vel ex hoc intelligi potest, quod
 ait Ambrosius lib. de Instit. virg. cap. 6. *Maluit Do-*
minus omnes de sua generatione , quàm de matris pudore
dubitare. Verè Iuditha Maria , de qua scriptum es-
 se legimus : *Erat autem eleganti aspectu nimis. Et erat*

Martyrol.
 Maurolin.
 Abbat.
 Mossan.

Sympathia
 Maria &
 Benedicta
 Artificum
 laudabilis
 virginita-
 tis.

Iudith 8,7.

*hæc in omnibus famosissima, quoniam timebat Dominum
valdè, nec erat qui loqueretur de illa Verbum malum.
Non solum hoc, sed & illam omnes pariter benedi-
cebant, cui nomine omnium dixerat olim Ozias:*

*Iudith 13,
23.*

*Benedicta es tu filia à Domino Deo excelso præ omnibus
mulieribus super terram. Benedictus Dominus, qui crea-
uit calum & terram, qui te direxit in vulnera capitis
principis inimicorum nostrorum: quia hodie nomen tuum
ita magnificauit, vt non recedat laus tua de ore hominum.*

CRUX BENEDICTÆ virginis, Crux status virginitatis.

*Ecclesi. 41,
15.*

PRæscribitur viro nobili, vt curam habeat de
bono nomine. Quid nobilius, quid splendi-
dius virtute virginitatis, quæ soror est Angelorum,
& homines in classẽ cælestium spirituum trans-
fert. Satis rectè Nazianzenus in laudem Basilij di-
cit: *Eximia res est virginitas & celibatus, atque in An-
gelorum naturæ singularis ordine debet censerì. Accedit
& Cassianus lib. 6. Institut. Monastic. Nulla virtute
tam propè carnales homines spiritualibus Angelis imitatio-
ne conuersationis æquantur, quàm merito & gratia castita-
tis, per quam adhuc in terra degentes, habent, secundum
Apostolum, municipatum in calis, quem deposita corrupte-
la carnali habituros Sanctos promittitur in futurum, hîc
iam*

*Excitatio
laboran-
tis.*

iam in carne fragili possidentes. Quid nobilius, quid illustrius virginum & Angelorum Regina? Hæc tanti nomen suum fecit, ut in gratiarum actionem pro illo modulata in montanis sit: *Magnificat anima mea* Luc. 1, 47. *Dominum, & exultavit spiritus meus in Deo salutari meo. Quia respexit humilitatem ancille suæ; ecce enim ex hoc beatam me dicent omnes generationes: quia fecit mihi magna qui potens est, & sanctum nomen eius.* Ditaui MARIA Deum virginitate, ditaui donis, donauit nomine. Nomen virginis donum Dei est, & idcirco adscribitur Deo & diuino eius nomini: inquit enim, *& sanctum nomen eius.* CHRISTVS in cruce patiens sibi nomen acquisiuit, acquisiuit & MARIA. *Cum* Cant. 1, *esset Rex in accubitu suo, nardus mea dedit odorem suauitatis.* ^{12.} Cum Rex in lecto crucis accumberet, nardus Mariana simul bonæ famæ iucundum misit odorem. Quæ ergo Mariana es, *curam habe de bono nomi-* Eccli. 41, *ne.* Vbi cura, crux ibi appareat necesse est: & qui- ^{15.} dem sine cruce virginitas tuta non est, cruce insignita virgo secunda, & simul illa ore omnium BENEDICTA proclamatur, & applausibus excipitur.

Speculum appensum virginis BENEDICTÆ,
speculum humanæ infirmitatis
& patientiæ.

VOcatur ad speculum æger, & monetur vt in speculo appenso formam humanæ nuditatis inspiciat, & dicat: *Nudus egressus sum de vtero matris meæ, & nudus reuertar illuc.* Reuertitur in terram illam, quæ spinas & tribulos generat. Et quidem terra nostra mortalis, cùm primæ subiaceat maledictioni, spinas & tribulos gignit, infirmitates scilicet & morbos, qui hominem ægotantem pungunt.

Iob 1, 21. vnde & infirmus Dauid: *Conuersus sum in ærumna mea, dum configitur spina.* Nouit patientiæ virtus in flores tribulos, in rosas conuertere spinas. Conuertit & illa, quæ cùm esset languida & patiens, assistentibus sibi dixit: *Fulcite me floribus, stipate me malis, quia amore langueo.* Languebat in cruce CHRISTVS, & ita languebat, vt spinis & tribulis pungeretur simul & coronaretur, nihilominus eius humanitas ait, *Lectulus noster floridus.* Hic lectus, hic thorus BENEDICTÆ sponsæ est, & eius animæ, quæ cùm CHRISTO laborat & infirmatur, & virtute suæ patientiæ ardentes febres quasi rosas & flores censet, memor sancti martyris Tiburtij, qui pauimentum candem-

Psal. 31, 4.

Cant. 2, 3.

Cant. 1,
16.Excitatio
agrotan-
tis.

candentibus stratum carbonibus nudis pedibus calcavit, & cum se signo sanctæ Crucis munivisset, per prunas nudis gressibus incessit. Dum incederet, conuersus ad Tyrannum ait : *Disce ex hoc solum esse Deum, quem Christiani colunt : prunæ enim mihi flores videntur.* Magnum assistentis diuinitatis argumentum est, cum prunæ vertuntur in flores, & febres ardentes rubeas commutantur in rosas, quas fert omni tempore, etiam brumali, patientia.

*Extrema
verba morientis.*

Leuamen columbæ gementis in labore
& morbo.

HÆc laborantis & ægrotantis consolatio est, ut prorumpat in alta aliquando suspiria, interdum sub onere, quam patitur, infirmitatis, diræ ac duræ mortis furto spoliandus, latrocinioque denudandus gemat, vel etiam fleat. Prouidit autem Deus laborantibus & ægrotantibus de gloriosa cæli Regina, quæ suspiria, gemitus & fletus miserorum excipiat. vnde & miseri dicunt : *Ad te suspiramus gementes & flentes in hac lacrymarum valle.* Benè in suis Meditationibus Bernardus æger : *Suspiramus de tam bonæ Matris absentia, venire ad te Domina cupientes. Suspiramus ad te, videre Filium tuum affectantes.* Rogat : *Quis ergo ad te, Domina, non suspirabit ? Amore suspiramus*

ramus etiam, & dolore. Undique nos angustia premunt. Vbi MARIA abest, adest gemitus. Vbi non est mulier, ingemiscit egens & ager, teste cap. 30. Ecclesiastico. Cum autem dixerit ipse cap. 27. Volatilia ad sibi similia conueniunt, conueniet sacra columba MARIAE, si gemat in morbo & labore columba, & flens & gemens adiungat se Ecclesiae, & dicat: Ad te suspiramus gementes & flentes in hac lacrymarum valle. Hæc vox afflictorum, qui solatium suspirantes, gementes & flentes quærunt apud eam; quæ primam expulit maledictionem, & eius loco benedictionem salutarem attulit, & contulit benedictum illum panem, ex quo vita nostra æterna pendet.

Viasicum.

Appareat speculum virilis virginitatis & infirmitatis WILGEPHORTIS.



65. *Purpureum quæ barba decus violauerat oris ,
Hæc tibi non fracti pectoris omen erat .*

Eeee

EMBLEMATICA IMAGO LXV.

S. VVILGEPHORTIS VIRGINIS

C R V C I F I X Æ

EXPLICATA.



ANCTA WILGEPHORTIS virgo, Regis Molan. ad
 Portugalliæ filia, pro defensione Fidei & Vfuard.
 pudicitia decertans, à CHRISTO cruci- Martyrol.
 fixo & simul deformato postulauit, vt se-
 ipsam deformaret, ne ad humanas nuptias expete-
 retur. Pro voto ac desiderio suo res accidit: tota bar-
 bata comparuit, & in CHRISTVM deformatum to-
 tam seipsam transtulit & transformauit. Filia Regis
 erat, quæ cultum non quærebat externum. *Omnia* Psal. 44,
gloria eius filia regis ab intus. Quid simile refert Gre- 14.
 gorius lib. 4. Dialogor. cap. 13. Gothorum namque
 temporibus Galla huius vrbs nobilissima puella, Sym-
 machi Consulis ac Patritij filia, intra adolescentiæ tempora
 marito tradita, in vnius anni spatio est eius morte vidua-
 ta. Quam dum, feruente mundi copia, ad iterandum tha-
 lamum & opes & ætas vocaret, elegit magis spiritalibus
 nuptiis copulari Deo, in quibus à luctu incipitur, sed ad
 gaudia æterna peruenitur, quàm carnalibus nuptiis subii-
 ci, quæ à letitia semper incipiunt, & ad finem cum luctu

tendunt. Huic autem cùm valdè ignea conspersio corporis inesset, cœperunt Medici dicere, quia nisi ad amplexus viriles rediret, calore nimio contra naturam barbas esset habitura, quod ita quoque factum est. Concludit Gregorius : Sancta mulier nihil exterius deformitatis timuit, quæ interiùs sponsi cælestis speciem amavit ; nec verita est, si hoc in illa fœdaretur, quod à cælesti sponso in ea non amaretur. Non est viduitas, & multò minùs non est virginitas vera, quæ externam speciem, quæ externum curat ornatum. Rationem reddit Cyprianus lib. de Bono pudicit. Pudicitia nihil ornamentorum querit, decus suum ipsa est. Hæc nos commendat Domino, coniungit CHRISTO, beata ipsa, & beatos efficiens apud quos habitare dignatur, quam numquam accusare possunt, nec qui eam habuit, nec qui eam non habuit, venerabilis etiam hostibus suis, dum illam multò magis mirantur, quàm illam expugnare non possunt. Et quidem mirabile est, quòd cùm B. MARIA adesset CHRISTI passioni, & summa hostilitas foret in eius crucifixum Filium, inter hostiles incursus iuxta crucem firmiter viriliterque consisteret, hostibus ipsis venerabilis & admirabilis. Qui WILGEPHORTEM videt, corde & animo viraginem MARIAM videt : imò & CHRISTVM ipsum, qui in vtraque erat, in vtraque latebat. Non solum Christiano Paulo licet dicere de se, *Vino ego,*
iam

Sympathia
Maria &
Vilge-
phoris
Artificum
virilis
virgini-
tatis.

iam non ego, viuit in me CHRISTVS. Sanctorum ac Sanctarum singulis affirmare fas est; *Viuit in me* CHRISTVS. CHRISTVS igitur, quem in animæ suæ sacrario WILGEPHORTIS occultauerat, foras in cruce per amorem virginitatis emisit, & simul ostendit, virginitatem esse debere virilem. Huc pertinet quod ait Bernardus de Modo benè viuendi, Serm. 9. *Ani-
mus in corporis gestu apparet: gestus corporis signum est
mentis: gestu corporis animus proditur.*

CRUX WILGEPHORTIS virginis, Crux
status virginitatis.

Feminæ cultrices curiosæ sunt vanæ suæ pulchritudinis: quam si natura negauerit, vel donatam iam abstulerit, extremum esse laborem arbitrantur. *Mulierem fortem quis inueniet*, quæ tam forti ^{Prou. 3, 10.} animo sit, vt formam pulchritudinis suæ parui faciat & contemnat? Fortis virgo non est, cui propria species placuerit: nec refert illa in se sponsum virginitatis, qui cum speciosus forma præ filiis hominum esset, seipsum in passione sua deformauit. Hæc mulier vana est, & quidem de illarum numero, quæ curantes speciem suam, non attendunt crucifixum, sicut lib. 6. Reuelat. S. Birgittæ cap. 52. Virgo Dei Mater aduertit. *Verè tales mulieres*, inquit, *non considerant*

faciem eius , quando stetit viuus & mortuus in cruce sanguineus & pallidus de pœnis , nec curant de opprobriis , quæ ipse audiuit , nec de morte contemptibili quam elegit.

*Excitatio
laboran-
tis.*

Fortis virgo quæ vsurpat verba Augustini lib.4. Confess. cap.34. *Pulchras formas & varias , nitidos & amœnos colores amant oculi. Non teneant hæc animam meam ; teneat eam Deus qui fecit hæc bona, sed ipse est bonum meum , non hæc.* Fortis virginitas, quæ totas viriles Agnetem & Agatham reddidit , quarum Ecclesiasticum Officium quasi de viro Martyre legitur & cantatur. *Beatus vir , qui non abiit in consilium impiorum.* Displicuit vtraque mundo , placuit Deo , qui pudicitiam diligit, sed talem , qualem de Singularitate Clericor. Cyprianus describit : *Pudicitia semper ornatur solo pudore ; benè tunc conscia de pulchritudine, si improbis displicet.*

Psal. 1, 1.

Speculum appensum virginis VVILGEPHORTIS,
speculum humanæ infirmitatis
& patientiæ.

CÆlestes nos esse cupit & optat Paulus Apostolus , qui cùm esset ipse cælestis , accepit istud oraculum , *Virtus in infirmitate perficitur.* Et quidem ritu cælesti, quando laborat & ægrotat homo , cum eodem Apostolo dicit : *Cùm infirmor, tunc potens sum.*

*2. Cor. 12,
9.*

*2. Cor. 12,
10.*

Ostendat

Ostendat se virum æger, & in carne sua infirma ^{Excitatio agrotantis.} animos viriles gerat. Fateatur ipse de se, quod de se ^{Matth. 26, 41.} passus est CHRISTVS: *Spiritus quidem promptus est, caro autem infirma.* Caro infirma spiritum non debilitabat, robustus potius spiritus carnem debilem excitabat. Hoc ipsum accidere solet ægro, cui verè dicere licet: *Viuo ego, iam non ego, vivit in me* CHRI- ^{Gal. 2, 20.} STVS. Rectè Ambrosius in Psalm. 37. *Noli ergo timere carnis infirmitatem, quia sanctus, cum infirmatur, potentior est.* Potentior sanè, robustior & virilior in lecto crucis WILGEPHORTIS visa est, & quisquis eam imitari lecto affixus cupit, *cor suum dabit in similitudinem picturæ.* Dabat & aptabat cor suum in similitudinem præsentis imaginis sancta virgo Elisabetta, quæ inter morbos & dolores acutissimos tota virago, Wilgephortis mystica apparuit, sicut eius historia tradit. Hæc virgo & simul virago sorores è lectulo doloris sic affata est: *Nolite mirari, charissimæ,* ^{Extrema verba moriens.} *super infirmitatibus meis, sicut homines imperiti; neque diffidatis gratiæ Dei in me, propter castigationes eius quas sustineo, & sæpè sustinui in medio vestri. Conscientia mea bona est apud Dominum, & certissimè agnosco, quòd per ea quæ patior, preparat & ornat coronam meam Dominus in regno suo. Hanc coronam in cruce & per crucem WILGEPHORTIS sibi promeruit, & eandem affixa lecto*

lecto virilis Elisabetha in doloribus & morbis me-
rebatur.

Leuamen columbæ gementis in labore
& morbo.

VIs in oculis Reginae gloriosæ est , ad quos re-
currit & recurrere docet Ecclesia ægros , cū
ait : *Eia aduocata nostra , illos tuos misericordes oculos ad
nos conuerte.* Recurrit Bernardus æger , & in Medi-
tationibus inquit : *Cur non offertis vos oculis Virginis ,
si vultis perfectam recipere medicinam ?* Præfert in vul-
tu & oculis gloriosa Regina , quanta virgo & quanta
virago sit , & habet hanc vim , vt animas in carne
infirmas degentes , robustas ac viriles efficiat , red-
datque per omnia similes WILGEPHORTI , quæ
2. Cor. 12,
9. dum in cruce laborat , vsurpat vocem Apostoli , *Cū
infirmor , tunc potens sum ;* & addit , *Virtus in infirmi-
tate perficitur.* Hæc virtus Eucharistiæ , & simul MA-
vaticum. RIAE est , vt cor humanum confirmet , & pectus
infirmum reddat omnino virile.

Appareat speculum consensus virginalis & infir-
mitatis MARTHA & MARIA.



66. *Concordes animas, quibus vnum est viuere Christus,
Quid mirum est vno claudere fine dies?*

Ffff

EMBLEMATICA IMAGO LXVI.

SS. MARTHÆ ET MARIÆ

CRUCIFIXARVM

EXPLICATA.

COMPARENT MARTHA & MARIA, am- Menolog.
 bæ sorores, ambæ virgines, ambæ Spiritus sancti sponsæ, quæ pro defensione Fidei & virginitatis suæ constantes & unanimes mortem crucis subierunt. Satis benè Augustinus Serm. de Laudibus Crucis exclamat: *Grande & profundum mysterium Crucis, & ineffabile atque inseparabile vinculum charitatis.* Mira res est, quòd sorores illæ duæ, MARTHA nimirum & MARIA, in ipsa præsentia CHRISTI dissenserint inter se, cùm querula MARTHA dicat, *Domine, non est tibi curæ, quòd soror mea reliquit me solam ministrare? Dic ergo illi, ut me adiuvet.* Necdum CHRISTVS exaltatus in cruce fuerat, cuius virtute vinculum puritatis, nexuque charitatis inter sorores duas intercessurus erat. Iam ergo virgines inter se MARTHA & MARIA, intercedente passione, conuenerunt, quarum vna pax est, vna crux virginitatis & pudicitiae. Vbi vna virginitas, & vna pudicitia est, deesse animorum &

Luc. 10.

40.

voluntatum consensus nequit. Fauet Cyprianus de Bono pudicit. *Pudicitia, inquit, est honor corporum, ornamentum morum, vinculum pudoris, fons castitatis, pax*

*Sympathia
Maria &
sororum
virginum
Artificum
unionis
virginalis.*

domus, concordiae caput. Regina virginum MARIA secum & in se MARTHAM & MARIAM complexa est, in cuius honorem & gloriam, cum in caelum assumitur, MARTHAE & MARIAE Euangelium legitur & cantatur, & simul ostenditur, sorores duas, alias inter se dissidentes, in vna eademque virginitate conuenire facile posse. Conuenerunt inter se MARTHA simul & MARIA, quarum idem animus est, eadem passio, quae verè illas germanas sorores fecit. Cùm CHRISTVS crucifixus est, adfuit MARIA, MARTHA defuit: iam verò crucifixo CHRISTO, duae sorores MARTHA & MARIA infixae & affixae cruci assistunt.

CRUX MARTHAE & MARIAE, Crux status virginitatis.

CHRISTVS, qui MARTHAM & MARIAM olim composuit in Euangelio, suggessit S. Birgittae lib. 6. cap. 65. quid facto opus esset, vt in vnam eandemque personam MARTHA & MARIA conuenerent. *Qui perfecta desiderat esse Maria, debet prius esse Martha laborando corporaliter; & scire debet prius resistere*

*Excitatio
laborantis.*

sistere desideriis carnis, & tentationibus diaboli obuiare,
 & postea potest cum deliberatione ascendere ad gradum
 MARIAE. Qui enim non est probatus & tentatus, &
 qui non vicerit motus carnis suae, quomodo potest iugiter
 caelestibus inherere? Hoc ipsum mysterium indicat
 proposita imago, in qua cruci affixa MARIA quie-
 scit, MARTHA verò in crucem assumpta ascendit,
 vt MARIAE gradum & quietem attingere queat.
 Quàm bonum & quàm iucundum, habitare so-
 res in vnum! Virgo cogitat quæ Domini sunt, vt sit san- 1. Cor. 7.
 cta corpore & spiritu. Ad hoc vt sancta corpore sit, la- 34.
 borat, & desideriis carnis reluctatur; & vt sit sancta
 simul spiritu, caelestibus continuò inheret. Cùm re-
 luctatur, MARTHA crucifigitur. Qui sunt CHRISTI, Gal. 5, 24.
 carnem suam crucifixerunt cum vitiis & concupiscentiis.
 Cùm autem adhæret caelestibus virgo, confixa est
 instar Apostoli, qui dicit: CHRISTO confixus sum Gal. 2, 19.
 cruci. Consensus virginalis MARTHAE & MARIAE
 planè consistit in eo, vt virgo carnem suam cruci-
 figat, & spiritum suum CHRISTO affigat, quiescat,
 & gloriatur in consortio eius qui dicit: Mihi autem Gal. 6, 14.
 absit gloriari, nisi in cruce Domini nostri IESV CHRISTI.

Speculum appensum virginum MARIAE
& MARTHÆ, speculum humanæ
infirmittatis & patientiæ.

R Espondent sibi virginalia specula appensa
MARIAE scilicet & MARTHÆ, in quibus
corporis & animæ effigies exprimuntur. Caro &
anima germanæ sorores sunt: carnem MARTHA,
MARIA animam repræsentat. MARTHA sollici-
ta est, nec quiescit; MARIA verò curis omnibus re-
nuntians, ad pedes CHRISTI confugiens, secura
quiete fruitur. Hæc in omnibus seruanda forma, vt
si caro sollicitata morbis nesciat seruare quietem,
illam quærat apud CHRISTVM anima, inuentam
teneat. Et quidem cùm MARIA Dei mater è viu-
is abiit, in eius infirmitate eluxerunt MARIA & MAR-
THA, vt in lecto laboraret, & in CHRISTO requie-
sccret, ac proinde in Assumptionis honorem sacrum
Euangelium MARIAE & MARTHÆ recitatur. Fe-
lix æger, cui assistunt MARTHA & MARIA, dicunt-
que Seruatori: *Ecce quem amas infirmatur*. Præua-
leat infirmæ carni fortis & potens anima, præua-
leat MARTHÆ MARIA. Tunc præualet, cùm et-
iam sanctis operibus, quæ sanus & incolumis æger
præstare poterat, infirmitatem, quam ex diuina vo-
luntate

Ioan. 11, 3.

Excitatio
agrotan-
tis.

luntate patitur, anteponit. Præstat, si Deo placet, in lecto ægrum otari, quàm sanum extra lectum negotiari. Vnum certè est necessarium, diuinum exequi beneplacitum. Et quidem infirmus Iobus, testante D. Chrysostomo, magis Deo gratus exitit, cùm plenus vlceribus otia retur, quàm cùm sanus & diues eleëmofynis elargiendis studeret. Ea propter venerabilis Pater Auila Sacerdoti in lecto iacenti scripsit: *Ne quæso respicias ad id quod faceres si sanus esses, sed cogita potiùs quàm placiturus sis Deo, si in morbo tuo cum voluntate Dei te conformes. Et si purè, vt equidem reor, Dei voluntatem queras, quid amplius tibi confert, sanum esse quàm ægrum, cùm eius voluntas omne nostrum sit bonum? Vbi omne bonum est, ibi regnum, ibi requies nostra est, & idcirco cùm oramus, Ad-* Matth. 6.
ueniat regnum tuum, consequenter supplicamus, Fiat 10.
voluntas tua sicut in cælo, & in terra: ex qua quidem voluntate totum bonum nostrum pendet. vnde & B. Martinus iam iam obiturus dixit, Fiat voluntas tua. Extrema
 verba morientis.

Leuamen columbæ gementis in labore
 & morbo.

SORORES duæ, MARTHA videlicet & MARIA, quæ cum fratre suo Lazaro laborabant, cupientes CHRISTVM videre, vt eius veneranda præsentia
 omnis

Ioan. 11, 3. omnis morbus fugaretur, scripserunt, *Ecce quem amas infirmatur*. Et quidem dum miser homo laborat, & malè habet, ductus eodem spiritu quo sorores regebantur, confugit ad eam quæ *salus infirmorum* est, & postulat: IESVM *benedictum fructum ventris tui nobis post hoc exilium ostende*. Refert Bonauentura in Vita S. Francisci, quòd cùm mulier grauissimis partus doloribus vexaretur, ex eius consilio recitauit Antiphonam, *Salue Regina*. Cùm illam deuotè enuntiaret, pulchellum infantem enixa est, & simul recreata ad hanc vocem, IESVM *benedictum fructum ventris tui nobis post hoc exilium ostende*. Exclamat hoc loco Bernardus: *O venter mirabilis, qui potuit capere Saluatorem! ô venter laudabilis, qui potuit recipere Redemptorem! Hunc eundem recipit, qui decumbit, & Viaticum*. Viaticum sumit, quiq̃ue, accepto sacro Viatico, cogitat adesse virginem, ac dicere CHRISTO suo: *Ecce quem amas infirmatur*. Respondeat & ipse cum eodem D. Bernardo: *Fructus tuus, Domina. Hunc IESVM benedictum fructum ventris tui nobis post hoc exilium ostende, vt videndo ipsum habeamus*.

Appareat speculum virginalis integritatis & infirmitatis **TARVLA** cum virginibus.



67. *Malo mihi tortor violet quam membra Cytheris:
Integra sum secto corpore sponsa Dei.*

Gggg

EMBLEMATICA IMAGO LXVII.
 SS. TARVVLÆ ET SOCIARVM
 CRUCIFIXARVM
 EXPLICATA.



TARVULA gloriosa virgo, soror Simeonis Episcopi, & cum illa ancillæ duæ, in Persia sub Sapore Rege pro seruanda castitate, & simul fide, dissectæ ferris per medium, crucibus affixæ sunt. Solemnis & celebris virginitatis lex, quam promulgauit Apostolus, vt mulier innupta & virgo penitus indiuisa sit, totam se Deo integram tradat, & seruet. Quamuis dentatis ferris virgines diuidantur, integræ tamen manent, quoniam integritas virginalis nulla externa vi destrui, nulla violentia secari potest, si virgo tenax propositi persistat ac perseueret. Magnum miraculum Eucharistiæ, quæ in specie externa Hostiæ patitur diuisionem, CHRISTVS tamen sub panis & vini formis integer conseruatur.

Metaph.
 Nicephor.
 Vsuard.

1. Cor. 7,
 32.

*A sumente non concisus,
 Non confractus, non diuisus,
 Integer accipitur.*

Proles ac germina sunt venerabilis Sacramenti Vir-

Gggg 2 gi-

Zachar. 9.
17.

*Sympathia
Maria &
virginum
Artificum
integrita-
tis virgi-
nalis.*

gines immaculatæ. *Quid enim bonum eius est, & quid pulchrum eius, nisi frumentum electorum, & vinum germinans Virgines?* TARBVLÆ & sociæ cùm virgines CHRISTI sint, & se hostiam offerant Deo, secari possunt exterius, earum integritas nulla potentia, nulla violentia concidi potest: referunt quippe Eucharistiam, cuius proles ac soboles sunt. Regina Virginum Mater tota Eucharistica est, quæ virgo & coniugata fuit: ita coniugata, vt esset illa diuisa; ita virgo, vt corpore & spiritu integra, & penitus indiuisa foret.

CRUX TARBVLÆ & sociarum, Crux status virginittis.

*Excitatio
laboran-
tis.*

Patitur insidias virginitas, patitur manus violentas, quæ labefactare & destruere eius integritatem conantur. Hæc dura puritatis oppressio, ferrarum martyrio non est absimilis, & quidem ita grauis & molesta, vt CHRISTVS lib. I. Reuelat. sanctæ Birgittæ cap. 6. dixerit: *Sicut non est mors vlla morte ferræ amarior, sic non est supplicium, quo non participes fiant, & secabuntur per medium à diabolo, & diuidentur à me.* Vera & perfecta virginitas ferris oppugnatur, non expugnatur; si virgo firma ac fida persistat, & à Deo non diuidatur. Non minuitur violentis

lentis ferris virginitas, sed potiùs augetur. Huc at-
tinet virginale illud responsum, quod Lucia Præ-
fecto Paschasio dedit: *Si inuitam iusseris violari, casti-
tas mihi duplicabitur ad coronam.* Sola voluntate virgi-
nis virginitas, & eius integritas amitti potest. Ergo
benè monet Augustinus Serm. 6. de Natiuitate Do-
mini: *Gratias agat Virgo, quia tantam felicitatem inte-
gritate portat. Teneat fortiter, ne perdat rem irrecupera-
bilem, ne in uno momento delectationis amittat gratiam
mentis & corporis, non contrahat turpitudinem animæ
per pulchritudinem formæ corruptæ, non illam concupi-
scentia vincat.*

Speculum **TARBVLÆ** & sociarum virginum,
speculum humanæ infirmitatis
& patientiæ.

Quid aliud mors est, quàm diuisio corporis &
animæ? Mors instar ferræ in morbo homi-
nem secatur, & in duas partes distribuit, vnde cùm
ille laborat, sub ferra est, & cùm iam vitam ab-
soluit, totus iam diuisus est; sub ferra mortalis es,
cùm infirmaris, scinderis, & doloribus secaris, ca-
uere maximè debes, ne patientia minuatur, sed in-
tegra conseruetur. Ad hanc patientiam seruandam,
& eius integritatem, habeat ægrotus præ oculis spe-

culum TARVLAÆ & sociarum, quæ dum ferrantur
& diuiduntur,

Non murmur resonat, non querimonia;

Sed corde impauido mens benè conscia

Conseruat patientiam.

Cùm ferra lignum partitur, queritur quodammo-
dò & murmurat, virgines verò ferratæ nec murmu-
rant, nec expostulant; postulantque ab ægrotante, vt
præster id quod monent exemplo suo, & Sermone
de Visit. infirmorum suggerit Augustinus, dum ait:
Nostri acquiesce consiliis, & quandoquidem murmurando
duo mala sustines, pacificus esto, & grauamen corporale
fac tibi antidotum spirituale. Et quidem ferra nos mo-
net, ne contra vitæ ac mortis Deum insurgamus,
cùm dixerit Isaias: *Numquid gloriabitur securis contra*
eum, qui secat in ea? aut exaltabitur ferra contra eum, à
quo trahitur? Consideret mortalis homo, adaptari se,
vt cælesti fabricæ inseratur, quæ ex viuus tam lapi-
dibus quàm lignis construitur. Lapides malleo & re-
gula disponuntur, & mystica ligna iam securi, iam
ferra, quam diuina manus mouet ac trahit, virtute
tolerantiæ dolantur & poliuntur. Serra se in artifi-
cem non erigit, nec etiam lignum quod scinditur &
secatur: nec æger extollat nec se efferat in Deum,
humilem potius se reddat, & Deo cedat. Cedit, qui
viuens

*Excitatio
ægrotan-
tis.*

*Isai. 10.
15.*

uiuens & moriens totum se diuinæ prouidentiae committit, & dicit cum moriente iam Ambrosio:

Mori non timeo, quia bonum Dominum habemus.

*Extrema
verba mo-
rientis.*

Leuamen columbæ gementis in labore
& morbo.

HÆc pietas MARIAE est, hæc summa eius clementia, vt iis qui laborant & ægrotant, adsit & assistat, cum eius auxilium & subsidium deprecantur, & exclamant: *O clemens! ô pia!* Virgo clemens & pia, sacra MARIA est, cuius pietas & clementia sine læsione partitur & distribuitur, perfecta semper & integra perseverat. Qualis Mariana virginitas, talis pietas, talis benignitas est. Quibus clemens, quibus pia? Respondet in Meditationibus Bernardus: *O clemens indigentibus, pia exorantibus! O clemens poenitentibus, pia proficientibus! O clemens liberando, pia largiendo! O clemens consolando, pia blandiendo!* Hæc dos, hæc prærogatiua pietatis ac clementiae Marianæ, vt ad omnes & per omnes miseros & afflictos pertineat, & tamen illa, postquam diuisa fuerit, integra perseveret. Dicat ergo infirmus, qui doloribus scinditur & disrumpitur, more **TARBVLAE** atque fociarum: *Hic scinde & rumpe, CHRISTE sancte, dummodò sua pietate & clementia Mater assistat,*

Viaticum. assistat, adsit & sacra Eucharistia, in qua non contractus, non diuisus, integer acciperis. Quòd si mortalis homo sacrum accipiens Viaticum totus mutatur, totus in CHRISTVM conuertitur, in morte ita diuiditur, vt totus & integer cælo & Deo destinetur.

Gloriosum opus Artis Crucis & patientiæ virginalis, corona & laureola.

*Honor alit
artem be-
nè viuendi
& moriendi.*

Figura gloriosæ Crucis apud virgines crucifixas & cruciferas esse deprehenditur, deprehenduntur quoque corona, diadema, laurus, & palma in signum præclaræ victoriæ & gloriæ. Corona gloriæ, quæ sita est in clara summi Dei contemplatione, donatis iam beatitudine communis omnino est: ornamentum aureum laureolæ solum Doctoribus, Virginibus & Martyribus specialiter conceditur. Triplex ornatus laureolæ tribus viribus animæ apprimè respondet, vt ex multorum opinione Theologorum refert S. Thomas in 4. distinct. 49. quæst. 5. art. 5. *Quidam, inquit, distinguunt tres aureolas secundum tres vires animæ, & dicunt, tres aureolas dependere potissimè ex trium virium animæ actibus. Potissimus enim actus rationalis est, veritatem fidei etiam in aliis diffundere, & huic actui debetur Doctorum aureola. Irascibilis verò actus potissimus est, etiam mortem propter CHRISTVM superare,*

rare, & huic actui debetur aureola martyrum. Concupiscibilis autem actus potissimus est, à delectabilibus maximis penitus abstinere, & huic debetur aureola virginum. Quamuis Regina gloriosa virginum crucifixarum & cruciferarum palmam omnibus prætulit. Ait deinde sanctus Thomas: *Quidam dicunt, quòd beata Virgo pro virginitatis præmio non habet aureolam, si aureola propriè accipiatur secundùm quod respicit pugnam, tamen habet aliquid maius aureola propter perfectissimum propositum Virginitatis seruandæ. Alij verò dicunt, quòd aureolam etiam sub propria ratione aureolæ habet excellentissimam; quamuis enim pugnam non senserit, pugnam tamen carnis aliquam habuit, sed ex Vehementia virtutis adeò habuit carnem subditam, quòd eiusmodi pugna ei insensibilis erat. Sed istud non videtur conuenienter dici, quia cùm Virgo credatur omnino immunis fuisse à fomitis inclinatione, propter eius sanctificationem perfectam, non est pium, ponere, aliquam pugnam à carne fuisse in ea, cùm talis pugna non sit nisi ex tali inclinatione; nec tentatio, quæ est à carne, sine peccato esse non possit. Vnde dicendum est, quòd aureolam propriè habet, vt in hoc alijs Ecclesiæ membris conformetur, in quibus virginitas inuenitur; & quamuis non habuerit pugnam per tentationem quæ est à carne, habuit tamen pugnam quæ est ab hoste, qui nec ipsum Christum reueritus est, vt patet Matth. 4.*

Hhhh

Tam

610 SACRI SANCTVARIi CRVCIS PARS III.

Tam crucifixis quàm cruciferis virginibus dictum
Cant. 2, 11. est illud oraculum : *Egredimini , & videte filia Sion*
Regem Salomonem in diademate, quo coronauit eum mater
sua in die desponsationis illius, & in die lætitiæ cordis eius.
 Accedit hoc loco Richardus : *Exiguum & breue est,*
quod pati potestis ; immensum , quod per hoc expectatis.
2. Cor. 4, *Momentaneum & leue tribulationis nostræ , æternum*
17. *gloriæ pondus operatur in nobis. Cogitate æternum, & le-*
uiter feretis momentaneum. Cogitate pondus (id est , ma-
gnitudinem gloriæ) & leuis fit tribulatio , quam comita-
Laureola *tur talis remuneratio. Dum patimini, coronam intueami-*
victoria. *ni : tunc enim vobis fit diadema, quo coronabimini in die*
solemnitatis quæ de vobis erit , cùm de corpore egrediemi-
ni, vel desponsationis illius , cùm de nuptiis Ecclesiæ mili-
tantis transibitis ad nuptias Ecclesiæ triumphantis. Cùm
Extrema *transiret ad has nuptias, clamabat Agnes : Benedico*
verba mo- *te , Pater prædicande, qui etiam inter flammæ intrepidam*
rientis. *me ad te venire permittis. Ecce iam quod credidi video,*
quod speraui iam teneo , quod concupiui , complector. Te
confiteor labiis & corde : te totis visceribus concupisco. Ec-
ce ad te venio viuum & verum Deum.

Appareat speculum status coniugalis & infirmi-
 tatis TIMOTHEVS & MAVRA.



68. *Vos cælo voluit socialem ducere vitam,
Qui crucis ad thalamum fœdera iunxit Hymen.*

EMBLEMATICA IMAGO LXVIII.

SS. TIMOTHEI ET MAVRÆ

CRUCIFIXORVM

EXPLICATA.

TIMOTHEVS & MAVRA coniuges charis- Martyrol.
Marulus.
simi apud Thebaïdem Ægypti, sub De-
cio Imperatore ab Ariano præfecto cru-
cis supplicio afficiuntur. *Ubi sunt duo vel* Matth. 18.
10.
tres congregati in nomine meo, ibi sum in medio eorum.

Coniunguntur matrimonio TIMOTHEVS & sua
MAVRA, cum quibus crucifixus CHRISTVS est, &
quibus crucifixis assistit. Pertinet huc, quod CHRI-
STVS ipse lib. 1. Reuelat. cap. 6. coniugatæ Birgit-
tæ declarauit: *Ego sum vnus Deus, trinus in personis,
vnus in substantia cum Patre & Spiritu sancto. Sicut
enim impossibile est separari Patrem à Filio, & Spiritum
sanctum ab vtroque; & sicuti impossibile est separari calo-
rem ab igne: sic impossibile est tales coniuges spirituales à
me separari, quin sim tertius cum eis. Semel autem corpus
meum laceratum est in passione, & mortuum, sed num-
quam lacerabitur, nec morietur. Ita & ipsi numquam mo-
rientur à me, qui mihi fide recta & voluntate perfecta in-
corporantur. Nam vbicumque stant, sedent, vel ambulant,*

Hhhh 3

ego

*Sympathia
Maria &
coniugis
Timothei
Artificum
tolerantia
coniugalis.* ego sum semper tertius cum eis. CHRISTVS igitur crucifixus TIMOTHEO & MAVRAE tertius adiungitur, vt socius & adiutor in martyrio sacris coniugibus veniat. Septem Sacramenta ortum suum in Cruce habuerunt. Coniugium è septem Sacramentis vnum, crucem, iugum, & onus affert vtrique coniugi commune, & ab vtroque portandum. Nec quidem matrimonium ipsum, quod celebratum est inter Deiparam & Iosephum, liberum à cruce fuit, nec vllus labor in eo, qui non esset communis vtrique, cum sub eodem iugo laboriosum onus traherent.

CRUX TIMOTHEI & MAVRAE, CRUX
status coniugalis.

Ephes. 5,
32.
Excitatio
laboran-
tis.

1. Cor. 7,
20.

Matrimonium Christianorum quasi præludium quoddam martyrij est. Quid enim aliud mysterium coniugale est, quàm laboriosum testimonium matrimonij, quod inter CHRISTVM & Ecclesiam celebratum est, *Sacramentum hoc magnum est, ego autem dico, in CHRISTO & in Ecclesia.* Magnum istud Sacramentum non voluptatibus carnis, sed intensis crucis doloribus consummatum est, vt nouerint Christiani coniuges, matrimonij sui statum non deliciosum esse, sed laboriosum, cum scriptum sit de coniugatis: *Tribulationem carnis habebunt huius-*

huiusmodi : nimirum , aperiens sibi per coniugij copulam dolorum officinam , vt agens de Vera virginit. explicat. Basilii. Qui crucifixus est , corporis sui liberam facultatem non habet , nec quidem coniux.

*Mulier sui corporis potestatem non habet , sed vir : simili- 1. Cor. 7, 4.
liter autem & vir sui corporis potestatem non habet , sed mulier. Quod seruitutis iugum expendens Chrysostomus libro de Virginit. scribit : Paulus proprij etiam corporis iure adempto , omnem ipsius principatum dat uxori , cuius imperio magis subiectum esse virum , quàm puerum emptum pecunia : seruo enim si quando comparata pecunia pretium , quanti emptus est , Domino persolvere potuerit , plerumque libertatem recuperare licet ; at vir quamuis omnium difficillimam seruitutem tamen perferre necesse habet , quippe qui nullam potest inire viam , qua solutus eiusmodi dominatu liberetur.*

Speculum appensum coniugum TIMOTHEI
& MAVRÆ , speculum humanæ
infirmittatis & patientiæ.

MVtuo coniugio caro & spiritus copulantur,
& dum viuit homo, coniugium hoc perseue-
rat. Nullum sine labore & sine onere connubium
est , cùm scribat Apostolus : *Tribulationem carnis ha- 1. Cor. 7,
bebunt huiusmodi. Quàm sit laboriosus carnis & spi- 28.
ritus*

ritus nexus , adhuc valentes & incolumes experimur ; sed tunc maximè sentimus , cùm morbis tangimur & afflictamur. Tunc temporis multi sunt , qui desiderant quàm maximè à vinculo matrimonij liberari. Nec peccat mortalis homo , cùm libertatem affectat , & vt illam consequatur , iacens in lecto suspirat. Apostolus ipse qui scripsit , *Alligatus es uxori , noli quærere solutionem* ; idem ipse vehementer optabat *dissolui , & esse cum CHRISTO*. Ergo cùm ægri laborant , & gemunt sub onere molesti laboriosique coniugij , moneri & simul excitari debent testimonio illo Scripturæ : *Multæ tribulationes iustorum , & de omnibus his liberabit eos Dominus*. Commendat hoc ipsum Gregorius 3. Parte Pastor. cap. 13. Liberabit hominem Deus ab infirmitatibus & morbis , cùm caro prædita virtute resurget : interim dum vitam mortalem agit , laboret necesse est , cùm lib. 10. Homiliarum Homil. 38. dixerit Augustinus : *Ægritudo perpetua est in ista fragilitate carnis*. Perpetuum est debilis nostræ carnis & spiritus vinculum , perpetua infirmitas & ægritudo , quæ longam exigit tolerantiam atque patientiam : monentque propterea TIMOTHEVS & MAVRA ægrum : Homo de humanis parentibus ortus , natus es ad laborem & infirmitatem ferendam , & tunc depones vtrumque , cùm animam

1. Cor. 7.
27.

Phil. I, 23.

Psal. 33,
20.

Excitatio
ægro-
tan-
tis.

nimam deposueris, interim onera sustine matrimo-
nij, quod inter carnem & spiritum intercedit; ita ta-
men sustine, vt libertatem affectes, & dicas moriens
cum moriente Simeone: *Nunc dimittis seruum tuum* Luc. 2, 29.
Domine. Extrema
verba mo-
rientis.

Leuamen columbæ gementis in labore
& morbo.

CUm satis laboriosa, graui & amara sint one-
ra matrimonij, prouidit Deus de Virgine con-
iugata, cuius ea virtus est, vt coniuges, qui tribula-
tionem carnis patiuntur, eius inuocatione solatium
& leuamen sibi acquirant. Acquirunt sibi, dum la-
borantes exclamant: *O dulcis Virgo MARIA!* Excla-
mant verò, dum vita superstes est, & dum illa de-
ficit, cuius defectu matrimonium omnino cessat. Ad
hanc formam cum maneat coniugium carnis spiri-
tusque, inuocanda MARIA est, vt mortalitatis no-
stræ onera facilius sustineamus: tunc verò maximè
oratio hæc & exclamatio, *O dulcis Virgo MARIA,* ne-
cessaria est, cum imminet mors, cuius amaritudo
Mariana dulcedine tollitur. Exclamat homo mor-
talis: *O mors, quàm amara est memoria tua!* sed non Eccli. 41, 1.
ille, qui dum moritur, confugit ad Matrem Dei,
& exclamare nouit, *O dulcis Virgo MARIA!* non il-
le,

le, qui dulcedine sacræ Eucharistiæ delinitus addit,
Vaticum. *O sacrum conuiuium!* Felix iter humanæ mortalitatis,
 quod desinit in hunc finem. Hic finis itineris diui
 Bernardi, qui missus ab Apostolica sede Spiram, &
 deductus ad primariam ædem Deiparæ, in ipso adi-
 tu templi, cùm *Salve Regina* cantaretur, tribus in lo-
 cis procubuit in genua, cecinit in primo, *O clemens*,
 in altero, *ô pia*, & in tertio clara voce, *ô dulcis Virgo*
 MARIA. Hodie visuntur in eodem templo tres la-
 minæ æneæ, in quibus suo ordine inscripta sunt ver-
 ba, quo illa gloriosus Bernardus cecinit. Felix, qui
 solutus carnis nexibus, suæ mortalitatis iter ita con-
 cludit & absoluit.

Gloriosum opus Artis Crucis & patientiæ
 coniugalis, corona & diadema.

*Honor alie
 artem benè
 viuendi &
 moriendi.*

AD coronam & diadema virginum crucifera-
 rum tendunt ac pergunt cruciferæ coniugatæ,
 sed à longè, similes Euangelicis illis feminis, quæ
 Regem crucifixum & Reginam contemplantur,
 vt annotat Matthæus cap. 27. *Erant autem ibi mulieres
 multæ à longè, quæ secutæ sunt IESVM à Galilea mini-
 strantes ei.*

Quanta sit coniugatorum crux, optimè decla-
 rant Patres, conferentes statum virginitatis cum
 seruitute

seruitute coniugali. Audiendus vnus Basilius: *Virgo earum perpetuas ærumnas miserabitur, quæ temporalibus his molestisquæ voluptatibus addictæ sunt. Nempe enim eius, quæ nupsit multiplices (vt sic dixerim) quas illa in dies patitur, è regione considerans, sibi ipsi profectò propositoquæ suo gratulabitur. Nam quæ mortali connubio coniuncta est ad suam ipsius curam, viri quoque altera adiecta, geminam in vna anima ex coniuncto sibi corpore sollicitudinem necessariò sustinet. Nec iam vnus tantum corporis laborat gratia, sed in vna (vt dixi) anima, & ad suum & ad viri corpus curandū iugiter intenta diuiditur.*

Hæc diuisio in causa est, vt feminæ coniugatae dissitæ adstent & assistant Crucifixo, quæ si velint in statu suo coniugali ad coronam adspirare, & propius ad diadema martyrij & castitatis accedere, opus est, ^{Diadema coniugij.} vt viuant ita sanctè, & ita castè, quasi maritatae non sint. Hoc voluit & monuit Apostolus CHRISTI Paulus, dicens: *Tempus breue est, reliquum est, vt et* ^{1. Cor. 7. 29.} *qui habent vxores, tamquam non habentes sint, vt scilicet non magnopere rei vxoriæ afficiantur, vt animum, mentem atque amorem magis in Domino quàm vxoribus defigant. Ad quem locum pulchrè Commentarij, qui S. Hieronymi nomine inscribuntur: Tempus vitæ nostræ modicum asserit, vt doceat voluptatem quæ citò finitur, non magnopere appetendam, sed*

magis concupiscendum esse æternum præmium castitatis. Idem alibi lib. i. aduersus Iouinianum ait : Inter cetera mundi opera , & nuptiæ præteribunt ; neque enim erunt post resurrectionem coniugia. Si autem mors finis est nuptiarum, cur necessitatem non in voluntatem vertimus? & quod inuitis extorquendum est , cur non spe præmiorum offerimus Deo? Rectè igitur monet, vt tamquam non habentes vxores vxorati vitam suam disponant & componant : componant, inquam , ad coronam, disponant ad diadema, quod virginitati ac viduitati statutum in regno cælorum per sacrum martyrium est. Quòd si coniugium etiam est inter humanam carnem & spiritum, cùm ita spiritus viuat , & è carne decidat , quasi in carne non sit , martyrium agit & celebrat , & extrema Agathæ virginis verba in obitu vsurpet : Tu ergo Domine exaudi me in hac hora, & dignare me relinquere hunc mundum, & peruenire ad diuitem & magnam misericordiam.

*Extrema
verba morientis.*


Appareat speculum viduitatis dilatæ fruitionis & infirmitatis MAGDALENA cum prole & fociis.



Christiadas, tortor, conuellere stirpe laboras,
69. Famineo cum sit robore victa manus?

EMBLEMATICA IMAGO LXIX.

MAGDALENÆ VIDUÆ,
FILII, ET SOCIARVM
CRUCIFIXARVM
EXPLICATA.

 N Iaponia pro defensione Fidei Christia- Ex relat.
Episcopi
Iapon.
Lud.
næ, quam didicerunt ab Apostolo Orien-
tis D. Francisco Xauerio, MAGDALENA

vidua, & LVDOVICVS filiulus octennis,
IOANNA & AGNES feminæ coniugatæ, sub Canu-
cungio Tungi Rege, & Cacuzeimone Præfecto cru-
cibus alligantur, mutuò se ad patientiam cohortan-
tes, tanto CHRISTI amore ac desiderio feruentes, vt
cùm ferrum in vulnera quasi hebesceret, diros car-
nifices ad necem sibi ocys inferendam incitarent.

Mulierem fortem quis inueniet? procul & de vltimis fi- Prou. 31,
11.
nibus pretium eius. Ecce iam inuentæ fortes mulieres

sunt in vltimis terrarum finibus. Vna MAGDALE-
NA alterius Magdalenæ æmula, quæ CHRISTO cru-
cifixo adhæsit, & sacram eius crucem amplexata est,
Attulit secum & simul obtulit filium, vt, qui iam
in ortu fuerat ventris foetus, crucis fructus in marty-
rio foret. Altera IOANNA est, in qua resplendet Ioan-
nes

nes dilectus & charus ille, qui recubuit supra pectus IESV, & crucifixo adfuit. Tertia AGNES, in qua virilis Agnetis spiritus viuit, & Agnum suum torridum in ara Crucis quærit & inuenit. Fortes omnes mulieres, etsi virgines non sint. Cane singulis:

*Fortem virili pectore
Laudemus omnes feminam,
Quæ sanctitatis gloria
Ubique fulget inclyta.
Rex CHRISTE virtus fortium,
Qui magna solus efficis,
Huius precatu quæsumus,
Audi benignus supplices.*

Sympathia Omnes quidem quatuor martyres dignæ proles sunt
Maria & beatissimæ viduæ MARIAE, cuius ardentia deside-
Magdale- ria Deum videndi, & eius aspectu fruendi, viuis
na vidua flammis & ignibus assimilantur. *Lampades eius, lam-*
& socia- *pades ignis atque flammæ.* Conceperant ignes &
rum Arti- flammæ, quæ mori pro CHRISTO, & CHRISTO
ficum ce- frui quantocyùs desiderabant.
lestis desi-
derij.
Cant. 8, 6.

CRUX MAGDALENÆ & sociarum, Crux viduitatis & dilatæ fruitionis Dei.

CRUX viduitatis per absentiam sui consortis affligit & cruciat; crux est molesta & grauis amant-

mantibus sponsum CHRISTVM, priuatio eius aspectus, & fruitionis dilatio. Hinc illud Dauidis Regis: *Hei mihi, quia incolatus meus prolongatus est!* Hinc illud Pauli: *Infelix ego homo, quis me liberabit de corpore mortis huius?* Quisquis desiderij huius ardentem ignem in sacrario pectoris condit, continere se nequit, quò minùs erumpat in similes illas voces. Erumpebat S. Ignatius, Societatis nostræ Patriarcha, cùm fastidiens terram, & cælum affectans diceret: *Quàm sordet terra, cùm cælum aspicio!* Erumpebat Ignatius Martyr, cùm Epistola ad Romanos scriberet: *Utinam fruar bestiis quæ mihi sunt præparatæ, quas & opto mihi veloces esse ad interitum & ad supplicia, & allici ad comedendum me, ne, sicut & aliorum Martyrum, non audeant corpus attingere. Quòd si venire noluerint, ego vim faciam, ego me vrgebo vt deuorer. Ignoscite mihi, filioli, quid mihi prodest ego scio. Nunc incipio CHRISTI esse discipulus, nihil de iis quæ videntur desiderans, vt IESVM CHRISTVM inueniam. Ignis, crux, bestia, confectio ossium, membrorum diuisio, & tota tormenta diaboli in me veniant, tantùm CHRISTO fruar.* Hæc infirmitas amoris est, qua laborabat sponsa, cùm diceret: *Fulcite me floribus, stipate me malis, quia amore langueo.* Accedit Bernardus Serm. 51. in Cantica: *Cùm præstò est quod amatur, viget amor, languet cùm abest.*

Psal. 119.

Rom. 7.

24.

Excitatio
laboran-
tis.

Cant. 2, 5.

Kkkk

Quod

Quod non est aliud-quàm tædium quoddam impatientis desiderij, quo necesse est affici mentem vehementer amantis, absente quem amat, dum totus in expectatione quantamlibet festinationem reputat tarditatem.

Speculum MAGDALENÆ, FILIOLI & SOCIARVM, speculum humanæ infirmitatis & patientiæ.

Speculum naturæ humanæ, quæ currit ac transit, labilis aqua est decurrens ac fluens, vnde & sapiens mulier dixerat olim Dauidi : *Omnes morimur, & quasi aquæ dilabimur.* Si quis se respiciat in aqua, inuersum se deprehendet, & suiipsius antipodem se inueniet. Et quidem MAGDALENA, FILIOLVS, IOANNA, & AGNES apud Antipodes in Iaponia gloriosum martyrium subierunt, in quibus, cum sint antipodes, inuersa natura nostra consideranda est. Ante peccatum commissum rectus homo erat, & fixus in suo statu perseuerabat, post scelus iam patratum stationem suam mutauit, & formam suæ naturæ omnino inuertit. Qui stabat, decedit; & qui fursus ascendebat, deorsum in terram descendit. Magnum hoc ænigma est, cuius meminit Ecclesiastes : *Solummodò hoc inueni, quòd fecerat Deus hominem rectum, & ipse se infinitis miscuit quæstionibus.* Quis talis

2.Reg.14,
14.

Eccle.7,
30.

lis ut sapiens est? & quis cognovit solutionem verbi? Videmus nunc in speculo hoc ænigma, quem rectum Deus hominem condiderat, ut in cælum assumere-
 tur, cernimus à statu suo deturbatum & inuersum
 deorsum vergere, & in terram, de qua formatus est,
 redire, & in ea sepeliri. Qualis ortus, talis & obitus.
 Inuersus oritur homo, inuersus obit. Solus CHRIS-
 TVS, sicut rectus in morte extitit, sic etiam rectus
 in natiuitate sua effusus est, ut Sermone de Laude
 Crucis Augustinus in hæc verba eidem Regi glorio-
 so fassus est: *Tu semper rectus, tu semper excelsus, tu
 semper altus: nos secundum carnem filij hominis, qui prin-
 cipale suum demisit in terram, cuius lapsus significatur spe-
 cie generationis humanæ: sic enim nascimur, ut proni in
 terram videamur effundi.* Hæc laus, hæc virtus crucis
 est, ut quos voluptas peccati intortos reddidit, labor
 & dolor infirmitatum & morborum rectos faciat &
 restituat cælo, quemadmodum in tanta Sanctorum
 multitudine crucifixorum cultores sanctæ Crucis &
 patientiæ speculati fuimus. Ideoque & nos (cruciferis
 Paulus & ipse crucifer ait) *tantam habentes impositam*
nubem testium, deponentes omne pondus, & circumstans
nos peccatum, per patientiam curramus ad propositum no-
bis certamen, aspicientes in auctorem fidei, & consumma-
torem IESVM, qui proposito sibi gaudio sustinuit crucem,

Excitatio
 agrotan-
 tis.
 Heb. 11, 1.

confusione contempta, atque in dextera sedis Dei sedet. Recogitate enim eum, qui talem sustinuit à peccatoribus aduersum semetipsum contradictionem, ut ne fatigemini, animis vestris deficientes. Nondum enim vsque ad sanguinem restitistis; aduersus peccatum repugnantes: Et oblitus estis consolationis, quæ vobis tamquam filiis loquitur, dicens: Fili mi, noli negligere disciplinam Domini, neque fatigeris dum ab eo argueris. Quem enim diligit Dominus, castigat; flagellat autem omnem filium, quem recipit. In disciplina perseuerate. Tamquam filiis vobis offert se Deus. Quis enim filius, quem non corripit pater? Quod si extra disciplinam estis, cuius participes facti sunt omnes, ergo adulteri, & non filij estis. Deinde patres quidem carnis nostræ, eruditores habuimus, & reuerabamur eos: non multò magis obtemperabimus Patri spirituum, & uiuemus? Et illi quidem in tempore paucorum dierum, secundum voluntatem suam erudiebant nos: hic autem ad id quod vtile est in recipiendo sanctificationem eius. Omnis autem disciplina, in præsentem quidem videtur non esse gaudij, sed mœroris: postea autem fructum pacatissimum exercitatis per eam reddet iustitiæ. Propter quod, remissas manus, & soluta genua erigite, & gressus rectos facite pedibus vestris, ut non claudicans quis erret, magis autem sanetur. Sanatur æger, cum in pristinum valetudinis gradum restituitur; & idem ipse curatur, cum in antiquum

antiquum rectitudinis statum reuocatur. Tunc sanus est, cum rectus est. *Rectus es*, inquit Augustinus in Psalm. 44. *quando in omnibus bonis quæ facis, Deus tibi placet, & in omnibus malis quæ pateris, Deus tibi non displicet.* Hic crucifer est, qui recta in cælum tendit, qualis Martinus erat, qui rogatus ut pronus conquiesceret, *Sinite me*, inquit, *cælum potius quam* Extrema verba morientis. *terram aspicere, ut suo iam itinere iturus ad Dominum spiritus dirigatur.*

Leuamen columbæ gementis in labore
& morbo.

Salue Regina, Mater misericordiæ; vita, dulcedo, & spes nostra salue. Ad te clamamus exules filij Eue, ad te suspiramus gementes, & flentes, in hac lacrymarum valle. Eia ergo aduocata nostra, illos tuos misericordes oculos ad nos conuerte. Et IESVM benedictum fructum ventris tui nobis post hoc exilium ostende. O clemens! ô pia! ô dulcis Virgo MARIA! Ora pro nobis sancta Dei genitrix, Ut digni efficiamur promissionibus CHRISTI. Magna laborantibus, magna ægrotantibus facta promissa sunt à CHRISTO Rege glorioso, qui inuitans ad crucem dicit: *Si quis vult post me venire, abneget semetipsum*, Luc. 9, 23. *& tollat crucem suam quotidie, & sequatur me.* Hic ipse Rex patientibus ait: *In patientia vestra possidete ani-* Luc. 21,

mas vestras. Quos inuitat ad crucem & patientiam, allicit & attrahit amanter ad mysticam refectionem,

Marth. 11. *Venite ad me omnes, qui laboratis, & onerati estis, & ego reficiam vos.* 18. Hæc mystica refectionis sacra Commu-

Viaticum. nio est, in qua seipsum oppignorauit CHRISTVS, vt qui auctor gratiæ est in Eucharistia Viaticum sacrum capientibus, futurus sit auctor & ipse gloriæ iis, qui recta cum conscientia sanctam Synaxin acceperint, vnde & meritò clamat & exclamat Ecclesia: *O sacrum conuiuium, in quo CHRISTVS sumitur, recolitur memoria passionis eius, mens impletur gratia, & futura gloriæ nobis pignus datur.* Hoc pignus dignè communicantibus exhibetur, qui & digni sunt cælestibus promissionibus, & vtrumque hoc rogamus, cum dicimus gloriosæ Reginæ cælorum, *Ora pro nobis sancta Dei genitrix, vt digni efficiamur promissionibus CHRISTI.* Benè Bernardus in deprecatione ad gloriosam Reginam ait: *Tollatur hæc crassa nebula ab oculis, vt reuelata facie gloriam Domini speculantes, in immensum illud pelagus diuini luminis absorbeamur: & Domini spiritu, ac Deo nostro in vinculis charitatis adstricti, vnum cum ipso efficiamur.* Præstet & hoc nobis tuo interuentu, ô MARIA, *Filius tuus IESVS CHRISTVS, Deus & Dominus noster, cui laus & gloria & gratiarum actio in sempiterna secula. Amen.*

Glorio-

Gloriosum opus Artis Crucis & patientiæ
vidualis, corona & diadema.

ADspirant ad coronam & diadema sacri & glorio- Honor alie
artem bene
vivendi &
moriendi.
rii martyrii cum virginibus cruciferis viduæ
cruciferæ, quarum status satis laboriosus est, & tan-
tam ferè virtutem exposcit, quantam exigit profes-
sionis conditio virginalis, vt lib. 1. de Vid. cap. 1. de-
finit Ambrosius: *Et propemodum non inferioris virtu-
tis est, eo abstinere coniugio, quod aliquando delectauerit,
quàm coniugij oblectamenta nescire. In utroque fortes, vt
eas & coniugij non pœniteat, cui fidem seruent, & coniu-
galia oblectamenta non alligent, ne videantur infirmæ, quæ
sibi adesse non possunt. In hac ipsa tamen virtute præmia
sunt reposita libertatis.* Tunc incipit martyrium viduæ,
cùm chari sibi coniugis iacturam facit. Et quidem
Ecclesia tunc temporis martyr extitit, cùm vir eius
IESVS CHRISTVS lecto crucis affixus interiit: tunc
facta est quasi vidua Domina gentium, ad cuius formam Thren. 1.
1.
mulier priuata viro martyr efficitur.

Nec minus martyrium Reginae & viduæ MA-
RIÆ, charam sibi amittere prolem. Hoc quidem
martyrium passa est beata Felicitas, & illa quidem
iam vidua martyr non semel, sed septies, quia se-
ptem pignora amisit, vel potius in cælum præmisit.

In

In eius elogium Serin. 110. de Diuersis asserit Augustinus: *Parum est fuisse spectatricem, mirati sumus hortatricem. Fecundior virtutibus quàm fetibus, videns certantes, in quibus omnibus & ipsa certabat, & in omnibus vincentibus ipsa vincebat.* Huic gloriosæ victoriæ decernuntur corona & diadema, cuius viduæ triumphatrices participes efficiuntur. Tales sunt, quæ in se decorem virtutis induunt, vt gratæ suo Deo præsententur. Erubescat, ait Hieronymus Epist. 23. *mulier Christiana, si naturæ cogit decorem, si carnis curam facit ad concupiscentiam, in qua qui sunt, secundum Apostolum, Deo placere non possunt. Vidua nostra (Blesilla) antè morosius ornabatur, & die tota quid sibi deesset quærebat ad speculum; nunc loquitur confidenter: Nos autem omnes reuelata facie gloriam Domini speculantes, in eandem imaginem transformamur à gloria in gloriam, quasi à Domini spiritu.* Hic spiritus crucifixos & cruciferos, crucifixas & cruciferas in formam Crucifixi Regis ac cruciferae Reginae, in cruce & lecto pingit æternitati, & amodò dicit spiritus, *vt requiescant à laboribus suis; opera enim illorum sequuntur illos.*

Diadema
viduitatis.

Rom. 8, 8.

Extrema
verba n. o.
rientis.
2. Cor. 3,
18.

Apoc. 14,
13.

Appareat S. GVDILIA, speculum in quo arcum mortis mysterium conspicitur.




70. *Tyndaridi Zeuxis, Veneri decus addit Apelles ;
Ornat tortoris te quoq. dextra Deo.*



EMBLEMATICA IMAGO LXX.

S. GVDILIAE CRVCIFIXÆ
EXPLICATA.

 ANCTA GVDILIA cū plurimos verbo
& exemplo fide Christiana imbuisset, ius-
su Saporis Regis variis tentata suppliciis,
cruci affixa, capite decaluata, sagittis con-
fossa, ac denique flammis cremata, in cælum mi-
grauit. Non tam humanæ vitæ, quàm mortis fune-
stæ GVDILIA præfert imaginem, quam adhuc in
lecto Gregorius impressam in se recognoscebat, cū
scriberet ad Rustitianam Patritiam, & diceret: *Me
ita amaritudo animi, & assidua exacerbatio, atque poda-
græ molestia afficit, vt corpus meum tamquam in sepulchro
siccatum sit, vnde fit, vt iam rarò de lecto surgere valeam.*
Præcessit gloriosus Rex in monte Caluarie GVDI- Sympathia
Christi,
Maria &
Gudilia.
LIAM, & statum morientium non lumine Solis aut
Lunæ, sed tenebris potius obscuris descripsit, ac
simul repræsentauit in primis Matri: *Tenebræ factæ* Luc. 23,
44.
sunt super vniuersam terram, vt quantum caliginis
mors secum haberet & afferret, indicaret. Indicarat
Rex Dauid, qui Psalmum vndecimum *Pro occultis
filijs*, siue, vt alij transferunt, *pro morte filij* inscripsit
LIII 2 ac

ac designauit. Occulta mors Dei Filij est, & vt ait Ephræm, de vita & morte vniuscuiusque agens, *magnum & occultum est mortis arcanum, & nullus enarrare illud potest.* Quid sic? Veniet enim repenti vna hora, & cuncta cessabunt, parua febris, & cunctæ vanitates in nihilum recident; vna nox profunda, & tenebrosa atque ærumnosa. Multis sanè tunc opus erit ductoribus, ô homo, multis adiutoribus, multis orationibus, multisque sociis in hora separationis animæ à corpore. Magnus tunc erit timor ac tremor, magnum mysterium. Magnum mortis arcanum, quod cum ingressus fuisset quidam senex, & rogaretur quid vidisset, narrauit plorans: *Audiui vocem illic lugubrem sine cessatione dicentem, Væ mihi, væ mihi. sic & nos dicere debemus.* Magnum arcanum GVDILIAE, magnum mortis ac sepulturæ mysterium, de quo paulò post addit Ephræm: *Adspicite, atque mysterij & secreti huius ne obliuiscamini. Fixis oculis intuemini, & de ista maximè hora estote solliciti. Quid enim est homo? nihil. Quid homo? vermis. Quid homo? cinis ac puluis. Quid homo? somnium. Quid homo? vmbra. Ecce iam transiit, ecce ascendit, ecce præteriit, ecce cessauit, ecce requieuit, & defunctus est.*

Crux accensa & inflammata GVDILIAE,
Crux splendida mortis iustorum.

REs obscura, res tenebrosa mors, cuius obscuritas & caligo dissoluitur & euanescit ad adspectum rutilantis Crucis CHRISTI. Clamat cum Ecclesia GVDILIA: *Fulget Crucis mysterium.* exclamet: O crux splendidior cunctis astris! Sol ipse cum oritur & occumbit, cum gyrat per meridiem, & flectitur ad Aquilonem, cursum suum perficit & consummat in crucis formam, ut adstruit Bonauentura cap. 1. Eccles. Crucis æmulus Sol est, & ab ea luminum splendore atque fulgore longè superatur. Cruciferis lecto affixis Crux CHRISTI in morte resplendet, cuius ductu viam cælestem norunt, & iter suum prosperè faciunt & conficiunt. Fecit & confecit, sicut tradit Seraphica Histor. S. Ludouicus Episcopus Tolosanus filius Caroli II. Regis Siciliae, qui accepto sacro Viatico, iam moriturus totus illustratus, totus illuminatus ait: *Ego morior, & gaudeo quasi terram videns, venturusque in portum ex longa navigatione huius vasti & vndosi maris, quod mihi diu in votis fuit: & optatum mihi exposituro hoc graue onus, quod humeri mei ferre recusant. Occupationes illæ me nimium distinent & decipiunt, ut mecum esse nequeam, nec pro*

Extrema
verba mo-
rientis.

meo arbitrio Deo & mihi vacare. Vero verius est, Episcopalem dignitatem non tam grandis esse nomen honoris quàm oneris. In portu, cùm appulero, onus exponam. Respicensque deinde ad crucem & crucifixum, quem præ oculis habebat, subiungit: *Adoramus te, CHRISTE, & benedicimus tibi, quia per Crucem tuam redemisti mundum.* Quæ verba sæpius iterata fuerunt extrema morientis. S. Eleazarus Comes, eodem auctore, constitutus in extremis, cùm in eius animæ commendatione Sacerdos diceret, *Per sanctam Crucem & passionem tuam libera eum Domine,* eundem versiculum repetiuit, & addidit: *Hæc est spes mea, in ea volo mori; & mortuus est.* Legimus in Historia S. Iuonis Presbyteri, quomodo tota nocte, antequam moreretur, apertis oculis, & in Crucis imaginem defixis, tacitus iacuerit, & obierit, vt & splendida CHRISTI Cruce illustratus & irradiatus dicere cum D. Laurentio potuerit: *Mea nox obscurum non habet, sed omnia in luce clarescunt.* Legimus quoque in Vita S. Didaci Confessoris, contemplantem ac venerantem sanctam Crucem excessisse, dum recitaret: *Dulce lignum, dulces clauos, dulcia ferens pondera. Quæ sola fuisti digna portare Regem calorum & Dominum.* Ioannes Aragonum Rex, vt lib. 8. Lucius Marinæus refert, dum mysteriis Ecclesiasticis intentus esset, derepen-
tè

Extrema
verba mo-
rientis.

Extrema
verba mo-
rientis.

tè capitur ita morbo, vt mortuus censeretur. Aperuit
 deinde oculos, & omnes qui aderant adspiciens, ex-
 clamauit: *O vanas hominum cogitationes! ô miseros ho-* ^{Extrema}
mines, qui ad Principatus adspirant, diuitias, opes & ^{verba mo-}
honores affectant! O felicem pauperum conditionem, qui ^{rientis.}
panem comedunt cum sudore, qui viuunt labore manuum
suarum! Nam mihi misero quid regnum, quid honores,
quid obsequia plurimorum contulerunt? Quid? labores
scilicet magnos, & multa corporis & animæ pericula su-
biui. O me miserrum & infelicem! qui tam serò mundum
fallacem cognosco: qui vitam vixissem multò meliorem, si
non Rex, sed agriculator fuisssem. Conuersus autem ad ima-
ginem Crucifixi, defixis in cælum oculis, O Rex gloriose,
inquit, ô pietissime Redemptor: parce mihi indignissimo
filio tuo, miserere mei clementissime IESU, & à peccatis
meis auerte faciem tuam: non meis meritis, Domine, quæ
nulla sunt, sed illa tua ineffabili pietate & infinita miseri-
cordia motus, qua homines à morte per Crucem tuam libe-
raſti. Post hæc cæleſti libertate donatus, è viuis ex-
ceſſit Rex ad Regem illum glorioſum, qui in loco
aperto, in montis Caluariæ arbore ſpectandum ſe
mortalibus præbuit, vt, tanto propoſito exempla-
ri, viuere dedicerent, diſcerent mori. Cùm S. Wol-
phangus Præſul ſimilis eſſet mortuis, & accedentes ^{Extrema}
ad lectum à miniſtris prohiberentur, ait: Aperite ^{verba mo-}
ſtia, ^{rientis.}

ostia, nec quemquam ingredi volentem excludite. Nos enim mortales homines non nisi malefactis erubescere debemus. Mortis autem debitum necessario soluendum nobis est. Itaque cum etiam CHRISTVS ipse, qui nihil morti debuit, penè nudus in Cruce mori non erubuerit pro humani generis salute, adspiciat quisque in morte nostra quid reformare quid cauere debeat in sua. Deus verò pius & bonus misereri dignetur & mei miseri peccatoris nunc mortem obeuntis, & omnium id cum timore & humilitate adspectantium.

Hic finis artis benè viuendi & moriendi, quam coluit & colendam docuit in monte Caluariæ CHRISTVS, cuius extrema verba excepit alumna eius Patientia. Ubi Deus, ibidem & alumna eius Patientia, asserit Tertullianus: & quidem suprema CHRISTI morientis oracula excipiet in Appendice sacri Sanctuarij.

AMBROSIVS lib.de Bono mortis, cap.8.

Resonent te postrema verba morituri, & benedictionem tui egrediens corpore anima secum vehat.

S A C R I
S A N C T V A R I I
A P P E N D I X

D E
S E P T E M E X T R E M I S V E R B I S
C H R I S T I M O R I E N T I S,
O R A C V L I S E C R V C E E D I T I S,
I N G R A T I A M
E X T R E M E L A B O R A N T I V M
E T M O R I E N T I V M.

Finem loquendi pariter omnes audiamus.
Ecclesiastæ 12.



in, sep
 la glori
 az per
 crucifix
 nientee
 in reg



*Secundum mensuram regulæ Patientiæ
Septem verba Christi morientis.*

EXTREMA verba, quæ languentes & morientes locuti sunt viri sancti in omnibus & singulis imaginibus Sanctuarij, oracula sunt languentibus ac morientibus; septem autem verba, quæ affixus crucis lecto Rex gloriosus pronuntiavit, sacratiora sunt oracula, quæ perfecta ac coronata Patientia sacra Deo ex ore Crucifixi excipit, & excipere in extremis homines patientes docet. Septem sunt verba *secundum mensuram regulæ*, cuius vel ipsa figura septenarium numerum ^{2. Cor. 10, 13.}

M m m m 2

rum

rum efficit. Cultor ergo Sanctuarij extremè laborans & moriens, si cupit morti CHRISTI conformari & configurari, monendus est, & monetur in hac effigie Patientiæ, vt septem oracula CHRISTI morientis sibi dicta & data consideret, vt *quæ desunt passionibus* CHRISTI, in corpore suo perficiat: *Patientia* quippe coronata *opus perfectum habebit*, postquam deficientis Solis iustitiæ septem radiis tacta fuerit & illuminata.

Colos. 1,

24.

Iacob. 1, 4.

ORACVLVM I.

Regis gloriosi languentis & morientis.

Lucæ 23, 34.

*Pater, dimitte illis: non enim sciunt
quid faciunt.*

*Dispositio
pro mortis
conflictu
remissio
iniuriarum.*

OPrimum oraculum est, cùm quis laborat & ægrotat extremè, componere cum aliis hostibus, vt liber & expeditus cum dira morte decertet. Rex, qui non minùs necessarium, quàm hostem potentem habet, prouocatus ac laceffit, si potest, pacem cum aliis tractat, & agit vt omnes suas exerat vires in eum, cuius congressum & prælium detrectare minimè licet. Hostis non minùs necessarius quàm

quàm potens mors est : necessarius quidem , quia *statutum est hominibus semel mori* ; potens verò , quo-
Heb. 9, 27.
 niam æquo pulsat pede , ac simul deiicit paupe-
 rum tabernas , Regumque turres . Cum tali hoste
 componere voluerunt perditæ vitæ homines apud
 Isaïam , sed frustra . *Propter hoc audite verbum Domini* *Isai. 28,*
Viri illufores , qui dominamini super populum meum , qui *14.*
est in Ierusalem . Dixistis enim : Percussimus fœdus cum
morte , & cum inferno fecimus pactum . Flagellum inun-
dans cùm transierit , non veniet super nos : quia posuimus
mendacium spem nostram , & mendacio protecti sumus .
 Fœdus absque dubio fictum ; proinde asserit Deus : *Isai. 28,*
Delebitur fœdus vestrum cum morte , & pactum vestrum *18.*
cum inferno non stabit : flagellum inundans cùm transie-
rit , eritis ei in conculcationem . Satiùs illis fuisset si non
 cum morte , vtpote necessario hoste , sed cum ad-
 uersariis suis pacis fœdus iniissent . Fecit hoc CHRIS-
 TVS , qui veniam pro crucifigentibus se precatus
 est , & morti inimicæ dixit : *Ero mors tua ô mors .* Et *Oseæ 13,*
quidem mors & vita duello conflixere mirando , mira- *14.*
bilemque victoriam de morte Rex gloriosus sibi &
nobis comparauit .

Hæc gloriosa victoria non gratis datur , sed emi-
 tur iniuriarum remissione , quemadmodum duæ fe-
 minæ veteri Dauidi vaticinatæ sunt . Vaticinata est

Abigail, quòd, si Dauid vindictam non sumeret de Nabal, futurus esset in numero Heroum, qui partem de morte victoriam agerent & celebrarent. Hoc

1. Reg. 25, est illud vaticinium: *Faciens faciet Dominus tibi domi-*
28. *no meo domum fidelem, quia praelia Domini, domine mi,*

tu praeliaris: malitia ergo non inueniatur in te omnibus diebus vitæ tuæ. Si enim surrexerit aliquando homo persequens te, & quærens animam tuam, erit anima domini mei custodita quasi in fasciculo viuentium. Idem ipsum promisit Regi mulier illa Thecuana, cuius opera vsus est Ioab, vt inductus ab ea Dauid parceret Absaloni, & eum ab exilio reuocaret. Sapienter satis

2. Reg. 14, ait: *Quare cogitasti huiuscemodi rem contra populum Dei,*
13. *& locutus est Rex verbum istud, vt peccet, & non reducat eiectum suum? Omnes morimur, & quasi aquæ dila-*

bimur in terram, quæ non reuertuntur. Omnes itaque, ô Rex, morimur: & cùm tantum ac tam validum hostem habeamus, vt illum superemus, & numero triumphatorum adscribamur, de sumenda ultione cogitare minimè debemus, sed potius de agenda compositione cum iis qui nobis inuisi sunt propter iniurias & contumelias, quas nobis immeritis intulerunt. Edoctus iis vaticiniis faustam ac beatam promeruit sibi Rex mortem, quam omnino infaustram & miserandam se meriturum ingenuè fatebatur, si

vindi-

vindicaret iniurias : *Domine Deus meus in te speravi*, Psal. 7, 2.
saluum me fac ex omnibus persequentibus me , & libera
me. Nequando rapiat, vt leo, animam meam, dum non est
qui redimat, neque qui saluum faciat. Domine Deus meus,
si feci istud, si est iniquitas in manibus meis : si reddidi re-
tribuentibus mihi mala , decidam meritò ab inimicis meis
inanis. Persequatur inimicus animam meam, & compre-
hendat , & conculcet in terra vitam meam , & gloriam
meam in puluerem deducat. Bonam sibi mortem opta-
bat & postulabat , & ne gratis illam haberet , iniu-
riarum illatarum sibi condonationem præsentabat.
Preiosa in conspectu Domini mors sanctorum eius. & hoc Psal. 115,
pretio emendam & acquirendam CHRISTVS ^{15.} *in*
cruce ostendit , & illam vterque Apostolus Iacobus
& Primicerius Martyrum Stephanus feliciter mo-
rientes postea mercati sunt.

Hæc vis , hæc virtus huius Dominici oraculi,
 quod pessimus seruus non excepit , nec pro se acce-
 pit , & propterea traditus est tortoribus , vt in mor-
 bo & morte eum grauitè premerent & torquerent.
 Remiserat ei Deus decem millium taleptorum de-
 bitum , & post remissionem , egressus seruus ille, inue- Matth. 18,
 nit vnum de conseruis suis , qui debebat ei centum dena- ^{28.}
 rios, & tenens suffocabat eum dicens : Redde quod debes.
 Et procidens conseruus eius, rogabat eum, dicens : Patien-
 tiam

tiam habe in me, & omnia reddam tibi. Ille autem noluit: sed abiit, & misit eum in carcerem, donec redderet debitum. Videntes autem conserui eius quæ fiebant, contristati sunt valdè: & venerunt, & narrauerunt Domino suo omnia quæ facta fuerant. Tunc vocauit illum dominus suus, & ait illi: Serue nequam, omne debitum dimisi tibi quoniam rogasti me: nõne ergo oportuit & te misereri conserui tui, sicut & ego tui misertus sum? Et iratus dominus eius tradidit eum tortoribus, quoadusque redderet vniuersum debitum. Sic & Pater meus cælestis faciet vobis, si non remiseritis vnusquisque fratri suo de cordibus vestris. Cælestis Pater tortoribus tradet inimicum & vltorem, id est, doloribus acerbissimis morborum mortis & inferorum, qui acceptas iniurias minimè condonauerit. Monendus igitur æger, vt si velit languere cum CHRISTO & mori, more CHRISTI clamantis è lecto crucis, Pater, dimitte illis, quia nesciunt quid faciunt, ex corde iniurias remittens pro inimicis preces & supplicationes offerat.

Luc. 23,
34.

ORA-

ORACVLVM II.

Regis gloriosi languentis & morientis.

Lucæ 23, 43.

*Amen dico tibi : Hodie mecum eris
in paradiso.*

BONUS latro crucis lecto affixus erat , & cùm Confessio
& oratio. doloribus magis peccatorum quàm tormentorum premeretur , languentem & pro se morientem CHRISTVM rogat , *Domine memento mei cùm veneris* Luc. 23, *in regnum tuum.* Respondit roganti CHRISTVS: *Amen* 42. *dico tibi : Hodie mecum eris in paradiso.* Magnum hoc oraculum est , non solum crucifixo latroni , sed etiam ægrotis destinatum ac dedicatum , in quo satis elucescit , quàm largus & promptus sit CHRISTVS Dominus , vt beneficiat iis qui eius implorant opem , cùm in extremis versantur. Acquiescit in hunc locum Ambrosius : *Plus Deus tribuit quàm rogatur.* Ille rogabat , vt memor sui esset Dominus cùm venisset in regnum suum ; Dominus autem ait , *Amen amen dico tibi , hodie mecum eris in paradiso.* Vita enim est esse cum CHRISTO , quia vbi CHRISTVS , ibi regnum. Accedit Augustinus agens de tertia Feria Paschatis:

Nnnn

Latro

*Latro attendens merita sua, non dixit, Memento mei, vt liberes me hodie; sed, cū veneris in regnum tuum, tunc memor mei esto, si mihi tormenta debentur vel quousque veneris in regnum tuum. Et ille: Non te differo, tanta fidei hodie reddo quod debeo. Torquebatur itaque reus, vt proferret veritatem, qua semel prolata non agit pius Deus de punitione delinquentis, sed de præmio paradisi debito confitenti. Non procedit more iudicis, qui torquet vt extorqueat veritatem, fatentemque reum plectit, cū Deus fatentem bonum latronem absoluerit, & regno suo donauerit. Nouerit æger, cū in lectulo doloris decumbit, expositum se torturæ, vt veritatem loquatur. Quod si Deus reum confitentem habuerit, sciat non de ipsius damnatione, sed potius de absolutione & remuneratione tractari. Nouerat conditionem Dei Ezechias Rex & æger: qui cū esset lecto affixus, declarauit veritatem, declarandam & exponendam cunctis ægris prædicauit. *Viuens viuens ipse confitebitur tibi, sicut & ego hodie: pater filiis notam faciet veritatem tuam. Domine saluum me fac, & Psalmos nostros cantabimus cunctis diebus vitæ nostræ in domo Domini.* Postquam veritatem aperuit, ait rex: *Domine saluum me fac;* ait latro, *Domine memento mei cū veneris in regnum tuum.* ait CHRISTVS: *Hodie mecum eris in paradiso.**

Isai. 38,
19.

radiso. Non distulit CHRISTVS præmium , com-
plens ipse quod in Prouerbiis præscripserat, *Ne dicas* Prou. 3,
28.
*amico tuo, Vade, & reuertere, & cras dabo tibi, cum
statim possis dare.*

Proximum morti & iudicio Dei ægrotum con-
fessorem professoremque veritatis Sermone de Pas-
sione Domini alloquitur in hæc verba Iustinianus:
*Prædonis huius Sancti, ô Catholicæ veritatis professor,
imitare exemplum, antequam venias ad iudicium. Corde
pendenti Domino assiste humiliter, fideliter pete, illumque
deuotè alloquere, & dic, Memento mei non tantum vt ve-
niam in regnum tuum, verum etiam vt doloribus compa-
tiar tuis, tuæque communicem passioni. Incongruum est
nempe, vt te patiente & languente, te moriente, ego à
cruciatibus illesus efficiar, potissimè cum sim tui causa mor-
roris. Ego enim sum qui deliqui.*

Excitat ad eandem confessionem animam ægro-
tantem, & pænè iam deploratam Augustinus Ser-
mone in Parasceue: *Quemadmodum Medicum tunc ma-
ximè admiramur, cum viderimus eum difficiles hominum
valetudines, mortisque pericula medendi arte curantem;*
*ita & CHRISTVM admirari iustum est, quando insana-
bilia vulnera corporibus & mentibus curat, quando pu-
blicanum & meretricem ad tantam sanitatem perducit, vt
etiam celo dignos ostendat. Et quid tali dignum quiete ege-*

rat latro, vt post crucem, quam meruerat, repentè paradiso dignus iudicaretur? Vis breuiter dicam virtutem fidei eius? Quando Petrus negauit deorsum, tunc ille confessus est sursum. Quantum conueniat ægrotis in præfata boni Latronis meditatione & confessione versari, auctor est ipse Augustinus, qui agens de infirmorum visitatione, dicit: Latronis illius in Euangelio quare nobis tam venerabiliter recensita confessio est? Quibus eleëmofynis, quibusve operibus, vel orationibus respondisti mi IESV benignissime quasi iureiurando, Amen dico tibi, hodie mecum eris in paradiso, nisi fidei suæ orationique breuissimæ, Memento mei Domine dum veneris in regnum tuum? Dico itaque omnibus, dico tandem confitentibus, dico confessis & consulentibus, ne confessi desperent, ne Sacerdotes post mortem aliquos ligent: imò cum suo IESV dicant, Soluite eum, & sinite abire.

Ioan. II,
45.

Habeat Deus confitentem reum, & ægrum simul orantem cum Ephræm Sermone Ascet. de Vita monastic. Ostende in me indignum peccatorem, Domine, ineffabiles diuinæ clementiæ tuæ diuitias: meque latronis illius fac consortem ac socium, qui per vnum verbum iucunda paradisi virentia consecutus est, idque obtinuit quod perfectis quibusque repromissum est: ita deprecor, benignissime ac misericordissime Domine, qui solus absque peccato es, immaculatus & incontaminatus, ineffabilem super

me

me tuam benignitatem ac misericordiam effunde, & præsta, ut omnes diligentes te, hæredes regni tui efficiamur, tuamque gloriam contemplantes, bonitatem tuam semper adoremus, dicamusque cum iucunditate uno pariter ore cuncti, qui immensam atque ineffabilem illam tuam promeruimus cernere pulchritudinem: Gloria Patri qui creauit nos, Gloria Filio qui saluauit nos, Gloria Spiritui sancto qui renouauit nos.

Monendus est æger, qui peccatis suis oneratus de impetranda venia desperat, ut memor sit boni Latronis, cuius poenitentia fera non fuit, quia vera. in cuius rei confirmationem affert exemplum Cæsarius lib. II. Miles quidam sceleratissimus ab inimicis suis captus est & occisus. Qui cum moreretur, verba eius extrema fuerunt, *Domine miserere mei.* In eius morte obsessus liberatus est, ad quem postea rediit: & cum solito atrocius eum vexaret, rogatus & coactus respondere, quare sic crudeliter ageret, responsum dedit: Multi congregati sumus in morte illius militis, sed quia nihil obtinuimus, amplius in hoc modico vasculo me vindico. Requisitus de causa subiecit. Tria tantum, heu! verba moriens protulit, propter quæ potestatem nostram euasit. Concludit Cæsarius: *Ecce huic prædoni ob inuocationem diuini nominis sicut latroni in cruce tormentum ver-*

sum est in martyrium. Annuit Cæfario Apollonius ibidem: In hoc exemplo satis confidero, quòd pœnitentia vera numquam fit fera.

ORACVLVM III.

Regis gloriosi languentis & morientis.

Matth. 27, 46. Marc. 15, 34.

Pfal. 21, 1. Eli, Eli, lamma sabacthani? hoc est, Deus meus, Deus meus, vt quid dereliquisti me?

Confilius.

HOc oraculum affecuti minimè sunt, qui, cùm languidus affixus cruci in has voces prorupisset, clamarunt ipsi, *Eliam vocat iste, sine, videamus, an veniat Elias liberans eum.* Et quidem vt languens, & iam moriens percipiatur, dum loquitur tantum mysterium, attentione opus est, quam, dum loqueretur CHRISTVS, pro se vel ab ipso Deo Patre humiliter postulabat, cùm ait, *Deus meus, Deus meus, vt quid dereliquisti me?* Recitat CHRISTVS verba Psalmi 21. quæ sic transfert ac refert S. Basiliius: *Deus Deus meus, attende mihi, quare dereliquisti me?* Explicat ille: *Cùm ligno crucis affixus esset Dominus, hac vsus est voce dialecto Hebræa. Dicit autem ista Dominus CHRISTVS tamquam primitiæ humanæ naturæ pro*
tota

DE SEPTEM EXTREMIS VERBIS CHRISTI. 655

tota natura. Portans ergo CHRISTVS totius naturæ languores simul & dolores dixit Patri : *Deus Deus meus attende mihi* , qui primitias non gaudiorum, sed mœrorum ac dolorum tibi offero. *Vt quid dereliquisti me ?* dereliquisti me extrema tormenta pati , & instar currentis aquæ vitam meam diffluere, *sicut aqua effusus sum.* Legimus apud Birgittam lib.4. ^{Psalm. 22.} cap.7. mirabile fuisse spectaculum in CHRISTO ^{15.} languente , cùm præfata verba protulit , *Postquam dixit , Deus Deus meus , vt quid dereliquisti me ? tunc color mortis accessit , cùm cor prope scissionem esset , totum corpus eius contremuit , & tunc barba eius super pectus eius cecidit.*

Solet æger in lecto doloris iacens in eum reduci statum , vt similis sit descendentibus in lacum , totus desolatus & afflictus , desertus & derelictus quodammodò à Deo ipso ; tunc meminerit CHRISTI Domini clamantis è cruce pro se : *Deus meus, Deus meus , vt quid dereliquisti me ?* Similis erat tunc morientibus CHRISTVS æger, & tenerum eius cor non solùm pro passione quam subibat , sed etiam præ compassione qua tangebatur in eos qui similia tollerarent, propè scindebatur & disrumpebatur. Cùm eas mortis angustias patiatur miser infirmus , patientem & compatientem simul sibi consideret piissimum

simum crucifixum, vt & in eius consortio extremas afflictiones ac desolationes subire & tolerare queat.

Solet æger in laborioso hoc statu constitutus, licet animosus sit, & benè de sua salute fidat, trepidare, & totis artubus contremiscere. Memor crucifixi sit, cuius totum corpus contremuit, cùm clamauit: *Deus meus, Deus meus, vt quid dereliquisti me?* Et quidem S. Ephræm, dum piū suū conderet testamentum, ageretque iam animam, mirum in modum pauebat & dicebat: *Quid igitur? plorémne? at non est qui attendat? Clamémne? at vbi est qui me exaudiat? Hei mihi? ab increpatione iudicij expectatio mihi grauis.* Hic ipse prænotauerat de morte vniuscuiusque agens, magnum & occultum esse mortis arcum prorsus inenarrabile & formidabile. *Horrenda & formidabilia sunt,* Ephræm loquitur, *quæ tunc anima subibit: sed nemo nostrum ea nouit nisi solum qui illic permearunt, nisi soli qui illuc præcesserunt, nisi soli qui ibi periculum eorum fecerunt.* Non vides apud fratres morientes, animamque agentes, quibus assidemus, quàm terribilia tunc eis accidere cernantur? quo pacto corripiantur, quomodo perturbentur? *Et* quo pacto suspirent? non aspicias eos sudoribus frigidos, & amarulentos instar messorum in agro: quomodo oculos huc illucque retorqueant, quomodo alij dentibus strideant, quomodo torpescant & expauescant,

nescant, tumultuarieque agant : & quo pacto multi etiam capillos suos euellant , quo pacto ex lecto exiliant , fugere volentes licet nequeant ; videntque ea quæ numquam prius viderunt , & audiunt à potestatibus quæ numquam antea audierunt , & patiuntur quæ numquam aliàs passi sunt ; querentes qui eos redimat , & nemo est qui liberet ; requirantes socios , & nemo est qui ipsos comitetur ; requirantes aduocatos & patronos , & nemo qui ausit . Quos aspicientes , tunc contremiscimus & plangimus , tenentesque eorum manus salutamus atque complectimur , lacrymis irrigantes . Sudorem vultus detergimus , & oculos eorum siccamus : linguam aestuantem aqua madesacimus & refrigeramus . Aurem nostram ori eorum admouemus , ut tenues saltem atque subtiles eorum voces exaudiamus . Deinde interrogamus , dicentes : Quomodo teipsum nunc sentis ? Noli timere : benignus est Deus .

Noli , inquam , timere : benignus est Deus , qui similia passus in cruce illud edidit oraculum , *Deus meus , Deus meus , ut quid dereliquisti me ?* tunc ipse timuit & pavit , & tunc barba eius super pectus eius cecidit . Virilis barba , signum virtutis est . Cecidit virtus humana , & extulit se diuina vis . Virtus in in-2. Cor. 12, firmitate perficitur . Vnde & infirmus CHRISTVS⁹ cum Psalm. 21. clamasset , *Deus Deus meus , ut quid dereliquisti me ?* non multo post subiungit , *Qui time-*

Oooo

tis

tis Dominum, laudate eum; uniuersum semen Jacob glorificate eum. Timeat eum omne semen Israël, quoniam non spreuit, neque despexit deprecationem pauperis. Nec auertit faciem suam à me: & cùm clamarem ad eum, exaudivit me. Ergo qui sic constitutus est, dicat Deo: Potésne, Deus meus, spernere vocem clamantis, & confugientis ad te? Nónne tu ille, qui dixisti: Clamabit ad me, & ego exaudiam eum, cum ipso sum in tribulatione?

*Psal. 90,
15.*

ORACVLVM IV.

Regis gloriosi languentis & morientis.

Ioan. 19, 26.

Cùm vidisset ergo IESVS matrem, & discipulum stantem, quem diligebat, dicit matri suae: Mulier, ecce filius tuus. Deinde dicit discipulo: Ecce mater tua.

*Subsidium
B. Maria.*

CHRISTVS in summis doloribus erat, & vt ostenderet quàm parum esset de suarum grauitate poenarum anxius & sollicitus, de negotiis aliis agebat. Summum hoc negotium erat, vt matris, & eius quem diligebat, discipuli curam haberet. Auctor est Cyrillus lib. 12. in Ioan. cap. 34. *Prouidit matri,*

tri, quasi parum de magnitudine doloris curaret. Nam etsi acriter patiebatur, erat tamen impassibilis. Non curabat acerbos dolores Filius, curabat piissima mater, quæ iuxta lectulum ægrotantis tota sollicita & anxia præstò erat, & ad omne languentis obsequium parata stabat. Accedit Ambrosius lib. 10. in Lucam cap. 23. Stabat & mater cum studio pietatis, quæ sua pericula posthaberet. Stabat ante crucem, & piis spectabat oculis Filij vulnera, quia expectabat non pignoris mortem, sed mundi salutem. Aut fortasse, quia cognouerat per Filij mortem mundi redemptionem, aula regalis putabat se & sua morte publico muneri aliquid addituram. Sed IESVS non egebat adiutore ad omnium redemptionem, quia dixit: Factus Psal. 87, 6. sum sicut homo sine adiutorio, inter mortuos liber. Suscepit quidem matris affectum, sed non quæsiuit hominis auxilium. Quod offerebat auxilium transtulit in Ioannem CHRISTVS, cùm ait, Mulier, ecce filius tuus. Tua ope & opera ego non egeo, eget Ioannes infirmus, quem ego sub tua cura atque tutela constituo, ut maternè cum illo agas. Dicitque deinde Ioanni, Ecce mater tua, quæ in laboribus & infirmitatibus Ioan. 19, tuis præstò erit & assistet, impendetque suum au-^{27.} xilium & subsidium. Accepit eam discipulus in sua, & priori matri suæ renuntiavit. Fons & origo morborum & dolorum, & simul mortis, est parens huma-

Iob 14, 1. *na. Homo natus de muliere, breui viuens tempore, repletur multis miseriis. Quasi flos egreditur, & conteritur, & fugit velut vmbra.* Prouidit pius Deus de muliere Ioanni, quæ est salus infirmorum, & refugium morientium.

De MARIA communi matre ægrotantium & migrantium prouidit CHRISTVS Ioanni, qui non ex martyrio sibi inflicto à Domitiano, sed postea obiit ex naturæ infirmitate. Et quidem Ioannes Apostolus non solum priuatam, sed etiam publicam personam agebat, vt vnusquisque languentium & morientium loco matris sacram MARIAM quærat, habeat, & colat. Verè mater infirmorum est, quæ & illorum curam habet. Vnde apud Cæsarium lib. 7. cap. 8. cum essent duo sibi addicti pauperes in Xenodochio ægrotantes, dixit Administratori: *Bone pater, vide vt diligentia ac custodia adhibeatur illis duobus pauperibus, quia in periculoso statu sunt.* Verè mater infirmorum est, quæ & visitat ægros suos, quemadmodum cap. 13. idem Cæsarius testatur. In tempesta enim nocte visa in monasterio est *lectos infirmorum perlustrans, & dormientibus benedicens.* Verè mater infirmorum est, & simul salus eorum. Nobilis vir Otto, sicut cap. 23. commemorat idem Cæsarius, duplici laborabat infirmitate, febre videlicet

cet & fistula : & cū eò deuenisset, vt exhalaret iam animam , ecce beata Virgo MARIA , quam inuocauerat , associata Filio adfuit , & interpellans pro ægroto, *Fili, inquit, da mihi puerum istum.* Qui respondit : *Tuus sit.* Ad quod verbum mox cœpit ægrotus iam semimortuus respirare atque confortari, & sibi de salute gratulari. Verè mater infirmorum est, quæ infirmis iam deploratis iniungit remedia salutis, nec horret eorum scabiem & squallorem. Testis mihi sit apud eundem auctorem cap. 15. Adam Sacerdos & monachus , qui ab infātia sua scabioso capite laborabat , nec poterat vlla medela sanari. Hic totus erat obsequio Mariano mancipatus : nec Virgo defuit , quæ aliquando in Sacello suo apparens squalido ægro, *Bone puer, ait, quare non adhibetur cura capiti tuo?* Respondente verò Ottone , *Domina, satis circa me laborauerunt amici tui, sed nihil profecerunt;* subiunxit illa: *Nosti quæ sim?* Cui cū diceret, *Non, domina;* respondit : *Ego sum mater CHRISTI, & Domina huius Oratoriij, quia mei memoriam solitus es habere, ego tibi curam adhibeo. Recipe fructus ligni fusilis, & fac tibi hodie ex eo lauari caput tribus vicibus ante Missam, in nomine Patris, & Filij, & Spiritus sancti, statimque curaberis.* & adiecit : *Ad me accede Adam.* quod & fecit. Flectenti coram se genua ait : *Ab hac hora vs-*

que ad diem mortis tuæ non dolebis capite. Veritatem dictorum postea probauit euentus. Nouit & ipsa non solum iniungere medicinas, sed adiungere & applicare remedia, quemadmodum eodem lib. cap. 49. recensetur. Cum feruens in obsequio Virginis virgo sanctimonialis, dum genua flecteret, tibiam læsisset ac vulnerasset, visa est in somnis adstare B. MARIA pyxidem vnguenti portans in manu sua, immisissique digitis accepto vnguento perungere vulneratam tibiam, quam & sanauit, tanta suauissimi odoris relictæ fragrantia, vt & ipsa mirabilis esset, & miraculum patratum euulgaret.

Verè mater emigrantium Virgo MARIA est, quæ vel in ipso mortis agone redire facit morientes. Confirmat hoc ipsum Cæsarius lib. 7. cap. 41. & quidem exemplo Religiosi morientis, qui in ipso mortis articulo ridere cœpit. & rogatus quid ita faceret, respondit: *Cur non rideam? ecce Domina nostra præsens est, & iam animam meam suscipiet.* Addit Auctor: *Videtur mihi in isto versiculus Poëtæ impletus, Incipe parue puer risu cognoscere matrem. Puer erat purus, paruus & mansuetus. Haud dubiè, quin beata Virgo morienti maternos exhibuerit gestus, quia non risum sed timorem vultus excitat seuerus.* Hæc magnanima mulier est, cui conuenit illud elogium, *Ridebit in die nouissimo,*

& eodem mortis die docet ridere filios, quorum vnus religiosus ille miles erat, de quo cap. 57. eiusdem libri. Hic enim cū in extremo mortis certamine mira lætitiæ & exultationis cordis & animæ signa dedisset, examinatus, lætus totus & alacer ait: *Quare non gaudeam? ecce Domina nostra sancta MARIA hīc præsens est, & hac mihi dixit: Nunc, quia reliquisti uxorem, & filios, & omnia tua propter honorem Filij mei, periculis te exponens, ego benè & plenè retribuam tibi. quin statim exclamauit: En video cælum apertum, & in eo sedem mihi præparatam, ad quam celerius sum ascensurus. Mox oleo inunctus, sacroque Viatico munitus, animam suam deposuit apud Mariam.*

Maria mater gratiæ,

Dulcis parens clementiæ,

Tu nos ab hoste protege,

Et mortis hora suscipe.

Benè Bernardus Serm. 2. de Nuptiis: *MARIA si piè à nobis pulsata fuerit, non deerit necessitati nostræ: quoniam misericors est, & Mater misericordiæ.*

ORA-

ORACVLVM V.

Regis gloriosi languentis & morientis.

Ioan. 19, 28.

Posteà sciens IESVS quia omnia consummata sunt, vt consummaretur Scriptura, dixit: Sitio.

*Sitis im-
mortali-
tatis.*

ARgumentum summi doloris erat haud dubiè illa sitis ardentissima, quam languidus CHRISTVS patiebatur, vt aduertit Cyrillus lib. 12. in Ioan- nem cap. 35. *Sanctissima caro CHRISTI naturale quid patitur: multis enim ac variis doloribus exsiccata, siti torquetur. Multum enim possunt dolores ad commouendam sitim: innatum enim calorem exagitantes, vel quod in profunditate humidum est, & igneis ardoribus dolentis viscera vrunt.* Totus sitibundus ægrotus, meminerit fientis CHRISTI, qui pro salute nostra sitim acerbissimam subire dignatus est. Quod si iucundus potus negetur afflicto ægro, & amaræ potiones ministrantur, in eum statum deuenit, vt similis fiat CHRISTO, cui perfidi ministri pro grato & iucundo potu acetum amarum & acerbum attulerunt. Similis CHRISTO Bernardus, qui cùm esset deploratus,

tus, dira siti vexabatur, & si parum in potu sumendo excessisset, mirum in modumangebatur. Testatur in Epistola postrema, quam dictante ipso, scribi voluit ad Arnoldum Bonæ vallis Abbatem. *Defectus stomachi, ferè totum quod patior est. Frequenter & in die & in nocte exigit confortari modico admodum qualicumque liquore. Hoc parum quod dignatur admittere, non sine graui molestia sumit : sed timet grauiorem, si se vacuum omnino dimiserit. Quòd si plusculum quid interdum admittere acquiescat, id grauissimum.*

Sitiebat CHRISTVS non tam bibere, quàm iam viuere immortalem corporis vitam : appetebat resurrectionem, vt lib. 10. in Luc. cap. 33. interpretatur Ambrosius, apud quem vitæ mortalis symbolum acetum est. Erat itaque humana vita instar vini generosi, antequam vitaretur & corrumperetur, post vitiosam corruptionem in acetum amarissimum versa est. Tunc maximè apparet, cùm æger vitam absoluit, & acetum mortalitatis exhaurit. Hic status Ezechiaë Regis cùm diceret : *Recogitabo tibi annos* ^{Isai. 38.} *meos in amaritudine animæ meæ.* & rursus : *Ecce in pace* ^{15.} *amaritudo mea amarissima.* Cùm factus est Deus homo, vitam amaritudine plenam cepit, in cuius rei testimonium acetum, non vinum, æger in cruce sumpsit, vt idem Ambrosius notat. *Acetum itaque bi-*

P p p p

bitur,

bitur, *vinum cum felle non bibitur: non quia fel, sed quia admixta vino amaritudines recusantur. Nam utique amaritudines vite nostrae pro corporis conditione suscepit. Cùm ergo extremè laborans infirmus corde, & animo amaro est, ut tædeat iam ipsum vivere, acrimoniam aceti percipit; & more CHRISTI vinum cum felle mixtum recusat, amat purum & nitidum, suave atque iucundum vinum resurrectionis, cuius sinceritati, sicut concludit Ambrosius, non debuit amaritudo misceri, ut ostenderetur sine amaritudine futura immortalitas resurgentium.* Nec quidem humanam vitam pertæsus, sitiebat resurrectionem CHRISTVS affixus cruci, quandoquidem, si Patri cælesti placuisset, adhuc duriora subire paratus erat. Audiamus Laurentium Iustinianum Sermone de Passione Domini: *Numquid sitit satietas? Sititne, qui sitientium ardoribus refrigerium præstat? An vite fons sitire valet? Potest, inquam, quia vult. sitit utique pereuntium salutem, animarumque diuinum sitit honorem, inebriatus amaritudine adhuc duriora sustinere desiderat. In spiritu sitit charitatis flamma succensus, sitit etiam, ut verus homo passibilis mortalisque.* Quisquis ergo grauiter in læto laborat, ita appetat immortalitatem, ut, si placeat Deo, acerbiora adhuc tormenta nec renuat nec recuset. Nec renuebat, nec refugiebat Martinus, cùm

cum iam moriturus diceret: *Non recuso laborem.* Sequatur interim per omnia sitientem, qui dicit de se: *Cucurri in siti.* Dicat cum D. Augustino lib. Meditat. ^{Psal. 61, 5.} cap. 37. *Rex potentissime trabe me sursum ad te. Curram post te in odorem unguentorum tuorum. Curram, & non deficiam, te trahente, & me currente. Trahe os sitientis animæ in æterna fluentia æternæ satietatis, imò trabe me ad te fontem viuum, ut pro capto meo bibam, unde semper viuam.*

O R A C V L V M VI.

Regis gloriosi languentis & morientis.

Ioan. 19, 30.

*Cum ergo accepisset IESVS acetum dixit:
Consummatum est.*

Summa fellis & aceti amaritudine opus redemptionis nostræ languens in cruce CHRISTVS <sup>Finis amar-
tus.</sup> perfecit & consummauit, ut scirent mortales omnes, non gaudiis & voluptatibus, sed angoribus & doloribus pensum humanæ vitæ absoluendum. Hic finis filiorum Dei, quem Filius Dei CHRISTVS habuit, & in quo filij adulterorum ab ipso omnino discrepant. *Filij adulterorum*, Sapiens ait, *in consum-* ^{Sap. 3, 16.} *matione non erunt.* Huc pertinet, quod scribit Aposto-

lus cap. 12. ad Hebræos. *Quem diligit Dominus, castigat: flagellat autem omnem filium, quem recipit. In disciplina perseuerate. Tamquam filiis vobis offert se Deus: quis enim filius, quem non corripit pater? Quod si extra disciplinam estis, cuius participes facti sunt omnes: ergo adulteri, & non filij estis. Ergo monendus æger, ut si legitimus Dei filius, & non adulterinus esse velit, perseueret vsque ad mortem in passionibus & doloribus, cui Deus ipse dicit: Fili noli negligere disciplinam Domini: neque fatigeris, dum ab eo argueris.*

Dixit Medicus salutis nostræ, *Consummatum est*, ut ostenderet, curationem infirmæ naturæ nostræ omnino esse perfectam. Qualis propterea debeat esse homo cum CHRISTO, qui est auctor salutis suæ, monuit omnem hominem Ecclesiasticus cap. 38. *Honora Medicum propter necessitatem: etenim illum creauit Altissimus. A Deo est enim omnis medela, & à Rege accipiet donationem. Disciplina Medici exaltabit caput illius, & in conspectu magnatorum collaudabitur. Altissimus creauit de terra medicamenta, & vir prudens non abhorrebit illa. Nonne à ligno indulcata est aqua amara? Nonne à ligno sanctæ Crucis acetum ipsum versum & conuersum est in liquorem suauissimum? Fatetur citatus Ambrosius: Benè ad consummanda omnia, & corruptio sinceritatis hauritur, ut omnia cruci, quæ vitiosa erant,*

erant, figerentur. Concludit tandem: Ergo acetum bibitur, hoc est, vitium corruptæ per Adam immortalitatis aboletur in calamo, vt de corpore absolueretur humano. Hic ipse cælestis Medicus, in cuius elogium addit deinde Ecclesiasticus: *Ad agnitionem hominum virtus illorum, & dedit hominibus scientiam Altissimus, honorari in mirabilibus suis. In his curans mitigabit dolorem, & vnguentarius faciet pigmenta suauitatis, & vñctiones conficiet sanitatis, & non consummabuntur opera eius.* Deus in mirabilibus suis honoratur, cùm æger sacrum accipit Viaticum, in quo *memoriam fecit mirabili-^{Psal. 110,}um suorum misericors & miserator Dominus, escam de-^{4.}dit timentibus se.* Tunc agit vnguentarium ad mitigandum temperandumque dolorem, cùm vtitur extrema Vñctione, in qua pigmenta suauitatis & sanitatis continentur, quemadmodum cap. 5. scribit Iacobus Apostolus: *Infirmatur quis in vobis? Inducat Presbyteros Ecclesie, & orent super eum, vngentes eum oleo in nomine Domini, & oratio fidei saluabit infirmum, & alleuiabit eum Dominus, & si in peccatis sit, remittentur ei.* Post hæc quid aliud sperare debebamus, nisi quod diceret Ecclesiasticus cum CHRISTO, *Consummatum est?* & tamen ait, *Et non consummabuntur opera eius.*

Dei perfecta sunt opera, & donec viuat infirmus,

aderit semper Medicus, aderit CHRISTVS, cuius
 præsentiam recolentes dicimus in animæ commen-
 datione: *Liberet te à cruciatu CHRISTVS, qui pro te
 crucifixus est. Liberet te ab æterna morte CHRISTVS,
 qui pro te mori dignatus est. Constituat te CHRISTVS.
 Filius Dei viui intra paradisi sui semper amœna virentia,
 & inter oues suas verus ille pastor agnoscat. Ille ab omni-
 bus peccatis tuis te absoluat, atque ad dexteram suam in
 electorum te sorte constituat. Redemptorem tuum facie ad
 faciem videas, & præsens semper assistens manifestissimam
 beatis oculis aspicias Veritatem. Constitutus igitur inter
 agmina beatorum, contemplationis diuinæ dulcedine potia-
 ris in sæcula sæculorum. Amen.*

ORACVLVM VII.

Regis gloriosi languentis & morientis.

Lucæ 23, 46.

*Et clamans voce magna IESVS ait: Pater, in
 manus tuas commendo spiritum meum. Et hæc
 dicens, expirauit.*

Commen-
 datio ani-
 mæ.

FORma obitus CHRISTI, forma est exitus nostri.
 Commendat CHRISTVS spiritum suum diui-
 no Patri, & vt ait Ambrosius lib. 10. in Luc. cap. 33.
benè

benè commendatur spiritus qui seruatur. Quod enim commendatur, utique non amittitur. Hoc dicto tradidit spiritum. Et benè tradidit, quia non inuitus amisit. Denique Matthæus ait, Emisit spiritum. Quod enim emittitur, ^{Matth. 27.} voluntarium est; quod amittitur, necessarium. Dignus animarum locus manus est Dei: ^{Sap. 3, 1.} *Iustorum animæ in manu Dei sunt, & non tanget illos tormentum mortis.* Commendetur ergo spiritus in manibus Patris summi, in cuius manibus seruandus est. Qui sic traditur, non amittitur, sed emittitur, & à Patre diuino recipitur. Summum hoc oraculum est, in CHRISTO, & cum CHRISTO mori. ^{Apoc. 14, 13.} *Beati mortui qui in Domino moriuntur; opera enim illorum sequuntur illos.* Pulchra animæ commendatio, quæ non illa sola, sed operibus etiam Christianis comitata & associata compareret, sicut & 1. Petri cap. 4. præcipitur: *Itaque & hi, qui patiuntur secundum voluntatem Dei, fideli creatori commendent animas suas in benefactis.* CHRISTVS prius opus suum consummauit, dein spiritum suum offert & tradit æterno Patri.

Communem morientium causam agit hoc loco CHRISTVS, quandoquidem non solum spiritum suum, sed etiam animas piè obeuntium Christianorum Patri suo commendat. Sic expendit Iustinianus de Triumphali agone CHRISTI cap. 20. extrema hæc

hæc verba : *Spiritum utique meum in manus tuas commendo, non tantum quem gero ut homo, sed quem ut mediator & redemptor acquisivi mihi. Meum planè dixerim membra mea, Ecclesiam meam, sponsam, quam patiendo pro illa meam facio. Hunc spiritum meum nuncupo, quia adherendo mihi vnus spiritus fit, & corpus vnum. Qui adhæret CHRISTO, & vnus spiritus cum eo est, ratum habens quod CHRISTVS in cruce fecit, spiritum suum in manus Patris commendet. Credere namque debemus, ut ait Cyrillus lib. 12. in Ioannem cap. 35. cum à corporibus sanctorum animæ abierint, tamquam in manu charissimi Patris commendari : nec ut peccatorum animæ ad immensi cruciatus locum, id est, ad inferos deferri, itinere hoc nobis à CHRISTO primum parato, sed in manus potius Patris euolare. Tradidit enim animam suam manibus Genitoris, ut ab illa, & per illam, factò initio, certam huius rei spem habeamus, firmiter credentes in manibus Dei nos post mortem futuros, vitamque multò meliorem, ac perpetuò cum CHRISTO victuros: ideo*

Phil. 1, 23. *enim Paulus desiderauit dissolui, & esse cum CHRISTO.*

Hæc sola consideratio quanti referat, ut excitetur homo in extremo illo conflictu, quo exhalare spiritum debeat, satis constat ex iis quæ de fratre suo Gerardo memorat S. Bernardus Serm. 26. super Cantica: *Accitus sum ego ad id miraculi, videre exultantem in morte*

morte hominem, & insultantem morti, Vbi est mors victo-^{1. COR. 15.}
 ria tua? vbi est mors stimulus tuus? Iam canendo moritur^{59.}
 homo, & moriendo cantat. Canebat itaque Gerardus:
In te Domine speravi, non confundar in aeternum. & pro-
 secutus est Psalmum, donec ad illa verba veniret:
In manus tuas Domine commendo spiritum meum. Tunc
 temporis accessit ad Gerardum Bernardus. Cùm ergo,
 inquit, superuenissem, & extrema iam Psalmi, me audien-
 te, clara voce compleisset, suspiciens in cælum ait: Pater in
 manus tuas commendo spiritum meum. & repetens eum-
 dem sermonem, ac frequenter ingeminans ait: Pater, Pater,
 conuersus ad me, exhilarata quidem facie, quanta, inquit,
 dignatio Dei, patrem hominum esse? quanta hominum glo-
 ria, Dei filios esse & heredes? nam si filij, & heredes.

Hæc de Cruce, hæc de Patientia, hæc de Oraculis
 gloriosi Regis Crucifixorum & Cruciferorum, quo-
 rum apparent imagines in Sanctuario Cruci & Pa-
 tientiae sacro, quæ variis picturis exhibetur & expri-
 mitur. Sic omnis faber & architectus, qui noctem tamquā^{Eccli. 32.}
 diem transigit, qui sculpsit signacula sculptilia, & assidui-^{28.}
 tas eius variat picturam, cor suum dabit in similitudinem
 picturæ, & vigilia sua perficiet opus. Congruit hoc lo-
 co, quod asserit Apollonius apud Cæsarium lib. de
 Diuersis visionib. cap. 23. Puto quòd sculptores & picto-
 res sacrarum imaginum aliquod speciale præmium ex hoc

percipiant. Cui Cæfarius : De hoc dubitare non debes, si tamen magis sit deuotio quàm auaritia mercedis in causa. Confirmat exemplo. Monachus quidam ante paucos annos mortuus est. erat autem pictor bonus, & Ordini nostro tam deuotus, vt gratis, expensis tantùm receptis, in diuersis domibus ad diuersa altaria miri decoris crucifixos depingeret : nam omnes crucifixos ipse penè fecit, nullas à nobis requirens expensas. Volens suo effigiatori ostendere summus ille Crucifixus, ad cuius imaginem omnes facti sumus, quàm sibi labor ille sanctissimus placeret, in Parasceue, die scilicet in qua passio specialiter representatur, illum non sine multorum admiratione de hoc mundo assumere dignatus est. quasi diceret Dominus : Quia circa meam passionem mente & corpore deuotè semper laborasti, de illa cogitando, illamque per picturas aliis exhibendo ; ecce in die mea passionis te de labore ad requiem assumo, in qua iam non mentaliter, vel per picturas, sed facie ad faciem me contempleris.

S. Bonauentura in Hymno S. Crucis:

Totum sit, quod ego dixi,
Ad honorem Crucifixi,
Ad laudem & gloriam;

Vt meorum peccatorum
Gloriosus Rex calorum
Mihî donet veniam. Amen.

INDEX

I N D E X
A R G V M E N T O R V M
S A C R I S A N C T V A R I I.

DE Sympathia CHRISTI Crucifixi, Crucifixorum
& Cruciferorum. I. & II. Parte.

De sacra Communione & Viatico. I. & II. Parte.

De laboribus & morbis. I. & II. Parte.

De extremis verbis morientium. I. II. & III. Parte.

& de vltimis verbis CHRISTI, in Appendice Sanctuarij.

De statibus Virginitatis, matrimonij & viduitatis.
III. Parte.

De Sympathia beatæ MARIAE, & Crucifixarum feminarum. ibid.

Explicatio Orationis Salve Regina, in gratiam laborantium & egrotantium. III. Parte.

De coronis, & corollis Crucifixorum & Cruciferorum.
I. II. & III. Parte.

INDEX RERVM MEMORABILIVM.

A

- A** Delhardi Abbatis morientis extrema verba. 132
- B. Agathæ morientis extrema verba. 620
- S. Agnetis morientis extrema verba. 610
- S. Agricolaë crucifixio. 179
eius sympathia cum Christo. 180.
crux timoris Domini. *ibid.*
crux ægrotantis. 181
leuamen laborantis & ægrotantis. 183
gloriosum opus & corona. 184
- Alberti Austriaci Belgarum Principis pietas ante mortem. 544
- S. Alexandri crucifixio. 207
eius sympathia cum Christo. *ibid.*
crux euiscerationis. 208
crux ægrotantis. 209
leuamen laborantis & ægrotantis. 210
gloriosum opus & corona. 211
- Alphonfi Castrij crucifixio. 457
eius sympathia cum Christo. *ibid.*
crux Sociorum Iesv. 458
crux ægrotantis. 459
- leuamen laborantis & ægrotantis. 460
gloriosum opus & corona. 461
- S. Ambrosij morientis extrema verba. 242. 607
- S. Andreaë crucifixio qualis. 27
eius sympathia cum Christo. *ibid.*
crux voluntariæ sui ipsius oblationis. 28
crux ægrotantis. *ibid.*
instrumentum artis benè moriendi. *ibid.*
excitatio ægrotantis. 29
leuamen laborantis & ægrotantis. 30
gloriosum opus & corona. 31
- Annæ de Iesv patientia singularis. 551
- Anna de Iesv & Anna de S. Bartholomæo dignæ filiæ S. Tere-
sæ. 574. 575
- S. Antonij morientis extrema verba. 374. 384
- Antonini Florentini morientis extrema verba. 232
- S. Apollonij crucifixio. 303
eius sympathia cum Christo. *ibid.*
crux perpetui laboris. 304
crux ægrotantis. 305
leuamen laborantis & ægrotantis.

INDEX RERVM.

tantis. 306
 gloriosum opus & corona. 307
 S. Asterij crucifixio. 369
 eius sympathia cum Christo. *ibid.*
 crux fraternitatis religiosæ. 370
 crux ægrotantium. 371
 leuamen laborantis & ægro-
 tantis. 372
 gloriosum opus & corona. 373
 S. Astij Episcopi crucifixio. 97
 eius sympathia cum Christo. *ibid.*
 crux amoris. 98
 crux ægrotantis. 100
 leuamen laborantis & ægro-
 tantis. 101
 gloriosum opus & corona. 103
 Aureola amoris. 104
 mortalitatis. 86
 mortificationis. 94
 nauigationis mundanæ. 132
 scientiæ Sanctorum. 66
 scandala tollentis ex se. 113
 triumphantis in cruce & lecto. 143
 zeli diuini. 121. *Vide* Laureola.
 S. Austreberthæ virginis morien-
 tis extrema verba. 104

B.

S. **B**artholomæi crucifixio. 43
 eius sympathia cum Chri-
 sto. *ibid.*
 crux iniusti tribunalis. 44
 crux ægrotantis. 45
 leuamen laborantis & ægro-
 tantis. 47

eius opus gloriosum. 48
 aureola spoliationis iniustæ. *ibid.*
 S. Basilisci crucifixio. 423
 eius sympathia cum Christo. *ibid.*
 crux mundanæ concupiscen-
 tiæ. 424
 crux ægrotantium. 426
 leuamen laborantis & ægro-
 tantis. 427.
 gloriosum opus & corona. 428
 eius morientis extrema verba. 143
 Beatorum Iaponensium crucifi-
 xio. 439
 eorum sympathia cum Chri-
 sto. 440
 crux circumcisionis spiritualis. *ibid.* 441
 crux ægrotantium. *ibid.*
 leuamen laborantis & ægro-
 tantis. 442. 443
 gloriosum opus & corona. 443
 S. Benedictæ virginis crucifixio. 579
 eius sympathia cum B. MA-
 RIA. *ibid.*
 crux status virginalis. 580
 speculum humanæ infirmita-
 tis & patientiæ. 582
 extrema verba morientis. 583
 leuamen columbæ gementis. *ibid.*
 S. Blandinæ virginis crucifixio. 555
 eius sympathia cum B. MA-
 RIA. *ibid.*
 Qqqq 3 crux

INDEX R E R V M.

crux status virginitatis. 556
speculum S. Blandinæ virginis.
557

C

Calliopij crucifixio. 539
eius sympathia cum san-
cta MARIA. 540
crux charæ prolis amissæ. *ibid.*
541
morientis extrema verba. 428.
436
Carilephi morientis extrema ver-
ba. 346. 392
S. Carpophori crucifixio. 349
eius cum Christo sympathia.
ibid.
crux curandæ animæ. 350
crux ægrotantium. 352
leuamen laborantis & ægro-
tantis. 354
gloriosum opus & corona. 355
Christophori innocentis crucifi-
xio. 517
eius sympathia cum Christo.
ibid.
crux Christum ferentis. 519
crux ægrotantis. 520
Christus gloriosus Rex crucifi-
xus. 7
crux eius, crux obedientiæ. 8
crux ægrotantis. *ibid.*
instrumentum benè viuendi &
moriendi. *ibid.*
excitatio ægrotantis. 9
leuamen laborantis & ægro-
tantis. 10. 11
ei tota crux incubuit. 13

eius septem verba extrema.
643. & seqq.
eius morientis conflictus. 654.
655. 656. 657
eius etiam pro Matre & Ioan-
ne sollicitudo. 658. 659.
660. 661
& consummatio. 667. 668.
669
Claræ virginis morientis extrema
verba. 550
S. Claudij crucifixio. 369
eius sympathia cum Christo.
ibid.
crux fraternitatis religiosæ. 370
crux ægrotantium. 371
leuamen laborantis & ægro-
tantis. 372
gloriosum opus & corona. 373
S. Clementis Episcopi & socio-
rum crucifixio. 117
eorundem cum Christo sym-
pathia. 118
crux zeli animarum. *ibid.*
crux ægrotantium. 119
leuamen laborantis & ægro-
tantis. 120
gloriosum opus & corona. 121
S. Cleonici crucifixio. 423
eius sympathia cum Christo.
ibid.
crux mundanæ concupiscen-
tiæ. 424
crux ægrotantium. 426
leuamen laborantis & ægro-
tantis. 427
gloriosum opus & corona.
428

Com-

INDEX RERVM.

Commendatio animæ morientis.
670.671.672.

Confessio & oratio rectè dispo-
nunt ad mortem. 649.650.
651.652.653

S. Cosmæ crucifixio. 189
eius sympathia cum Christo.
ibid.

crux obsequij exhibiti ingra-
tis. 190

crux ægrotantium. 191
leuamen laborantis & ægro-
tantis. 192

gloriosum opus & corona. 193
Crucifixorum corona aurea &
aureola. 12

Crucis opus gloriosum. 23

Crux ægrotantium. 8.20.29.37.
55.63.73.83.91.100.110.119.

128.129.138.164.173.181.

191.200.209.217.228.229.

238.248.257.265.273.281.

289.297.305.313.323.333.

343.352.361.371.380.389.

397.405.416.426.433.441.

450.455.468.477.487.488.

495.504.511.512.520.

Crux afflictorum vndique. 322

amoris. 98

animæ curandæ. 350

attentionis sanctæ. 396

calumniæ. 162.163

candoris vitæ. 280

capitis regentis amissi. 216

Christum ferentis. 519

circumcisionis spiritualis. 440.

441

concupiscentiæ mundanæ. 424

Crux constantiæ magnæ. 236.237
corporis. 494

culturæ Sanctorum. 342

custodiæ Decalogi. 404

eviscerationis. 208

festinantium ad astra. 360

fraternitatis religiosæ. 370

fruitionis æternitatis dilataæ.

624

furorem humanum patientis.

432

habitus prauis. 264

hæreticos ferentis. 467

hominis patientis. 388

hominis religiosi. 332

humiliationis sanctæ. 18.19

ignobilitatis. 414

impietatis alienæ. 272

incentoris malorum. 296

innocentiæ. 502

iustitiæ. 288

laboris perpetui. 304

militiæ Christianæ. 226

morbi pro meritis acceptati.

153

mortalitatis humanæ. 82

mortificationis. 90

natiuitatis humanæ. 449

obdurationis alienæ. 36

obedientiæ. 8

obsequij ingratis exhibiti. 190

orationis. 510.511

patientiæ triumphantis. 136.

prolis amissæ. 540.541

regiminis Ecclesiæ. 72.

repulsæ dataæ. 476

resurrectionis mysticæ. 486

saluationis animæ. 256.

Crux.

INDEX R E R V M.

Crux scandali vitandi.	108.109
scientiæ Sanctorum.	62
senectutis.	54
seruitutis Christianæ.	172
seruitutis iniquæ.	312
Sociorum IESV.	458
status coniugalis.	614
status virginalis.	548.556.564. 572.580.589.596.604
supplicij acceptati.	152
suspensionis animæ.	379
timoris Domini.	180
transitus mundani.	126.127
tribunalis iniusti.	44
viduitatis.	624
vitæ humanæ.	246
voluntariæ sui ipsius oblationis.	28
voluptatis terrenæ.	198
zeli animarum.	118

D

S. D Amiani crucifixio.	189
eius sympathia cum Christo.	<i>ibid.</i>
crux obsequij ingratis exhibiti.	190
crux ægrotantium.	191
leuamen laborantis & ægrotantis.	192
gloriosum opus & corona.	193
SS. Decem Martyrum crucifixio.	403
eorum sympathia cum Christo.	<i>ibid.</i>
crux custodiæ Decalogi.	404
crux ægrotantium.	405
leuamen laborantis & ægro-	

tantis.	407
gloriosum opus & corona.	408
Diadema coniugij.	619
viduitatis.	632
SS. Diomedis & sociorum crucifixio.	377
eorum sympathia cum Christo.	378
crux suspensionis animæ.	379
crux ægrotantium.	380
leuamen laborantis & ægrotantis.	382
gloriosum opus & corona.	<i>ibid.</i>
S. Dionysij crucifixio.	61
eius sympathia cum Christo.	<i>ibid.</i>
crux scientiæ Sanctorum.	62
crux ægrotantis.	63
leuamen laborantis & ægrotantis.	65
gloriosum opus & corona.	<i>ibid.</i>
Discipulorum Petri & Pauli crucifixio.	161
eorum sympathia cum Christo.	<i>ibid.</i>
crux calumniæ.	162.163
crux ægrotantium.	164
leuamen laborantis & ægrotantis.	166
gloriosum opus & corona.	167
Dunstani Archiepiscopi morientis extrema verba.	462

E

S. E Lisabetha virgo, mystica Wilgephortis.	591
eius morientis extrema verba.	<i>ibid.</i>

Epipodij

INDEX RERVM.

Epipodij martyris morientis extrema verba. 203. 260. 268
 Eucharistia leuamen ægrotantis & Viaticum. 22
 Eugendi Abbatis morientis extrema verba. 86
 Eugenij Abbatis morientis extrema verba. 194
 S. Eulaliæ crucifixio. 563
 eius sympathia cum B. MARIA. 564
 crux status virginalis. *ibid.*
 speculum humanæ infirmitatis & patientiæ. 566
 leuamen colubæ gementis. 567
 S. Eutropij crucifixio. 423
 eius sympathia cum Christo. *ibid.*
 crux mundanæ concupiscentiæ. 424
 crux ægrotantium. 426
 leuamen laborantis & ægrotantis. 427
 gloriosum opus & corona. 428
 Exercitus decem millium crucifixio. 245
 eorum cum Christo sympathia. *ibid.*
 crux vitæ humanæ. 246
 crux ægrotantium. 248
 leuamen laborantis & ægrotantis. 250
 gloriosum opus & corona. 251

F

S. **F** Austi crucifixio. 287
 eius sympathia cum Christo. *ibid.*

crux iustitiæ. 288
 crux ægrotantis. 289
 leuamen laborantis & ægrotantis. 291
 gloriosum opus & corona. *ibid.*
 S. Febronix crucifixio. 547
 eius sympathia cum B. MARIA. 548
 crux status virginalis. *ibid.*
 speculum virginale Febronix. 549
 Fulgentij Ruspensis morientis extrema verba. 308. 567

G

G Alli Episcopi Auernorum morientis extrema verba. 444
 S. Gemelli crucifixio. 387
 eius sympathia cum Christo. *ibid.*
 crux hominis patientis. 388
 crux ægrotantis. 389
 leuamen laborantis & ægrotantis. 391
 gloriosum opus & corona. *ibid.*
 Gothardi morientis extrema verba. 365
 S. Gudiliæ crucifixio. 635
 eius sympathia cum Christo. 675
 crux splendida mortis iustorum. 637
 Guilielmi pueri crucifixio. 493
 eius sympathia cum Christo. *ibid.*
 crux corporis. 494
 crux ægrotantis. 495
 Rrrr le-

INDEX

leuamen laborantis & ægro-
tantis. 497

H

Heruli martyris morientis ex-
trema verba. 472

S. Hilarionis morientis extrema
verba. 186

S. Hiorami crucifixio. 447

eius sympathia cum Christo.
448

crux natiuitatis humanæ. 449

crux ægrotantis. 450

leuamen laborantis & ægro-
tantis. 452

gloriosum opus & corona. *ibid.*
453

Hugonis pueri crucifixio. 501

eius sympathia cum Christo.
ibid.

crux innocentiae. 502

crux ægrotantis. 504

leuamen laborantis & ægro-
tantis. 506

Humiliationis corona aurea. 23

eiusdem aureola. 24

I

SS. **I**ncognitorum crucifixio. 413

eorum sympathia cum
Christo. *ibid.*

crux ignobilitatis. 414

crux ægrotantium. 416

leuamen laborantis & ægro-
tantis. 417

gloriosum opus & corona. 418

Ioannis Aragonum Regis mo-
rientis extrema verba. 639

R E R V M.

Isabellæ Claræ Eugeniae Hispa-
niarum Infantis pietas ante
mortem. 544

S. Iuliæ virginis crucifixio. 571

eius sympathia cum B. MA-
RIA. 572

crux status virginalis. *ibid.*

speculum humanæ infirmira-
tis & patientiæ. 573

extrema verba morientis. 574

leuamen columbæ gementis.
575

S. Iuliani morientis extrema ver-
ba. 276

L

Latronis boni crucifixio. 151

eius sympathia cum Chri-
sto. *ibid.*

crux acceptati supplicij. 152

crux morbi pro meritis acce-
ptati. 153

leuamen laborantis & ægro-
tantis. 155

gloriosum opus & corona. 156

extrema verba morientis. 157

Laumari Abbatis morientis ex-
trema verba. 114

Laurentij Iustiniani morientis ex-
trema verba. 50. 284. 356. 420.
678

Laureola afflictionis omnimodæ.
328

attentionis. 400

calumniæ toleratæ. 167

candoris vitæ. 284

circumcisionis spiritalis. 444

concupiscentiæ denictæ. 428

Lau-

INDEX RERVM.

Laureola constantiæ.	241
criminationis toleratæ.	300
culturæ Sanctorum.	346
Decalogi.	409
festinantium ad astra.	365
furoris deuicti.	436
ignobilitatis.	419
ingratitude toleratæ.	194
habitus prauu deuicti.	268
hæreseos oppugnata.	471
humanitatis victæ.	453
iustitiæ.	292
laboris perpetui.	308
martyrij incruenti.	524
militiæ Christianæ.	231
mores prauos aliorum susti-	
nentis.	276
mortis oblata.	252
patientis.	392
pudoris victi.	212
repulsæ.	481
salutis animæ.	260.356
seruitutis iniquæ toleratæ.	318
sociorum Iesv.	462
supplicij tolerati.	157
timoris.	185
victoriæ gloriôsæ.	337
voluptatis victæ.	203
Leocadia, mystica Eulalia.	566
S. Leonis martyris morientis ex-	
trema verba.	168.212
S. Leontij crucifixio.	349
eius cum Christo sympathia.	
<i>ibid.</i>	
crux curandæ animæ.	350
crux ægrotantium.	352
leuamen laborantis & ægro-	
tantis.	354

gloriosum opus & corona.	355
S. Liberati Abbatis & sociorum	
crucifixio.	125
eorum sympathia cum Chri-	
sto.	<i>ibid.</i>
crux transitus mundani.	126.
	127
crux ægrotantium.	128.129
leuamen laborantis & ægro-	
tantis.	130
gloriosum opus & corona.	<i>ibid.</i>
	131
Longini morientis extrema ver-	
ba.	481
S. Lucelliani crucifixio.	263
eius sympathia cum Christo.	
<i>ibid.</i>	
crux prauu habitus.	264
crux ægrotantis.	265
leuamen laborantis & ægro-	
tantis.	267
gloriosum opus & corona.	<i>ibid.</i>
S. Lycarionis crucifixio.	255
eius sympathia cum Christo.	
<i>ibid.</i>	
crux saluationis animæ.	256
crux ægrotantis.	257
leuamen laborantis & ægro-	
tantis.	258
gloriosum opus & corona.	260

M

S. M Acarij Patriarchæ cru-	
cifixio.	81
eius sympathia cum Christo.	
<i>ibid.</i>	
crux mortalitatis humanæ.	82
crux ægrotantis.	83

INDEX R E R V M.

leuamen laborantis & ægro-
tantis. 85
gloriosum opus & corona. *ibid.*
Magdalenæ viduæ & sociarum
crucifixio. 623
crux viduitatis & dilata frui-
tionis. 624
speculum humanæ patientiæ.
626
leuamen columbæ gementis.
629
gloriosum opus & corona vi-
duitatis. 631
SS. Marci & Marciani & socio-
rum crucifixio. 235
eorum sympathia cum Chri-
sto. *ibid.*
crux magnæ constantiæ. 236.
237
crux ægotantium. 238
leuamen laborantis & ægro-
tantis. 239
gloriosum opus & corona. 240
S. Mariæ crucifixio compassionis.
531. 532
est mater morientium. 662.
663
S. Marini crucifixio. 431
eius cum Christo sympathia.
432
crux patientis humanum furo-
rem. *ibid.*
crux ægotantis. 433
leuamen laborantis & ægro-
tantis. 435
gloriosum opus & corona. 436
SS. Marthæ & Mariæ crucifixio.
595

earum sympathia cum B. Vir-
gine. 596
crux status virginalis. *ibid.*
speculum humanæ infirmita-
tis. 598
leuamen columbæ gementis.
599
S. Martini morientis extrema ver-
ba. 122. 328. 599. 629
S. Mauræ crucifixio. 613
crux status coniugalis. 614
speculum humanæ infirmita-
tis. 615
leuamen columbæ gementis.
617
gloriosum opus & corona. 618

N

S. **N**eonis crucifixio. 369
eius sympathia cum
Christo. *ibid.*
crux fraternitatis religiosæ. 370
crux ægotantium. 371
leuamen laborantis & ægro-
tantis. 372
gloriosum opus & corona. 373
S. Nestoris Episcopi crucifixio. 89
eius sympathia cum Christo.
ibid.
crux mortificationis. 90
crux ægotantis. 91
leuamen laborantis & ægro-
tantis. 93
gloriosum opus & corona. *ibid.*
extrema verba morientis. 94
S. Nicolai Tolentinatis morientis
extrema verba. 32

Obe-

INDEX R E R V M.

O

- O** Bedientia merces. 12
Oratio & confessio ritè dis-
ponunt ad mortem. 649.650.
651.652.653

P

- S. P**aphnutij Abbatis crucifi-
xio. 135
eius sympathia cum Christo.
ibid.
crux patientia triumphatis. 136
excitatio laborantis. 137
crux agrotantis. 138
leuamen laborantis & agro-
tantis. 139
gloriosum opus & corona. 141
S. Patrocli martyris morientis ex-
trema verba. 292
S. Pauli morientis extrema verba.
67
Pauli morientis extrema verba.
276
S. Petri crucifixio qualis. 17
crux sanctæ humiliationis. 18.
19
crux agrotantis. 20
instrumentum artis benè mo-
riendi. *ibid.*
excitatio agrotantis. 21
leuamen laborantis & agro-
tantis. 22
eius morientis extrema verba.
24
S. Petri Balsami crucifixio. 331
eius sympathia cum Christo.
ibid.

- cux hominis religiosi. 332
crux agrotantis. 333
leuamen laborantis & agro-
tantis. 335
gloriosum opus & corona. 336
S. Petri Damasceni crucifixio. 107
eius sympathia cum Christo.
108
crux scandali vitandi. *ibid.* 109
crux agrotantis. 110
leuamen laborantis & agro-
tantis. 111
gloriosum opus & corona. 112
Petri Helcij crucifixio. 475
eius sympathia cum Christo.
476
crux datæ repulsæ. *ibid.*
crux agrotantis. 477
leuamen laborantis & agro-
tantis. 479
gloriosum opus & corona. 480
S. Philemonis crucifixio. 395
eius sympathia cum Christo.
ibid.
crux sanctæ attentionis. 396
crux agrotantis. 397
leuamen laborantis & agro-
tantis. 399
gloriosum opus & corona. 400
S. Philippi crucifixio. 35
eius sympathia cum Christo.
ibid.
eius crux obdurationis alienæ.
36
crux agrotantis. *ibid.* 37
leuamen laborantis & agro-
tantis. 38
eius opus gloriosum. 39
Rrrr 3 **S. Pio-**

INDEX

- S. Pionij Presbyteri crucifixio. 295
 eius sympathia cum Christo. *ibid.*
 crux inceptoris malorum. 296
 crux agrotantis. 297
 leuamen laborantis & agrotantis. 298
 gloriosum opus & corona. 299
 extrema verba morientis. 300
 S. Platonis martyris morientis extrema verba. 400
 S. Polycarpi morientis extrema verba. 409
 S. Pontiani morientis extrema verba. 78
 Prosperi Aquitanici morientis extrema verba. 338

R

- R** Emisso iniuriarum dispositio bona ad mortem. 644.
 645. 646. 647. 648.
 Richardi Episcopi Cicestrensis morientis ultima verba. 252.
 454
 S. Richardi pueri crucifixio. 509
 eius sympathia cum Christo. 510.
 crux orationis. 510. 511
 crux agrotantis. *ibid.* 512
 leuamen laborantis & agrotantis. 513

S

- S** Acerdotis crucifixio. 465
 eius sympathia cum Christo. 466

R E R V M.

- crux ferentis hæreticos. 467
 crux agrotantis. 468
 leuamen laborantis & agrotantis. 470
 gloriosum opus & corona. 471
 Sacra hostia leuamen crucis & passionis. 521. 522
 SS. Scillitanorum crucifixio. 321
 eorum sympathia cum Christo. *ibid.*
 crux vndique afflictorum. 322
 crux agrotantium. 323
 leuamen laborantis & agrotantis. 325
 gloriosum opus & corona. 327
 S. Siméonis morientis extrema verba. 176
 S. Simeonis crucifixio. 53
 eius sympathia cum Christo. *ibid.*
 crux senectutis. 54
 crux agrotantis. 55
 leuamen laborantis & agrotantis. 56
 opus gloriosum. 57
 S. Simonis pueri crucifixio. 485
 eius sympathia cum Christo. *ibid.*
 crux mysticæ resurrectionis. 486
 crux agrotantis. 487. 488
 leuamen laborantis & agrotantis. 489
 Sitis Christi in morte. 664
 Sitis immortalitatis. *ibid.*
 S. Sixti Pontificis crucifixio. 71
 eius sympathia cum Christo. 72
 crux

INDEX R E R V M.

crux regiminis Ecclesiæ. *ibid.*
 crux ægrotantis. 73
 leuamen laborantis & ægro-
 tantis. 75
 gloriosum opus & corona. 76
 Speculum Marianum, speculum
 humanæ infirmitatis & patien-
 tiæ. 533. 534
 Speculum Theocliæ, speculum
 infirmitatis & patientiæ. 542
 S. Stephani morientis extrema
 verba. 40

T

SS. **T** Arbulae & sociarum eru-
 cifixio. 603
 earum sympathia cum B. MA-
 RIA. 604
 crux status virginalis. *ibid.*
 speculum humanæ fragilitatis.
 605
 leuamen columbæ gementis.
 607
 S. Thali crucifixio. 341
 eius sympathia cum Christo.
 342
 crux culturæ Sanctorum. *ibid.*
 crux ægrotantium. 343
 leuamen laborantis & ægro-
 tantis. 345
 gloriosum opus & corona. 346
 Theocliæ crucifixio. 539
 eius sympathia cum S. MA-
 RIA. 540
 crux charæ prolis amissæ. *ibid.*
 541
 S. Theodori Ducis crucifixio.
 215

eius sympathia cum Christo.
 216
 crux amissi capitis regentis.
ibid.
 crux ægrotantis. 217
 leuamen laborantis & ægro-
 tantis. 219
 gloriosum opus & corona. 220
 extrema verba morientis. 222
 S. Theodori militis crucifixio.
 225
 eius sympathia cum Christo.
ibid.
 crux militiæ Christianæ. 226
 crux ægrotantis. 228. 229
 leuamen laborantis & ægro-
 tantis. 230
 gloriosum opus & corona. *ibid.*
 231
 S. Theoduli crucifixio. 311
 eius sympathia cum Christo.
ibid.
 crux iniquæ seruitutis. 312
 crux ægrotantis. 313
 leuamen laborantis & ægro-
 tantis. 315
 gloriosum opus & corona. 316
 extrema verba morientis. 318
 S. Theophimi crucifixio. 341
 eius sympathia cum Christo.
 342
 crux culturæ Sanctorum. *ibid.*
 crux ægrotantium. 343
 leuamen laborantis & ægro-
 tantis. 345
 gloriosum opus & corona. 346
 S. Timonis Diaconi crucifixio.
 279
 eius

INDEX R E R V M.

eius sympathia cum Christo.	280	Elisabethæ virginis.	591
crux candoris vitæ.	<i>ibid.</i>	Epipodij.	203.260.268
crux ægrotantis.	281	Eugendi Abbatis.	86
leuamen laborantis & ægro-		Eugenij Abbatis.	194
tantis.	283	Fulgentij Ruspensis.	308.567
gloriosum opus & corona.	<i>ibid.</i>	Galli Episcopi.	444
S. Timothei crucifixio.	613	Gothardi.	365
crux status coniugalis.	614	Heruli martyris.	472
speculum humanæ infirmita-		Hilarionis.	186
tis.	615	Ioannis Aragonum Regis.	639
leuamen columbæ gementis.		Iuliani.	276
617		Laumari Abbatis.	114
gloriosum opus & corona.	618	Laurentij Iustiniani.	50.284.
		356.420.678.	
V		Leonis martyris.	168.212
S. V Enantij crucifixio.	271	Longini.	481
eius sympathia cum		Martini.	122.308.599.629
Christo.	<i>ibid.</i>	Nicolai Tolentinatis.	32
crux alienæ impietatis.	272	Patrocli.	292
crux ægrotantis.	273	Pauli Apostoli.	67
leuamen laborantis & ægro-		Pauli alterius.	276
tantis.	275	Petri Apostoli.	24
gloriosum opus & corona.	276	Platonis martyris.	400
Verba extrema morientium:		Polycarpi.	409
Adelhardi.	132	Pontiani.	78
Agathæ.	620	Prosperi Aquitanici.	338
Agnetis.	610	Richardi Episcopi.	252.454
Ambrosij.	242.607	Simconis.	176
Antonij.	374.384	Stephani.	40
Antonini Florentini.	234	Wolfgangi Episcopi.	639
Austreberthæ.	104	S. Vincentij crucifixio.	197
Basilisci.	143	eius sympathia cum Christo.	
Benedictæ.	583	198	
Calliopij.	428.436	crux terrenæ voluptatis.	<i>ibid.</i>
Carilephi.	346.392	crux ægrotantis.	200
Claræ.	550	leuamen laborantis & ægro-	
Dunstani.	462	tantis.	201
		gloriosum opus & corona.	202
		S. Vitalis	

INDEX R E R V M.

S. Vitalis crucifixio. 171
 eius sympathia cum Christo.
ibid.
 crux seruitutis Christianæ. 172
 crux ægrotantis. 173
 leuamen laborantis & ægro-
 tantis. 175
 gloriosum opus & corona. 176
 S. Wilgephortis virginis crucifi-
 xio. 587
 eius sympathia cum B. MA-
 RIA. 588
 crux status virginalis. 589
 speculum humanæ infirmita-
 tis. 590

leuamen columbæ gementis.
 592
 S. Wolfangi Præfulis morientis
 extrema verba. 639

Z

S. **Z** Otici & discipulorum cru-
 cifixio. 359
 eorum sympathia cum Chri-
 sto. *ibid.*
 crux festinantium ad astra. 360
 crux ægrotantium. 361
 leuamen laborantis & ægro-
 tantis. 363
 gloriosum opus & corona. 364



ssrr

SVM-

SVMMA PRIVILEGII CÆSAREI.

FERDINANDI II. Diuina fauente clementia electi Romanorum Imperatoris semper Augusti Diplomate cautum est; nequis intra Romani Imperij & Regnorum ac Dominiorum suorum hereditariorum fines, Societatis IESV Patrum Opera citra consensum eorundem Patrum & Auctorum desuper obtentorum imprimere, vel recudere, aut alibi recusa inferre aut vendere præsumat. Qui secùs faxit, præter Librorum omnium confiscationem, viginti marcharum auri puri pœnâ mulctabitur, vti latiùs patet ex Diplomate dato Vienna die IV. Augusti, M. DC. XXVI.

FERDINANDVS.

Petrus Henricus à Stralendorff.

*Ad mandatum Sac. Maiestatis proprium,
Hermanus à Questenbergh.*

FACVLTA R. P. PROVINCIALIS.

Cvm sacrum Sanctuarium Crucis & Patientie Crucifixorum & Cruciferorum, Emblematicis Imaginibus laborantium & egrotantium ornatum, Auctore R. P. Petro Biuero Societatis nostræ Theologo, & Serenissimorum Belgij Principum Concionatore, tres Societatis nostræ Theologi, quibus id commissum fuit, lustrauerint, & in lucem edi posse probauerint, pro potestate mihi facta ab admodum R. P. N. Mutio Vitellesco Societatis nostræ Præposito Generali, concedo vt typis diuulgetur; & iuxta Priuilegium Cæsareum Societati nostræ concessum, soli Balthasari Moreto idem imprimere ac recudere liceat. In cuius rei fidem hæc manu meâ subscripsi, & officij mei sigillo munitas dedi Bruxellis v. Decembris, M. DC. XXXIII.

Guilielmus de VVael.

SVM-

SVMMA PRIVILEGII REGIS CATHOLICI.

PHILIPPVS IV. Hispaniarum & Indiarum Rex Catholicus ac Potentiſſimus Belgarum & Burgundionum Princeps, Diplomate ſuo ſanxit, nequis ſacrum Sanctuarium Crucis & Patientiæ Crucifixorum & Cruciferorum, Emblematicis Imaginibus laborantium & ægrotantium ornatum, Auctore R. P. Petro Biuero Matritenſi Societatis IEſv Theologo, & Sereniſſimorum Belgij Principum Concionatore, præter Balthaſaris Moreti voluntatem ullo modo intra ſeptennium imprimat, aut alibi terrarum impreſſum in has Inferioris Germaniæ ditiones importet, venalēve habeat. Qui ſecus faxit, conſiſcatione Librorum & aliâ graui pænâ mulctabitur, vti latiùs patet in litteris datis Bruxellæ XVI. Septembris, M. DC. XXXII.

Signat.

Steenhuyſe.

APPROBATIO CENSORIS.

Sacrum Sanctuarium Crucis & Patientiæ Crucifixorum & Cruciferorum, Auctore R. P. Petro Biuero Societatis IEſv Theologo, non minùs ſacrorum Patrum testimoniis quàm imaginibus ornatum eſt, ad conſolationem laborantium & ægrotantium; ac proinde prælo ac luce digniſſimum eſſe iudico.


Gaspar Elſtrix Canonicus & Plebanus
Antuerp. ac Librorum Cenſor.

ANTVERPIÆ,
EX OFFICINA PLANTINIANA
BALTHASARIS MORETI.

M. DC. XXXIV.







D 55/22/15778

